

Х. А В Ш А Л У М О В



**Э ХЭТОЙ ЭН  
Е МОЧ**



С (ТАТ)  
А 22

Художник  
Л. БРУЗГИН

$\frac{7-3-3}{70}$

# Новеллего



**Е**гиле Шими Дербенди э кул хэр хуышде веноре омурдебу э базар эз хьээт хуышде веровунде хиёр-помодур эри фурухде. Э куындигьой базар оморе раси-реки, Шими фурамо эз кул хэр, берд уре э ки эн е дор, бесд э расеревоз.

— Эй Дуразе гушгьо! мугу Шими эз хэр хуышде, — Бебегьо несиг'эт нори: «ебо жилов эн хэре бесд, песде уре э худо тапшуърмиш сох», — э хоширевоз зере эз лэгъэре кефел эн хэр, гуфди Шими. — Ме эдее э базар рафденуым, те ме оморе туьре эдее э худо тапшуърмиш сохденуым. Оммо воро те ме эз базар вогошде эз обур-сабуър ведерафде, хэр-хэре коргьо сохи, — о!

Хуышдере дуъл олхогъини доре Шими Дербенди, веноре севере э кул, оморени э базар. Гиросдени е се-чор сэг'эт те Шими хиёр-помодур хуышдере фурухде верасде. Песде видов-видов оморени э ки эн у дор, эжеки у хэр хуышдере бесдебу. Шими миденишуъ мивинуъ хэр веди нисд. У омбор мэхътел мунд, дуълпесо бисдо, хэре э жигъею неофденге. Гъич сирогъгьой эн хэриш э е жигеш веди небу.

Шими дуълхуърд, сер дуллу бире нуышд э сер эн е сенгъ, сер гуърд эри фикир сохде: чуъ бириге и хэре?

— Гуърг чум руз эз више оморе, э пушой эн ингъаде хэлгъ, хэре нихуру, ниберуъ, — думит сохд эри хуышде Шими. — Не е доне одомиш темэхъ сохде и хэре ниберуъ, бологъ э сер хуышде, чуьнки хэр лэгъэри жонсуъзи, е пусд е осгъуни.

Гене Шими фикир сохде эри хуышде, гуфдирени:

— Хуб, гуюм и хэре гуърг нехурди, одоми — неберди. Дие чуъ бири и хэре?

Эхириш Шими хэйли фикир сохде бэгъдо, э сер оф-дорени: хэр юре худо веберди э ки хуыште, чуьнки у э базар рафденге, хэре э худо тапшуърмиш охдебу. ЕгӀни, белки худо э кешире жофогъо, зэхьметгъой эн хэр ю езугъ берде, эз хотур э гиснеи-тешнеи сабуър дошдеи эн у веберди уре э асму э ки хуыште.

Шими эри хуыште фикир сохдени, худо э хэр энү ижире гӀуьзет сохде бэгъдо, юш биё э хэржи-вержи неденишире, овил гуъруь эри хэр хуыште. Огол зенуь жэгӀмете, рабире, дегъ мерд кура соху, гъэдиш зенуь эри энү, нешумой хэр э генгӀидин гъисмет бу гуфдире,

Эз хиёр-помодур фурухде пулгъо Шими восдорени шороб, гушд, савзи, овурдени э хуне. Песде рафдени э ки эн раби, гуфдирени:

— Э раби, гӀуьмуьртуь дураз гердо, эн ме е куьнде одоми ме муърди э чул, э гъэриби, биё эри энү е гъэдиш зе, муьзд туьре ме мидуьм, чендгъэдеш хосдиге.

— Хуб ме гъейсэгӀэт миём,— жугъоб дорени раби. — Те ме оmore, туь бура ебо е дегъ мерде кура сох эри нумаз хунде.

Шими оморени э хуне, кура сохдени мердгъоре, зенгъоре.

Раби оморенге, шумордени, мивинуь нуьгъ мерд зиёдте кура небири.

— Бура е мердигеш оф биёр эз чуьжо бисдогеш,— мугу раби эз Шими.

— Э раби,— мугу Шими,— ме э гъеммей мэхъэле дерафдем хуне-бехуне. Гъер мерд э кор хуышдеи, эзи нуьгъ мерд бэгъэй одоми неофдем. Бигъил э жигей эн дегъимуьн одоми зен ме бугу. Зен ме омбор хубе, хъэло-ле одомини. Гогъ-бой у мара хуно бед, зобу биренигеш, э кесевоз нисе бире, э меревоз бире. Зугъун энү эриме тэхълиге, эри кес гӀэсел не шелбете хунои...

— НэгӀ,— мугу раби,— дегъимуьн мерде офде гереки, небуге нумаз хунде гӀэмел ниёв.

Шими домунд э хуыште.

— Э раби, гъодоволим,— минет сохде, гуфди Шими.— Эгенер зенме жигей е мерде «э дегъ мерд» гуърде нисе дануьсдеге, белки келе зен — холейму, жовоне хэгъерме эеки жигей эн е мерде семе гуърде дануьсдуьт?

Раби гӀюси бире, чумгъоре келе сохде дениши э Шими.

— Погъ! Чуь тэгӀэле одомини туь, эде? Эдее гуфди-

ренуым э туь: не зен туь, не гъэрие холейтуь, не жовоне хэгьртуь, гьемме зенгьой шегьериш кура бире оморот-ге инжо, угьо жигей е мерде э дегь мерд гуьрде нида-нуьт, гIэмел нисе оmore. Туройму зене, денилере одоми хьисоб нисе сохде, оммо иму, гьер мерд бэхш эн ху-доим.

Чорей шими небисдо, ведарафд э куче-мэхьэле «бэхш худоре» — дегьимуьн мерде эри гешде, офде. Бирден мивинуь, э куче, э ён диш нуьшди килэхьэ норе э пушой хуьшде эри эз оmore-гирошдегор пул хосде е пиёне вечи-вечи. Сер эню кечел бу, е чум ю кур бу, ке-мер ю бонгъуз бу, эн девере хуно, е луьнги юш кутэхь бу. Оммо Шими уре диренки омбор шор бисдо, гуйге эр-шефи суьрхи офдиге. Энжэгъ э сер-сифет эню денишире диренге, е кем э дуьл Шими шек оmoreере хуно бисдо. Э сер эни бинехури-бирачигьой эню, уьсделуьге, э сифет эн бонгъуз е доне муиш невебу, сифет ю сифет эн зене хуно муйсуьз бу.

— Эй дусд! — э хоширевоз гуфди Шими эз бонгъуз, — гIэйб месох, гу: туь зени небуге мерди? Эдее дире-нуым э тентуь парталгьой мердуне вери, оммо э чуней-туь е доне муйлеш невери. И чуй кори?

Бонгъузе омбар гъэгьр омо эз Шими, муйсуьзе си-фет ю гьирмизи бисдо эз хуьрш дуьл ю.

— Эгенер туьре е шогьи е аббаси доре ниевоисдеге мере, енебуге нисдиге туьре эри доре, бигьил бура и рэхьтуьре, э ме руьхшенд эри чуй сохде туь, мере зен гуфдире? — туьндлемиш бире гуфди бонгъуз — Ме зен нисдуьм, мердуьм, энжэгъ кусеюм.

— Огь! Гьечу буге, жунме туь, жигерме туь възиз бурайм э меревоз э хунейму, — шор бире, гуфди Шими. — Э «дегьмерд», эри нумаз хунде, е мерд, е туьчуьни «бэхш эн худо» вес нисе сохде. Эгенер туь оmoreиге, ме туьре хуб михорунум, гушд, шороб мидуьм, те шуь-гьэмтуь э буз туь вероморе.

Бонгъуз гье у сэгIэт възухьшд, песеде гене дуборе нуьшд э жигей хуьшде.

— Мере э кул туь веноре бердиге, — мугу у эз Ши-ми, — ме разинуьм эри оmore, небуге гIуьлом омогеш, келебешмуш эз гьовре възухьшде омогеш, ме эз жигей-ме нижуьмуьм.

Чорей эн Шими небисдо, вено бонгъузе э кемер хуьшде, берд э хуне.

Бонгъуз оморенге, раби сер гуьрд эй нумаз хунде, нешумой эн муьрде э генгИдин бурав гуфдире. Бонгъуз гьетте э сер суьфре нунгьо, гушдгьо, шоробгьо ве савзигьоре дире, те нумаз верасде тоб недоре, сер гуьрд зуризури, гиснемуьрде хуно тикегьой гушде фуберде, шороб хурд.

Э вэхд нумаз хундеки, раби огол зе Шимире, чуйтам гIэдот гьисдиге, пуьрси евошлей нум эн муьрдере, э пушой худо нум энуре эри гуьрде.

— Кини нум эн монухьо биригьо одомитуй? — пуьрси раби.

— Нум энуй? Уре нум бу Дуразе Гушгьо, — э олхогьиниревоз жугьоб до Шими.

Раби, чумгьоре буьхь сохде, дениши э Шими.

ГIэйл мебош, ижире нум е одомиреш небири. Белки у нум нисди, лэгъэми. Гу нум энуй чуйниге?

— Э раби, ме недануьсденге, дие ки дануьсде, монухьоту ковуд хэрмере чуй нум буге?

Раби перт бисдо мунд и гофгьоре шиновусденге. Песде е хьэрой вегуьрд э сер эн Шими, гуфди:

— Песг туь и дегь мерде эри эни кор кура сохдей, мере эри хэртуь огол зерей нумаз эри хунде? Туьре гIэйб нисе оморе рошогI, утанмез, туь эз худойтуь нисе терсире? Туь эже дирей эри хэр «дегь мерд» кура соху, овил гуьруь, гъэдиш зенуь?..

Шимиш гъэгьр сохде, гIоси бире гуфди:

— Хэр ме хэр бугеш, е саламете, е езугъэ, е фэгьире нешумо бу. Оммо у ижире делуье мувэхьсуьзе хэр небу, комики гуфдирени, ки имуре зендигьо зенгьо, шир доретгьо, келе сохдетгьо — одоми нисдуьт, гуйге гьемей эни зенгьо нисе верзире э е ижире nebude, бонгузе пиёнискее мердиш, — Шими и гофе гуфдиреки, гъэгьр хуьшдере ведешенде, э зарбевоз е тепуьк зе эз кемер эн бонгъуз, комики, э иловле неденишире, шоробгьо-гушдгьоре суьпермиш сохдембугьо.

## **БЭХШ ЭН ШИМИ ЭРИ ЗЕН ХУЬШДЕ**

Хосиетгьой эн зен Шими Дербенди оморе-оморе эдембу бед бире. У келе зен биреки лап зобу, лэгълэгь,

гъуьд-гъуьд биребу. Сер-гуш эн косибе шувверхуьшдере гье эдембу берде. ЛэгГэй ю керг эн гъуьртире хуно гьич сокит небу. Шими визор-гизор бу эз лэгъ-лэгъи, муьр-муьр сохдей эн зен хуьшде.

— Эй зен, биё туь ингъаде лэгъ-лэгъ, бед мебош,— ченд гиле, минет сохде, гуфдирембу э у Шими,— имуре гьейсэгГэт, худоре шуькуьр, нун иму гьисди, сер-тен иму гьисди, у четине вэхдгьойму гирошди. ГГэйилгьош келе бирет, э метлеб ишу расирет. Дие чуй воисде туьре. Иму имогьой келе мердгьо, келе зенгьоим. Э жигей гъадуьр екире дануьсде, туь эдее руз имуре сиегъ сохде.

Гофгьой эн Шими эз е гуш зен ю дарафдембу эз у гушгье ведироморе: гуфдире гофгьо, несигГэтгьой Шими э у кори нисе сохдембу.

Е гиле Шими согъ орине э дуре богъгьой эн колхози кор сохдебу, унегуьре шевгьо унжо хисирембу. Бэгъдовой е оринейге Шими э хуне вогошденге, гьетте эз дер дироморе э хуне, зен энэ э жигей шуввере диренге шори сохде, сер гуьрд гене эй хъэлово бире э жун энэ:

— Эй зен чуй бири гене туьре, коми гГэнг, эбрэгъ гезири туьре? Ме гьеле бегъем эз дер недироморем, туь гене э ехэнме хъэлово бирей, лэгГэ вокурдей. Чуй воисде эхи туьре гене эз ме?

Охмури, серкуши эн Шими диеш зиьдте хъуьршгьой эн зене веровунд.

— Эй мерд, гьич туьре номус-гъирыет гьисди, фикир-гъэйгъуй эн зен гуьрди? Ме себэхъ офдоре муьрдуьмге, гГэйбиш бу гуфдире, эз туь е вор рафдере хунош нибу...

— Э балам, негуи чуй бириге, чуй воисдеге туьре эз ме,— хъэрой сохде, гуфди Шими.

— Мере эз туь чуй воисде? Себэхъ си сали ме, и гъэребэхде серме, офдорем э зенжил туь, э туь э шуввер оморем. Де мердиге зен хуьшдере хоюгьо, гьимиш сохуьго, хъуьрмет юре гируьгьо эзини рузе мигГид мисоху, эри зен хуьшде е хубе бэхш мосдону. Оммо гьич э ёргьо-хъёлгьойтуьш недери себэхъ и си сали и сенгъэ-соре, муйбура серме зентуь бирей, э дес чуьтуьни сурул, гъэдуьр недан, биинсоф офдореи.

Шими Дербенди гье усэгГэт хэндуьсде, хоши гуьрде зен хуьшдере, гуфди:

— Ой зен, туьре воюгьо бэхш, э сер дуй чум эн Шими. Э жун бебейтуь, ме гьейсэгГэт мирам гьеме мага-



зингьой Дербенде мигешдуым, те ме эри туь эз дуьлиме небугьо бэхше неофум, ме э и хуне нивогордум. У бэхше, комиреки мере воисдени эри туь эри восдоре, эз суьрхиш бисдоге, ме пул гьимиш нисохум, ёгьин мосдонум.

Зен омбор шор бисдо. Чи до шуьвер хуьшдере, тимор сохд ведефуьрсо э куче. Шими э хуне вогошд лап шохьонгум, е келе парс гуьрде гурунде килит э дес дери. У вомундебу, оммо ловгьой ю э шоре хэнде вебу.

— Э мерд, туь мунош, и чуйни? — гогь э шуьвер хуьшде денишире, гогь э килит, пуьрси зен.

— Чуьтам чуйни? Ме эз хуне ведарафденге, — мугу Шими эз зен хуьшде, — туьре гоф недоредуьруьм, ки ме эз дуьлиме гьисдигьо бэхше эри восдоре эри туь? Инией, омурдем эри туь у бэхше, — килите жумунде э пушой чумгьой эн зен хуьшде гуфди Шими, — оммо э жунтуь зен, бовор сох, э келе гужгьо, зэхьметгьоревоз офдем и килите. Гешдем гьеммей шегьере, магазингьоре, э е жигеш ижире мере воисде келе килит неофдуьм. Песде неденишире э хэсдеи, келе мердиме, э жун туь зен, э хотур туь, вэхуьшдем верафдем е сер э гьэле. Ун-жо эз гьопуй эн гьэлей Дербенд, пушотегьо хон зигьисдембугьо жиге, э гужевоз векендем омурдем и килите.

— Эй мерд, туь жингир бирей? Мере килит эри чуйни, уш чуй килит, — э мерд шефд денишире, гуфди зен.

— Туь жун гьовре хуней бебейтуь, зен, — э минетевоз гуфди Шими Дербенди, — э рузию е-дуь сэгIэтле се-ме э у зугьунлей туь вени и килите, лэгIэлейтуьре ги и езугьэ сермере динж, саламет бигьил.

## ЧУЪТАМ ШИМИ Э ХУНЕЙ ДОМОР ХУЪШДЕ РАФДЕБУГЕ

Духдер эн Шими Дербенди э е колхозник э шуьвер бу. У э дигь зигьисдембу.

Е гиле Шими не зен ю бэхшгьо, гьэнфитгьо восдоре, э туморе доноре, рафденуьт э дигь, эри э духдер хуьшде сер кешире, невегьоре дире. Э куьндигьой эн дигь е туьнде чой бу. Шоволгьой ю тар небу гуфдире Шими

Дербенди, шоволе эз пой векенде, донорени э гьултугъ, песде дерафдени э гъэд эн гIов. Оммо гъэдой нэхьс, э минжи эн чой пой Шими суьрт рафде, у офдорени. Те Шими э пой вэхуьшде, гIов бердени шовол энуре. Шими мундени шоволбирэхьне, нисе дануьсде чуй сохуге. Бирден э ёр энурени, ки э туморе э кул зен веригьо, э гъэд эн бэхшгьо, тозе поже, тозе сердеги не булши зен ю дери.

Шими мугу эз зен хуьшде:

— Эй зен, ме дуй сале гIэиле хуно, пой-бирэхьне, шовол-бирэхьне, э и рушевоз э дигь кес, э пушой эни хэлгь оmore нидануьм. Ведеше эз туморе пожейтуьре, вокунум э жигей эн шоволме. Гъэйгьу нибу: пожейтуьре э вокурдеки ме те кишдибэнд пушотеинере хуно э хуьшдени хуьшденме ухшеш мизенуьм, эз кишдибэнд зофру э туь.

— Эй мерд,— мугу зен Шими,— туьре хэлгь диге гьечи, гьеме э туь михэндуьт. Туьре эри кес нешинох-деи, хубтеи неки пожеймере, булшимереш воку э тен-туь, сефгимереш деги э сертуь.

— НэгI! Худо мегуё! — терсирере хуно, гуфди Шими Дербенди.— У вэхди ме эслогь э туь ухшеш мизенуьм. Дире-вохурдегор гьелбет нидануь ме зен нисдуьм, мердуьм гуфдире. Оммо эз худо чуьтам пэхьни сохум и коре. У гьемере дирени, дануьсдени. Мере э пушой худо уьзуйгьэре, дургу, шефд ведироморе нисе воисде.

Зен омбар мэхьтел мунд, гофгьой эн Шимире шинире, мугу:

— Эй мерд, худолугь чуй кори инжо?

— Чуьтам чуй кори? — гIоси бире, гуфди Шими,— ме гьер себэхь э пушой худо э нумаз хундеки, гуфдиренуьм: «Шуькуьр э нум туь, огьойму худо, офирегор эни гIуьлом, туь мере зен хьэсуьл неовурдей». Имогьой ме парталгьой зени вокурдумге, ме э пушой энур дургу, шефд ведироморере хуно биренуьм. Эз товун эни кор ме терсиренуьм у эз ме гъэгьри бире, вегирде мере э зен нечаруну. Чуй жире бираче зен эз ме медировге туь хуьшденитуй дануьсденики. Е небуде мердиш мере эри хуьшде э зениети нивегируь, уш э ижире салгьойме. НэгI, зен, ме поком инжо э гьирогь чой, туь бура э дигь, веги шовол домормере биёр эриме, песде бурам э дигь. Де чорейге нисди. Эйчуй хуьшдере э негьогь э хэто-бологь дешенуьм.

## ХЭР ЭН РАБИ

Егиле Шими Дербенди э хуне э рафдеки, раби эн нумаз омо вохурд э у э куче, пушой юре гуьрд.

— Ой Шими, туь имогьой келе мерди, руш сипи сохдей, эз нумаз дес вегирдей. Ме туьре хэйли вэгдош гьисди э нумаз нисе диренуьм. И хубе кор нисди.— Раби лове э руьхшенди хэнде веберде, гуфди гене: — Небуге туь э пире вэхд туь комсомол бирей, э худо бовор нисе сохде?

— Э жунтуь, раби, комсомоллугь кор нисди инжо, эз хэр мере э више гуьрггьо хурде эйло э чумме не худом, не бенде,— э вогънеки мугу Шими, раби дес кенуь бурав гуфдире эз сер ю.

— Эй Шими гьечи кор гьэмел ниёв. Дуразруйтуь, одомигьо офдоре муьрде,— мугу раби,— бегем хэр муьруь гуфдире, одоми гьечиш туьре хуно эз дин-имон миведарав?

— Хэрме у туь гуфдире хэргьо небу, омбар перголлуь хэр бу,— мугу Шими, ох кешире.

Раби Шимире э лой нумаз эй кешире мугу эз у:

— Эй Шими, туь мунош мере е хэр гьисди, э е хубе гьэсб миверзуь. Туь е-дуь мегь семе гьэре недоре, биё бура э нумаз, худойтуьре гьуллугь сох, ме хэрме туьре мибэхшуьм.

Шими рази бисдо. Дуь мегь у омо рафд э нумаз. Э вэхд ю э руз ю се гиле нумаз хунд, шобот мигид хуьшдере гуьрд. Дуь мегь верасде мунде, омо э ки раби, мугу:

— Ме и дуь мегь э гофтуь денишире, гьер руз оmore, нумаз хундем, э гьихэл сер зерем, имогьой туьш, жон раби, гоф туьре э жиге биёр, хэртуьре ди мере. У мере гереки эри э богь рафд-оморе.

Раби гуфдире гофгьой хуьшдере хьэшо зере, мугу эз Шими:

— Эде, туьре гьэйб нисе оmore э и келе мердитуьре-воз эз ме ижире бидэгьэти гофгьо гуфдирени?! Туь эри-туь, эри жунтуь, нешумойтуь, гьуьломгьобойтуь оmore-рафдей э нумаз, ме хэр мере эричуь биё дуьм туьре эри эни кор?

Шими э охмури не руьхшендиревоз денишире э раби, мугу:

— Эй раби, эй хьилле, ме дануьсдембируьм туь

хэртуь мере нидигьоре, унегуьре меш у нумазгьоре  
когъли-когъли, е жигеймере хорусде-хорусде хундем-  
бируьм.

## ХУНДЕГОР БИРЕ АСАНТИ, ОДОМИ БИРЕ ЧЕТИН

Е гиле э гуш Шими дерафд филонкес хундегор бири  
гуфдире. Уре эз хотур эни кор дипломиш дори. Шими  
и гофе шиновусде мунде, дуьл ю гъэреболугъэ хуно бис-  
до. Шими хуб дануьсдембу у одомире, у э гъуншигъой  
ю добу. У келегед бу, лэгъ-лэгъ бу, менуьм-менуьм бу.

— Хъэйф, те егиле уре хундегор сохде, миёсде уре  
одоми сохде: хундегор бире асанти, одоми бире четин,  
— мугу Шими Дербенди.

## ДУЬЛ

Зен эн Шими Дербенди эдембу э базар рафде эри  
гушд восдоре. Пушой э базар рафде у пуьрси эз мерд  
хуьшде, чуй гушд восдонуге.

— Е дуьл эн гусбенди, енебуге эн говире восдо биёр,  
— мугу Шими эз зен хуьшде.

Зен омбар мэхьтел мунд. Чуйнки песини вэхдгьо  
сери ебо у э базар рафде, Шими гьемише э у гъэдэгъэ  
зерембу у дуьл восдожу биёру гуфдире.

— Эй мерд! — мугу зен, — туь эзи гушд эн дуьлире  
хурде визор неоморей беге. Туьре ингъэде э дуьл темэхь  
эри чуйни эхи?

— Темэхьлугъи инжо кор нисди, — мугу Шими эз  
зен хуьшде. — Туь э гофгьо, гъуьд-гъуьдигъой туьревоз  
ингъэде дуьлмере хурдей, э ме дуьл недомунди. Ме  
у гушд дуьлире хурденуьм дуьлмере екем гуьруьм  
гуфдире.

## ЧУЪТАМ ШИМИ ДЕРБЕНДИ МУЪРДЕБУГЕ

Е гиле Шими Дербенди эз дес эн зен хуьшде визор оmore, хуьшдере э муърдеки веноре, себэхьмунде эз хьэлов невахуьшд. Зен чендгъэде огол зе, шувунд Шимири, оммо у чум невокурд, жугъоб недо. Зен гьечу дануьсд Шими гьэгъигъэтиш муърди. У нуьшде э ён бонилей эн шуввер хуьшде, сер гуьрд эри домо вокурде, гирисде. Зен Шими э гирисдеки эдембу келе тэгИрифигьо доре шуввер хуьшдере.

— Ижире бэхдевере мерд, ижире жобордлуье игид, ижире догъэ хуно э песой эн зен хуьшде кумек кире муърдиге, гъэдой эн у муй бура, гъутине векенде гIэруьсгьо, рури сужде дедейгьоре ме вегиром... эй!..

Гирьей эн зен хуьшдере, гуфдире тэгИрифигьоре эз товней хуьшде шиниренге, дуьл Шими буланмиш бисдо. Уре э хуьшде омбар хьэйф, езугъ оmore, гирисд. Э гирисдеки мугу эз зен хуьшде:

— Э муърдеки нэгI, э согъиле миёсди дануьсде гъэдуьр эн у фэгъире. И зугъунтуьре огъу зере, нешдер сохде э шуввертуь хьэлово нибисдориге, у езугъ гъеле ченд салгьойгеш мизигъисд э и гIуьлом. Имогьойле паре бисдоригеш рихде гIове вечире нибу. Дие ме муърдем, эз ме туьре шуввер нибу.

## ЧУЪТАМ ШИМИ ДЕРБЕНДИ ЭРИ ПАДШОГЪ ЧАУЧ БИРИГЕ

Е гиле э девр эн Николай э гуш Шими хэбер дарафд, ки полицмейстер эн Дербент эдее одоми гешде эз гъэд эн хэлгъ эри э фэхьле-базари поюнде. Шими и хэбере шиновусденге омбар шор бисдо: белки полицмейстер уре э и кор вегуьрдге. И шеш мегъ бу Шими корсуьз бу, кифлет гисне-тешне бу. Шими зури-зури видовусд рафд э ки полицмейстер.

Фэхьле-базари э Дербенд соките жиге небу. Инжо согъ руз кура бире оморембируьт косиб-кусуб эри кор гешде, э кор поисде эри гIоширгьо э богъгьо, э ветэгъэ-

гъо. Оммо э фэхъле-базари кимигъо оморембируът эри ебонжэгъишу, тозе гоф, хэбер эри шиновусде, хьол-ов-хьол екире эри пуърсире, дануьсде, енебуге ихдилотгъо-овосунегъо шиновусде. Оммо кимивэгъдо инжо одоми-гъо эри е негъогъие гоф э еки хьуьжет офдоре, хэнжел-гьоре эз гъоб ведешенде, сер екире паре сохдембируът.

...Шими э ён полицмейстер оморенге, у э денуьшдее буй-балай эн у ве туже, жуьргъэтлуье чумгъой эну дени-шире, омбар рази бисдо эз у.

— Хуб, ме эдее диренуьм туь мере герек гьисдигъо одомини,— десе э баракаллогъиревоз э кемер эн Шими зере, гуфди полицмейстер.— Ги туьре тухмох эн полицейски, ги туьре фит. Хуб дениш э фэхъле-базари, е доне одоми, е доне угъреш очугъ, енебуге э эйгъомевоз э падшогъ иму Николай расиренигъо гофе эз лагъэ не ведешенуь, э песой эн хьуькуьмет усоле гоф негую, женг-чи невэхизуну. Эгенер ужире одоми э дес туь офдоге, уре дуьсдогъ сох, биёр э киме.

Шими тухмох э е дес, фит э е десиге дери, омо э фэхъле-базари. Миденишуь мивинуь э ежиге э базар хэйли одоми кура бири. У гьеусэгъэт гуьз-гъулогъ бире, тухмохэ не фите сэхд э дес шишире, дерафд э гъэд энугъо эри дануьсде эйчуь хэлгъ инжо кура бириге, чуь ихдилот сохдеге. Шими миденишуь мивинуь и одомигъо э иловлей эн е келе мерд, сипре рушгъо кура бирет. И келе мерд эдей эри энугъо овосуне хунде.

— Хэбер эз ки дуьм ишмуре, хэбер эз е падшогъ,— сер гуьрд келе мерд овосунере эри хунде,— улкей эни падшогъ келе бугеш, хэзинею лап пур бугеш, оммо ю хэр бу, хьэйвуре хуно бед бу, хэрегуше хуно терсен-гогъ бу...

— Пой! Дие посоюре негуфдиригеш гъэмел миёв, иму гоф туьре хуб варасирим,— ихдилот эн келе мерде бурра, гуфди Шими,— имогъойле е инжимиш бош, вэхиз бурайм э меревоз э ки эн полицмейстер.

— Эйчуь, чуь сохдем ме беге эри э ки полицмейстер рафде?— пуърси э мэхътелиревоз келе мерд.

— Унжо э ки полицмейстер оморенге, мидани,— э сер гоф хуьшде поисде, жугъоб до Шими.

Шими миденишуь мивинуь келе мерд юре э гуш нисе гуьрде, тухмохэ гъово гуьрде, омо э сер ю.

— Э жун синей эн падшогъ гъэдо мерасо, эгенер туь гьейсэгъэт вэхуьшде ө меревоз э ки полицмейстер неомо-

риге, сер туьре э тухмохэвоз гъэрпузе хуно чэх мисохум,— гуфди у, гьелебуле доре келе мерде.

Зэхълей эн келе мерд рафд. Чорей ю небисдо, вэхуьшд рафд э Шимиревоз. Оммо э фэхъле-базари бугьо одомигьо, гЪоси бире эзи кор Шими, угьош рафдуьт э песой келе мерд.

— И келе мерд э иловлей хуьшде хэлгъэ кура сохде, эдембу э песой падшогь иму усоле, бишерке гофгьо сохде,— гуфди Шими э полицмейстер эз гьул келе мерд гуьрде.

— Чуь гуфдиребу у э товун падшогь? — пуьрси полицмейстер.

— У ижире бишерке гофгьо гуфдири эз товней падшогь иму эн Николай, зугьунме нисе рафде у гофгьой энуре эри пуьруьш сохде,— жугьоб до чауч.

— Гу метерс, ме туьре ихдиёр доренуьм,— мугу полицмейстер,— ме биё дануьм чуь гуфдириге у, э гофгьой энугуьре тембихьи энуре эри доре.

— И келе мерд гуфдири: падшогь иму хэри, хъэй-вуре хуно беди, хэрегуше хуно огъжигери...

И гофе шиновусде мунде, полицмейстер, эз хуьрш дуьл хуьшде, чугьундуре хуно гьирмизи бисдо. Гуьрд эз сипре рушгьой эн келе мерд, сер гьурд э сер энугуьре эри хъэрой сохде.

— Зугьун туь, нелоигь, чуьтам рафди, ижире гофгьоре эри гуфдире эз товней эн падшогь иму?!

Келе мерд лерзире, зугьун ю величире, мугу:

— Э жун худо ме эз товун пдашогь иму негуфдирем. Ме эдембириуьм овосуне хунде. Бегем кеми овосунегьо эз товней пашогьгьо? Ме и овосунере хундеки, гьич падшогь Николай э дуьл-хэёлмеш недебу...

Кура бирегоре одомигьо шогьоди дорут гофгьой эн келе мерд дузи гуфдире. Шими миденишуь мивинуь полицмейстер эдее бовор сохде э угьо, хуьршлуь бире, гуфди:

— Бовор месох э и дургуне келе мерд не э шогьодгьой энугуьре. Угьо гьеме э е зугьунуьт. Ме дануьсденуьм у гофгьоре у эз товней эн падшогь иму гуфдири. Оммо падшогь иму хэр гьисдигеш, ме не туьни, господин полицмейстер, худоре шуькуьр, хэр нисдим. Иму гьемеше дивун эн дуьшменгьой падшогье доре миданим, шефде коргьой энугьоре э пуьггуьл ведировунде миданим. Дузи небуге нэгI?..

Полицмейстер гъогъ-перт бире, лэгІэ вокурде, дениши э Шими. Песде э хуьшде дироморенге, рохьо до келе мерде, шогьодгьойюре, хуни-хуни дениши э Шими Дербенди.

— Шовол эни нолоигъэ векенит, е сад доне шуш зенит эз кефел ю, песде берит дешенит уре э гъэземет,— буйругъ до полицмейстер, э хуни хуьшде дениширере хуно, денишире э Шими Дербенди.

## Э ШОРОБ СЕР ДЕНУЪГЬО — СЕРЕ ВИР МИСОХУ

Е гиле гьовой шохьонгум Шими Дербенди, пул ве-гирде, эдембу эз контор эн колхоз э хуне вогошде. Эз куче, эз ён шороб туку э гиросдеки, пушой энуре оморут дуь-се дуре шинохгьой энугу, лутигьо-пиёнискегьо гуьрдуьт.

— Э лелей Шими,— мугу угьо эз у, эз гьул Шими гуьрде,— биё дараим э шороб туку е-дуь пейле эз согьитуй хурим.

Шими омбор эдембу тэгІди сохде ебо зури-зури эри э хуне рафде. Оммо эз нерми хуьшде дие руй шенде недануьсд, дарафд э угьоревоз э шороб туку эри шороб хурде. Те куьфгьой эн Шимире темиз несохут, лутигьо-пиёнискегьо уре рэхьо недорут.

Эз шороб туку Шими ведиромо е кепик э куьф недери, лул-пиён, э поиш поисде нисе дануьсдембу. Шев ние бу, иловлеш гьеме торик. Сер эн Шими ингьэде гиж бу эз пиёни, у рэхьэ вир сохде, нисе дануьсдембу, чуйтам буравге э хуне. Чорей энугу небисдо, э зир эн е дор, э хори, э сер куче, килэхьэ э жигей болуш э бониле доноре, дегешд, гье усэгІэт пих зере, хиси.

Хэбер бисдо Шими сер-себэхь эз хиники, эз лерз, миденишуь-мивинуь ю тенбирэхьнеи, э тен ю партал, шей-шовол невери. У мадан, шев инжо э пиёни хисиренге, дуьздгьо-хулигангьо расд оморе э у, векенде бердебируьт сер-тен энуре, энжэгъ килэхьэ гьишдебируьт э бонилей энугу.

Шими възухьшд э килэхьэвоз сэхд сохд гІэйбинежигегьой хуьшдере, гІэйбе-гІэйб дениши, чуме-чару сохд



э иловле, дануь-винуь белки е шинохдегор э ю расд омоге, фуьрсуй уре э хуне, партал биёру эрию. Гьемин э гьисмет Шими гье и вэгдо гьунши эну е келе гьэрзинке э дес дери эдембу зури-зури э базар верафде кергвече эри восдоре.

— Ой гьунши! — гьетте уре дире эз дурине хьэрой сохд Шими. Туь мунош е инжимиш бире, вегорд песово, бура э хунейму, гу э зенме: коми нелоигъэ инсофсуьзе одомигьонге, мере суймиш сохдет, сер-тен мере векендет, бирэхьне гьишдет эз деде оморере хуно. Бигьил парталгьой мере вегуьрде биёвгу, гешдуьгу офугу мере э ме бошумгьо жиге.

И гофгьоре э гьунши гуфдире, песеде килэхьэ диеш сэхд шишире э гьэйбинежигегьой хуьшде, Шими Дербенди видов-видов гиросдени э улойгей куче, дарафдени э хьомум: гене худо ники сохдебу, хьомум э у тарафигей эн куче бу, куьнд бу эз у.

Согь руз Шими битоби кешире, нуьшде поисдебу э гьэд эн хьомум, чум ю э рэхь эн зен дери. Руз омо пишнеи бисдо, оммо зен веди небисдо. Дуьл Шими эдембу пара бире. Эз илойге зен Шими согь руз парталгьой Шимире э дес гуьрде, куче бе куче гешде, чуме-чару сохде, эз дире-шинохдегор пуьрсире неофд уре.

Е гилейге шохьонгум, гьэренлугь биренге Шими ю хуьшдению омо ведиромо э хуне. Э тен эну куьгьне хэлет эн зен-хьомумчи, э пойгьою добонгьою рафде дарбигьой эну вебу.

— Эжеи туь согь руз, чумгьойме ведирофдо э рэхь туь домунд, оммо туь веди небисдори?! — туьндлемиш бире, хьэрой вегуьрд Шими э сер эн зен хуьшде.

— Ме гьемей эни шегьер-вилеете гешдем, эз дире-гор-шинохдегор эз гьеме пуьрсирем, оммо ме туьре э е жигеш недириуьм, неофдум, — мугу зен.

Шими Дербенди и гофе шиновусденге, зидтеш гюси, диври бире эз дес эн зен хуьшде, э гьэгьревоз мугу эз у:

— Ой, бебейтуь су гиро зен: гьич э сертуь эгьуьл вери? Туь эже дирей, эже шиновусдей тен бирэхьне одомире э гьэд хэлгь э базаргьо, э кучегьо гешдуь офу? Ингьэде сал э и гьуьлом зигьисдей, те имугьоиш неварасирей: пиёнискере э духон гешд, бирэхьнере — э хьомум. Валлагь, туь зен нисди, бологьи!

Зен Шими, гюси бире, мугу эз у:

— Ой мерд шуьгъэм эн у чуйтуьни мерде зендигъо пара миёсд бире. Белки ме э гъэншер чуйтуьни бей берде, мувэхъсуьз гъисмет нибисдорум. Ингъэде сал э и гIуьлом зигъисдей, те имогъоиш неверасирей: «Э ичку омбор сер денуьгъо, сер хуьшдере вир мисоху». Эз коргъо эдее диренуьм, туь ди ингъэде э шороб сер донорей, неки сертуьре, шоволтуьреш вир сохдей.

## ГИРЪЕЙ ЭН ШИМИ Э СЕР МУЪРДЕЙ ЭН ХЭР ... ХУЪШДЕ

Хэр эн Шими эз нокуми офдоре муърдебу. Муърдеи эн хэр хуьшдере диренге, дуьл эну омбор догъиногъ бисдо. У чор зани зере нуьшд э ён мегъит хэр хуьшде. Тегъер эн зенгъойму э ёс хуне гиръе вокурденигъоре хуно, Шими сер гуьрд зани куфде, сине куфде, домо вокурде, гирисде эри хэр хуьшде.

Сес гиръей эн Шимире шиновусде, зен-зорей эн гъунши — мэхъэле, дуьлпесо бире, видовусде дироморуьт э хъэет эну эри дануьсде, чуй бириге. Шими угъоре диренге, э угъо денишире, диеш сэхдте домо вокурде гирисд.

— Шуьвер муърде гIэруьсу, бирор муърде хэгъерлову, гуш венит — гъэдой гушвеноре гушгъошму биёво э синей эн Шими, — гирисде, гуфди Шими, — э дуьл ишму муьгър венгенит, гирисит эри эзини жейроне хэр, муй ю суьрхи, гъутинею суьрхи, э руз-метлеб нерасире, хъэсрот э дуьл дери муърде, рури дедее догъ сохие марал кире муърдиге, эри эну гъурбу гердом...

Мерд гъунши куьнд оmore эз Шими, сер гуьрд уре эри хомуш сохде, гIэйб доре, хуьшдере биёбур несоху гуфдире э пушой эни хэлгъ, мугу:

— Ой, Шими, туь гIэил бирей, чешмиш бирей, эри хэриш одоми беге зар доноре гирисдени? Эн ме и пушгъо, монухъоту ковут, нум ю э беди гуьрде меево, фэгъире зен хуьсуьрме муърдебу, ме домо вокурде негирисдем, оммо туь эри е хэр муърдеи зар донорей эдее гирисде.

Шими, комики, зен хуьсуьр хуьшдере э чум дире нисе хосдембугьо, и гоф гъуншире шиновусденге, диеш сэхдте зар доно гирисд.

— Меш пара биренуьмгьо гье эзу кори дие,— гъирке сохде, мугу Шими,— эн мозоллуьгьо-бэхдевергьо зенхуьсуьр ю муьрде, эн чуьмени бедмозол, гъэребэхд — хэр офдоре муьрде.

## ИНСОН НЕ МЕЙМУ

Е гиле шев зимисду Шими Дербенди, гъэйлей хуьшдере томбоку пур сохде, нуьшдебу э ён эн герме кинле, эдембу э лезетевоз гъэйлей хуьшдере кешире. Э куьнж эн хуне, невей энэ, е дуваздегь сала гІэил, книге, дефдере э пушо норе, эдембу урокгьой хуьшдере сохде.

— Келебебе, ой келебебе,— мугу гІэил эз Шими,— расди и кор: одоми эз мейму бири гуфдире?

Шимире хъэз неомо эз гофгьой эн невей хуьшде. У шефд денишире э невей хуьшде, хуьршлуь бире, пуьрси эз у:

— И чуь хэре гофгьои туь гуфдирени? ГъейсэгІэт гушгьойтуьре эз бине миведешенуьмгьо, хъэремзеде!

— Тэхсирме чуьни? — гъэгъри бире, муьр-муьр сохд гІэил,— ме гуфдирем беге и гофе, учитель гуфдири.

Шими шиновусденге и гофе, дие сес несохд, эри хуьшде думит сохд: «Учитель, хундегоре одомиш гъисдиге, гъелбет, гъэлете гоф гуфдири, э хьисобевоз шоробэрэгъи хурде чи бири. Пиёне одоми жингире одомире хунои, эзу гъерчуьш гири шиновусде мибу». Оммо эз невей хуьшде келе-келе мугу:

— Гъечуниге, ме себэхь миём э туьревоз э школа, гоф мисохум э учительтуьревоз.

Гье у шев Шими Дербенди э зен, э кукгьо-гІэруьсгьо, духдергьой хуьшдеревоз эдембу телевизор томоше сохде. У шев э телевизор эдембу бирмунде е жогъиле зен-артискаре, эз улкегьой эн Запад оморере. Шими артисткаре э экран диренге, парт-мэхьтел бисдо, чумгьоре эже пэхъни сохуге недануьсд. Ненегьо-синегьой эн ар-

тистка гъеме ведибу, гъулгъой ю, кемер ю те кефел ю селт бирэхъне бу. Муйгъой эн артистка телуьгъой эн кемер жежуьре хуно тим тиж бу. Пожей эн булши артистка, гІэйбиш бу гуфдире, те биднаю бу. Э мэгІни хундеки, артистка будгъо-базугъой хуьшдере вежегъунде, вешенде — фушендембу. МэгІни хундей энущ лап бидэгІэти, хэри-хэрире хуно бу. ЛэгІэре пара сохде, э хундеки сес энугъ э мэгІ зерей эн жингире наргов ухшеш зерембу, гогъ э зузей эн женевер, гогъ э «мав» зерей эн назуй вишеи.

Шими, диренге ижире обурсуьзи, хъэьсуьзи эн эз заграница оморигоь артисткаре, гІоси бире, гъишд вешенде телевизоре. Ю эри хисире э дарафдеки, эри хуьшде думит сохд: «и зен меймуре хуно не гІэйб дануьсде, не гІор, коргъош, унгъоюш гъе эн меймуре хуно».

Собэхъмунде гІэйилле, невей эн Шими Дербенди э школа рафдеки, пуьрси эз у:

— Э келебебе, туь эз расдекиш оморени э меревоз э школа эри гоф сохде э учитель имуревоз?

Шими гъе усэгІэт э ёр овурд шовуне артисткаре, э хуьшде домунде екем, песде гуфди:

— НэгІ, балайме. Эриме оморенигоь учитель туь дузи. Ме имогъой э сер офдорум эз товун эн чуьжире одомигъо гуфдиребуге у, ки инсон эз мейму хъэсуьл омори гуфдире.

## ЭГЪУЬЛ НЕ ПУЛ

ГІоширгъой эн Дербенде эз Шими гъэгър оморембируьт, зугъун энугъ тиж бу гуфдире, гІэйбгъо, бедхъисобигоь энугъоре эй хэлгъ ошгор сохде, э угъо гоф зере, руьхшенд сохдембу гуфдире.

Е руз Шими Дербенди э фэхъле-базари оморе, поисдебу э е ченд косибе одомигъоревоз. Ченд орине у корсуьз бу. У поисдебу, белки е сэхъиб богъ, е сэхъиб ветэгъэ оморе, уре э кор гуьрдегор бисдоге. Руз поизи бу, гъовош хиник, кулок бу. Э тен эн Шимиш куьгънее, паре парталгъо вобу: Шими эз хиники гъуьж дироморе, поисдебу.

Гье и вэхди е г҃ошир омо вохурд э Шими. Сер-тен эн г҃ошириш геймиш-гейдуърмиш бу, гьовоюш куьк бу. Шуьггэм эн г҃ошир эз хурде-нуьшде э буз ю вереморebu, эн бордоре зене хуно, сифет ю, кекуьл эн хурузе хуно, гьирмизи бу, юш дуьлшор, лов хэнде бу. Оммо у г҃ошир э гьеммей шегьер мэг҃луьм бу гьеми келегед-такабур, гьемиге эгъуьл буше одоми бу гуфдире. Шимире диренге, г҃ошир, лове э суьпле хэнде веберде, омо эки эну, э руьхшендиревоз денишире, мугу эз у:

— Ой Шими, туь хуьшдере эгъуьлменд хьисоб сохде, э иму, э г҃оширгьо, хьокимгьо руьхшенд сохде, хэндуьсдени, э песойму гофгьо сохде. Эгенер туь эгъуьлмендиге, дие туь гьечи косиб эричуьни, э пойтуь е бегьеме тирохиш невери, э тен туь е бегьеме партал?

— Туь, дузи,— ме косибуьм,— е ох вокошире, гуфди Шими,— оммо косиб биреиме э эгъуьлме кор невери. Эгъуьл не пул гьеммише э е жиге расд нисе оморенуьт. Веги виниш туь не мере. Туьре пул гьисди, эгъуьл нэг҃҃, оммо мере эгъуьл гьисди — пул нэг҃҃.

## ШОРИ ЭН ШИМИ

Е гиле э хуней эн Шими Дербенди зурбо шуьдгьо, кекгьо лов биребируьт. Гьетте товуше куьшде, шуьдгьо, кекгьо сер мигуьрдуйт эри г҃энж гуьрде. Зен Шими Дербенди уре э шев ю ченд бо эз хов хэбер сохде, эз хов вэхизунде, мигьишд шуьдгьо, кекгьоре гуьрде-куьшде.

Эз сереботи эни шуьдгьо-кекгьо, Шими те сирои хисире нисе дануьсдембу, хов ю гьич сирои нисе бирембу. Себэхьмунде у хэсде-гьолоке одомире хуно вэхуьшде, ховолу-ховолу рафдембу э кор.

Егиле гьовой шохьонгум, чуьшме батмиш биренге, Шими Дербенди, гьупи э душ вери, эдембу эз кор, эз онгурбоггьой эн колхоз вогошде. Зен видов-видов омо пушой энуре гуьрд. Сифет эн зен хове хуно зерд бу, чумгьою эн чешмише одомире хуно.

— Ой мерд, э сер иму бедбэхди омори, хунейму г҃этош офдоре сухди, хунесуьз мундейм, чуь хуби имогьой эриму?

И гофе шиновусде мунде, Шими, гъупире эз душ шенде, десгьоре лов сохде, диг-диги зере, сер гуьрд эй вежегьисде, шори сохде.

— Ой мерд, туь чешмиш бирей,— гирисде-гирисде, мугу зен,— хунейму сухди, э сер иму бун невери, туь э жигей дуьлесди кешире, гІэруьси вокурдей инжо, эдее диг-диги зере вежегьисде, Ижиреш кор бирени?

— Ой зен, сер туь гьич эз е кориш нисе ведарафде, — хэнде-хэнде мугу Шими,— хуне сухдигеш гъэйгъу нисди, оммо шуьдгьо-кекгьо сухдеи лап эз дуьлимени. Гьечу хуби эри энугьо.

## МУЬРДЕЙ ЭН КЕС ХИСИРЕ ОДОМИРЕ ХУНО ОМОРЕ

Жогьиле вэхдгьой эн Шими Дербенди бугьо вэгІдогьои. Е гиле у э куче э рафдеки, миденишуь мивинуь е полицейски е косибе одомире э пушо дешенде, зерезере эдее берде уре. Шимире езугъ омо э косиб. У куьнд омо эз полицейски, мугу эз у:

— Эже берде туь и езугъэ гьечи куфде-куфде? Чуь тэхсири сохди беге у?

— У дуьзди сохди,— мугу полицейски,— эз нун туку е ловош дуьздири, унегуьре ме уре эдее эки эн судье берденуьм, тембихь энуре дуь гуфдире.

Шими мугу:

— Белки у гисне бири, эз гиснеи дуьздири? Гье гуьом, э гуфдирей туьревоз и одоми дуьзди. Песк, туь дуьзде эки дуьзд эричуь берде?

— Чуьтам дуьзде эки дуьзд берде? — хуни-хуни денишире э Шими Дербенди, мугу Полицейски.

— Бегем туь нисе дануьсде, ки судьяйму ю хуьшдению лап келе дуьзди гуфдире? У эз дуьздгьо, талавурчигьо пул-рушве вегуьрде, угьоре хилос сохдени, пул-мол хуьшдере э и теьберевоз зиёд сохдени. Унегуьре хосденуьм эз туь, биё е рэхьме кор сох, и фэгьире мебер э суд, рэхьо ди, бигьилуьгу буравгу э хуней хуьшде, эки эн гІэйлгьой хуьшде.

1 Метеле.

Полицейски эри гофгьой эн Шими шеш кепикиш недоре, э пушо дешенде косибе, берд э лой суд, э тухмох ризиниревоз уре зерезере.

Шими диренге, ки гуфдире гофгьой ю кори несохд э полицейски, гъэгър сохде э у, эз нокуми гьов кенде рафд э сер эну. Эз нэхэбереки ведешенде эз дес эну тухмох эн ризинире, э е зарбевоз додо эз мазалей эну. Полицейски э сер шох расире вечере хуно суьсд бире, офдо э хори. Косиб, диренге и коре, килэхьэ э гьултугь доноре, шуш нефес гуьрде, вирихд эз пушой чум, хилос сохд сер хуьшдере.

Шими дануьсд ки кор ю шифи, видовусд омо э хуне. Эз зен хуьшде мугу:

— Эгенер мере эй берде одоми-чи омоге, мугуи, ме муьрдем гуфдире.

Шими, чуьтам гьэдот гьисдигьоре хуно, руйхьэлови-ре вегуьрде, э куьнж хуне хьижле кеши эри хуьшде, парталгьой хуьшдере векенде, тембирэхьне дегешд э хори эн хуне, э зверсер хуьшде лампере дегесунд.

Е сэгьэтиш негирошд э хьэйт эн Шими Дербенди омо диromo полицмейстер ве гьемин у полицейскиш, эз сер комики Шими Дербенди дегенеге зереbugьо.

Шиновусденге эз зей эн Шими, шуьвер ю муьрди гуфдире, бовор несохде, угьо шишире диromорут э хуне.

Полицмейстер не полицейски эз расдиш мидени-шуьт мивинуьт э куьнж эн хуне хьижле кешире омори. Полицмейстр микешуь пердере, мивинуь Шими тип — тенбирэхьне, чумгьою сэхд, дегешди э хори, э зверсер юш эдее лампа сухде.

Полицмейстр гьуз бире, дес мизенуь э бирэхьнее жендек эн «меит», песеде гьул юре гуьрде, пульс юре фем мисоху, гуш веноре э сер синейю гуш мивенуь дуьл эну кор сохдениге небуге нэгI, песеде мижегьой чумгьой энуре вокурде, фем мисоху, товуш дериге э чумгьой эну небуге нэгI.

Оммо жендек эн «муьрде» герм бу, нефес ю хуб, лугьонд бу, дуьл юш сэгьэте хуно эдембу кор сохде.

Полицмейстр, хуьршлуь бире, мугу келе-келе:

— Э и нолоигьэ дениш ебо: хуьшдере э муьрдеки венори иму юре дуьсдогь сохде, тембихьи юре недим гуфдире, енебуге хисире, эз гьуьломиш хэбер ю нисди.

Шими Дербенди гофгьой эн полицмейстре шиновусденге, гьоси бире, вэхуьшд эз жигей хуьшде, мугу эз у:

— Эй господин полицмейстр, беге туь нис дануьсде, ки чуьтам хуней эн кес суьмер суждере хуно оморениге эри кесиге, гьечу муьрдей эн кес хисире одомире хуно оmore эри кесиге.

## СЕГ ЭН ШИМИ

Е гиле Шими Дербенди е буд гусбенде восдоре овурдебу э хуне. Э хьэёт менгьэл веноре, уре воисдембу эзи буд е хубе кобоб соху. Эз хуне ведировундени кордере, норени э пушо логоне. У суьфделе сер гуьрдебу эри гушде бурра, бирден чум энэ э елойге гьисди, сег эн Шими Дербенди э нэхэбереки эз бине-буз энэ вирихундени берде буд эн гушде.

Шимире эз гьэьгьр жин гуьрде, чубугьэ вегуьрде, видовусдени э песой эн сег. Сег, диренге, ки Шими чубугьэ вегуьрде эдее э песой ю видовусде, диеш сэхд гьэнж гуьрде буд гусбендире, пар верие гьуше хуно вирихдени э куче. Чендгьэде Шими невидовусд, э песой эн сег нераси. Шуш нефес гуьрде, гьоси-диври вогошд э лой хуне. Э ён гьопуй эн хьэёт хуьше оmore расиренге, у винирени е сегигере. Шими шуше гьово гуьрде сер гуьрдени у сего эри куфде, гьэьгьр хуьшдере эзу ведешенде. Зен Шими диренге и коре, гуфдирени эз шуьвер хуьшде:

— Эй мерд, чуь сохде туь? У сег чуь тэхсиркори? У гушд туьре небердики туь уре куфдени?

— Эй зен, лэгьэйтуйге ги,— хьэрой сохде э сер энэ Шими,— туь нисе дире беге и сегиш сег имуре хуно сиегьи?

## ЧУЬТАМ ШИМИ Э ДУЬЗДИ РАФДЕБУГЕ

Е гиле Шими Дербенди те эри мигьид е мегь мунде е гур-гур восдорегебу. Гур-гуре э сарай сэхд сохде, угьо



зен-шуьвер э руз ю ченд бо э гужевоз э бугъоз энү донгъой суьмергъэндил декуьрде, эз гъэдер зиёди хорундембу уре, гур-гур чогы бу гуфдире. Эри мигид е руз мундебу. Шими себэхъ зу-сери дироморени э сарай, гур-гуре эри куьшде, миденишуь мивинуь гур-гур су-рогъгъоюш веде нисди, киниге берди уре. Иловлей хъэйте э гешдеки, бирден э песой эн чапар гъунши вохурдени э чум энү темиз сохде паргъой эн гур-гур ю. Гъуншире е кук бу, гъуморбаз, пиёниске, лути-бомбули. У шев дироморе, гур-гур эн Шимире эз сарай берде, куьшде, хурдебуьруьт э пиёнискее хъэрмэхъгъой хуьшдеревоз.

Шими э сер офдоренге и коре, сэхд гъеле-буле гуьрд эри гъунши хуьшде. У но эри хуьшде, имишев кечи энуре эри дуьздире, куьшде э жигей эн гур-гур эри мигиди. Шимире эз зен ю пэхъникие гоф небу. Унегуьре эз товун эни кор у меслэхъэт сохд э зен хуьшдеревоз.

— Герек нисди туьре кечи энугъо, эз бугъоз ишу шэхте бире ведировгу,— мугу зен энү,— не ижире кор эз дес туь веромореш ниверов, туь е темизе одомини, биёбур месох хуьшдере.

— Эй зен мере воисдени кечи энугъоре дуьздуьм эз гъэгър угъо гур-гур имуре дуьздиреи. Небуге мере э кечи энугъо чуй дери?

— Ме дануьсденуьм гъечуни гуфдире, генедеш герек нисди туьре кечи энугъоре дуьздире,— мугу зен эн Шими,— не ижире кор эз дес туь веромореш ниверов. Кими элчэгъэ одомигъо дуьздиш сохденуьт, эз сериш берденуьт. Дес ке эзи кор э хотур эн худо, э биёбури мевенге имуре, э жегъендем бугу у гур-гур.

Оммо Шими э сер гоф хуьшде сэхд поисдебу.

— Туь зен олхогъин бош,— сер гуьрд Шими уре гъемин эри сохде.— Э жун бебейтуь, ме кечи энугъоре гъечи мидуьздуьм, ки гъич э дуьлгъо-хъэлгъой энугъош ниёв ме дуьздирем гуфдире кечире. Ингъэде сал туь э меревоз эдее зигъисде, оммо туь мере гъеле хуб нисе шинохде.

Шев ниме биренге, э хуней гъунши гъеме хисиренге, Шими, вегуьрде расереш, туморереш, асда-асда да-рафд э хъэйт эн гъунши.

Буз эн кечире бесде, у мэгI незенуь гуфдире, э е гужевоз шиши уре э туморе. Туморере э кул хуьшде веноре, у э буз-пой, евош-евош поисд э ён пенжерей гъунши, е ченд бо келе-келе мэгI зе э жигей эн кечи.

Эз сес эну гъуншигъо хэбер бире, ведироморут гьемееки э хъэйт. Диренге Шимире, туморе э кул вери, поисдеи э ён пенжерешу, угъо омбор мэхътел мундуьт. Шими денишире э угъо, суьпле хэнде сохде, мугу:

— Бэхшлемиш сохит, ме ишмуре шев-нимешев хэбер сохдум, эз хэлов вэхизундум. Мере воисдембу ишму хэёл несохит, ки э и туморейме кечишму дери гуфдире, мэГІ зерегор кечишму небу, ме хуьшдениме бируьм.

Э гоф хуьшде эри расд ведироморе э пушой эн гъунши, Шими лэгІэ вокурде, е келе мэГІ зе гене э жирей эн кечи э гьемей хъэйт.

### «ГЪУНОГЪ» ЭЗ АМЕРИКА

Пор э васал э гъэдимие шегьер Дербенд оморебу е журналист эз Америка е дилбоше, ловхэндее мерд, чешмекечум. У э е келе томошеревоз фегъм сохд келе гъэдимие боругъой Дербенде, эзи гъозори пенжсад сал пушо вокурде оморетгъоре, гъэлей эн Дербенд «Нарын-Каларе». Песде журналист рафд э онгур-богъгъой эн Дербенд. Инжо у вохурд, шинох бисдо э келе мерд Шими Дербендиревоз.

Эз Америка оморебугъо журналист омбор мэхътел мунд Шимире диренге, чуьнки Шими келе мерд, сипре рушгъо бугеш, балай ю тип-тик бу эн жогъиле хуно, дуьлшор, жуьргІэтлуь бу.

— Гуит, пожалуйста, м.. м... мистер Шими Дербенди,— мугу американски журналист,— ишму э и келе-мердишмуревоз гъечи жогъил чуьтам мундейт?

Шими жугъоб до, мугу:

— Ме согъ гІуьмуьрме кем-кем шороб хурдем, э богъгъо, э чул кор сохдем, гъингъэр э сир-суьркеревоз хурдем, песде ме хуьшденимеш дуьлшоре одоминуьм.

— О'Кей! — шори сохде, кел-келе мугу журналист, — лап хубе жугъоб дори туь мере. Гу гене, пожалуйста, эз кеевоз туь гъечи дуьлшори?

— Эз зуревоз,— сере жумунде, жугъоб до Шими Дербенди,— эзу вэхдевоз, кейки иму и онгурбогъгъоре эз дес эн ГІоширгъо восдоре, эри комигъоки ме руз те

шохьонгум, эри е аббаси кемер хуьрд сохдембуьруьм, э колхоз гуьрд биреймге.

Шимире омбор хош омо и хундегоре одоми, чешмекечум эз у дуре хоригьо омориго, гьечи э юревоз е рач гоф сохде, пуьрсиренге хьол-овхьол юре. Шими эз хотур эни кор сер гуьрд эри гуфдире э у эз товун эн зиндегуни хуьшде, эз товун эн кор, ки эз и дегь сал пушо колхоз уре э хуьрметевоз чуьтам э пенсие фуьрсориге. Шими гуфди эри эню, ки юре хунеи, хьээт, богъчеи, худорешуькуьр дестенги нисди уре. Э пенсия рафдигеш э богъ оморени гьеммише, чуьнки э хуне гьэрол нисе гуьрде, гIэилгьо хьэрмэхьгьоре эри дире, гоф сохде, э жогьилте колхозникгьо синогьи хуьшдере эри бурмунде.

Эз Америка оморебугьо гьуногъ гуйге омбор рази бисдо эз гофгьо-ихдилотгьой эн Шими Дербенди. Уре воисд Шимире сирот зенуь. Вегуьрде эз дес эн жогьиле колхозник лапаткере у до э дес эн Шими Дербенди, мугу эз у:

— Мере воисдени туьре э кор сохдеки сирот зенуьм, егIни, чуьтам туь бурмундениге синогьитуьре э жогьиле колхозникгьо.

Шими Дербенди рази бисдо. У туф зе э кеф дес хуьшде, руш хуьшдере тимор сохд, гьуз бире, сер гуьрд эри кор сохде. Гье и вэхди американски журналист ченд бо уре сирот зе.

Шими песде теклиф сохде берд журналисте э хуне, гьингьэр э сир-суьркеревоз э шоробевоз хуб гьуногьлу-гьи сохд уре. Угьо омбор эз еки рази мундут.

Е мегь гирошде бэгъдо, киниге е американски газете фуьрсо эри Шими Дербенди. Э чоримуьн верэгъ эн газет очерк эн американски гьуногъ эн Шими Дербенди нуьвуьсде оморебу. Э зеверсер эн очерк сирот эн хуьшдени американски гьуногъ вебу, чешмекечум, ловхэнде. Э минжи эн очерк сирот эн «Нарын-кала» вебу, э зофру — сирот эн Шими Дербенди э кор сохдеки э богъгьо.

Шими газите вегуьрде зури-зури рафд э ки эн е учитель, зугьун эн американски гьуногъэ хуб дануьсдем бугьо.

Омбор рач, тэгIрифлуь, бемзерлуь нуьвуьсдебу гьуногъ эн Шими эз товун эн Дербенд, эз товун эн рачи эню, гьэдимие боругьой эню, эз товун эн «Нарын-кала»,

чол, зиндон, эз товун э иловлей эн шегьер Дербенд гьис-  
дуьтгьо боггьо, хоригьо.

Шимире омбор хьээ омо, чуйтам гъуногъ энун тэгI-  
риф дорениге Дербенде, рачи оводунieti энуре. Оммо  
Шими шиновусдки чуйжире гофгьо нуьвуьсдиге гъу-  
ногъ энун эз товней ю, чумгьой энун чор чуми бисдо, жин-  
гьой энун верома.

«Мистер Шими Дербендире ме диренге,— нуьвуьс-  
дебу американец,— эриме гьечу омоки, эз у девргьо,  
кейки э тэхд эн Дербенд хонгьо нуьшдебурьтгьо вэгI-  
до, гьичиш дегиш небири гуфдире э зиндегуни эн могъ-  
лугъ эн шегьер. Вегирит винишит э и газет веригьо си-  
роте. И келе мерд, сипре руш эри е лугъэ нун, эри эз  
гиснеи немурдеи э и келе мерди хуьшдеревоз эдее руз  
те шохьонгум гIэзиет кешире, кемер хуьрд сохде. Эге-  
нер у э ижире хьолевоз, э ижире муьрсевоз те имогьой  
зинде мундиге эз хотур энун кори, ки мистер Шими Дер-  
бенди омборе, харе, эз эгъуьл буше одомигьоре хуно  
гьемише дуьлшори. Песде у гьемише сир хурде...»

Шими гъэгъри-гIоси бире оморени э хуне. Дуьл энун  
омбор эдембу тенги сохде. Гъэгър э дуьл ю деригьоре  
эри фурмуш сохде, Шими Дербенди е-дуь пейле шороб  
хурде, деспоку, зиршеини-зиршоволи хуьшдере э аме-  
рикански газет пучунде, рафдени э хьомум. Эз хьомум  
тен шушде, ведироморенге э пушой утогъ, э партал  
векенденигьо жиге, Шими Дербенди те ебо партал  
хуьшдере вокурде, газете э зир хуьшде дешенде, нуьшд  
эри форигъэти вегуьрде. Э вэхуьшдеки эз жиге, эз  
эрэгъ жендек энун тар биребугьо верэгъ эн газет, эжеки  
вебу очерк эн заокеански гъуногъ энун, вогоси мунд  
э тара кефел эн Шими. Шими векенде верэгъ эн газите,  
дешенд э бедирей эн хокоруи. Оммо е тикей эн газит,  
сирот эн американски гъуногъ энун вобугьо жиге, во-  
мунд э лап гIэйбе жигей энун.

Е мерд лове э суьпле хэнде веберде, мугу эз Шими:

— Ой лелей Шими, э песошму, лап э гIэйбе жиге  
е тике гозит э сирот эн е мердевоз-чешмекечумевоз во-  
мунди.

Шими гье усэгIэт хуььршлуь бире, гъэгъри-гъэгъри  
мугу эз у:

— Гъэлете гоф эричуь гуфдире туь?! У сирот вери-  
гьо жиге лап гуьнжолуье жигей эри энужире дургуне  
шефде одоми. Бигьил вомунугу э жигейю.

## ХЭР ЭН НОВИ

Е гиле Шими Дербенди нуьшдебу э богъче э сер сав-зегегъи, эдембу ихдилотгъо сохде. Бирден еки эз келе мердгъо мугу эз Шими:

— Ой Шими, туь кем-биш туро дануьсдени, гъери гу туь мунош: э туро вери гуйге хэр эн БелгIом э уре-воз э зугъун эн одоми гоф охдебу. Э у туро нуьвуьсде омorigгъо эз товун эн хэр зугъун одомире дануьсдеи расди, небуге гъечи э эйгъомевоз гуфдире гофи?

Шими екем э хуьшде домунде, песе гъэйлере эз лэгIэ ведешенде, сипре рушгъой хуьшдере тимор сохде, сере жумунде, гуфди:

— НэгI, чуьтам э туро нуьвуьсде омorigе, гъе гъечуни. Гъисдуьт ужире хэргъо, комигъоки зугъун имуре дануьсденуьтгъо. Ини меселен, е вэгIдо имуре председатель бу э колхоз. Сер ю эз е кориш нисе ведарафдембу, гъич э гоф-весиет эн дануьсдегоре одомигъо-колхозникгъо гуш нисе венорембу. Оммо эз зугъу лап дилбош бу, дилможе хуно. У председатель эн колхоз гъисдики, коргъойму гъе эдембу пес рафде. Иму е гъэдер вэхд тоб дорим, песе сабуьр иму лов бисдо, эхир-эхиридеш э сер офдорим, ки и рэхъбер нисди, хэри, расди чорпое хэр нэгI, дуьпое хэри.

## ЗЕН ЭН ШИМИ ДЕРБЕНДИ

Зен эн Шими Дербенди эз сер-сифот бирач бу. Догъ уьсде-дэгъме е келе зигил шишире вероморембу э сер вини энуну, эз мунде жигеш бирач-бухур бирембу мунде. Еки хэндуьсде, руьхшенд сохде э Шими Дербенди, мугу эз у:

— Ой Шими, туь э у зеневоз чуьтам рузе шохъонгум сохде, зигъисде, эз зигил э сер вини энуну веригъош зэхълей одоми мирав ки?

Шими хуьшдере э недани веноре, дуьл энуну одомире эри хош несохде, мугу эз у:

— Эй жонум, э товуше менгиш дэгъме вери, э хуш-буйлуье гъуьзуьргуулиш телуь вери, туьре воисдени э сифот эн зен ме е зигилиш невебу?

## КИШДИ ХЬОМОЛИ

Ченд салгьо Шимире гье эдембу духдергьо бире. Шими миденишуь мивинуь ю гьечи кук недире, пир мибу, эзи г'уьлом мирав, хьомол мимуну, у сер гуьрд кишди хьомоли эри беседе. Дире-шинохдегоргьо гоф вероморенки мугуфди эз Шими э дуьлсухуниревоэ «Эхиртуь ник гердо».

Е ченд сал гирошде бэгьдо, дирешинохдегоргьо миденуьшуьт мивинуьт Шими эз кишд хуьшде «кишди хьомолире» векенди, кишдисуьз эдее гешде. Угьо эри хуьшде веровурд мисохут: эхьисобевоз эхир Шими ник бири, уре г'Эил эн нариinei бири. Угьо шори-шори миевт эки эн Шими, мугуют:

— Э худо шуькуьр ой лелей Шими, эхиртуь ник бири, «кишди хьомоли» эз кишд туь фурамори.

Шими гьошгьоре дулла сохде, гьэгьри-гьэгьри гуфди эз угьо:

— Эхир ме ник не бири, эхирме пэхуьр бири. Эз логьо-тошувогьошму, зенме неки кук, дие духдергьош нисе зенде.

## ГУШД ЭН ХЭРИ

Е гиле Шими Дербенди дуь-се руз э вишегьой эн Григору-чой гьитгьо-хьэчегьо бурабу эри говду вокурде эри молгьо-говгьой эн колхоз. Э шегьер вогошдебугьо руз э тогьор эн Шими нун, хурдение чи недемундебу, гьеме верасдебу, унегуьре у рэхьэ шугьэм гисне эдембу оморе. Э ён догьгьой эн Дербенд оморе расиренге э Шими Дербенди омо вохурд е одоми. У эз дигь эдембу э шегьер рафде. Тогьор эн у пур бу. Шими ченд бо э тогьор зну дениширембу, ег'ни, у э сер мофдону, мугую эзу: биё нуьшим нун хурим гуфдире. Оммо юловчи зну хуьшдере э недиреи, недануьсдеи веноребу. Эхир чорей эн Шими небисдо, мугу эз у:

— Эй, хьовир, биё екем нуьшим, фори́гьэти веги́рим, эз у э тогьор туь деригьо нунгьо-гушдгьо хурим, дуьл имуре гирим.

— Туь эз же дануьсде э тогъорме гушд дери гуфдире,— э дуьлпесоиревоз пуьрси юловчи эн Шими, комики лап сэгъэте одоми бу.

Шими мугу:

— Мегезгъо э ёнме нэгI, гье э песой тогъортуь эдете вежегъисденуьт, буй гушде кеширет дануьсде.

Нешинохэ мерд дие хьэшо зере недануьсд э тогъор ю гушд дери гуфдире, оммо уре гушд доре нисе воисдембу гисне бугъо Шимире.

— Туь дузи, э тогъорме гьэгъигъэтиш буржунде гушд дери,— жугъоб до у,— оммо туь у гушде нихури.

— Эйчуь нихурум,— мэхътел бире, пуьрси Шими Дербенди.

— Чуьнки э и тогъорме деригъо гушд — гушд эн хэрини. Ме эдее эз дигъ иму э шегъер э гъуногълугъи рафденуьм. Дес тигъи нерам гуфдире, вегуьрдем е келе кесег эн гушд хэрире, буржундем сег эн гъуногъэ эри доре.

Шими э сер офдоре гIэмелдани эни сэгъэте одомире, суьпле хэнде сохде, мугу эзу:

— Эжунтуь, ме ченд бо гушд эн хэрегуше хурдем, лап хош омори мере. Гушгъой эн хэриш гушгъой эн хэрегуше хуно дурази, унегуьре эз гушд хэрегуши те гушд хэри эрме бешгъэ нисди, ме гье э у гушд эн хэриш разинуьм.

Чорей эн мерд небисдо, поисд, нуьшд э гъиругъ эн рэхъ, ведешенд гушде эз тогъор хуьшде, но э пушой Шими.

## КУК ЭН БЕБЕ

Е гиле куклей эн Шими Дербенди нединжи сохдебу. Шими э у гъэгър сохде е-дуь шуш зе эзу. Зере шушгъо гIэиле дорд до. У эз зир дес бешу вирихде, ведарафд э куче, гирисде-гирисде, хьэрой сохд эз унжо, мугу эз бешу:

— Туь виниш имогъойле ме эз гъэгъртуь рафде хуьшдере э дерьёг дешенде, батмиш небисдорумге!

ГӀәил гуфдире и гъелебулере, вирихд зофруво, э лой эн дерьёгъ. Зен эн Шими сер гуьрд эй гирисде, сере куфде:

— Вой эриме, гӀәилме эз дес рафд, имогъой чуй ху-би эримел..

У сер гуьрд Шимире эри серкуш зере, гуфдире э у, э песой гӀәил видову, хоши гуьрде, вогордуну биёру гуфдире уре. Оммо гофгъой эн зен гъич э хәпер эн Шимиш небу, эз и гуш эдембу зере, эз у гушиге ведешенде.

Шими гъич э хори е кор небирере хуно, нуьшд эри томбоку венжире, кисей хуьшдере пур сохде.

Е сәгӀәт гиросше бәгъдо, сер гуьрд эз гъово эри во-руш рихде. Эз е ченд минутиге бәгъдо, кук эн Шими вогошде омо э хуне, гъемею тар-гӀов, лов дуллу, енбоки эз зир чум денишире э бебешу. Шими суьпле хәнде сох-де, пуьрси эзу:

— Туь, гуйге, э дерьёгъ рафдебири эри батмиш бире?

— Эри рафдебуьруьм! — гъирке сохде гъәгъри-гъәгъри, гуфди гӀәил.

— Дие эйчуй батмиш небисдори?

— Воруш мешет бисдо. Туь нисе дирe э куче чуй жире воруш вонориге, гъемейме тари-гӀови,— жугъоб до кукле.— Ме терсируьм э ме хиники мирасуь, суь-телжем мибошум гуфдире. Небуге ме те имогъой эз зу-ревоз батмиш биребуьруьм.

Шими дие хуьшдере гуьрде недануьсде, келе-келе хәндуьсд:

— Эй, машаллагъ, балайме, машаллагъ,— хәнде-хәнде гуфди у,— эдее диренуьм эз гӀәмелдани туь эз бебе нидомуни. Дор чуйтамиге — бегъерюш — гъечуни.

## ХУДОЙ ЭН ШОГЪИРГЪО

Е гиле э дес эн Шими офдоребу е книг, э комики ве-буьруьт стихигъой эн куьгъне буьзуьрге шогъиргъой эн Ирон. Шими э гужевоз юхуле-будуре хунде верасде бәгъдо у стихигъоре, бирден эри хуьшде хәёл сохд юш эри стихигъо нуьвуьсде, хуьшдере э гӀәрей шогъиргъо дешенде.



Зен хушдере эз кухни огол зе овурд у эри месла-хъэт сохде э уревоз эз товун эни кор.

— Эй зен, — мугу Шими Дербенди эз зен хушде. — Зугъун эн фарси не зугъун татиму э еки ухшешуът, куьндуът. Меселен: иронигъо не таджикгъо гуфдиренге: «занро муяш дораз, аглош кутагъ»,<sup>1</sup> егӀни «эн зен мую дурази, эгъуъл ю кутэхъи», иму лап хуб верасиреним мэгӀэной эни метелере, угъо э зугъун ишу гуфдиренге.

— Гьери, чуь гуфдире воисде туьре егӀни э и гофевоз? — гъэгъри-гъэгъри денишире э шуьвер хушде, гуфди зен, комики Шимире унгъэде эгъуълменд хъисоб нисе сохдембу.

— Гуш вени ебо зен. Буьзуьрге Фирдоуси эзи гьозор сал пушо э зугъун фарси нуьвуьсди е келе дестон «Шогъ-наме», — мугу Шими, — оммо у эз зуревоз муьрдигеш, нум ю зиндеи, тэгӀрифлуьни э гъемей гӀуьлом. Ме эриме фикир сохдем: эгенер Фирдоуси э зугъун хушде ижире гӀэлемете дестон яратмиш сохдиге, нибуми ме э зугъун ме эзи ебототе шогъиригъо семе нуьвуьсде недануьм?

— Ой мерд, — мугу зен эн Шими, — шогъиригъо нуьвуьсде кор туь нисди. Шогъир одоми биё эз деде бу. Коргъой гуюгъоре хуно: «бирение вече эз гъэд хое жив зере», Туь хьофдод сал зигъисдей э и гӀуьлом, е доне шогъири не нуьвуьсдей, эзинбэгъдойге эз туь шогъир биренини?

Шими эз зен хушде гъэгъри бире, фуьрсо уре дуборе э кухни, ю дефдере вегуьрде нуьшд эри шогъиригъо нуьвуьсде. Те шохьонгум бире дефдер энупур бисдо эз нуьвуьсде стихигъо-шогъиригъо. Оммо нуьвуьсде чигъой энуре не сер вебу не дуьм, еки эз догъ бу, еки эз дерьёгъ. Шимире лап воисдембу нуьвуьсде шогъиригъой хушдере эри гьерки бисдо хуну, шинову чуь гуфдиреге гъирогъдеки эз товун энугъо. Шими э и хэёл дерики, дер энуре вокурде дироморут дуь одоми э хуней энупур. Еки энугъо винодел эн колхоз бу, чугъундуре сифет, гъолинде гъирмизине вини, дуьимуьн е нимбобое одоми, ветеренар эн колхоз, гиргине чумгъой гуселеи. Гьердуьй энугъо кефлуь буьруьт, эз гӀэруьси эдембуь-

---

<sup>1</sup> Метеле э зугъун ирони не эн таджики.

руът вогошде. Эз ён хуней эн Шими э гирошдеки, угьо дироморebuуруът э келе мерд эри сер кешире.

Шими угьоре диренге омбор шор бисдо. У гьемин эдембу гьечинигеш одоми гешде нуьвуьсде шогьиригьой хуьшдере эри хунде.

Шими хош омори сохде, дес энугьоре гуьрде, овурде нушунд угьоре, гьишд зене гьингьэр декуьрде овурде, бутылкей эрэгьиш овурде норе э пушой энугьо.

Гьуногьгьо эрэгьи хурденге, диеш серхош бисдорут. Шими эри хуьшде фикир сохд, ки лап хубе вэгӀдои угьоре э нуьвуьсде шогьиригьой хуьшдеревоз эри шинох сохде.

— Омбор хубе шогьиригьои, лелей Шими,— тэгӀриф до винодел, келе гьирмизине вини,— э и шогьиригьойтуь хушбуй эн шороб мускат дери, нерми эн кагор, ширини эн портвейн, гӀэселе дэгӀэм эн ликер, туьнди не палаши эн тэгӀрифлуь коньякьгой эн Дербендиму де-руът. Туь, лелей Шими гьэгьигьэтиш зиреке-талантлуь шогьири.

— Пой меш гуьом гофмере,— э жигей хуьшде э битобиревоз жуьмуьсде, гуфди ветеринар,— шогьиригьойтуьре ме шиниренге, э гушме дерафденуът гӀуьгӀуьй эн хурузгьо э пушой себэхь, хьзвеслуье шихьиней эн чо-гьэ бейтол, гӀуьре сес эн эшгьлуье жингов, гӀэриней эн уьткеме деве. Туь — бебей эн шогьиргьоймуни, келегеди ве ярашуьгьи эн чуькле хэлгь имуни.

Шимире омбор хьэз омо эз тэгӀрифигьой эн гьуногьгьо. У лове э шоре хэнде веберде, огол зе зене, мугу:

— Биёр инжо е бутылкейгеш эрэгьи!

Гьуногьгьо дуймуьн бутылкере хурденге, угьо гене сер гуьрдуът эз товун шогьиригьой эн Шими Дербенди эри гуфдире.

— Мере, лелей Шими, омбор хош омо эз шогьиригьойтуь,— зугьун ю пичире-пичире гуфди келе гьирмизине вини,— шогьиригьойтуь э мувэхь одоми эзи туьнде гьэдимие куьгьне шоробгьоре хуно кори сохде. Туь лелей Шими лап хьохмолуье шогьири.

— Пой меш гуьом гоф мере,— эз жигей хуьшде вэ-хуьшде, гуфди ветеринар, десе э сине веноре, э падшогь сер зеренигьоре хуно, сер зере э Шими,— Чуьтам суьмуьргь падшогь эн гьеммей парандегьо гьисдиге, туьш падшогь эн шогьиргьоймуни.

— Ой зен! Биёр гене е бутылкейгеш эрэгъи,— буйругъ до Шими Дербенди э зен хуьшде.

Гъуногъгъо сеимуьн бутылкей эн эрэгъире хурденге, гене зугъун ишу диеш пичире-пичире, сер гуьрдуьт эри гуфдире эз товун шогъиригъгой эн Шими Дербенди.

— Хуби, рачи, мэгІэнолуьи хьохмолуьи эн шогъиригъгойтуьре, лелей Шими, гъэдер нисди,— мугу келе гъирмизине вини,— ижире шогъиригъго туь нуьвуьсдейгъоре гъеле екиш эз шогъиригъгойму нуьнуьвуьсди. Гъемей энугу э е дирногъ туьш ниверзуьт. Туь, лелей Шими, лап эз хьохмолуье шогъиргъош зиьди.

— Пой меш гуьом гофмере,— эз жигей хуьшде вэхуьшде, келе-келе гуфди ветеринар,— падшогъ гуьгъиш нисди э пушойтуь. Туь худой эн шогъиригъгоймуни, унегуьре э худо боворсохэ одоми э пушой худо сер зеренигъоре хуно эдее сер зеренуьм э пушойтуь.

Лул-пиьн бугъо ветеринар, э сугърезани поисде, чендбо гъуз бире, сер зе э Шими Дербенди.

Зен Шими диренге, шиновусденге тэгІриф дореигъгой эн шогъиригъгой шуьвер хуьшдере, мэхьтел мунд, шор бисдо. И дес, те Шими огол зере уре, ю хуьшдению омо эки Шими, гуфди шори-шори э гушо:

— Эй мерд, биёрум чоримуьн бутылкереш эри гІэзизе гъуногъгъо?

Шими, э лов хэндеревоз денишире э эз эрэгъи лап гиж бире гъуногъгъо, мугу эз зен хуьшде:

— Весси, дие меёр. Эзу тэгІрифигъо зверте, угъо гуфдиретгъо э товун эн шогъиригъгойме, дие тэгІрифиге нисди. Эйчуь негъогъ хэржи-пуч сохим чоримуьн бутылкаре...

## **ЧУЪТАМ ШИМИ ДЕРБЕНДИ Э ЖИГЕЙ ХУДО БИРЕБУГЕ**

Е гиле Шими Дербенди э зен хуьшдеревоз женг гуьрде, эз зен гъэгъри-гІоси бире, ведарафдебу рафдебу эз хуне. Шев бу. Э куче-мэхьэле е доне одоми небу. Э кучей эн Шимиигъо е нумаз бу. Бун эн нумаз сар бу, гъир зере. Э минжи эн бун нумаз ченд е пенжере е ке-

ле гиргине сула дебу. Шими жундура куьгъне килэхъ хуьшдере э жигей эн ламбалуш доноре э бонилей хуьшде, дегешд эри хисире. Суьфделе чумгьой эн Шими Дербенди э хов верафдебу, у бирден хэбер бисдо, сес эн одомире шиновусде. Сес эз гъэд эн нумаз эдембу оmore. Шими дениши эз сулай эн бун, мивинуь е мерд поисди э сер эн гьихэл. У тип-тэхьной. Э нумаз эз у бэгъэй е до не одоми неде. Э тен мерд жундуре чухо вери, э пой ю дурра тирохгьо, э сер ю муй рафде килэхъ. Сифет мерд лэгъэри, могъбули. Мерд сере тик гуьрде, эдембу гуфдире:

— Эй худой ме, эй худой ме!..

Шими э сер-сенбол эн мерд дениши, гье усэгІэт вераси, ки у е юхсуле, косибе одомини, э хьисобевоз е дердию, е войгей ю гьисди, унегуьре омори инжо эри э худо минет сохде.

Косиб гене сер гуьрд эри худоре огол зере.

Косибе жугьоб дорегор эз же омори!

Шимире э косиб езугъ омо, хуьшдере э далде гуьрде, мугу эз сулай бун нумаз:

— Эй бендейме, гу чуй воисдеге туьре эз ме, эз худойтуь?

Дуьл косиб гье усэгІэт шор бисдо, мугу:

— Ой худойме, шуькуьр э нум туь, эхириш и сесме э гуштуь дерафд, — мугу шори сохде, косиб. — Ме чендгилегьо туьре огол зерем, оммо туь, офирегор, мере егилеш жугьоб недоребири. Ме гьечу дануьсдебуьруьм туь, дуьргердо, селт кар бирей, кур бирей, чумгьойтуь дие чи нисе дире, гушгьойтуь гоф нисе шиновусде, мувэхьтуьш дие унгъэде чи нисе бурра. Зарифети беге: салгьойтуь омбори, келе мерди туь. Гьеле эзи гІуьломе туь офире эйло пенж гьозор сал гирошди. Те увэгІдоигьош, кидан, ченд сале бириге туь. Гьелбет, э ме лоигъ нисди э пушойтуь эри гоф овурде, туьре серкуш зере: хуб офирейге туь и гІуьломе, небуге хэреб. Оммо ме э туь гуьом расдире: эгенер туь эз дуьли э сабуревоз кор мисохдиге, ижире теретэгІди нисохдиге, э пенж-шеш руз гьерчуьтам бисдо туь гІуьломе ниофири. Хубе фегьмлуье сэхьиб э гъэд пенж-шеш руз э теретэгІди кергелуьш нисе вокурде эри керг-вечей хуьшде. Негьогъ гуфдире беге бендегьойтуь: «гевилсуьз э зеневоз зигъуьгьо, уре феремезе кукгьо мибу». Энтуьш гьечу: э теретэгІди, серсуи, гевилсуьзиревоз вокурдей хорире, унегуьре

э гІуьлом е порядке, е дузи, е оводуней нисди. Кимигьо эдее э гисней муьрде, кимигьойге эз озгьуни эдее парче-парче бире. Кимигьоре дорей гІош, кимигьойгере — ишдогь. Эн гІошир пул э сер пул эдее оmore, эн косиб — гІаил э сер гІаил. Эз туь гІэйбиш бу гуфдире, косиб гьеетте э зен дес зере, гІаил лэгІере пара сохде гисне-муьрде хуно эдее гьов кенде оmore э сер эну...

Гоф косибе бурра, мугу Шими:

— Ой бендейме, нешиновусдей беге: расе дураз хуби, гоф — кутэхь? Гу эриме, дураз некешире, чуй метлеб воисдеге туьре эз ме?

— Бэхшлемниш сох, ой худойме, туь дануьсдени: дерд омбор бугьо одоми омбор гоф мисоху, — э езугьиревоз, мугу косиб. — Унегуьрей ме гьечи омбор гоф сохденуьмгьо, Метлеб ини: ме е косиб-гІонинуьм, мере е шеле гІаили, гьеме гисне-тешнеют, сербирэхьне-кунбирэхьнеют, эдете эз дес рафде. Меш ки эз дердгьо-дуьлесдигьо, нэхурдеигьо-небердеигьо хэсде-мендеюм. Э кулмеш е шеле гьэрд вери. Сэхьиб гьэрдгьош эдете мере зэхьмет доренуьт. Хосденуьм эз туь, екем пул ди мере эй хэржи, гІаилгьо гисне немунут, екемиге пул-гьэрдигьоймере эри эз сер сохде.

Косиб войгей хуьшдере гуфдире, поисди, денишири худо чуй мугуюге. Шими нисе дануьсде чуй жугьоб дуьге косибе. Э куьф хуьшдени энуш е сие кепик недебу. Песде Шими е гІамел офде, мугу эз косиб:

— Ме туьре пул доре нидануьм!

— Эйчуь эхи, — гье усэгІэт пуьрси косиб. — Туьре воисдге, чуьш сохде мидани.

— У дузи, — жугьоб до эз звер Шими, — э мигІид эн «Руш Гьешоно» э нумаз оmoreйге, туь нешиновусде нибоши эз гофгьой эн раби, э сер гьихэл тефило э хундеки, ки ме, худойтуь, э руз «Руш Гьешоно» нуьвуьсденуьм, э руз «Кипур» теслих сохденуьм..., ки имисал гІошир мибуге, ки косиб мибуге, ки маравге, ки мифуравге...». «Руш Гьешоно» гирошди, ме туьре эз косиби эри хилос сохде, э имисал ужире гьонун ненуьвуьсдем.

— Гьечу буге э худойме, — сер гуьрд эй минет сохде косиб, — жун мере веги, хилос сох мере. Эриме муьрдеи хуби, гьечи зигьисде, э билбули домундеинжон.

— НэгІ, ме туьре гІэжел доре нидануьм, — гуфди Шими эз нуминей худо, — туь беге эй бендейме нешино-

вусдейми, гье э у нумаз эри «Руш Гьешоно» хунденигьо вери «худо буррани, ки имисал пуч мибуге, ки зенде мийёвге, ки мимунуге, ки мимируьге...» Э дефдер невери туь имисал биё мири гуфдире. Унегуьре ме жун туьре восдоре нисе дануьсденуьм.

Косиб, сере дуллу гуьрде, э думит домунд. Песде э бун нумаз денишире, гуфди:

— Гьечу буге, езугь бер э ме, гьелелуьге те сал ги-рошде, «Руш Гьешонойге» бире, вебер мере э ки туь. Чумме и синемишигьоре невинуь, дуьлме и дердгьоре некешуь.

— Хуб, воро э киме э асму, — мугу Шими.

— Эй худо э туь гIэёни ме молох нисдуьм, гьуш нисдуьм эри пар зере вероморе э ки туь.

Шими векенд эз кишд хуьшде расере. У гьеммише э хуьшдеревоз расере бердембу, шеле-чи бисдоге эри берде, е шогьи-дуь шогьи пул эри гьэзенмиш сохде. Е сер расере э дес хуьшде гуьрде, е серигере фушенд э гьэд эн нумаз.

— Эй бендейме, бесд хуьшдере э и расе, ме туьре вокошум э киме.

Косиб шори-шори бесд хуьшдере э расеревоз. Шими сер гуьрд эри вокошире уре э бун нумаз. Гье сер эн косиб э сергьови нумаз расире мунде, бирден и нэхьсе расе бурри, косиб э е зарбевоз раси э хори, е хьэрой ве-гуьрде эз терс не эз дорд дореи.

— Эй бендейме, ме эз сестуь кем мундебу кар не-бирени! — гуфди Шими эз сулай бун эн нумаз, — кидан е жигейтуь хуьрд, хэхэ бириге?

Косиб, гоф несохде, гьош дуллу взхуьшд, песой хуьшдере э десевоз совусде, чумгьоре тик гуьрде э гьэгьревоз мугу:

— Ере гиресен туьчуьни худо, чуьн мени езугьэ, гиснере гьичиш доре нисе дануьсде эз е дуьмбел бэгьэй э песой кун ю.

Гуфдире и гофе, косиб ленгуьсде-ленгуьсде веда-рафд эз нумаз.

## ЧУЪТАМ ШИМИ ДЕРБЕНДИ ЗЕН ХУЪШДЕРЕ ФУРМУНДЕБУГЕ

Е руз эз кор эн колхози хэвлет гьисдигьо вэгІдой эн Шими Дербенди, уре воисд бурав э више, гешдуь эри хуьшде, ов зенуь. Гьемин э мэхьэлей эн Шимиигьо е овчи зигьисдембу. Шими омо эки энду, «руз эхэйрбу» до, хосд эзу эри е рузи туфенг, патронгьо дуь юре гуфдире.

Шими э душ веноре туфенге, э кишд беседе патрондаше, э кул хэр хуьшде венуьшде, рафд э више. Э биней эн е дор, э гьирогь эн више хэре беседе, туфенге э дес вегуьрде, дерафд Шими э гьэд эн више. Согь руз Шими гешд гьэд эн вишегьоре, кулегьоре, гьубигьо-дерегьоре, э чум ю е гьуш е хьэйву невохурд эри зере. Хэсде, во мунде вогошд Шими э гьирогь эн више, э ён энду дор, эжеки у хэр хуьшдере бесдебу. Мивинуь, э жигей эн хэр, остгьугьо бэгьэй немунди: те Шими э вишегьо-дерегьо э песой хьэйву-женевеьр гешде, гуьргьо оmore, хэр энуре хурдебируьт.

Туфенге э душ веноре, сер дуллу вогошд Шими э хуне, овсуьз, хэрсуьз, супой-пееде. Оммо гьетте э шегьер оmore, Шими Дербенди, дерафд егиле эки эн овчи, «согьбоши», «худорази» гуфди эзу, согь саламет туьфенге, патронгьоре гьемере вогордунд э у.

Овчи-мэхьэлей энду миденишуь мивинуь Шими дес тигьи омори, патронгьо гьеме согьи, мугу, суьпле хэнде сохде:

— Туь, лелей Шими, гьичиш незерей э ов?

Гоф эн овчи эри Шими руьхшендире хуно омо. Шими, сере тик гуьрде, э уьктемирсвоз, мугу:

— Зерем, эйчуь незерем! Негьогь беге согь руз овчнети сохдем, э вишегьо-дерегьо гешдем!

— Гьэмел миёвге пуьрсире, гу гьери: чуьре зерей, кире зерей? — диеш зиьдте суьпле хэнде сохде, пуьрси овчи.

— Хэрмере зерем,— мугу Шими, бигьгьоре тимор сохде,— зерем, гьечу незеремгьо, синейтуь муно, гьич гьэележ негуьрде, е доне гуниле нешенде. Ненге ишмуре хуно мибу,— э руьхшендиревоз, гуфди Шими.— Пес-песоеки, парте-парт туфенг шенденит э песой эн хьэйву, оммо гьич е гунилешмуш э у нисе расире, у вор ведешенде-ведешенде эришму, э ю е локош нерасиреки

согъ-саламет вирихде, рафдени. Зерегор мере хуно биё зену!

Гуфдире и гофгьоре, Шими Дербенди, сере тик гуърде, э уьктемиревоз ведарафд эз хуней эн овчи, перт-мэхьтел гьишде уре.

Оммо Шими э ён хуней хуьшде оморе расиренге, у диренге э лэгГэй дер гьопу зен хуьшдере, гьовойю хэреб бисдо, дуьледэгъдэгъэ бисдо. У хосиет эн зен хуьшдере дануьсде, терси: эгенер зен дануьсдге, ки хэр эз гушесури энэ эз дес рафди гуфдире, сер-гуш энуре динж нигьилуь. Унегуьре Шими, гьетте зен хуьшдере дире, хуьшдере э нечоги вено, э десевоз эз пэхьлуьй хуьшде гуьрде, сер гуьрд э гьемей мэхьэле келе-келе ноле зере, ох кешире.

Зен, диренге шуьвер ю э чуй хьолиге, терсире, видовусд омо э пушой энэ, мугу:

— Эй мерд, вой эриме, туьре чуй бири? Туь эз хуне согъ-саламет рафдебири, имогьой нэхогьгьойтуь шуьл-шуькест вогошди. Хэр туь эжи?

— Эгь, мепуьрс, зен,— ноле зере, гуфди Шими,— гье у хэри э серме и коре овурдигьо. Е шиллогъ эз пой ме зери — пой мере хуьрд сохди, е шиллогъ эз гьэбуьргьэйме зери — дуь дендеймере хуьрд сохди. Эз немурде жиге мундем. Гене худо э ме рэхьм берди, согъ мундем э сер эни гГэйиллегьойме.

— Гье у туь уре доре жуьгьгьо, суьмергьо эз чумгьой энэ ведирово, гуьргьгьо хуро сер энэ гьэдуьр неда-не,— гьэгьри-гГоси бире, нифри сохдени зен хэре.

Шимиреш гьемин гье и воисдембу:

— Дие гьэгьр мекеш, ловой туь эжиге омори,— мугу Шими, э вогьнеки уьгь зере-зере,— гуьргьгьо гьечи хурдет сер энуре, леш энуре, гьич дуьмиш немунди эзу.

## НЕВЕГІЭМЛЕЙ ЭН ШИМИ

Шимире е невэгІэмле бу. У жогьиле одоми бу, эгьуьлсук, хуьшге келегед бу. Егиле у рафдебу э туристически путевкеревоз э Европа эри гешде. Эз унжо во-гошде оморебу, муйгьоре муйгьой кешуше хуно дураз



сохде. Э этен энэ вобугьо ранги-бе-рангие руйшеини сиротгьой жуьр-бе-жуьре хьэйвугьо-женевеьр-гьо вебу.

НевэгIэмле вогошденге, Шими омо эки энэ, хошомори сохд уре, дес юре гуьрд, пуьрси эзу, чуьтамиге э у вилеетгьойге, чуь дивэгI, чуь хосиетгьоиге хэлгь энугьоре, чуьтамиге зигьисдемун — зиндегунни энугьо, чуь э чум энэ унжо хуб-хош омориге эри энэ, чуь зобуниге. НевэгIэмлей эн Шими э и гофгьой энэ жугьоб доре недануьсд. Оммо у э е хьэвесевоз сер гуьрд эри гуфдире, э коми духонгьо, чуьжире шоробгьо, хурекгьо у хурдиге, чуь жире вежегьисдеге жогьилгьой энугьо, чуь жире тозе модгьо ведешендетге...

Шимире эз гофгьой энэ хьэз неоморе, вэхуьшд веда-рафд. Себэхьимуьн е келе мерд, шинох эн Шими диренге уре, мугу эзу:

— Ой Шими, ме шиновусдем невэгIэмлейтуь э дуре улкегьо эй гешде рафдебу гуфдире. Чуь дири, чуь шиновусди у унжо?

Шими гьошгьоре дуллу сохде, мугу:

— Хэр рафди, хэр вогошде, энжэгь палан хуьшдере дегиш сохди.

## «ТЭХСИРКОРИ» ЭН ЗЕНГЬО

Е шев э овилхуне раби эдембу дореш доре. Дореш энэ эз товун эн зенгьо бу. Раби эдембу гуфдире, ки «зен — бэхш гьэлифои», хунризи, эз товун эн зенгьои инсонгьо эз гIуьлом муьрде рафденуьтгьо.<sup>1</sup> Худо э суьфдеи зен э Хьово гьэгьр нисохдге, инсонгьо гьич е вэхдиш нимуьрдуйт.

Раби э дореш дореки э овилхуне Шими Дербендиш дебу. Гьетте Шими эз овилхуне вогошде, хуни-хуни де-

---

<sup>1</sup> Э гуфдирей эн туроревоз суьфдеи зен э гIуьлом Хьово эз гоф худо ведарафде, сибе чири эз дор, эз комики худо гьэдэгьэ зеребу мэху гуфдире. Хьово хурдебу эзу сиб, шуьвер хуьшдере — Одомеш доребу эри хурде. Унегуьре худо э угьо гьэгьр сохде, пиш сохдебу угьоре эз генгIидин ве гуфдиребу эз Одом: «Э эрэгь пушонигуьревоз михури нунтуьре. Эз хок оморей, э хок мирай...

ниши э зен хуыште. Песде хъэловгьой хушдере гъужогъ зере, эдембу э хъэйт ведарафде, зен пурси эз у:

— Эй мерд, туь э ме хуни-хуни э дуьшме дениширере хуно эдее денишире?

— Эгенер туьре данусьде воисдениге, лап келе хунриз, дуьшмен ме туьни.— Хьуьршлуь бире, гуфди Шими.— Унегуьре ме э дуьшменмеревоз э е хуне хисире, сермере э сер энуревоз э е болуш веноре нидануьм.

Гуфдире и гофе, Шими эдембу гьов кенде ведарафде, зен гуьрд уре эз гьул ю мугу:

— Эй мерд, туьре жин гуьрди, ме хунриз бире, келебешмуре куьшдем беге?

— Бебеймуреш туь куьшдей, келебеймуреш, келебей эн келебеймуреш,— гюси бире, жугьоб до Шими.— Э хисобиревоз ме туьре куьште, хун энугьоре эз туь миёсдуьм восдоре. Оммо эз хотур туь дедей эн гьилгьойме бирей, ме э туь дес низенуьм, не э туьревоз э е хуне хисиреш нидануьм. Эдее ведарафденуьм э сер бун эн хуне хисире.

— И дургуне, хэре гофгьоре ки венгесди э мувэхьтуь?

— Лэггэй туьре ги! — Хьэрой вегуьрд Шими э сер зен хуыште,— Раби не туро гьич вэхдиш дургуни нируют.

Шими гуфди эз коми раби шиновусдиге и гофгьоре эз товун эн гювункори зенгьо э пушой инсонгьо. Зен Шими шиновусденге и гофе, сер гуьрд келе-келе эри хэндуьсде.

— Хуб, эгенер зен усоле тейфеиге, бэхш гъэлифоиге, песг гье у раби се зене эйчуь вегуьрди эри хуыште?.. Гьемей энур раби гуфдире гофгьо — нэгьуьлгьой, овосунегьой. Туь нешиновусдей беге меселере: «Раби гуфдирере месох, чуь ю сохдеге, туьш гьечу сох».

Шими гье у сэггэт олхогьин бире, чумгьоре келе сохде, дениши э зен хуыште, ловэ э шоре хэнде веберде.

— Э жун бебейтуь зен, чуь эгьуьлменде гоф туь гуфдири,— шори-шори гуфди Шими, хъэловгьоре э жигей ю норе,— себэхь илчигьоре вегуьрде эдее рафденуьм дуь зенигеш эри хосде эрима. Туь хуб мере э сер венгесди.

## ЖЕЛЕГЬОЙ ЭН ШИМИ ДЕРБЕНДИ

Е вэхд Шими заведиш эн птицафермай эн колхоз кор сохдембу. Эз дуй тараф эн ферма више бу. Кими вэгІдо шевгьо туьлкигьо, чоьгьолгьо эз више ведироморе бердембируйт керг-вечере. Унегуьре Шими э гьирогь эн више желегьо норебу, туьлкигьо, чоьгьолгьо э желе оф-донут гуфдире. Э гьечиревоз у туьлкигьо-чоьгьолгьоре терг сохд. Председатель колхоз уре эри эни кор лап келе тэгІрифи до.

Оммо председатель колхоз не председатель ревизионный комисие ишу сер ебо э ферма оmore, гьишдембируйт, Шимире е ченд керг куьшде, буржунде норе э пушошу э шоробевоз эри хурде. Кими вэгІдо председатель хьэрмэхьгьо, дусдгьой хуьшдере овурде э ферма, хьэз сохдембируйт эришу.

Егиле председатель э дусдгьой хуьшдеревоз э ферма э оmoreки, миденишуь мивинуь э гьирогь више бугьо желегьо э сер эн рэхь норе омори, пушой эн рэхьэ ведабурри. У машине поюнде, фураморени, огол зере Шимире, пуьрсирени и чуй кориге.

— Э жун туь, председатель, — гуфди Шими Дербенди, — Керггьо-вечегьоймуре дие эз чорпоие туьлкигьо-чоьгьолгьо терс нисди, угьо дес кендет. Угьоре имогьой терс гьисдигь эз дуй пое туьлкигьо-чоьгьолгьой. Унегуьре ме желегьоре эз гьирогь эн више вегирдем э сер эн рэхь венорем.

## ЕНГЕГЬОЙ ЭН ШИМИ

Шими жовоне кук гьисдики, бегегьо-дедегьой энун эри Шими зен хосдебу. Эз дигь эн Муьшгуьр эз хуней эн куьгьне шинохгьошу. Те шев эн гІэруьси домор егилеш руй эн одохлуй хуьшдере недиребу, э уревоз э ежиге бире гоф-гелиж, дес-вози несохдебу. Шев эн гІэруьси, чуйтам гІэдот гьисдиге, пушой эн гелин-гиьв бире, дуй одоми эри энун енгегьо поисдебу. Енгегьой эн Шими гьердуй муьшгуьригьо бу.

Е ним сэгІэт негирошд, енгегьо куфд дере, огол æ ведировунд Шимире.

— Гьо, чуй хэбери? — пуърсируйт енгегьо.

— Гьеле гьичиш, сере дуллу гуърде гуфди Шими.

— Эй дуьмбурра!... Туь мерди небуге кини?... — хьэрой вегуърд еки эз енгегьо.

Дуьимуьн енге, эзу куьнд биер, е синле вено э Шими. Песде енгегьо кешируйт бердуьт доморе э дерьёгь, гьишдуьт сер-тен юре векенде, э гІов дарафде, тен шушде, э хуьшде дилов гуфдире. Вэхд поизи бу, гІов хиник бу. Лерз эн Шими пою гуфдире, уре е-дуь пейле шороб дорут, дефуърсорут э ки эн гІэруьс.

Гирошд гене е ним сэгІэт, енгегьо дере куфде, огол зере ведировундуьт доморе.

— Чуй хэбери? — пуърсируйт енгегьо.

— Гьеле гьичиш, — сере дуллу гуърде жугьоб до Шими.

Енгегьо гене сер гуьрдуьт эри гІэйб-номус доре Шимире. Е-дуь синле кешире гене э Шими, бердуьт уре э дерьёгь, тен энуре шушде дуборе дефуърсоруйт э ки эн гІэруьс. Шими эз хиники не эз терс енгегьо лерзире, дуьледэгьдэгьэ бире и дес недениши те енгегьо уре гьегене огол зере, ведировунде, Шими ю хуьшдению ведиромо э ки энугьо. Енгегьо гьечи дануьсдуьт домор не гІэруьс дие гелин-гиёв бирет, шори сожде, куьнд оморе эз Шими, пуърсируйт:

— Чуй хэбери?

— Куит мере, берит гене э дерьёгь, оммо дануьсде бошит и дес эз дерьёгь месуьз могошдит. Э ижире гужевоз гелин-гиёв бирейнжон э гьэргьги ковре дерьёгь домунде хуби, — зар доноре гирисд Шими, юре э хуьшде езугь оморе.

## ЛОВОЙ ЭН ШИМИ ДЕРБЕНДИ

Косибе вэгІдогьой Шими бу. Егиле у оморебу э ну-маз эри эз худо е лово хосде юре е кем пул дуь гуфдире.

— Эй худо, — мугу Шими, чумгьоре э сергьови ну-маз доноре, — эз себэхьэвоз э лэгІэйме е тике нун неде-

рафди, шуьгъэмме э кемерме вогосири. Ди мере е кем пул, омбар нэгI, эри е нун, е тике пени, не е пейле чой э шекеревоз восдоре.

Э ён эн Шими е гIошир поисдебу, шуьгъэм ю омбар келе бу, ченд е дегъ бедиреи хуьм. У ловой эн Шимири шяновусде, гIоси бире, шефд дениши э у:

— Эде, туь гье э и бине гушме оmore, ижире лово эричуь хосде эз худо? Меш оmoreм эз худо эй лово хосде, эйме пул фуьрсуй гуфдире. Оммо мере пул омбар гереки: тозе богъгьо эй дешенде, коньяк сохденигьо завод эй вокурде, тозе хоригьо эри восдоре, чоримуьн эен эри хосде. Худо шиновусдге ловой туьре сэгъэти сохде, мере унгъэде пул нидуь.

— Туь мунош,— мугу Шими эз гIошир,— энжэгъ э хотур туь ме эз худо унгъэде пул омбар нехосдем.

— Чуьтам эз хотурме? — мэхьтел бире, пуьрси гIошир.

— Гуш вени,— мугу Шими,— ме эдее диренуьм, худо мебуро, туьре чуь шуьгъэм вериге. Денишируьм э шуьгъэммеш э шуьгъэмтуьш. Ме эриме веровурд сохдум, ки э ён чуьтуьни гьолинде шуьгъэм поисде, э ме лоигъ нисди эз худо пул эри омбар хосде. Чуьтуьни шуьгъэме эри сирой сохде омбаре пул гереки, мере ки е тике нун, е тике пени, е-дуь пейле чоиш весси. Худо рази гердо эз худо!



# Ихдилотгъо



## ЧУЪТАМ МЕ ЭЗ МУЪРДЕ ЖИГЕ ХИЛОС БИРЕМГЕ

**Е** гиле ме хов диребируым муърдем гуфдире. Гьетте ме муърде, чуътам э иму гӀэдот гьисдигьоре хуно, сер-тен мере векедуют, тенбирэхьне гьишдуют мере, эз сер кроват, вегуърдуют (егӀни, муърдере э хьэлов жиге нисди). Тенме гьеле бегьем хиник небиребу, мере э сер бирэхьне хори, э куьнж эн хуне дегердундуют (егӀни, дие э ме не хиникиш, не е гӀэзориш кори нисоху). Куьнж эн хунере перде кешируът, мере кес невинуьгу гуфдире (гӀэйби эхи муърдеш гьисдиге, келе одоми тенбирэхьне э пушой келе жэчӀмет леш хуьшдере узатмиш сохде дегешде).

Песде е ченд мерд тен мере э герме гӀовевоз шушдуют, мере хьомумлениш сохдуют (ме недануьсдем, э у гӀуьломиге тен не шушде, «санобработка» негирошде, нисе дегьишде гуфдире). Песде эриме сипре эхироти духде, вокурдуют уре э тен ме. Вонорут мере э сер эн мида, зури-зури бердуют э сер эн гьоврегьо.

Ме муърдемгеш, чумгьойме эдете диернуът, гущгьойме эдете шиновусденуът гьемей эни коргьоре.

Э пушой эн митойме хэгьергьо, холегьо, гӀэмегьойме муй векеде, эдете эриме гирисденуът.

Эз сер эн мида ме эдее диренуым, чуьшме э асму чуътам товуш дорениге, хэлгъэ, мере эри гьовре сохде оморенуътгьоре, хунегьо, кучегьой эн шегьере. Дуьлме омбор догьиногьы, тенги эдебу сохде. И шегьер эриме дувойне гӀээиз бу. Ме хуьшдениме зинде гьисдики, гуйге, бригадир эн сенгьчигьо бируым. Омборе хунегьо э шегьер э десдин-десмеревоз нен хьэрмэхьгьоймеревоз вокурде оморебу. Чуътам эри богьдор, ю кошде тегьенгьо, емишдоргьо хуш, гӀээиз гьисдуьтге, гьечи и вокурде хунегьо эриме гӀээиз буьруът.

Дуълме эдембу лов бире, ме эрме фикир сохденге, ки ме дие шегьермере, и хунегьо, и кучегьоре гьич те гьоймей гьиемет э чуммеревоз нивинуъм, косибе гІзилгьойме бебесуыз мундуът, ме гьеле келе мерд небиреки, офдоре муърдуъм гуфдире. Оммо ме эз лэгІэйме е доне гофиш неведировундум, е доне охлеш некешируъм, чуьнки э муърде лоигъ нисди жен-жели сохде, гьерчуь бисдо эз лэгІэ эри пертово доре, у бие хуьшдере динж, саламет гируь, домор эри гІэруьс овурде рафденигьоре хуно. ЖэгІмет э сер гьоврегьо омо. Дусдгьо, хьэрмэхьгьойме мидай мере эз сер душгьошу вегуьрде, э сер хори, э ён тозе векенде гьовре норут. Эз гьэд эн гьовре, э коминжоки ме имогьой биё дегешдуъм, эдембу буй неми, буй эн пусирейгьо оморе. Э иловлеймеш гьоврегьо, нуьвуьсде сенгъгьо бируът, поисдебируът жерге-жерге сессуыз, гуйге могъбуле хуно, лос бире поисдебуьруът. Угьоре диренге, бирден э ёрме омо гофгьой эн буьзуьрге шогьир Омар Хайям:

Имогьой туьре миденуът э гьовре,  
Эжеки нисд не товуш, не астаре,  
Гуш вени, и сура э екиш туь мегу,  
Суьпенжегуьл зинде нибу дуборе.

Э зевер серме гьэдимие боругьо гьэлебендире хуно поисдет, охмури кеширере хуно, савзелуье богъгьо, э пойней ме, екем дурте, эдете дуълмере хуно шивен сохде шаргьой эн ковре дерьёгь. Дуълме дэгъ-дэгъэи: ини гьейсэгІэт мере эз сер эн мида вегуьрде, миденуът э гьовре, ме дие не ковре асмуре, не суьрхине астарегьоре, не герме чуьшмере, гуьлишонлуье дуньнёгье гьич э чуммеревоз нивинуъм. Ме э ижире дерд, думит дерики, бирден э гушме дерафд сес эз товун митинг эн ёси вокурдеи, эз товун эн муьрдеиме. Эз нуминей эн корсохгьойму гоф дорут куьгьне усдоре, келе мерде Дада Бадаева. Бригадайме э бригадай энуревоз бэхьс бердембуьруът э кор. Дуълме екем гьемин бисдо шиновусдумки сес эн дусд, хьэрмэхьмере. Ме дануьсдуъм, ки у е-дуь хубе, дуьлсухуние гоф, эз дуьли, жуни эн гьемме мере шинохдегоре одомигьо мугую эз товун ме. Оммо гуйге эз мазалайме эз некуми сенгъ зерере хуно бисдо, кейки дусд ме эз куьф хуьшде ведешенде э машинке печат зере докладе, э чумгьой хуьшде чешмек веноре, сер гуьрдки эри хунде.



«Хьовиргьо! Э песини вэхдгъо э вилсет иму э гъеме жиге омборе хунегъо эдете вокурде оморенуът эри жофокешгъойму. Девиз иму гьисди — хуб вокурде, зу вокурде, ужуз вокурде тозе хунегъоре...»

Песде Бада Дадаев сер гуьрд эри мэгІлуьм сохде э сер гъоврегъо кура бире жэгІмет, чендгъэде, э коми кучегъо корсохгъойму хунегъо вокурдетге э шегьер, ки эз пушолуье корсохгъойму э кор хубе нишонгъо бурмундениге. Эз товней ме Бада Дадаев мугу ме э е дес керпич гуьрде, э е десиге карасдире э е смена дуьвойне нормаре бегъем сохдембируьм. Келе мерд юш дануьсдембу, ки ижире гофгъо гуьнжолуь нисди э сер гъоврегъо эри гуфдире, оммо саре жумунде, гъошгъоре гъуьжунде, суьгъуьсде-суьгъуьсде эдембу хунде у доклад хуьшдере, комиреки киниге пуш-пушоки нуьвуьсдебу эри эню. Э эхир эн доклад у эз когъоз чум вегуьрде, е пертовуш дениши э лойме. Песде, э хьисобевоз, терсире ю э когъоз хунде жигере ниофу гуфдире, гене чуме доноре э доклад, хунд ижире гофгъоре:

— Дусд иму, туь Хьызгъил. Бигъил иму э тозе куче вокурдеймгъо чортебэгъэи хуне э коммунальни герекигъоревоз еревурд бугу эритуь эз товун сохде коргъойтуь, кешире жофогъойтуь э коллектив иму. Туь э гІуьмуьр туь омбор кор сохдей, омбор жофо кеширей. Имугъой хис э олхогъиниревоз. Рэхъ туь ник, жигейтуь — саламет!..

Ме чуме-чару сохде, денишуьруьм э иловлейме. Хэлгъ гъеме и доклад эн Бада Дадаева шиновусде, эдембуьруьт суьпле хэнде сохде, эжигей могъбули, хьэйфбери кешире эз товун муьрдеиме. Е саре гудеге мерд, буьхьуьлуье келе чумгъо, э дуь десевоз эз гъолинде шуьгъэм хуьшде гуьрде, эдембу хэндусде. Эриме и кор лап гурунде руьхшенди омо: «Ах, зйчуй бие дусдме Бада Дадаев вэхуьзуь э сер эн муьрдеиме ижире отчетни доклад хуну? — фикир сохдум ме эри ме, — е хубе, дуьлсухунне гоф беге гъэгъет бу инжо, эзини руз эри гуфдире эз товней ме? Эхи эз муьрдеи эн инсон, эн дусд, эн хьэрмэхъ зиьдте чи нисди э гІуьлом. Беге ме, согъ гІуьмуьрме энжэгъ э дес керпич гуьрде, э е десиге карасди гуьрде зигъисдем? Ме хьэрмэхъ бирем, бебе бирем, э дуьлме ниетгъо, хэьлгъо дебирет. Бегем эз товун энигъо е-дуь хубе гоф гуфдире нисс бирембу?»

Гудеге мерд, бухъуьлуь келе чумгъо, гъолинде шуьгъэм гъейсэгІэт евош нэгІ, эдембу келе-келе, керге хуно, шэгъгъэ зере, хэндуйсде эз гофгъой эн Бада Дадаев. Ме суьфде омбор эзу гІоси бисдорум. Песде бирден мереш хуьшденимереш хэнде гуьрд. Суьфде евошлей, песде лап сэхд сер гуьрдуьм эри хэндуйсде. Чендгъэде ме хъэрекет сохдум не хэндуьм гуьфдире, оммо хуьшдере гуьрде недануьсдуьм: гуйге киниге мере эдее гъилигъили дореге. (Эхи чуьш бисдоге э муьрде лоигъ нисди эри э зиндегъо хэндуйсде). Бирден омо ижире махътеле кор бисдо: ме эз муьрде жиге зинде бисдорум. Сие шоле эз сер мидайме шенде, ме вэхуьшдуьм э пой.

Ме шиновусдебуьруьм хэнде одомире эз ченд жире ночогъигъо хилос сохде гуьфдире. Оммо мере хэнде эз ижире беди — эз уьлуьм хилос сохд.

Себэхъимуьн ме эз хов хэбер биренге, э ёрме омо, чуьтам мере э хов бердебуьруьтге эри гъовре сохде... Мугум эз вен ме:

— Дануьсдени чуьниге, ме эз туь пушоте муьрдуьмге, туь жун бебе-дедей туь, гу э сер эн гъоврейме митинг невокунут.

## ТЕЛЕФОН

Э жун ишму, мере худо гъэлет сохди, ме э хуне телефон норей. Эйчуь бу мере и кор! Телефонсуьз могъгъул, коргъой гуьфдиренигъоре хуно: гушме динж бу, лешме рэхъэт. Хуб хурдембуьруьм, хуб хисирембуьруьм, гъовой меш лап хуб бу. Оммо эзи ализе телефоне ме э хуне норе эйлоревоз, мере ишдогъиш нисди, ховиш нисди, гъовоймеш усол бири. Гъеле сер зиёди, и перигъо эз товней эни телефон, кем мундебу мере паралич незенуь.

Эз елойге гъечи хуби эриме, лап жигеюни. Э ме ченд бо гуьфдиребуьруьт эз контор телефон дешенденуьтгъо, герек нисди гуьфдире мере телефон, егІни, эз хэйр энуг зарал ю омбори. Эз гъеме омборте гуьфдиребу э ме эз товун эни кор начальник эн контор — е лэгъэре, огъиле, соките одоми.

— Эйчуьни туьре телефон? Кортуй — нуьвуьсдеини. Оммо телефон энжэгъ мешет мибу э нуьвуьсдеигьойтуь, омборе вэхд туь э ногьогъие гофгьо-тележгьо сохде мирав э кесгьойгеревоз.

Ме э сер гоф ме гьиретине гуьрде нэхьсе хуно поисдуьм, мугум эзу:

— НэгI, э хунейму гьуншигьоймере гьисди телефон, эримеш деше. Эри энугьо гIэмел оморенге, эриме эйчуь гIэмел ниьв?

Начальник эн контор бэгъдовой ченд рузиге э хуне телефон дешенд. Телефон е рач бу: сипи, тимор, ширмогьире хуно. Э у дениширенге, мере воисдембу уре гIэиле хуно тимор сохде — ингъэде раче телефон бу. Оммо телефон гоф нис сохдембу, «лол, кар» бу.

Е орине гиросхде бэгъдо вегуьрдуьм трубокере эз жиге корме зеруьм телефон эри эн начальник эн контор.

— Телефон ме эхи гоф нис сохде, и чуь кори? — пуьрсуьруьм ме эзу.

— Телефон патефон нисди, гьеусэгIэт, гьетте пластинка доноре эри хунде, — жугьоб до э сабуьрлуье, олхогьине сес хуьшдеревоз начальник эн контор.

— Е оринеи эхи эзу сес нисе ведироморе, гоф нис сохде.

— Гоф месохугу, мунугу гьечу. У эз ишму нун нисе хосдеки?

— Эрио, гьечуни, оммо...

— Вессит, — бурри нимелит гофмере начальник эн контор, — имуре гьейсэгIэт хэвлете номергьо нисди, биренге гоф мисоху.

Гиросхд гьечи се мегь. Ме гене эз жиге корме, трубокере вегуьрде, телефон зеруьм эри начальник контор.

— Телефон теимогьоиш гоф нисе сохде.

— Месохугу, эз туь нун нис хосдеки у.

— Эрио, у дузи, энжэгъ телефон гьоргой гири биь гоф соху, небуге нэгI? Дие эйчуь дешендейт эриме телефоне?

— Ишму гуфдирейт дешенит гуфдире...

— Эри, ме гуфдирем телефон дешенит гуфдире, оммо у гоф соху гуфдире... Эхир-эхириш ишму мере гьечи визор миьрит, ме мивегуьруьм е фельетон муьнуьвуьсуьм э дес ишму, — терс дорум ме начальника.

Е согъ минут эз трубка сес эн начальник не омо. Песде шиновусдум:

— Нуувуьсит ишмуре воисдениге, оммо дануьсде бошит, ки эз фельетон телефон нибу...

Дуьимуьн руз э сер столме телефон сес сохд. Ме эриме фикир сохдум, ки гьейсэгIэт е дусдме, енебуге е шинохэ зен э меревоз гоф мисоху. Зури-зури вегуьрдуьм трубкаре.

— Алло! Алло! Чутьтами хьол эн зенме? — шиновусдум ме э трубка.

— Чуть? Чуть?

— Мугум хьол эн зенме чутьтамиге? — эдембу пуьрсире дуборе гье у мерд.

— Ме эз же дануьсденуьм хьол зентуь чутьтамиге. Ме эже, зен туь эже? Туь шуьвер зентуьни — туь дан хьолюре, — гIоси бирере хуно гуфдурум ме эзу.

— Пой, пой, и бега больница нисди, — э хоширевоз гуфди гье у сес.

— НэгI, хуней, — жугьоб дорум ме.

— Гьо-о, гьечу буге бэхшлемиш сохит, — гуфди мерд э трубка.

Ме норум трубкаре э жигей ю нуьшдуьм э жигейме эри кор сохде, песде гьегене сес телефон омо.

— Бэхшлемиш сохит, гуит чутьтамиге хьол эн зенме? — эз сес шинохдум гье у мерди пуьрсиренигьо.

Ме жугьоб не доре норум трубкаре э жигей ю. Оммо е минутиш некеши, телефон гене сес сохд, гене гье у мерд эдее пуьрсире: «Чутьтамиге хьол эн зенме?»

Ме эз дуьлме гуьрде, сэгIэр кешире одомире хуно гуфдурум эз у:

— Эй жонум, инжо больница нисди, хуней ишму егIэлмиш бирейт...

— Бэхшлемиш сохит, коми номери телефон ишму? — хоши-хоши пуьрси мерд.

Ме гуфдуруьм номер эн телефоне. Гьетте номер эн телефоне шиновусде, гуйге уре жин гуьрд, у сер гуьрд э трубка эри хьэрой сохде, мере терс, гьелебуле доре.

— Ишмуре гIэйб нисе оморе?! Эйчуь дургу гуфдиренит? Ме диш, периш гье э и номер телефон зерем э больница, мере, чутьтам герек гьисдиге, жугьоб дорет, оммо ишму инжо эдейте мердимазари, хьиллеи сохденит. Ибуд бошит эз ён телефон, небуге ме гьейсэгIэт милиционере огол мизенуьм.

Ме трубкаре норум э жигейю, оморум нуьшдуьм э жигейме, вегуьрдуьм гьэелеме эри нуувуьсде, оммо не-

дануьсдуьм дие кор сохде, фикиргьойме, гуйге эз луле инжимиш бире вирихде г'анггьоре хуно, лов-тум буьруьт, ме угьоре дие кура, жэгим сохде недануьсдуьм. Гьэлеме дуборе норум э жигей ю, вегуьрдуьм эз ещик папрусе, кешируьм. Папрусмере гьеле кешире неварасдебуьруьм, гене киниге эриме телефон эе.

— Гуит гьери ишму муношит, мере чуй г'эил бири: куки небуге духдери?

Ме гьеусэглэт э сер офдорум: гене э больница, э «родильный дом» эдете телефон зеренуьт.

— Ме согь орине э чул, э гелегьоревоз буьруьм э гьишлогь, гьейсэглэт оморем э шегьер, гьеле гьичиш нисе дануьсденуьм,— гуфди мерд.

— Ишмуре чуй г'эил воисде? — вомунде одомире хуно пуьрсуьруьм ме.

— Эриме бэшгэ нисд...— э хуьшде домундере хуно жугьоб до у.— Гьелбет мере г'эил нарине воисдембу, чуьнки мере шеш духдери...

— Омборекбу, ишмуре г'эил нарине бири,— гуфдурум ме, норум трубкаре эжигей ю, мугум э дуьлме: ме гьечи гуфдурумге, дие у мере э и зуригьо инжимиш нисоху.

Эз е-дуй минутиге бэгьдо гене сес эз телефон омо.

— Зенме зенди, небуге гьеле незенди? Иму э хуне э сер г'ов верире хуноим, э гузетим...

Телефон зерегоре одоми нум, фамилей эн зен хуьшдереш гуфди.

Ме е ченд дэгь-дэгэ трубкаре э дес гуьрде, эдембуьруьм фикир сохде: «гуюм — незенди, гене сер ми-гуьруьт эри телефон зере, сер-гуш мере берде». Мугум эз мерд, зентуь зенди, хьол ю хуби, шолум ве саламет дори эришму.

— Чуй г'эил зенди? — зури-зури пуьрси мерд.

— Чуй г'эил воисде ишмуре? — пуьрсуьруьм ме.

— Мере духделе воисде, нум дедеймуре эй норе. Келе ниетмени...

— Омборек бу, ниет ишму эжиге омори, ишмуре духдери бири,— олхогьин сохдум ме уре.

Ме вегуьрдуьм эз сер эн кровать болуше венорум э сер эн телефон, сес эну э гушме недараз гуфдире.

Сибэхьимуьн киниге э поевоз тарпе-тарп е сэхд куфдери хунеймуре, дер гуйге гьейсэглэт э хори мофдону. Видов-видов оморум, дере вокурдум, мивинуьм э лэг'эй

дер е денушдее мерд поисди. Э сер ю килэхь бухоре вери, э пойгьою чекмегьой хром, э тен ю гимнастерка не шовол гелифе. Мерде е келе сие биггьгош вери. Э десгьой мерд се гундогь вери — дуьдуь э расди дес, еки э чеи дес.

— Ме пуьрсирем, дануьсдем, ишмунит эриме э телефон жугьоб доребиритгьо, мере кук бири гуфдире. Мере кук небири, духдергьо бири, ини гьерсе духдер э гьужогьме вери, — гIоси бире гуфди мерд.

— Гьери ме чуй сохум, тэхсирме чуйни, — мугум меш.

— Туь чуй сохи, тэхсиртуь чуйни? — диеш гIоси бире биггьгьоре вежегунде, чумгьоре чарунде, гуфди мерд... — Туьре воисденбу, егIни, э ме келлег биёй, эме хэнди, руьхшенд сохи, мере духдергьо бири гуфдире? Гьич туьре гIэйб оморени? — У лугьонд нефес кешире, гундогьгьоре хуб э дес гуьрде, э ме шефд хуни-хуни, э дуьшмен хуьшде дениширенигьоре хуно, денишире, мугу эз ме. — Э ижире «зерифетевоз» туь неки э ме, э духдергьойме, э гьеме зенгьо руьхшенд сохдей, егIни, мере духдер бирей — руьхшендини.

— Эй балам, гьич ужире мэхьшовогоь э фикиргьо-хэйлгьоймеш недебу. Эйчуй гуфдире туь ужире гофгьоре. Ме гьечи, э лэгIэйме оmore у гофе гуфдирем, э дуьл зобуниревоз нэгI...

Гофгьойме э бебей духделегьо кори несохд. Гоф мере нимелит бурра, у гене сер гуьрд мере эри серкуш зере, гIэйб, номус доре...

— НэгI, нэгI, ижире коре э ишму бэхшлемиш сохде гIэмел ниёв, мугу гене у, келе-келе, туьндлемиш бире, — У э уьктемиревоз сере тик гуьрде, мугу — Э гьужогьме се духдер вери. Духдер гьейсэгIэт — инженери, духдер — учителя, духдер министри, духдер — депутаты. Эз товней эн духдергьо, пушолуье зенгьо книггьо нуьвуьсденуьт гьейсэгIэт. Хьэйф, хьэйф, зенме зенди-зенди, гьеебо чор доноре незенди, э синей энду медаль эн суьрхи эн «Мать Героинаре» мивоно. Эз гьэгьр чуйн ишмуни пес мунде одомигьо э пусире дивэгIгьоревоз. Телефон дешендейт э хуне, загранични мебель восдо-рейт, оммо муьвэхь ишму эн вэхьше одомигьоре хуно мундет...

Бебей эн нуьгь духдер гьеле гофгьо, охмуригьой хуьшдере гуфдире неварасдебу, мивинуьм е мерд, си-

фет ю вечирере хуно, э сер ю шляпа вери, э дес ю е гъундогъ дери эдее э пилоконгъой хунейму веромере. Мугум э дуълме: и у мерд небу эриме телефон зереbugь, комики эз ме гуфдиребу юре духдер воисде, нум эн дедешуре эри норе, оммо уре эжигей духдер кук бири. Имогъой уш э хысобевоз омори мере эй серкуш зере, гЭйб доре, нифри сохде. Ме гьеусэгIэт дер хунере сэхд сохдум, видов-видов оморум трубкей эн телефоне вегуърде, телефон зеруъм эри начальник эн конторей связь.

— Хьовир начальник, и чуй кори, эз ишму мере номер дорейт, эриме гьеме телефон зерегор больницаре пуърсиренуът.

— Гьо-о! Эри, эри, дузи, иму ишмуре номер эн больницаре дорейм. Унжо угьоре зиэдие телефон бу. Усуъиш угьо э рэхъ миравт,— э олхогьиниревоз жугьоб до начальник эн контора.

— Чуътам олхогьин бошум ме — шев-руз мере динжи нисди, гье эдете телефон зеренуът, пуърсиренуът: «зен ме чуътами, чуй гIэил бири имуре», ме кор сохде нисе дануъсденуъм. Мере эз товун эни кор э ченд одомигьоревоз гофе-гоф бири, хьэрой-хьэрой бири.

— Бисдогеш мибу у кор,— жугьоб до начальник эн контор.

— Текей мибу? — э дуъледэгъдэгъэиревоз, пуърсуъруъм ме.

— Те тозе обонентная книжка неведешенуът, и номер эни телефоне э нум ишму ненуъвуъсуът.

— Кей миведешенит ужире книжкаре?

— Эз чор-пенж салиге бэгъдо,— жугьоб до начальник эн контор.

И гофе шиновусде мунде, серме черх хурд, гиж бисдо, гьолоке хуно офдорум э сер эн куърси, омбор э пешмуни эну кор домунде, эйчуъ ме гьэлет бире, гуфдурум, талаб сохдумге эзугьо эриме э хуне телефон дешенуът гуфдире. И телефон небисдо бологъ бисдо э серме.

Боби десдечу э дес дери эдембу эз гІэруьсихуне во-гошде. Оммо ловгьой энэ э гІэруьси бире одомире хуно небу. Гьошгьо-гьобогьгьой энэ дулла бу, дуьл хуьрд, пешмуре хуно бу. Эёр энэ исэгІэт оморембу у ю э гІэруьси дире коргьо, шиновусде гофгьо.

— Уф, Гевгьер, Гевгьер, чуь гуьм туьре ме, — гІо-си бире э зен хуьшде келе-келе гуфди Боби, — килэхь мере э хори зери, биёбур сохди мере э гьемей шегьер, э пушой дусд-душме.

Э пушой чум энэ омо чигьрет зен ю, Гевгьер. У эхьисобевоз гьейсэгІэт олхогьин — форигьэт хисири, гьич эз гІуьломиш юре хэбер нисди. И думит э ёр Боби омореки, у диеш гІоси бире, десдечуре сэхд зере э хори, эз синей энэ е ох-ноле ведиромо, ярауь бире одомире хуно.

Пушой себэхь бу. Боби эз гІэруьси во-гошдембугьо вэгІдо. Э кучегьо, мэхьзлегьо е доне одоми ве-ди небу. Хэлгь э ширине хов дебугьо вэгІдо бу. Оммо серине шогьвор себэхьмундеи вокурдебу. Э гІэрей энэ хэсде луьгегьой энэ доргьо, э дуь тараф куче вебуьруьтгьо, эдембуьруьт сесгьой энэ эз хов хэбер бире бэгІвечегьо-муьргьо оморе. Асдарагьош еки-еки эдембуьруьт де-рафде, торик бире э гьово.

Э ёр энэ эз фикир не гьэгьер серсоне хуно бугьо Боби омо гьозие-гьэдер энэ гирошдигьо руз.

Ди шохьонгум Боби эз кор оморенге, дес-руй хуьш-дере шушде, суьфделе нуьшдебу чой-чи эри хурде.

— Дануьсдени чуьниге, Боби? — гуфди эз Боби зен ю, е пура зен, э хэсде муйгьой сер ю сипии офдоре, — имуре имбуруз э гІэруьси огол зери.

Боби пейлей чое но э сер стол, дениши э зен хуьшде.

— Энкини гІэруьси?

— Эри кук Рэхьмон хьэрмэхьтуьни гІэруьси. У огол зери имуре.

— Деш хуб, — шор бирере хуно, гуфди Боби, пей-лей чое дуборе эз сер стол вегуьрде. — Огол зере бэгь-до, рафде гереки.

Гевгьер жугьоб недо. У сере дулла гуьрд, поисд эзи могьбул бире одомире хуно. Боби мэхьтел мундере ху-но дениши э сифет зен хуьшде.

— Эз дуьли туь нисди беге имбуруз эри кук хьэр-мэхьме гІэруьси бирей?



Гевгьер гье усэгIэт сере тик гуърде, оггьир-домогуь-луь бисдо. Эз гIэйб не гъэгьр у ггьирмизи бисдо.

— И чуй гофи туь гуфдирени? — мугу у эз шуьвер хуьшде.— Ме беге нехогь эн Рэхьмон нен кук юнуьм, енебуге нэхогьме бэхили-хылети е паре одомигьоре хуно, туь и гофе эз ме гуфдирени? Ме екем хижолети эдее кеширенуьм, чуьнки дес иму ггейсэгIэт тенги.

Боби хуни-хуни дениши э Гевгьер, эз гъэгьр пейлей чое дур но эз хуьшде, е ох кешире гуфди:

— Ишму, зенгьо, тэггьиемет ггьемише эз шуьвергьо биразинит. Э куьф ишмуш, э кешешмуш пул оворде дешенденге велг вишере хуно, гене мугуит: «кеми», гье муьр-муьр мисохит:

«Эйчуй гуфдире и мерд и бедхьисобие гофе? — туьндлемиш бире, э дуьл хуьшде мугу Гевгьер.— И бисд сали у хуне гуьрди, ебош недири Боби волговуше хуно биёру э кешей энупул пур соху не у эз шуьвер ужире пулгьош нисе хосде. Ггьер мерд э хьэллов хуьшде гуьре пой микешуь. Шуьвер энупул рангчи зиьдте нисдигеш, эри Гевгьер у эз министргьош зиьди, бебей гIэйлгьойюни, товуши хунейюни. Боби пул кем оворденигеш, у, Гевгьер, серберэхьи хунере сохдени, коре э рэхь бердени. У нисе дануьсде беге, зен селиггьэлуп небисдоге, пул гуьрдегор небисдоге, дегь одоми ггьэзенж сохдегор бугу, еки пуч сохдегор, гене э пушой чум чи веди нибу. Э у кем-омбор шуьвер оворденигьо пулевоз, Гевгьер хунереш эдее э рэхь берде, партал гIэйлгьореш сохде, эри хурдеш михьтожи нисе ггьишде кифлете. У чуй соху хуней кифлете ггьер руз эри хэржи пул гереки гуфдире.

Эгенер одомигьо э хурде пул хэржи несохдге, серишу суьрхи мибисдо, пойгьошу зар-зари. Эричуй гуфдире у э Гевгьер ижире гофгьоре? Биггил и ггьононмезе шуьвер энупул, Боби, дануь, э у Боби оворденигьо пулгьоревоз хуне э рэхь берде зарифет нисди. У э гIэруьси рафдге имишев, гене е сад-дивисд монет биё векенуь эз лэгIэй гIэйлгьо, эн кифлет, беруь, эри шомош доре, ссхьиб гIэруьсире эри доре. Уре, Гевггьере ггьечу ужире текелифи, э гIэруьси герек нисди. Э шеггьер уггьоре, зен ве шуьвере омборе шинохгьо, дусдгьо, хэггьер-бироргьо дери. Меггь, енебуге орине нисди э хуней эн еки энуггьо гIэруьси небу. Бугу гIэруьси — шори, чум ю кур гердо, ки нисе хосдеге шори-ники эн кесе. Оммо, у Гевггьер ви-

зор омори: сер ебо гІэруьси бире, угьоре э гІэруьси огол зере, Боби е эхушевоз, е э гужевоз эз у е сад-дивисд монет векедени. Песде е дуй орине эз гъэгр эни кор дуьл эн Гевгьер дорд дорени.»

Боби сере гъуз гуьрде эз зир чумгьо гъош-гъобогъ-луй эдембу денишире э зен хуьше, недуьл-недуьл гуш веноре гофгьой энуре. У дануьсдембугеш, ки гуфдире гофгьой эн зен ю дуз гьисдигеш, гене у гьейсэгІэт эз Гевгьер гІоси бу. «Чуьтам мирай э гІэруьси пул «шо-мош» неберде э хуьшдереоз? Нирай — гъэгры ми-бошут».

Боби егилейгеш тиж, тигъэт дениши э сифет зен хуьше. НэгІ, эз сер-сифет, гъош домогъ ве лов-буз зен веди буки, у не э хоширевоз, не э гужевоз, имбуруз уре эри э гІэруьси берде пул нидуь.

Оммо вэхд эдембу гироше. Гъово лап торик бире-бу. Чорей Боби небисдо, эз зе гъэгры бире, е гоф эз лэгІэй хуьше неведировунде, вэхуьшд эз сер стол, куьнд бисдо эз вешалка, вено э сер шопкей хуьшдере, веда-рафд эз хуне. «Бурам омборекбу сохум Рэхъмоне, кук юре, вогордум бийм», — мугу э дуьл хуьше Боби э куче ведироморенге.



Э иловлей хъэет столгьо, куьрсигьо жерге-жерге норе оморебуьруьт. Э сер куьрсигьо нуьшдебуьруьт геймиш бире гъуногъгьо. Э минжи столгьо сохде оморебу мейду. Зерегоргьо: тарчи, тефтчи ве комончечи эдем-буьруьт зере вежегьисденигьо гъовогьо. Жогъиле кук-гьо, духдергьо дуй эз песой еки ведироморе э мейду ме-жегьисдуьт. Нуьшдегоргьо чек мизеруьт эри энугьо. Э дорун хъэет э келе гъэжгъугьой муьси, э сер кинле-гьой сенгьи эдембуьруьт дуьшире лезетлуйе егънигьой гІэруьси, хушбуе хуно буй лов сохде э гъемей хъэет. Э гъэд ве иловлей хъэет эдембуьруьт сухде келе лампе-гьой электри, бергулугьо. Уне гуьре гъэд хъэет товуш бу рузе хуно.

Боби чумечару сохде, Рэхъмон дусд хуьшдере эй гешде диромо э минжи хъэет. Гье у туьтем серпои, е науке жогъиле гІэил, чуькле бигълегьо, тиже чумгьо, десгьоре лов сохде, зури-зури омо гуьрд пушой Бобире.

— О, Лелей Боби, жунме-жигерме, туь хош оморей, — десе, везир э пушой пашогъ гъэд бире, э сине зерени-гьоре хуно, э зарифетевоз дуйгъэди сохд у назуке жен-дек хушдере э пушой эн э хушде домунде Боби.— Э гӀэруьси гӀэилгьойтуьш, эн кукгьо-духдергьойтуьш оморени, кеф сохдени гердойм. Эз гӀэилгьойтуьш ви-нош и рузгьоре, эз невегьойтуьш, нишрегьойтуьш. Кеш егиле нуьш эки эн жэгӀмет.

— НэгӀ, согъбоши, кефме нисди, ме поисде нида-нуьм,— гӀэйбе-гӀэйб гуфди Боби.

Оммо серпой гофгьой Бобире э гуш негуьрде, эз гъул ю гуьрде, берд нушунд уре э гъэд хэлгъ. Чорей Боби небисдо, нуьшд э серпой овурде бурмундигьо жи-ге. Боби сере тик гуьрде дениши э оmore гъуногъгьо. Хэлгъ, мердгьо, гӀэруьс-духдер геймиш-гейдуьрмиш гье-ме нуьшдебуьруьт. Э гӀэрей э гӀэруьси оmore мердгьо омборе шинохгьой эн Боби дебуьруьт. Э ён Боби нуьш-дебу е саре сиечердее мерд, гъолине шуьгъэм келе чум-гьо. Э тен энү вебу ковре руйшеини эн бастон, э сер-гъолине шуьгъэм хушде у дарам бесдебу фирегье гъэ-иш, э пойгьой энү вебу фирегье гелифе, чекмегьой мэхьси. И сара сиечердее мерд кор сохдембу снабженец эн е завод. Снабженец гъэдерсуьз гъолинд бугеш, у дилбош, сер-суге одомире хуно бу. Гьетте э мейду тозе одоми дерафде эри вежегьисде, снабженец гье у туьтем гъунде хуно мивэхуьшд э кутэхъэ пойгьой хушдере-воз, э гъолинде муйлуье пенжегьой хушдеревоз э зар-бевоз келе-келе чек зере, хъэрой мисохд:

— Гьерсо,— О! Гьерс! Гьерс! Гьерс!..

Кими вэгӀдо гъолинде гъунши эн Боби десе э фире-гье куьфгьой хушде доноре, пул ведешенде, мидиромо э минжи мейду. Пуле э дес эн вежегьисдегоргьо доноре, чумгьоре домбул сохде, хъэрой мисохд:

— Ой шомош! Ой шомош!

Шев эдембу нимешев бире. Э пушой эн зерегоргьо гъэм гъэд-гъуд бире пулгьо кура биребу. Хэлгъ вомун-дебу, эри вежегьисде дие омборгьоре дуьл небу. Оммо назуке кефлуье серпой, вежегьисде-вежегьисде миёмо э пушой хэлгъ, э бижхьэремзедее чумгьой хушдеревоз мидениши э нуьшдегоргьо, э гужевоз миведеберд гьер-кире бисдо эри вежегьисде.

— Эй жэгӀмет, ишму э гӀэруьсинит небуге эжеит? Вэхизит вежегьит: эришмуш кеф бу, эри зерегоргьош!..

Е-дуь гиле серпои куьнд оморебу эз Бобиш. Оммо Боби гьечу жуьргIэтлуь сере жумундембу э десдечу бурмунде, егIни ме ленгуьсденуьм, серпои гье усэгIэт дес кендембу эзу.

Бирден чуй кор бисдоге Боби э энгуьшдевоз огол зе оворд серпоире. У гье усэгIэт видов-видов омо поисд э пушой эн Боби.

— Хьозурум э гьурлугь ишму, бирорме,— дуьгьэди бире, десе э сине зере, гуфди серпои.

— Гу э зерегоргьо эри ме е гьовой «Узун дере» зенуь,— буйругь до Боби э серпои.

Серпои гье усэгIэт чарусде руе зерегоргьо, десгьоре лов сохде, гуфди келе-келе:

— Зерегоргьо, зенит «Узун дере», лелей Боби вежегьисденини!

Зерегоргьо зеруьт. Боби десдечуре норе э ён стул, диromo э мейду эри вежегьисде. Гьенжэгь эз и дуь минут пушо э ёр эну омоки, эз диревоз э куьф эну дуь дегь монети дери. У э ёр эну омоки, Бобире гуйге паргьо верома. У эри хуьшде фикир сохд, ки эричуь нуьшдем ме поисде эз и гIожизе, сочкуе одомигьоре хуно, э куьф пул дерики жиге? Вэхуьзуьм мерде хуно вежегьуьм, песде биём нуьшуьм э жигейме.

Серпои ведировунд эз гIэрей десдей духдери е раче инчелеле жогьиле духделере, сиегье гьошгьо, сиегье чумгьоре, дешенд э мейду эри вежегьисде э Бобиревоз. «Чуй хубе гIэселе духдери,— мугу э дуьл хуьшде Боби, денишире э духдер.— Эри кук ме михосдум ире».

— Гьо! Гьо! Чек зенит, чек! Чек! Чек! — черх хурде э иловлей мейду, э пушой хэлгь чек зере келе-келе гуфди серпои.

Хэлгь сер гуьрд гьеме эри чек зере. Гьунши Боби, сиечердее гьолинде мерд, домбуле чумгьо, вэхуьшд эз жигей хуьшде, э зарбевоз чек зере-зере э бугьоз гуьрде сес хуьшдеревоз келе-келе гуфди:

— Гьерсо-о-! Гьерс! Гьерс!

Эз сесгьой чек не музик, эз шори э жовоне духдереоз вежегьисдеи гуйге э пойгьой Боби гьэнетгьо вероморуьт. У гьейсэгIэт чуьлпенжсале мерде хунош гуйге небуге, эз и бисд сале уьктеме жуьргIэтлуье кукгьоре хуно эдембу бурмиш бире э мейду. Гуйге у легуьсдембугьой пой эну гьич эз бинедениш гьич ние ленгуьсдембу. Э гьизгьин эн вежегьисде, Боби сере тик гуьрде

э е фурсевоз десе доно э расди куьф хуьшде пуле эри вегуьрде, эри доре шомош э дес духдер не эри э пушой зерегоргьо дешенде. Гье у туьтем у чепи дес хуьшдере доно э чепи куьф хуьшде. Песде гье э вежегьисдеки у сер гуьрд э дуьдесевоз дуь куьф хуьшдере эри гешде. Оммо э е куьф энущ пул недебу. «Бобо вой, биёбур бисдорум э пушой хэлгь,— хьэлежигер бирере хуно, гуфди Боби э дуьл хуьшде.— Чув бири эхи э куьф ме дебугьо пулгьоре?!» Занигьой энущ гье усэгIэт буш, эз гьувот бурраре хуно бисдорут, ранг Бобиш дегиш бисдо. Гье и туьтем хэлгьши гуйге э хьэвес офдоре эдете дуь эз еки сэхдте чек зерембуьруьт. Кутэхьэ пойгьо, думбуле чумгьо, «снабженец», гIэлибобое шуьгьэм хуьшдере пушово ведешенде, эдембу чек зере, гуфдире «Гьерсо! Гьерс! Гьеррр!», зерегоргьош, э шомош имид бире, гьемешу эрэгьэлуь, эдембуьруьт зере тарпе-тарп. ГьейсэгIэт сес чеке-чек, эн музик эдембу гуйге зэхьлегьой Бобире берде.

«Чув бири и жегьендемие пулгьоре эз куьф ме эхи. Коми мердимазар ведешенди угьоре эз куьфме? — эдембу э дуьледагьдэгьэиревоз фикир сохде Боби.— Кей вегуьрди бу и пулгьоре эз куьф ме Гевгьер? Чув мугую имогьой хэлгь э песой ме? Мугую: э куьф е шогьи недери омори э гIэруьсихуне, э мейду эри вежегьисдеш дерафди эз и угьреше гIэилгьоре хуно».

Э е дэгьэдэгьэ Боби гуйге фурмуш сохд у гьейсэгIэт э пушой хэлгь, э гьэд мейду дебу гуфдире, поисд э минжи мейду. Десгьой энущ бирден ведешенд буруне буше куьфгьой энуре. Бирден гьемей хэлгь э гIэруьси бирегоргьо шэгьгьэ зере хэндущдуьт. Духделе э Бобиревоз вежегьисдембугьо, эз зир ловгьо хэндущде, вирихд ведарафд эз мейду. Зерегоргьо гье усэгIэт поюндуьт зерире. Тефчи, е лэгьэре хьире чумгьо, тефте э сер эн занн веноре, хуни-хуни дениши э Боби.

Боби сере гьуз гуьрде эз гIэйб, хэсде, эзи эз хьол офдоре одомире хуно, омо нуьшд э жигей хуьшде.

Гирошд е нимсэгIэтигеш. Эжириш овурдуьт э пушой хэлгь дешендуьт суьфро, норуьт гIош, ёгьни, шоробгьо, эрэгьигьо, закускагьо. Е-дуь румке эрэгьи хурде бэгьдо, гьовой Боби екем очугь бисдо, оммо у эз дуьл эдембу гIэйб-хижолети кешире. Э вэхд чи хурде, гьовой гьуногьгьо екем кефлуь бугьо вэгIдо, э мейду диловундуьт гIэруьсе, вераюнде эз сер те ве пой, эри вежегьунде.

Серпой ю е сад монети доно э дес гІэруьс.

— Десишмуре лов сохит, гІэруьс эдее вежегьисде э пушошму — эй! — черх хурде э иловлей гІэруьс гуфди серпой.

Э гІэруьси оморегоргьо мивэхуьшдуьт, мидоноруьт э дес гІэруьс пул. Вэхуьшд эз жигей хуьшде гудеге снабженец. У вегуьрд дуь тозе верэгь-верэгьэ садигьоре, екире э е дес гІэруьс доно, екигере э е десигею. У гуж зере, чумгьоре диеш буьхь сохде, сер гуьрд эри хьэрой вегуьрде, гуфдире: «Ой шомош! Ой шомош!». Оммо эз тасире бугьоз энэ э жигей гоф, гов чуьтам мэгі зереге, ужире сес ведиромо. Чорей эн у небисдо суьгьруьсде-суьгьруьсде, футракуьсте, нуьшд э жигей хуьшде.

Бобире гІэйб, номус оmore эз э куьф пул недери хуьшде, эз ижире порядкагьо ве гьонунгьой эн гІэруьси гьэгьр кешире, десдечуй хуьшдере э дес вегуьрде, э екиш неденишире, ведиромо эз гІэруьсихуне.

Ини, у гьейсэгІэт эдембу эз гІэруьси вогошде э хуне, гьэгьри-гІоси бире. Боби э дуьл хуьшде эдембу нифри сохде Гевгьер зен хуьшдере, зерегоргьоре, серпоире не и «шомоше» ки гІэдот дешендиге.

## **ПИШКЕШ**

И пушогьо ме э куче гешдеки омо вохурд дусд ме, Симон. У механик кор сохде э завод. И пушогьо уре э тозе хунегьо е секция дори, э коминжо хьомум ве газиш дери. Хэйли вэхдгьо кифлет эн Симон э е чуькле хунеле э секцияй хьэрмэхьи зигьисдембу. Жигей эн угьо омбар тенг бу, келе зэхьмет кеширембу у э кифлетевоз э е хуне. Унегуьре э тозе хуне э секция гиросшеи эри энэ келе шоре мигид бу. Оммо ме омбар мэхьтел мундум, диренге, ки Симон дусд ме дуьлхуьрд, пешмуре хунои гуфдире. У гуйге диеш пирте эдее веде бире э и песини рузгьо, сипре муйгьой сер энэ зиьдте бирет. Ме уре «руз эхэйрбу» дорум, омборекбу сохдум уре тозе хуне дори гуфдире, оммо Симон недуьл-недуьле хуно жугьоб до мере. Ме омбор мэхьтел мундум.

— Симон, гу дузире, э хуне е кор-чи бири? — э дуьлпесоиревоз пуърсируым ме эз дусд ме.

— НэгI, нэгI, гьеме хуб-хоси,— хуьшдере жуьргIэт дорере хуно, зури-зури жугьоб до мере Симон, э гуже-воз лове э хэнде веберде, э лой ме неденишире.

Оммо ме гье усэгIэт верасируым, ки Симон дусд мере е пэхьникие дерд-думит гьисди, энжэгъ нисе гуфдире, э дуьл хуьшде гуьрди гьишде.

Е ченд минут иму гоф несохде гешдим. Ме эз зир чум денишируым э Симон. У сере гьуз гуьрде, десгьоре э песой кемер веноре, эдембу чуьниге эри хуьшде думит сохде. Песде гье бирден у сере тик гуьрде, э могъбуле чумгьой хуьшдеревоз э ме денишире, эз дес ме гуьрде, э жуьргIэтевоз гуфди:

— Туь э ме гу ебо, туьре вэхд гьисди гьейсэгIэт?

— Мере рафдение жигей ме нисди,— гье усэгIэт жугьоб дорум ме.

— Гьечу буге, биё инжо нуьшим,— бирмунд Симон э скамейка э гьэд парк.— Ме ихдилот сохум эри туь э сер ме оморигоь гьозиегъэдере.

Иму гьердуйеки нуьшдим э сер скамейка. Руз поиз бу. Доргоь, кулегоь э гьэд эн парк нимелит бирэхьне бируьт. Ранги-рангие велггоь, тикегьой лугуре хуно, дуьлу биребируьт эз лигегьо. Сери ебо кулок лигегьой доргьоре шувунде, хэзон бире велггоь сессуьз, э гьово лой-лум хурде-хурде офдорембируьт э хори.

Те егиле Симон ихдилот хуьшдере сер гуьрде, у ведешенд эз куьф портсигаре, вокурд, до мере сигарет, юш кеши, песде э думит демундере хуно, дениши поисд э лой эн е кулелугъ. Ме теклиф сохдум э у ихдилот хуьшдере сер гуьруь гуфдире.

— Эри, эри бэхшлемиш сох, гьейсэгIэт,— е ох вокошире, гуфди Симон.— Эз и кор бире эйло ме гиге хуно бирем э хуьшде недерире хуно. Э хунеш ме гьечинуьм. Сер гуьрдenuьм е коре эри сохде, песде фурмуш сохденуьм, э ёр ме, э дуьл ме оморени офдоре гье и гьозиегъэдер, комиреки ме гьейсэгIэт эй туь ихдилот ми-сохум.

Е ченд гьум папрус кешире, шенде нимелит сухде сигарета, Симон сер гуьрд гьечи ихдилот хуьшдере:

— Эз и нуьгъ руз пушо мере тозе хуне дорет. Мере эри туь гуфдире герек нисди, туь хуьшдени туь дануьсдени чуь жире шориниге эриму бэгъдовой ченд салгоь

э е чуйкле тенге хуне зигьисдеи, песе е согъэ секция вегуурден.

Имбуруз э тозе хуне гирошдейм, себэхьимуьн — руз эн шобот бу, дер эн хунеймуре кибуге асталей куфд. Деро вокурдум, мивинуьм е гуьндуйре жогьиле нешинохэ кук поисди. Эз сер-тен э шофер ухшеш зеро. Пар-талгьой эн у екем мазутини, е тилте буй бензиниш эдее оморе эз у, э пойгьой ю чекмегьой солдати вери, герде-вуней чекмегьореш чарунде, фушенди зофруво, шопке-юш зверо вешендеи. Э ён пойгьой эн у е келе сэхде ящики, э сер ящик зинде гур-гур вери, э ён ящик е пенж чорекеи баллон шороби.

— Ишмуре ки гереки? — пуьрсируьм ме эз кук.

Шофер э мигьревуниреров хэндуьсде, «руз эхэйрбу» доре мере, гуфди:

— Бэхшлемиш сохит, мере ишму гереки. Э ме гъэ-дэгъэ зерет ме и чилегьоре дуьм гуфдире э хунешму.

Ме сер гуьрдуьм э и нешинохэ кук эри гуфдире, ки у, белки, егІэлмиш бири, эри ме нисдуьт и чигьо.

— НэгІ, нэгІ, — мугу гье усэгІэт шофер, — эришму-ни, ме дануьсденуьм.

Ме гоф Симоне зеро, пуьрсируьм эз у:

— Симон, гоф туьш мундге, туь бегем не пуьрсире эз кук, ки фуьрсориге и чигьоре эри туь?

— Чуьтам непуьрсирем! Пуьрсирем, — ноле кеши-рере хуно, ох верома эз дуьл эн у, гуйге ме исэгІэт э не-куми э пэхьникие ярай эн у расируьм. — Эз ме мугу: песе миданит, у эришму телефон мизенуь... Эри, те ме э иловле денишире, шофер гъужогъ зеро, вегуурд ящи-ке эз хори, диловунд хуьшдению э кухни, песе ди-ровунд пенж чорекеи шоробе, гургуреш но унжо, согъбо-ши гуфдире э бузпой ведарафд эз хуне.

ГІэилгьой ме шори-шори дироморут э кухни. Ме ящике вокурденге, угьо дирируьт сер-сереки рач дечи-ре оморе хушегьой онгуре, чек зеро, шори сохде, сер гуьрдуьт эри эз шори вешенде-фушенде хуьшдере. Он-гургьо екем гъуьж дироморебируьт, оммо кегьроборе хуно зерд, мезелуь бируьт. Эз ящик вегуурде е ченд ху-ше онгур, гьеркире е хуше дорум гІэилгьоре. Е ченд ми-нут гирошде бэгъдо, зен ме вогошд э хуне. ГІэилгьо э коридор э пушорэхьи эн у ведарафде, хушегьой онгу-ре бирмунде, шори сохде-сохде, гуфдируьт э у эз товун эриму оворде бэхшгьо.



Зен меш, гуом э туь омбар мэхьтел мунд, диренге эриму овурде бэхшгьоре. Е ченд минут у э ме дениши, ме э у, думит сохде эриму, ки миё биёруге и бэхшгьоре. Иму сер гуьрдим гьемме одомигьоймуре эри э ёр овурде. Оммо имуре гьич екиш ужире одоми небу, гьебо ингэдер чире фуьрсуй эриму. Одомигьой ме не эн зен ме гьеме э шегьер зигьисденуьт, гьуллугьчигьоют, лаг омбар хэржи-вержишуш нисди, имуре хуноют.

— Гьелбет, герек небу вегуьрде и бэхшгьоре, неда нуьсде эз киниге угьо, — гуфди зен ме.

Эз сифет не эз сес зен ме дануьсдуьм у шор нэгI, пешмуре хунои. У, гьелбет, дузире гуфдире, чуьш бисдоге дуьлежэгIми эри доре зен мере, гуфдируьм эз у:

— Туь чуьш гуфдириге ире эриму фуьрсорегор бири е эз тараф одомигьойму, енебуге эз тараф одомигьой туь. Небуге туь хуьшдени туь думит сох, сер эн кире гIэнг гезири ингэдер чире дип-дуз э хунейму э дес эн шофер доре фуьрсоре? Эриме оморенигьо э хотур иму тозе хуне вегуьрдеи фуьрсори.

Зен гуйге бовор сохд э гоф ме, гьемин бисдо. Е сэгIэт гирошде бэгьдо, очугь гуом бурам э туь, ме шориш бисдорум ижире бэхш фуьрсорет гуфдире эриму. Иму зен-шуьвер, меслэхьэт сохдим эеки, себэхь, руз екшобот, виходное руз гIош, соус сохдени эз гургур, шороб не онгуревоз стол зерени дусдгьоймуре, гьуногь сохдени. Туь э шегьер недебири, э курорт бири... Хучби недебири.

Симон гоф хуьшдере поюнд, гьошгьоре гьуьжунд, э битобиревоз е ченд бо жуьмуьсд э жигей хуьшде. Песде десе деноре э куьф, гене ведешенде портсигаре, кеши сигарете, сер гуьрд песой ихдилот хуьшдере.

— Эри, зен ме вераюнд столе, гIош но, соус но, гирфинкегьоре шороб пур сохде но э сер стол, э фирегье вазгьо вено хушегьой онгуре. Е ним сэгIэт гирошде бэгьдо, гьуногьгьойму нуьшдуьт э ён суьфре. Суьфден пейлере эри хурде вегуьрдим, гье и туьтем радио хунд мэгIни эн Рашид Бейбутове «Декинит пейлегьоре». Межлуьс иму деш шор бисдо. Пейлегьоре э хурдеки гьуногьгьо — дусдгьой ме, мере омборекбу сохдуьт, хубе воегьо-воисдгьо хосдуьт эриме э тозе хуне. Бирден дуьимуьн пейле э буз иму верики, дер эн хуне сэхд куфде омо, ме зури-зури ведироморум э коридор, дере вокурдум, мивинуьм, гьемин поисди гье у шофер. Си-

фет эн у огъуре хуно вечирей, гъирмизини. У э ме хуни-хуни денишире, гуфди келе-келе божэхъ дешендере хуно э сер ме:

— Эжи ящик эн онгур, эжи шороб, эжи гургур?!

Дуъл ме гуйге рафд, занигъой ме шуъле хуно бисдорут. Те эз лэгІэй ме гоф ведироморе, у шиши диromo э коридор, гье гене хъэрой вегирде гуфди келе-келе:

— Эжи ящик эн онгур, эжи шороб, эжи гургур?!

Ме зури-зури дер эн хунере сэхд сохдум. Шофер чуме-чару сохд иловлей кухнере, дениши вини, ки ю ди оворде чигъо веди нисди, гуфди дерд хурдере хуно:

— Дануьсденит чуьниге? Ме эз расдиш егІэлмиш бирем. Директор эн совхоз иму фуьрсори пишкеш и ме ди овордебируьмгъо бэхшгъоре эри е уре герек гьисдигъо одоми. Оммо ме егІэлмиш бирем, эжигей эри эн у одоми, номер эн хунере чешмиш сохде, диrowндем дорем ишмура. Имогъой у мере зинде-зинде михуру.

Шофер поисд, вомунде, гъолоке одомире хуно ведо кемер хуьшдере э дивор, гуфди келе-келе, гъэгърегъэгър э ме, э буй балайме э охмури, э негреиревоз денишире, десе э пушони хуьше зере:

— Эгъ, эгенер ме екем фегъмлуье одоми мибисдрумге, э и сер ме екем семе эгъуьл мидебисдоге, ме гье усэ-гІэт миьсдум э сер офдоре, ки туь ужире одоми, мере герек гьисдигъо нисди. Одомире эз руй, эз обуриш шинохе бирени.

Ме гене гоф эн Симоне зеруьм тоб не доре, пуьрсируьм эз у:

— Туь и гофгъой эн и нолоигъэ гъечи ветовусди поисд, хуб жугъоб эн уре, шелей эн уре неведоре?!

— И! Ме нэгІо, э жигей ме сенгъиш нивотовусд и коре...,—Жугъоб до Симон, туьндлемиш бире.—Меш эз обур-сабуьр ведарафде, келе-келе хъэрой вегуьрдуьм э сер эн у, мугум: «ЛэгІэй туьре мевoku инжо, егІэлмиш туь бирей, песг ме чуь сохум инжо, оморей э гъэд эн хуней ме эдее ижире биьбуригъо сохде. Веги гъимет эн туь оворде чигъоре, хъэк туьре вор ди эз инжо!..»

Шофер, гъич э хэпер хуьшдеш негуьрде гофгъой мере, эз ме куьнд бире, бигІоре хуно денишире э сифет ме, диеш келе-келе хъэрой вегуьрд э сер ме:

— Эри чуьни мере пул туь. Мере гереки ме оворде чигъо, эри берде доре э у одоми, эри комики начальник ме фуьрсоригъо угъоре.

Песе, э хысобевоз, дениши вини, порине верфе во-гордунде мибу, ю оворде чигьоре-пишкеше вогордунде нибу, у пойгьоре э зарбевоз куде рафд эз коридор, эз рэхьое дер хуне хуни-хуни денишире э гъуногъьо. Э ведарафдеки дер эн коридореш у э э зарбевоз зе.

Ме э ён гъуногъьо вегошдумки, диренуым гъовой эн гьеммей эн игьо дегиш бирере хунои, угьо дуълхуурде хуно нуышдет, эдете гІэйбе-гІэйб дениширенуыт дуь эеки. Ме гье усэгІэт верасируым, ки угьо шиновусдет гьемме э гІэрей ме не эн шофер бире гофгьоре. Е-дуь минутиш негирошд, гьерки е вогъне офде, екире э хуне кори, эн екиге гІэйл э хуне тэхьно дери гуфдире, вэхуышде эз сер суьфре еки-еки рафдуыт эз хуне. Сохде чигьо, шоробгьо, онгургьо гьечу мундуыт дес незере.

Шориму э могъбули чарусд. Согъ е сэгІэт ме не зен ме нуышдим, дуь эеки денишире, дуьлесди хижолети кешире. Дуьл ме эдембу паре бире демунде э синей ме. Эхир ме вэхуышдуым, вегуьрдуым баллон шоробе, тьгьи сохдум э гІовхуне, песде ящик онгуре веноре э душ бердуым э детдом, (у эз хунейму куьнди), дорум гІэйлгьоре, мугум хурит, хьэлол ишму, и онгургьоре эришму фэхьлегьой совхоз бэхш оворди.

— Туь пуьрсире недануьсди, эз коми совхоз фуьрсориге и пишкеше? — пуьрсируым ме эз Симон.

— Дануьсдем,— сере жумунде, жугьоб до Симон, — шофер эз пилонконгьо э фурамореки гуфди эз ме, е-дуь гоф нувьуьсуым, фуьрсуым гуфдире э сер эн директор совхоз, дануь гуфдире, ки у доре пишкеше ме э иловле не фурухдем, егІэлмиш бире эри туь овордем гуфдире. Адрес эн совхозеш гуфди. Ведини угьо дуь эекиш ихьдибор нисе сохденуыт,— верасд ихдилот хуышдере Симон, гъош-гъбогълуь бире.

Имогьой ме верасируым чуй дердиге дусд мере, Симоне, э думитгьо-фикиргьо дешендигьо.

## ОДОХЛУЙ ЭН ПИРЕ ЗЕН

Гуюм и пушогьо э сер ме, эн келе зен, чуй кор омориге? Валлагъ, шиновусдитге, нэхогьошму пэх мибу эз хэндуьсде. Гьисди, ме шовгІо дорем и сура э екиш не-гуфдирени. Оммо ме э хуышде вероморе дануьсденуым беге? Зугьун мере э расе бесдигеш, гене гоф хуышдере

негуфдире тоб-довом нидуь. Ижире ализе хосиет дери мере. Негьогъ мере э дигъ зен-зору, гІәруьс-духдер «дэгъ-дэгъэй есиёв» огол нисе зеренуьт.

Шев-шохьонгум ме эз хуне ведарафденге, бирден дуь доне озгъуне гедегьо, шилолигьо э сер вече биёв-гьоре хуно, гьов кендуьт оморуйт э сер ме. Угьо мере депучундуьт э епинжи, гІәиллей соворе хуно, венорут э кул ишу — еллагъ, вирихундуьт.

Ме э ишму гуьм расди гофе: мере хуьшдени мере воисдембу и дуь жогьиле кукгьо мере вирихунут гуфдире. Ишму белки мере эри эни кор гІәйб мисохит, серкушиш мизенит, кидан, мугуит: хок э сер чуйтуьни кафтар — гъэри, хун зери вешенде беге э келле-мазалайтуь, хьуьрштуь веромори беге, хьэшдод сале пире зен эже и коргьо эже? Поит ебо, гъэдошмуре вегиром, те чой расире, поже мевекенит, те биней кор-хьоле дануьсде, нэхогъ мере серкуш мезенит.

Меш дануьсденуьм — ме келе зенуьм. Оммо муй негьогъ сипи несохдем, гІуьмуьрмере э усали-бедиревоз негировундем. Шуйкуьр э худо, е кук ме — сад сал гІуьмуьр гердо уре э дире шиновусдегоргьоймеревоз, офицери, э солдати гъурлугъ сохде, серхьэдгьоймуре дошде эз дуьшмегьо-жансуьзгьо, е кукигейме — лап одлуье чупон эн колхозини. Сирот энэ э е келе, шекуьл кешире тэхде э минжи дигьиму вери. Духдерме гириге, э согъи хьуькуьмет иму нуьгъ гІәил зенди, дегьимуьн э шуьгъэм ю дери. Денишит, чуй жире гІәилгьоре ме келе сохде ведировундемге.

Эгенер ишмуре дануьсде воисдениге, э жогьилиш ме е рач — сирот бируьм, дуь гуьл гъутинейме эдембу гуьл-гъуьзуьргуьле хуно су гуьрде сухде. Э ёр мени, нисдануьсденуьм, эзи пенжогъ пенж салиге, небуге шасд пенж салиге пушо, э дигъ е ошугъ оморебу. Омбор мэгІрифетлуье, данандее ошугъ бу, буьлдуьрчине хуно мэгІни хундембу, е хуб сазиш зерембу. У мере э мейду диренге, эри ме гье унжо мэгІни гуьнжундебу. Э у мэгІни хуьшде у дуь гъутиней мере э дуь нимей сибевоз той сохдебу, ловгьоймере э инжеревоз. Имогьойле эз у инже дуь пушои денду бэгъэй недомунди э лэгІэйме. Гъетте ме хэндуьсде и дуь донду пушово ведироморени, и е сале невелейме — гъурумсогъ э сифет ме деширенге терсирени, гъечу дануьсдени мере воисдени гІәнж гуьрде эз нерме жигей ю.

Эри, нуышдем ме ди шохьонгум э хуне, эдее невей-  
мере э гуфере жумунденуым, эри энуненуй-ненем хун-  
денуым. Гьечи дес ме э сер гуферей гІэйил верики, чумме  
эдее э хов верафде. Э пушой чум ме, булутгьо э сер  
доггьо сейл зере гердуьгьоре хуно, гиросше рузгьош  
эдее пес-песоеки оморе гиросше. Э ёрме оморени жогьи-  
ле гуьзеле вэгІдогьойме. Дуьлмеш буланмише хуно би-  
ри мунде.

Бирден эз гьэриш хове хуно миденишуым миви-  
нуым, еки дер хунеймуре вокурд, асда-асда диромо. Чу-  
ме вокурдум, мивинуым и дироморегор — кук эн гьун-  
шимуни Микаили. Ме уре эз гьэд е жэгІмете одомиш,  
гье усэгІэт мишинохум. Сифет эн у исэгІэт эн дуьлпесо,  
дуьледэггьэдэггьэ биренигьо одомире хуно бу. У эдембу  
песово-пушово чуме-чару сохде. Мугум эз у:

— Хэйр гердо, Микаил, чуй кори туй э лойгьойму  
оморей, черх хурдей?

Микаил сере гьуз гуьрди, эдее гІэйбе-гІэйб хандуьс-  
де, дугмей шеи хуьшдере векендени дезере, — ведини  
чуьниге эдее дуьлтенги сохде.

— Бэхшлемиш мисохи, холей Фатма, — мугу у е  
гьэдер э хуьшде домунде бэггьдо, — мере э китуь е гьул-  
лугьи. Ме дануьсденуым, туй и гьуллугь мере бегьем  
мисохи.

Меш екем мэхьтел мундум: «Чуй гьуллугь бирени-  
и ре эмеревоз».

— Хуб, дие, сермере дорд меди, — мугум эз Мика-  
ил, — гу бура, чуй гуфдире воисдениге туйре! — Мика-  
ил нуьшд э раче-берачейме, э ён гуфере, гьуз бисдо, э ён  
гушме мугу:

— Имуре воисдени имишев е духдере вирихуним...

И гофе шиновусдемунде, хов ме гье усэгІэт парусд,  
гуйге киниге э жилиде гІов сер зофруво дешенд мере,  
хун зе вешенд э келлей ме. Ме гье усэгІэт туйндлемиш  
бире, вегуьрдуым дуразе шуше-чубуггьэ эри зере эз сер  
Микаил (Ме у шуше гьемишеноренуым э киме, керг-ве-  
че эз дер дироморенге эз жиге невэхуьшдеки угьоре эри  
пиш сохде).

— Туй чуй гуфдири? — е хьэрой вегуьрдуым э сер  
Микаил.

Эз хьэрой ме гІэйил э гуфере гье усэгІэт вешенд  
хуьшдере, е буьруьж вегуьрд. Микаилиш терси, десе  
пушово кешире, зури-зури мугу эз ме:

— Жон холей Фатъма, поит, екем сабуър сохит, бе-  
бей ме муно, э дуъл ме ужире хэёлгьо недери, егиле хо-  
муш бошит, песой гофе шиновит...

Ме шуше норум эз дес, сер гуърдуъм гІэиле эри жу-  
мунде.

— Гъери, гу,— мугум эз Микаил,— чуй гуфдире во-  
исдеге туъре. Сер ме мугум эз гофгьойтуъ нисе ведараф-  
де. Егиле туъ эдее гуфдире: «имуре духдере вирихунде  
воисде», песде гьетте чубугъэ э дес ме дире, зугъуре ча-  
рунди, гуфдири: «нэгІ, гьечини-гьечинигеи».

Эхирки эз гофгьой Микаил верасируъм ки, уре  
е хьэрмэхьи, Ильяс гуфдиренигьо. Ме шинохденуъм  
у Ильясе, е раче, хушбуйбалае куки. Оммо небуд-не-  
гъуъзи, хушдере э кор зеренигьо одоми нисди, пиёнис-  
кеи. Дедешу — фэгъир, бие зен, кор сохдени, у энжэгъ  
сохдегьой энуре э шороб-эрэгъи дорени. Гье и небуд,  
пиёниске Ильяс ошугъ бири э е духдер, Рукият. Ме  
эришму гуюм, у омбор раче гуъзеле духдери. Эз у хуб-  
те корсох э гІэрей дояркегьой колхоз иму недери. Пор  
у, (худо гъувот до уре), гьозор трудодень гъэзенж сох-  
ди. Дуъ мошин тэхуъл овурди эри эну эз гьомбор кол-  
хоз. Ильяс ю пиёниске, тембелиш гьисдиге, дануъсдени  
гъурумсогъ, э чуй духдер ошугъ буге. Валлагъ у духдер  
мереш хьэз оmore. Эгенер ме кук мибисдорумге — ме  
ужире духдере эз десме ниведешендуъм. Э гуфдирей эн  
Микаилевоз, духдереш эз Ильяс хьэз оmore, оммо эри  
э у э шуъвер рафде э герде нисе вегуърде, гуфдири му-  
гу: «туъ эрэгъи-шороб хурдере шендиге, э кор дераф-  
диге, увэхди миём э туъ». Лап жигей ю гуфдире Руки-  
ят, баракаллагъ, небуге пиёнискее шуъвер эйчуъни  
одомире!

Мугум ме эз Микаил:

— Туъ эйчуъ нисе хосде, пардил, Рукияте, ижире  
раче эгъуълменде, кордане духдере эз дес туъ ведешен-  
дени?

Микаил сере гъуз гуърде мугу:

— Ме холей Фатъма, рач нисдуъм. Э чум духдер  
хуш эри оmore эн суьфде биё одоми рач бу.

Мугум эз Микаил:

— Туъ гІэиле хуно эдее гоф сохде. Рачире одоми  
э гьиче нисе веноре. Эн мерд эн суьфде коргьой ю не  
дуъл ю биё рач бу. Мерд беге тикмелеи. Е гофе дуъ го-  
фиш месох, бебейтуъ муно, гье имишев, ме хушдениме

дарам э сэхьибгьой Рукиятевоз гоф сохум, бурум-бес-дуым эритуь, меш э гІэруьси кейвони бире, е келэгъэи бэхш вегируым эз туь. Хьэйф энү духдери, песеде мурав э дес эн и небуде пиёнискее Ильяс миофдону.

— Дануьсдени чуьниге, холей Фатма, угьо дуй-екире хосденуьт, э гІэрей энугьо эри гъэриш бире э ме лоигъ нисди. Ильяс хьэрмэхьмени. У гъечиниге зобуне одоми нисди. И шороб-эрэгъи сер энуре гъэриш сохди. Мере воисдени уре э дузе рэхь дешенуьм.

Эри, Ильяс дениширени дирени, Рукият э ю эри оmore э герде нисе вегуьрде, мэхьшово сохди уре шев эри вирихунде. Э хьэрмэхь хуьшде Микаил, хьэлово бири:

— Туь эн ме дусд, хьовириге, э ме кумеги сох, дух-дере эри вирихунде.

Микаил домунди э мэхьтели: гоф хьовир хуьшдере, э жиге неовурдге, у эзу гъэгъри, бирази мибу, эз е тара-фиге уре нисе воисде эз хотур эн и кор нум эн Рукият биёбур бу, хуьрд бу...

Лап герекие гоф хуьшдере, чуь гуфдире воисдембу-ге уре, Микаил э чорзани вэхуьшде, асда-асда гуфди э гушме. Песеде э жигей хуьшде нуьшде, келе-келе му-гу эз ме:

— Иму гъечи холей Фатма, и коре сохдимге, гьс-мин э сер духдер хэлгъ биёбури ниверав, гьемиге белки э и коревсз Ильясе э сер дешенде дануьсдимге.

Ме гьеебо рази небисдорум. Е гъэдер вэхд думит сэхдум, песеде жугьоб дорум, разименди мере.

Шохьонгум кук ме не гІэруьс мере гьингъэр э сир-суьркеревоз дорум. Песеде гьемей кифлет дегешде хис-ренге, сермере дегуьрде, ведарафдуьм э буру. Шев то-рик-зулмоти бу. Э чум одоми энгуьшд доноге, одоми нисе дире. Асмуш гъечи торик гьисди, гуйге гъурум си-етов зери. Ёвош, диворгьой хунегьоре гуьрде оморум, ведироморум э хьэёт Рукиятигьо. Гьетте э хьэёт эн Ру-кият дироморе, мивинуьм, бирден чуьниге э сер ме оф-до. Дес киниге ейлугъэ гье у туьтем доно э лэгІэйме, ме офдорум. Мере гье у туьтем пучундуьт э епинжи, венорут э кул.

— Эже берим ире? — шинируьм ме сес эн Микаиле.

— «Чуьтам эже?» Беге туь нисе дануьсде,— гІоси бирере хуно гуфди асда-асда Ильяс,— бер э «Мугьоре эн Соймишигьо». Зубош бер, те имуре кес дире.

«Мугъорей соймишигъо» — е келе лугъонде мугъорей. У дери э гъэд эп гъуьндуьре гъоей сенгъи. Ингъэде у гъое гъуьндуьр гъисди, е сер эн у э асму вери, пойнейю э кун лугъонде дохъор дери. Омборе рузгъо булутгъо э гуьмге кура бугъоре хуно, кура биренуьт э иловлей келлей эн гъое. Поиз не васал, чупонгъо гелегъоре эз догъ э гъишлогъ фуравунденге енебуге эз гъишлогъ э догъ веберденге, сайлов, воруш оморенигъо вэгъдо угъо э и мугъоре пэхъни биренуьт. И мугъоре э куьндигъой дигъ имуни. Уре «мугъорей соймишигъо» эри чуй гуфдиренуьтгеш гуьм эришму. Гуфдиренуьт эз чендченд салгъо э хъэрэм эн е хон е раче гуьзеле жовоне духдер дебири. У духдер э дигъ ишу те э хъэрэм хон офдоре, соймиши эн е жовоне кук — чупон бири. Нуькергъой хон оморенге егиле э и дигъ хэрж эри вечире, дирэбу и раче духдере. Э гужевоз эз бебе-дедей ю векенде, бердебу уре бэхш — пишкеш эри хон. Кук — чупон, одохлуй эн духдер дануьсде и коре, оморебу э дервозей хон, поисдебу эри эн у э нуькери. Эз инжо вирихунде бердебу одохлу-соймиши хуьшдере. Соймишигъо эз ки хон вирихденге, е гъэдер вэгъдо угъо пэхъни биребуьруьт гъе э и мугъоре. Эзумогъойлеревоз и мугъорере хэлгъ нум норет «Мугъорей соймишигъо».

— Туь хъитиёт бер уре, — эдее шиновусденуьм ме сес эн Ильясе, е гъэдер вэхд эз дигъ дур бире бэгъдо. — Чуйниге у эхи сесиш нисе сохде. Кидан тасунде — куьшдейге уре э теретэгъди.

Мивинуьм Михаил эдее гуфдире:

— Туь, Ильяс, фикир мекеш. Рукият сес нисе сохде — э хъисобевоз суьсд бири. Эз суьсд биренгъо зен хэйлогъире е кориш нибу, туь олхогъин бош. Э «Мугъорей эн Соймишигъо», э жун сертуь, ме э чум хисирекиш мирам мирасуьм, э е доне сенгъиш пой ме нарасиреки.

Те иму рафде расире, гъово э асму екем очугъ бисдо. Эз гъирогъ асму эз песой догъгъо менг, тов-тов доре, веди бисдо. Ме эз гъэрей епинжи э е чумевоз эдее диренуьм чуйтар Михаил мере, э душ хуьшде веноре бердениге.

Эхириш оморим расирим э «Мугъорей соймишигъо». Михаил ю вегуьрд мере эз душ, гъоб шишере хуно, э хъитиётиревоз, коргъой гуьгъоре хуно «нум худой-нум худой» но э хори. Ильяс гъе у туьтем мугу эз Михаил:



— Зубош фонаре дегесун!

Микаил фонаре дегесунд, дуре гуурде диворгьой эн мугьоре гье усэглэт товуш бисдо. Ильяс гье у сэглэт омо, поисд э сугьрезани, э пушой ме, егӀни эри гуфдире э ме: «Рукият, бэхшлемиш сох, ме ижире коре эри сох-деи. Мере де чорейге небу, ме туьре, жун-жигерме, хосленуьм, ме туьсуьз зигьисде нидануьм...» И гофгьо э лэглэй энү дерики, ме епинжире эз серме шендуьм, нуьшдуьм, водорум хуьшдере э дивор, хэндуйсде, бирмундум э угьо пире зен бирей мере ве дендугьо недериере э лэглэйме.

— Вирихунди гьурумсогь?! — пуьрсируьм ме эз у э гьэргь не руьшдендиревоз.

Бирден Ильяс перт-гьогь бисдо мунд, сенгь дохьорире хуно, ранг до, ранг восдо, песде екем э хуьшде ди-ромоки, мугу:

— Бебей ме жон, и туьни, холей Фатма! Песде э пой вэхуьшде гӀоси-диври бире, келе-келе мугу эз хьовир хуьшде: — Микаил, э геде, кире, кире э епинжи пучунде овордей туь! Чумгьой туь эже бу? Имогьой э гьемей гӀуьлом биёбур мибошим ки?!

— Эже бу? — туьндлемиш бире, гуфди Микаилиш. Чумгьойтуь эжебуге, эн меш гье унжиге бу. Э торики ме сечмиш несохдем...

Ильяс сер гуьрд эри вирихде, ме гуселере эз расе гуьруьгьоре хуно, сэхд гуьрдуьм эз хьофдранге галстук энү, мугум:

— Дие вирухунде, овордей мере, биёбур сохдей э пушой эл-вилеет, ме разинуьм эри э туь э шуьвер омо-ре, хогь мере, гьурумсогь.

— Эле туь чуь гуфдире, холей Фатма, туь эже ме эже, ме той невегьой туьнуьм. Гьич э дуьл-хэьлгьой меш туь недебири, иму егӀэлмиш бирейм, туьре неда-нуьсдеки вирихундейм!..

— Гьо,— мугум эз Ильяс, рэхь энуре ведабуре, э муьшдевоз эз синей ю зере.— Е одомигере, гӀовунсуьз-хэтосуьзе духдере вирухунде хэьл дебу э дуьл туь?! Духдер кес бегем эритуь сиб-гӀэрмуни эри эз богь кес вирихунде, небуге инсони?! Уре беге дуьл недери, номус-хэьё нисди. Нэгл,— мугум,— ме и коре гьечи нигьилуьм, е мере хогь, енебуге гьейсэглэт мирам мэглүьм мисохум э прокурор, э сельсовет, кеми эри паздегь сали мидарай э гьэземет.

Ме э гоф сохдеки эз диворгьой мугьореш сес унг оmore, сес ме ченд е гром лов бире. Микаилиш поисди э фонаревоз э лэглэй мугьоре, эдее э пэхьники чум зере мере, еГни: «Гу, холей Фатма, машаллагь, омборте терсун уре, бигьил э эгъуъл диров». Эз душ эн Ильяс гуьрде, Микаил мугу:

— Ильяс, офдо э пойгьой эн холей Фатма, бэхшлемиши хогь эз у, небуге кор иму шифи, хунейму гжи.

Сер ишмуре омбор дорд недуьм, игьрол сохдим гье инжо, э «Мугьорей соймишигьо», эз имбурузевоз Ильяс пиёнискеире шенденини, дерафденини эри кор сохде э колхоз, чуьтам э мерд, э жогьил лоигь гьисдиге. Эгнер у, Ильяс, ме гуфдирере сохдге, ме хуьшдениме мидарам э ки бебе-дедей эн Рукият уре эри хосде эри Ильяс. Ильясе эри олхогьин сохде ме уре гоф дорум, шовгю дорум, и имишевине гьозие-гьэдере э екиш негуфдирени.

Оммо ме тоб-гьэрол недорум, гуфдирум эришму, ме э сер Ильяс овурде коре. У гофиге игьролигере — эри Рукияте дерафде хосдеи ме ёгьин бегьем мисохум, Кор э ю, э хуьшдени Ильяс вери имогьой.

## ДУЬШМЕН МЕ — ГЪУНШИМЕНИ

— Руз туь эхэйрбу, хьовир редактор! Омбар минет сохденуьм э туь, биё е доне хубе филейтун нуьвуьс эз товун эн гьуншиме. Гьуншимере Кечеле-Илдод нуми, зигьисдени у э дигь эн Леглег, э раче-берачей эн есиёв гюви, у кечеле сер эню, гуьомге ме, э зир эн у гурунде сенгьгьой есиёв домунде хэхэ гердо. Гуфдиренуьтгеш э метелегьо: «эз дуре бирор-хэгьер куьнде гьунши хуби», оммо ме э туь гуьом расдире, хьовир редактор, эз Кечеле-Илдод зиёдте мере э и гюуьлом дуьшме нисди. Ингьэде ме эз у визор-гизор оmoreм, у мере эз сабуьр-обур ведешенди, э жун туь эдее гуфдиренуьм, эгенер ужире минкини мибисдоге: хьэёт мере, богь-богьчей мере, оводуней хуней мере, молгьэрей мере, зен мере э е чувол донорени, монорум гьемей энугьоре э кул ме, гьич э иловле чуме-чару несохде сер мере мивегирдуьм

мивирихд эз и дигъ, эз зимилерз вирихуьгьоре хуно. Бовор сох, э уревоз э е махъэле, э рач еки зигъисдеш екини, э шогъмаревоз э кун лугъонде чол эеки зигъисдеш,— шогъмар гезо у шефде, хьиллее зугъун энуре.

Э ме гуфдирет, эгенер туьре э газет нуьвуьсде воисдениге, биё фактгьо нушу ди. Эри товуней фактгьо гуфдирениге, гъутиней туь муно, мере е гIэребе факти э гъэршуй эн гъуншиме, гьи э зир черх гIэребе домуно сер энур. Оммо ме ихдилот мере дураз кешире, сер туьре омбар дорд нидуьм. Э метелегьо гуфдиренуьт: «Расе дураз хуби — гоф кутэхъ».

Гъуншиме лов сохди э гьемей эн дигъ, ки ме иловлей эн хьэёт мере, эн богъ мере боруй сенгьи кеширем, чум эн мердгьой кес, гIэйбиш бу гуфдире эз туь, э жогъиле зен ме недомуну гуфдире, егIни келе мердгьо зен хосденге — жогъилгьо кейф сохде.

Гьи зугъун энур бурра гердо эз дургуни энур гоф. Е чи зен ме гьер руз худои э базари, э пушой гьозор одоми эдее сиб-гIэрму, савзи-пиёз э богъчей ме вероморенигьоре эдее фурухде, дие чуьтам пэхъни сохдем ме уре э гIэрей эн чор боруй эн хьэётме, егIни уре кес невинуь гуфдире? Омбаре рузгьо бирени, эз дигъ берде чигьоре фурухде нисе верасдениге, дуборе у руз э дигъиш нисе вогошде, гье э шегьер э хуней эн одомигьой хуьшде мундени рафде эри хисире.

Куьгъне зен мере толугъ дорем, хосдем исэгIэтине зен мере, чуьнки эз суьфдеи зен ме, коргьой гуьогьоре хуно, не хэйр бу, не берекет. У е жонсуьзе, гьемиге гIэил нисе биренигьо зен бу. Бегьерсуьзе доре богъбониш э богъ нисе дегъишдеки. Песде эз дес юш е бегъеме кор нисе вероморенбу. Одомире гьейсэгIэт э менг эри фирсоре асанти, оммо у зен мере э базар эри емиш-савзи фурухде фирсоре четинте бу.

Ме хьэшо нисе зеренуьм, очугъ эдее гуфдиренуьм, гьэгъигъэтиш ме чор тараф хьэёт мере, богъ мере боруй сенгьи кеширем е гъурумсогъиш чум неденуь гуфдире. Оммо зенлугъ инжо кор нисди. Мере, чум мерасо е хубе богъи э хьэёт, гьеми рачи, гьемиге лап хубе бегьер доре. Чуь жире хубе жинс емиш гьисдиге вери э богъ ме. Унегуьре гьеркире воисд уьз ихдиёринде дироморени э богъме, дениширени эри хуьшде, те шуьгъэм ю вемасире хурдени э гьовой емиш, зир доргьоре, зир пой хок, хокору сохде, вогошде рафдени, гуйге и богъ сэхъибсуь-

зи, эн колхози, енебуге эн жэгІметини. Чутьам бире и кор? И кемчере вегуърде э гъэжгъуй хэлгъ сер доно-рере хуно биреки. Ишму дануьсденит келе доегъо эз гъир кешире верасде.

Песде эгенер хъисобире гешдиге, гъич си сале зен хэйлогъире жогъиле сер хунде мибу ми? Ме миром эри туь и гоф гъич эз сер рафдение гофи? Пушотегъо, э ёр мени, гъейсэгІэтире хуно, омбаре си сале зенгъо дедей-холугъо, енебуге келедедейгъо бируьт. И Кечеле-Илдод имогъой эдее гуфдиреки и си сале зен ме — жогъиле се-ри. Юш дануьсдени жогъил нисдигъоре, оммо эдее гуф-дире гъэрез э сер ме е зиёдие хъэшо эри вешенде.

Эз и гофгъой меш эдейте дирент ишму, чужире угъреше одоми гъисдиге и гъунши ме, Кечеле-Илдод.

Екемигеш сабуьр сохит, гуш венит песой эн ихди-лотмере.

И пушогъо гъуншиме э пушой эн гъемей бригада э ме охмурие гоф зери, мере «ологъ» хунди. У эз ме гъе гъечи гуфди: «Туь мугу, лап зобуне ологъи э гъэриш эн темизе махъсуьл колхозиму, миё, мугу, хоригъой эн мувэхъ туьре э у, чуьниге, култиваторевоз не химиче-ски дермугъоревоз эз ологъ-чулогъ темиз сожде биёе...»

Гъе и култиватор гироро эз шидрэй кемер эну! Ме ологъ чутьам биренуьм, е чи согъ гъуьмуьрме ме эдее э и ологъгъо-кулегъоревоз женг берденуьм, э дуьшмере-воз женг беруьгъоре хуно. У э кечеле сер хуьшде ологъ миофу, оммо э богъме е доне ологъ офде нидануь.

Э жунтуь, гъей эй хъэз, э хори е кор нисди, гъечи чум дире-дире э пушой бригада биёбур сохд мере у руз, ижире хуьрдие гоф зе э ме нелоигъ дие.

Гъе эз сер бошден сер эни гоф веромо гъечи. Э вэхд келемгъоре ологъ сохдеки, гІэйлгъо ведироморуьт эри папрус кешире. Мере э папрусевоз гІэрейме нисди, ни-се кеширенуьм. Папрус гъеми жун одомире сухунде, гъеми пул одомире: эри чуьни мере пуче хэржигъо? Угъо э папрус кешире мухшул гъисди, чумме сер гуьрд эри э хов верафде. Мугум эри ме: эри э гІэйлгъо мешет небиреи, бурам е далдее жиге офум эри ме, тэхъли чум-гъой мере вегируьм те угъо папрус кешире верасде. Э гъечиревоз, вэхуьшде эз ки энугъо, оморум э ён эн е серине кулелугъ, дегешдуьм э гъэд эну. Егилейге хэ-бер биренуьм мивинуьм, гъово шохъонгуми, чуьшме эдее дерафде э песой эн више. Гъисди расдире гуюм

э туь, ме хуьшдени ме хэбер небиребируьм, мере гье и гьунши ме Кечеле-Илдоод хэбер сохди. Ме медан е сэгІэтойге нэхирчи нэхире э дигь э бердеки эз гІэрей эни муьлк говгьо, жинговгьо гьетте эз ён ме дегешде куле гирошдеки, зэхьлелевезгь бире сер гуьрдет хуьшдере эз нокуми эри пертово доре, кимигьойге терсе-терс, чумгьоре буьхь сохде, сере гьуз гуьрде, сново-еново доре хуьшдере, мэгІ зере, вирихдет. Кечеле-Илдоодиш гье и вэхд эз чул э хуне вогошдеки бири, чубугь пеймунэи э дес дери (у э колхоз учетчик кор сохде). Диренге говгьо, жинговгьо, гьечи серсу бире, эдете терсиренуьт эз куле, э дуьл энү гумон оморе, зури-зури омори эри фегьм сохде, чуь дериге э гьэд эни куле. Унжо вохурдем ме э чум энү.

Гуфдирени: «Бедмозоле э сер эн девеш гуьрг михуру». Эн меш гьечи. Ме и пенжогь-пснж сале мерд эдее биренуьм, гьич э гІуьмуьр ме недирем эз зинде олхогьин хисире одоми терсуь гуфдире. Гов-гуселе терсиренуьт эгенер э кулелугь гуьрг-женевеьр пэхьни бириге, енебуге, дуразруйме нен шиновусдегор, муьрде одоми дериге.

Кечеле-Илдоодиш ки эз худо е вогьне эдее хосде деворигьой мере эри гуьрде, э сер ме хьэшогьо эри вешенде. Себэхьимуьн э пушой эн гьемей бригада у сер гуьрд дургунигьоре эри венжире, мере биёбуьр эри сохде. Э гуфдирей энуревоз ме согь руз хисирем эриме э серини, э кулелугь, хьэрмэхьгьойме э гьизгьин кор дерики! Э гуфдирей энуревоз, гуйге суьфдеи гиле нисди ме гьечи эз пэхьники хьэрмэхьгьо, хуьшдере э далде кешире хисиреи. Гуйге угьо е гиле мере гьечи хисиреки офдет эз гьэд эн «Гьэмишлугь Хуги», дуьимуьн гиле э зир тоей гьёв, гуйге ме руз, э вэхд эн кор пэхьни бире хисиренуьм, шев те себэхь э богь ме, приусадебный участкей ме те мере воисде кор сохум гуфдире.

Э жун туь, эдее гуфдиренуьм, хьовир редактор, е доне гоф энүш бегьем тевесер дуз нисди. Эн эвелимуьнжи, гуьом э туь ме у руз э кулелугь согь руз нэгІ, энжэгь те пишней зиёдте нехисирем. Одоми гоф хуьшдере шефд ние ведировуну. Гьунши гьуншире нехою гуфдире, гІэмел ниёв эхи гьерчуь э зугьун ю омо эри пертово доре. Ве дуьимуьнжи, ме гьич э «Гьэмишлугь Хуги» э гІуьмуьрмеш егилеш нехисирем, чуьнки унжо мескен эн хуггьой вишенуьт. Ме гьеле эз жун ме визор неомо-

рем эри эз сери-вериме и согъэ сер мере берде э зир тиге дендугъой эн хуггъой вишеи доноре. Эгенер Кечеле-Илдоод эз хуышде визор омориге беруыгу у кечеле сер хуышдере денуыгу э лэгIэй хуггъо, егиле семе и дуылме, эн гъуншию, хош бирение кор сохугу.

Э зир эн тоей гиёвиш мере екиш недири чум-руз, э вэхд эн кор хисиреире — дургуне гофгъои! Э зир тое нэгI, э зир эн хэрей эн тозе чире гиёв, э гъэриш эн мерж хисиребируым. Эз тое те хэре тефигIэт дери небуге нэгI? Э и Кечеле-Илдоод дениш ебо туь, ечи тоере эз хэре тефигIэт сохде нисе дануьсде, эдее нубой хэлгъэ хундени.

Оммо расди, шевгъо ме те хурузгъо гIуыгIуы зере кор сохденуым э богъ ме, э хъэёт ме, чуьнки кор эн колхоз месуызиш э рэхъ мирав. Э колхоз, худо мебуро, пенжсад хуне дери, оммо э хозяйствоме ме е тэхьно кор сохденуым. Кор мере Кечеле-Илдоод не угъониге омере э жигей ме нисохут.

Оммо мере сухунде, догъ сохденигъо уни, хьовир редактор, е доне одоми гофгъой мере э назар невегирдуьт, гъемееки э е лэгIэ бире, теслих сохдуьт эз правлений колхоз талаб сохдени, мере дегъ трудодень штраф соху гуфдире.

Гуш венит ебо, ижиреш кор бирени. Эз ело игъо эдете гуфдиренуьт, ки мере э колхоз е салиш минимум трудодень нисе бире гуфдире, эз елойге чум диреки эдете трудоденгъой мере вегирде буррануьт. Эзи зиёдтеш бедбихъисоби биреними?!

Имогъой эхир гоф мере гуш венит ебо, чуь беде кор овурдиге э сер ме гъунши ме. Эз сереботи эню кем мундебу ме одомире куышдени. ГъейсэгIэтиш у кор э ёр ме оморенге, муй тен ме биз-биз бире.

Шову — нимешев эдее эз гIэруьсихуне вогошденуым, меш эз туь нехуш, е кем хурдем, кеф ме хуши. Дер гъопуре вокурде э хъэёт дироморенуым, мивинуым, э богъ ме, э зир бэгIлидор е одоми поисди. Уре кутэхъэ рушгъо вери, э сер ю — кепка. Э е десевоз луьгей эн бэгIлиире гуьрди, эзилойге э ме денишире, дендугъоре сипи сохде, эдее э сифет ме хэндуьсде.

— Оворе бош эзинжо, гъурумсогъ, — е келе хъэрой вегирдуым ме э сер эню, — бега ме бэгIлигъоре кошдемверовундем, туь э гъовой хурде, э сифет ме хэнди гуфдире?

Э ки мигуи! Э дивор гоф дерафдени э гуш энү нэгI. Диеш луйгей доре сэхд гуърде, эдее хэндүьсде э ме.

Меш ки инсонум, сенгъ нисдуым. Хьуърш зе вешенд э келлей сер ме, песде меш хурде, серхоше одоми. Дерафдуым э хуне видов-видов, ведировундум туфенге, бегьем гъэлеж негуърдеки, зеруым дуьзде. Дуьзд, сес не-сохде, бурра гъэлэгъэне хуно, офдо э хори. Гье у сэгIэт зэхьлей ме рафд, мугум: «Бобо вой, и чуй кор овордум ме э сер ме, хуней ме вечарусд».

Сере вир сохде эз терс ме видовусдум э лой гьопу эри вирихде рафде, туфенге гье у сэгIэт шендуым эз дес ме. Оммо э жигей гьопуре вокурде, сер ме раси э сенгъ эн бору, хэхэ бисдо. Эриме гьечи омоки, гуйге руьхъ нешумой эн муърде вэхуьшде, видовусди э песой ме, сенгъэ вегирде, зери э мазалейме, гъэгър эн хун хуьшдере эз ме эри ведешенде. Эз терс жун ме песово вогошде, видов-видов, шуш нефес гуърде, оморем — дироморем э хуне, дере сэхд сохдем. Э жунтуь эдее гуфдиренуым, ме шову кеширемгьоре, дуьшмеш мекешо. Соей эн у ме куьшде одоми согъ шев эз пушой чумме нисе рафдембу. Хубчи э сес эн гуниле шендеиме е доне одоми неомо. Ме медан у шев эз ме бэгъэй ченд одомигьойгей эн дигъ имуш туфенг шендебируьт гье у вэхди. Э дигъ иму ижире гIэдот дери. Шев гIэруьси, домор э ки гIэруьс дерафденге, дигъбонигьойму э гъиругъ эн дигъ ведироморе э гIуьзет энугьо туфенггьо шенденуьт. Унегуьре туфенг шендеимере екиш э гуш негуьрдет, фикир недорет.

Себэхъ е кем очмиш бире-небире, ме е гьолоке, жун недерие одомире хуно вэхуьшдуым эз жигейме, терс-терс ведироморум э хьэёт, куьнд бисдорум эз у жиге, э ён бэгIлидор, эжеки меит ме шову зеремгьо одоми офдоробуге. Оммо гьетте ме э у жиге оморе расире, гьогъ бисдорум мунд э жигейме. Мивинуым э сер эн эз шей себэхьи гьисдигьо хори одоми нэгI, гьуру-келе (чучело) дегешди. Э сер гьуру-келе сер кечи вери, ловгьой энү эз зириш, эз звериш бурраи, дендугьой ю ведини. Унегуьре эри одоми гьечи оморени, гуйге хэндүьсдени.

И коре ме э чуммеревоз винируьмки мере эз шори гуйге паргьо веромо, шори мере гъэдер небисдо, гуйге эз торике чуьлокон э товуше гIуьлом ведироморере хуно бисдорум. Оммо е ченд минут гирошде бэгъдо, ме эз серхоши ишор бире одомире хуно бисдорум, дири-

руъмки э тен эн гъуру-келле бенек-бенеке пинжек эн гъуншиме вери, э сер ю — кепкей ю. Э ёр ме омо, чуйтам гъуншиме — Кечеле-Илдод и пушогъо мере серкуш зере, эз ме гуфдиребуге: «Туй озгорегъой эн куьгнегъои, темэхькоре инсони, ки туй унгъэде сэгъэт, пулдусд гъисди, эри дуй доне бэгъли одомиреш микуьши...»

Ме гъе усэгъэт э сер офдорум, ки и келлеге э ме гъуншиме гуьрди. Гъе усэгъэт векендуйм эз гъуру-келле пинжек не кепкей Кечеле-Илдоде, вегирдуйм сер эн кечире, пучундум э пинжек энун, оморум э районный центр, э ки прокурор. И гъозие-гъэдере, гъуншиме э сер ме омурдигъоре, гъемере тек-бетек, чуйтам ме эри туй нуьвуьсдемге, гъечу ихдилот сохдум эри прокурор, талаб сохдум эз у тембихь-жозей энун гъурумсогъэ, гъэре гъэриш сохе, хуневечаруне дуй гуфдире. Оммо прокурор, гофгъой мере гуш веноре, гъечи ёнбоки, хуни-хуни дениши э ме, гуйге келебей энугъоре ме куьшдемге, гуйге эри гъемей эни коргъо тэхсири э гъунши ме невери, э ме вери. Гъэйбиш бу гуфдире эз туй, коргъой э метелегъо гуфдиренигъоре хуно: «Гит дигинен хьокиме, хьоким диди... фестериме». Ижиреш прокурор бирени?

Ишму хуьшденишму, хьовир редактор, гуш венит, винишит, гъуншиме Кечеле-Илдод ингъэде беде коргъо, гезирогъо омурдеки э сер ме, э ме гъич тэхсир неверики, эри энун одоми э газет филейтун не нуьвуьсде гъэмел миёв ми? Унегуьре омбар хосденуйм эз ишму, нуьвуьсит эри энун е нешдере хуно тижэ филейтун — фил зере хэхэ-хэсле сохо уре не прокуроре э еки эз товней бедхьисобие коргъой энугъо.

## «НОВОГОДНЫЙ ДОМОР»

Э дигь иму омбордеки одомигъоре лэгъэми. Ини, меселен, э дигь шеш одомире Ошир нуми. Гъерки энугъоре е лэгъэми. Еки — Ошир-гъирмизине рушгъой, еки — Ошир-буьлдуйрчини, еки — Ошир-Гудеги, еки — Ошир-ударники, еки — Ошир-дуьшперей. Эзи шеш Ошир, энжэгъ эки эн угъоре зав. эн сельмаге лэгъэм небу. Имогъой эзи ченд руз пушо мигъид эн «Новой



год» — тозе сал биренге уреш лэгъэм дорет. Уре гъану э уруси «Новогодный домор» огол зеренуът.

Эз товун Ошир-завмаге ижире лэгъэм дорет эме гуфди пери эз дигъ э шегьер экиме э гъуногълугъи омор-реbugъо дигъбониму Ошир-буылдуърчин. Уре буылдуърчин лэгъэм дорет эз хотур энү кор, ки у лап лошур гъуъни, песеде гофгъо ихдилотгъо уре омбор хъэз омор.

— Оммо, туъ жунме, ме миром эйтуъ, — э дуъ эи-гуышдевоз эз ховорей хуышде гуърде, минет сохде, мугу эме Ошир-буылдуърчин, — и ме эритуъ сохдату, гъо меслэхъэт э гъэрейму домунугу, небу э де кесиге гун эз товун эни кор.

— Туъ беге эме бовор, ихъдибор нисе сохд ? — э вогънеки гъэгъри бирере хуно, гуфдурум ме эз Ошир-буылдуърчин.

У песой сере хорусде, эхуышде домунде, мугу эз ме :

— Дануъсдени чуъниге? Гъэрейме нен Ошир-«Новогодный домор», чум мерасо омбор хуби эеки, рафде-оморейму гъисди эеки. Эз хотур эни кор, у э магазин е хубе мол, е хубе чи оморенге, у э пэхъники э гуш-гушшине гуфдирени: «Э магазин ижире чи омори, гъеле кес нисе дануъсде, биё туъ, енебуге хунеигъоре фуърс биёвгу беруъгу». Песеде моле, чире э пеймунде дорски, эз ме нисе дуъздире, дип-дуз доре. — Ошир-буылдуърчин, е чуме хисунде е чумигере келе сохде, дениши эме, суъпле хэнде сохде, — оммо, расдире гуюм: ме эз туъ терсиренуъм. Ме этуъ мугуюм и ихдилоте, песеде туъ мегири муънуъвуъси е хэбер, е фельетон эз товун эни кор. Ишму гофе э дуъл пэхъни сохде нисе дануъсденит, керг хоере пэхъни сохде нисе дануъсденигъоре хуно: гъемере э когъоз нуъвуъсденит, э гъеме лов сохде. Увэхди эз товун эн Ошир-«Новогодный домор» туъ е фельетон, небуге е хэндее когъоз нуъзуъсдиге, э гуш энү дарафдемунде ме хэбер дорем гуфдире и коре эритуъ, у эз ме келе гъэгъри мибу, эзу дие эме чи нирасуъ, дусди-хъовириму пучи.

— Ниевоисдениге туъре — мегу, — мугум ме эз Ошир-буылдуърчин.

— Гуфдире — мугуюм, энжэгъ эз товун энү, хосденуъм эз туъ, гъичиш менуъвуъс.

Ме уре гоф дорум нинуъвуъсуъм гуфдире. Увэхди Ошир-буылдуърчин, екем гъемин, олхогъин бире, сер гуърд гъечи ихдилот хуышдере.

— Эй гІээзи, э ёрмени, гье умогьойгьо, Ошир-«Новогодний домор» жогьил гьисдики е раче одоми бу, буй-балаюш хуб, ченд е килэхь гусбенди муйгьо вебу э сер эню. Имогьой туь дирейки уре, сер эню хоей эн гьозе хуно тип-темизи, е доне муйлеш невери, э лэгІэй ю е дондуш эй хьэсрот недомунди, лэгІэй эн соворегІэй иле хунои. Ю хуьшдениюш тулугьэ хуно вамасири. Имогьой келе мерди дие. Оммо имогьой биё вишиш у э и келе мерди хуьшдеревоз, э и сер-сенбол хуьшдеревоз, чуь жире уингьо ведешендиге. Э дигь иму е жогьиле бие зен дери, Беневше нуми уре. Ошир уре динж нисе гьишде, э песо-пушой эню эдее вежегьисде. Хьэлово бири э у: «туь жогьиле зени, меш ки гьеле э гьулме гьувот, э жунме жуьргІэт деригьо вэгІдоймени. Биё туьре э сер эн зенме вегуьруьм, эз дуьли-жуни еки зигьим. Туь эме омориге, бикере хуно мизигьи.

— Беневше чуь гуфдире? — пуьрсуьруьм эзу ме.

— Беневше? Беневше уре э чум диреш нисе хосде, — мугу Ошир-буьлдуьрчин.— У эз ю дес кенуь гуфдире, ченд бо Беневше эри эню гьелебуле гуьрдебу, мирав эз дес эню э сельсовет шуькеет мисоху гуфдире. Оммо Ошир гофгьой энуре эзи гуш зерени эзу гушиге ведешенде, чумгьоре хисунде, сер гуьрдени эри эню э гьовой эн шуькесде хунде мэгІнире, чуьтам Керем эз муьгьбет эн Асли су гуьрде сухдиге, Меджнун эз муьгьбет эн Лейли жингир бириге.

Туь дануьсденики, дигь шегьер нисди. Э дигь еки э у тараф дигь шев хов виниге, себэхьимуьн э у тарафигей дигь зигьисдегоргьо гьеме дануьсденуьт. Шев э говду гов эн ки зендиге, себэхьимуьн э гьеме мэгІлуьм бири. Унжо дуь эз еки гоф, енебуге де чиге пэхьни сохде нисе дануьсде. ГІэлибобое денду недерие Ошир э песой Беневше гьишде, уре чум вокурде нисе гьишде гуфдире, э дигь гьеме дануьсдени. И хэбер гьелбет э зен Ошир, э Периш расири. Зене жинг гуьрди, хьэлово бири офдори э жун эн шуьвер: эй туьре гІэйб нисе оmore, хуьшдере э пушой эн хэлгь руьхшенд-биёбур сохдей, той эни коргьои туь, туьре келе гІэйлгьои, невегьои, келе мерд бирей эз эгьуьл чешмиш бире, уён-буён. Эки мугуи! Э и дивор гофгьой эн Пери кори сохдениге, э Ошириш кори мисоху.

И перигьо шев эн мигІид, эн Новый год (имогьой э имуш и мигІиде э уруси гуфдиренуьт) Ошир дере сэхд

сохде, пулгьоре гьеммере эз касса вегуърде донорени э гьултугъ эн палту. Песде э е келе ейлугъ доноре е ченд метро мол эвруьшуьми, шоробгьо, гьэнфитгьо вегуърдени э хуьшдеревоз, еГни бэхш эри доре Беневшере. Палтуре у э тен нэгI, э сер душгьо вешенде, рафдени э лой хуней Беневше. Те э хуней эн Беневше расире, ебо туь биё куьрпире эз сер нуькере гирори. У шев хинике шев бу. Э хори те сугьрезани верф бу. Иловле эз верф гьеме сип-сипи бу. Оммо верф, хиники э гуш эн Ошириш недебу. У эз эшгъ серхуш бире одомире хуно, бугъчере э дес гуьрде, эдембу шори-шори рафде э хуней эн Беневше. Уре имид бу, эз хотур эн бэхш, эн мигIид у и дес юре пиш несохдге, э гофгьо, минетгьо, менэхьэ-фигьой энугуш веноре, эхириш эгерде вегуьрде, рази бисдоге зен энугуш эри бире. Эз шори у мэгIни эдембу хунде э зир зугьун хуьшде:

Ме не туьни гьердьеки,  
Бэхдеверим э гьэл еки,  
Дуьлме э дуьл туь дерики,  
Биё, биё эме жейрон.

Оммо э сер куьрпи оmore расире мунде, бирден эз нокуми эз жеиге мошин, зури-зури фурамо э сер эн куьрпи. Ошир бирден, сер-суре хуно бире, песово э гьирогъ эн куьрпи чеп рафде, серкуногьово офдорени э гьэд эн хинике гIовгьой эн нуькере. Бугъчере, палтуй энуре гье усэгIэт гIов берд. Эз хиники, эз хьэлежигери, Ошир сер гуьрд эри келе хьэрой дешенде, буьруьж вегуьрде.

Э мошин вебуьруьтгьо одомигьо, дес энуре гуьрде, э е гужевоз ведешендуьт уре эз нуькере, овурдуьт э хуне. Ошир эз хиники кип-кову биребу, гьуьздурме гуьрде одомире хуно эдембу лерзире. Зугьун ю кут бире, гоф сохде нисе дануьсдембу. Зен энугуш Пери диренге э и хьол шуьвер хуьшдере, терси зэхьлевежэгъ бисдо. У гьечу дануьсд, ки уре киниге талан сохди, э нуькере дешенди, дуьзди-талавуришу очугъ небу гуфдире. Зен зури-зури тара парталгьой эн шуьвер хуьшдере векенде, дуборе вокурд сер-тен энуре, нушунд э ён эн герме кинле, гирисде-гирисде, мугу эзу:

— Ой мерд, коми залумгьо, гьэyserгьо овурди э туь и гуже, ки дешенди туьре э и шев-торики э жилиде гIовгьой эн нуькере?

Себэхъимуьн э гьемей дигь лов бисдо, чуьтам шову Ошир э пул не бугъчеревоз э хуней эн Беневше э рафдеки э нуькере офдоре батмиш небире мундиге. И гьозие-гъэдер энуре гьеме эдете гуфдиренуьт- хэндуйсденуьт. Эзу шев эйло, Ошире имогьой гьеме нум норет Ошир-«Новогодный домор».

Ошир-Буьлдуьрчин гуфдире верасденге ихдилот хуьшдере, дениши эме, екем э хуьшде домундере хуно, песой сере евош-евош хорусде. Песде лове э хэнде веберде, э жуьргIэтиревоз гуфди эме:

— Дануьсдени чуьниге? Воисдениге нуьвуьс эз товун энү. Лап жигеюни эри энү. У туь нуьвусигьо ихдилоте нум ни «Ошир-«Новогодный домор».

## Э ХЭТОЙ ЭН Е МОЧ

Ме э ишму гуюм, ме э гIэрей эн одомигьо е одоми-нуьм, песде эзи жанае-манае одомигьо нисдуьм-о, номенклатурный одоминуьм. Оммо биьйт ишму э зенме денишит. У эжигей эз ме э жигей шори сохде, келегеди сохде, лов-буз ю гьеммише дуьлуни, гьич эз ме рази нисди, керг гьуьртире хуно гье эдее фугьунде, гушмере динж нисе гьишде.

— Эз дестуь, Эсеф, серме гижиги, туь анслангьореш хьэл мисохи, неки мере. Туьре эз буй-бала бэгъэй е фегьм, е эгьуьл нисди. Ме туьре пенж энгуьшдмере хуно хуб дануьсденуьм, шинсхдэнуьм, кеми-кури нэгI, бисд сали ме э туьревоз эдее гIэтиет кеширенуьм,— гуфдирени эз ме зенме.

Буй-балайме гьэггигьэтиш хуби, обурлуьни, ме худо мебууро, екелуье чоьгъэ одоминуьм. Оммо мере эз хубе, обурлуье буй-бала бэгъэй де верзирение коргьойгеймеш гьисди. Небуге мере э хотур эн е буй-балайме ответствени гьурлугьгьо екиш нидо. ГьейсгIэт ужире вэхдгьо, зомонегьо нисди. Гуьлом гьеме эгьуьлменди. Оммо имогьой биё туь и гофе э зенме гьондурмиш сох, комики эз гIош не дуьшпере сохдере бэгъэй, не эз дуь сал егиле гIэил зендере бэгъэй де гьичиш нисе дануьсде.

Эз ме хьэлово бири:

— Туь э дипломтуьревоз эричуь келегеди сохде? Диплом эри вегуьрде асанти, одоми эри бире четини. Диплом туь эйчуьни мере, э сер туь бегьем эгъуьл недебиренге.

Диренит чуь зобуниге зенме? Эришму гурунд ниёв, ишму э гIэрей эн мердгьо е мерд биреки, зен ишму иш-муре ижире серкушигьо зенуь? Гьеле серзиёди эз начальникгьоймеш мере динжи нисди.

Зенме мере серкушигьо зерени, охмурие гофгьо гуфдирени, егIни мере ижире обурлуье сер-сенбол гьисдики, диплом э гьултугь дерики, э е жиге омбор нуьшде кор сохде нисе дануьсденуьм. Хуб, э зенме чуьни инжо, эгенер ме э гьэриш эни пенж сал ченд гьурлугь дегиш сохдемге. Суьфде ме буьруьм заведиш эн городская овощная база (сенигIэтме агроном-овощеводи). Песде бисдорум ме директор эн есиёв. Эз директор эн есиёв, мере вегуьрденге, норут директор эн хлебопекарни, песде начальник эн пожарная охрана. Э коми кор ме небирем, эз гьеме жиге мере э «выговоргьоревоз» вегуьрде э е кориге норенуьт. Оммо зенме эзи коргьойме бирезини. Ме эдее гуфдиренуьм эз у: туьре э коргьойме кор нисд, туь гIош-дуьшперейтуьре сох, гIэилгьойтуьре зенд парте-парт. Те ме э номенклатурный список эн рэхьберчие корсохгьой эн шегьер дереуьмгьо ме гьемише начальник-хьоким мибошум. Е гьурлугь мебугу, е гьурлугьиге бугу, токи ме начальник бошум.

Оммо ме эришму гуьом: мере эз гьеме жиге эз кор ведекуьрденуьт, гуйге ме начальник бире усол-хуб гьэрез войгей мере биё сохум, э е кориш чум невеноре, э корсохгьоревох хуби-хуби гоф сохде нисе дануьсденуьм.

Ишму вегирит винишит ебо: чуь начальникуьм ме эгенер войгеймере, доре приказмере корсохмере э жиге овурде негьишдуьмге? Дие чуь хьуьрмет биренини мере э пушой эн корсохгьойме? Ини имогьой вегирит винишит гьозие-гьэдер эз товун эн э хэтой эн е моч сохдеи чуьтам домундемге.

Песини гиле мере директор эн театр норебуьруьт. Ме э ишму очугь гуьом пишей эн артисти гьич мере хьэз нисе оморе. Эриме гьеммей эни артистгьо суке-делхэке одомигьоре хуно оморенуьт. Ме рази бисдорум э театр эри рафде, чуьнки директоруьм-хьокимуьм, рядовой одоми нисдуьм.

Е гиле коллектив эн артистгьой театр иму эдембуурьт хьозур бире тозе пьеса-комедия эри норе. Ме эз та-рафме буйругъ дорум э гьеме жигегьо офишагьо венуь, э радио мэгІлуьм соху эз товун эни постановка, хэлгъ омбор биёв гуфдире.

Гьемин гье у руз эн спектакль, эри перде вокурде нуьгъ-дегъ минут мундеки, сер-суре хуно видовусде ди-роморени экиме режисер эн театр, муйгьой сер хуьшде-ре кешире-кешире.

— Биёбур бисдорим э пушой хэлгъ, спектакль эдее эз дес рафде, — гириسدенире хуно бире, гуфди режисер.

Ме медан еки эз артистгьоре эз нокуми шуьгъэме дерди гуьрде юре, э сегьне ведироморе нисе дануьсде. Режисер э ме хьэлово бири ме э жигей энуде ведиром э сегьне возум гуфдире. Гьисди, роль эн шуьгъэмедерди гуьрдебугьо артист келе, четине роль небу. У э спектакль нэхирчире возирембу. Нэхирчи шохьонгум нэхире эз чул овурденге, дироморени э ферма, э говду. Ин-жо дирени у жогьиле бие зене — ширдуьше. Хуьшдени эн нэхирчи эз зуревоз бие мерди. Чум энуде эз зуревоз э и бие зен дери. Нэхирчи эз шори, уре дири гуфдире, сер гуьрдени э иловлей энуде эри вежегьисде, мэгІни хунде. Песде у куьнд бирени э лой ширдуьш и гиле хосдени эзу юре бигьилуь моч сохде гуфдире уре, оммо жогьиле зен нисе гьишде, рази нисе бире.

Ме ченд гиле биребуьруьм э репетиция, дануьсдем-буьруьм у роле чуьтам возире герекиге. Оммо эз елойге ме гьич э гІуьмуьрме э сегьне возире одоми нисдуьм, песде нэхирчи жогьиле зене диренге биё мэгІни хуну. Мереки эслогъ сес неве, сесме сес эн бидбиде хунои. Ме эз товней сес ме гуфдиренге э режисер, у мугу:

— Диеш хуб. Туь возиренигьо роль хэндее комиче-ски роли. Э ужире сесевоз хундиге хэлгъ диеш омборте михэндудь.

Чорей ме небисдо рази бисдорум: е чи спектакль эдее эз дес рафде, зал одоми пури. Э серме килэхъ воно-рут, э душгьой ме епинжи дегуьрдуьт, келе бигъгьо клей зере воноруьт э сифетме. Пушой э сегьне ведарафде, ме хуьшдере эри жуьргІэт доре эз ешик эн стол ме бутылкай эн коньяке вегуьрде е пура пейлей эн коньяке декуьрдуьм хурдум.

Вэхд ме омо эри ведироморе э сегьне. Э сесгьой «гов-гьо» гуселегьо омореки, ме дироморум э сегьне, э «гов-

ду» дирируёмки севгил мере, ме лове э шоре хэнде вебердуым, биггьгой мере хуб тимор сохдум. Песде эз шори эн дуьлме, гуйге мере пар вероморере хуно, десгьоре лов сохде, сер гуьрдуым э иловлей эн жогьиле зен эри хунде мэгИни, вежегьисде.

Эз зир чум денишуьруым э зал, хэлгь эдее хэндуьсде, разини эз возиме.

МэгИни хунде верасденге, куьнд бисдорум эз жогьиле зен, минет сохде гуфдуруым е гиле, дуь гиле, песде сеимуьн гилеш мере моч дуь гуфдире те гьерки бисдо инжо оморе дироморе.

У э сеимуьнгилеш э гофме гуш невеноренки, мере моч недоренки, бирден хьуьрш зе вешенд э мазалейме. Ние дануьсденуым хурде пейлей коньяк кори сохдге э мувэхьме, небуге эриме ме директор, начальник бирей у гофмере э жиге неовурдеи гурунд омоге эриме, эхирки, ме эз хуьшде ведарафде, епинжире эз душ шенде, пертово доре, хьэрой вегуьрдуым э сер артистка.

— Гьистомон! — мугум ме. — Ме келейтуьнуым, начальниктуьнуым, туьре чуй ихдиёри эз гофме ведарай, буйругьмере эжиге неёри, хьуьрметмере э пушой хэлгь пой зени?!..

И гофе гуфдире ме э зарбевоз куьнд бисдорум эзу, сэхд гьэл гуьрде уре, е моч векендуым эз лэгИэйю. Гье и момент Гьистомон, э дес комики бедире дебу, бедирере гьово гуьрде зе эз серме, эзилойге чубугь эн «нэхирчииме» э дес дери омо ведиромо э пушойме гьэлбуьсе хуно, чумгьоре чарунде, шуьвер эн Гьистомон... Дие песоку чуй бисдоге ишму марасит. Спектакль лов бисдо. Э зал офдо хьэрой, хэнде, нифри... Эзилойге Гьистомон э тие бедиреревоз, шуьвер ю э чохлахэвоз видовусде э песойме е сер те куче пиш сохдет мере.

Оморем э хуне. Инжо зен мере э хуне нисе дегьишде.

— Э киревоз эрэгьи хурдейге, гьэл-моч гуьрдейге, унжо вогошд бура, номуссуьз, лоигьсуьз! — мугу эз ме, женевере хуно э серме гьов кенде оморе.

Ме медан, ме Гьистомоне э моч сохдеки э ловгьойме гьирмизине ранг вомунди, э сифетме — пудри. Зенме гьечу дануьсди ме э иловле э киревозиге гешдем, гьэл-моч гуьрдем...

Имогьой и ченд рузи Министерством культура мере эз кор ведешенди, зенме мере эз хунегьо ведекуьрди, нисе дануьсденуым имогьой чуй сохумге, сер мере э ко-

ми куле беруым денуымге. Э жун ишму, гинохькор эн е моч бирем, а хэтой эн е моч домундем.

## СИЕГЪЕ ГІЭРСГЪО

— Ой, туьре чуй гуьм, келедедей! Гьеле песде гуфдиренуьт: «Пире одомигьоре хьуьрмет гирит, хотур ишуре омбор хогьит, э сер дес гердунит!..»

— Чуй сохди беге э туь келедешму?

— Чуй сохди? Эжун худо, дуьшме э сер одоми у коре ниёру, келедедеюму э серме овурдигьоре. Гуш венит ебо, чуй муьгІуьжуьз донориге у э чумгьойму.

Ме хуьшдениме э конторай «Загот рогатскот» кор сохденуьм, заведующий эн ветеренарный службаом. Конторайму дуь тебэгъэи хунегьо вокурди. Э гьер та- раф хунегьо болхунгьои. Е болхун э лой эн дерьёгьи, е болхуниге э лой эн парк, е рач музыкаш зерени. Мере имид небу унжо хуне мидуь гуфдире мере. Мере хуне гьисди дуь утогъи. Расди гази, батареи, ваннеи э хуней- ме недери. ГІов-гІэилиш имуре нисди. Не имуре гьеле гІэилиш герек нисди. Те жогьил гьисдимгьо хурим эри- му, кеф сохим, эзунбэгъдойге мивиним, чуйнки гІэил биренге, одоми руз дире нисе дануьсде. Не эз гІэил эри бебе-деде эз инжимиши бэгъэй де хэйр нисди. Е менуьм, е — зенме. Оммо э ме чуй кори кими одомигьоре хуне нисди, енебуге кими кифлетгьо э ченд гІэилевоз э е чуйкле хунеле эдете тасире домунденуьт, суьфде- суьфде, егІни угьоре биё хуне дуьт. Лампей эн гьер мерд э хуней эн гьер мерд товуш доре. Гьер мерд эри чорей сер хуьшде фикир сохде.

Оммо ме эриме омбор думит, фикир сохдум, чуй гІэмел, чуй фенд, чуй чоре сохум, ме э у тозе хунегьо дарам? Коргьой гуфдиренигьоре хуно: «гьозор фикир е абассире эз сер нисоху», эз сохде думитгьо, фикир- гьойме ме эриме е рэхь, е чоре офде недануьсдуьм. Эз гьэгьр, ме э у хунегьо дерафде нидануьм гуфдире, эдем- буьруьм хуьшдере хурде вечире. Мере дие имид небу э тозе хунегьо эри дарафде, кейки бирден э ёрме омо- ки, мере э дигь гьэрие келедедеи гуфдире. Гьисди дузи-



ре гуом, ме нэгI, зенме э ёрме овурд, мере э дигь келедедеи гуфдире.

— Пой ебо,— мугу эз ме зенме э гъосутевоз,— туьре гуйге э дигь е садсале келедедеи.

— Огь! — мугум ме,— чуь хуб туь уре э ёрме овурди. У имуре гьейсэгIэт лап гереки.

Бовор сохит, эдеме гуфдире, гьейсэгIэт, нум эн келедедеймуре гуьрдуьмки эз дуьлме е келе шори гиросд, гуйге хэзинеи гIуьлломе свурд э пушойме тигьи сохдге. Ме гьечи эри эн хьэсроти, темерузи кешируьм, нечогь эри е гуьле онгур темаруз кеширенигьоре хуно. Эриме гьечи омо, ки ме келедедейсуьз е руз, е сэгIэт, е дэгь-дэггэш зигьисде нидануьм, чуьтам жэгI гIовсуьз зигьисде нисе дануьденигьоре хуно. Эз келедедейму куьндте, гIэзизте, ширинте, гуйге эриме э гIуьлломе дие одоми нисди. Гьелбет, иму кесим беге? Хун екиним, жуп екиним. Коргьой гуьгьоре хуно: «Дуьл одомию эри одомию мисуху, эн ёд чуью мисуху?» Эз ело ме шор бисдорум уре э ёр овурдумки, эз елойге дуьлме омбор буланмиш бисдо. Фэгьир келедедейму унжо тэхьновэхьной, э дигь уре не шувьери, не куки, не духдер. Зигьисдени келедедейму э хуней эн кесиге, эн хэгьер хуьшде. Нева биреки одомире, э хуней эн хэгьер хуьшде эйчуь биё зигьуь келе зен?

Эхирки, сер ишмуре дорд недуьм, венуьшдуьм э мошин, рафдуьм э дигь, келедедере э киме э шегьер эри овурде. Бигьил зигьуьгу э имуревоз э тозе хунегьо. Эри, эри — э тозе хунегьо! Гьери виним садсале пире зен имуре э хуне дерики конторайму мере хуне нидуьге. Садсалине куьгьне одомигьоре келе хьуьрмети, угьоре академикгьо э учет вегуьрденуьт, эз товун садсалине одомигьо статьягьо нуьвуьсденуьт, государство э угьо хуб денишире. Песде, келедедейму — дедей эн партизани. Лелейму дуьвимуьн кук эн эз дес фашистгьо э довго муьрди.

Эхирки ме дануьсденуьм, эгенер келедедейму э имуревоз зигьисдге, э тозе хунегьо ордер эри чор утогьи хуне э куьфме дери. Оммо ме гьейсэгIэт дуьлпесо буьруьмгьо э товун эн кор бу, ки: зиндеиге келедедейму, небуге те имогьой муьрдиге, чуьнки и ченд сали ме уре недирем, не пуьрсиреш недануьсдем, эз коргьо боргьойме мере можол небири.

Оморенге э дигь, шоримере гьэдер небу, диренге, ки

келедедейму согъ-саламети. И имогъой нуьгъ сал мибу, ме уре недирем. Гьечу пушотеиней хуьшдере хуно чуьк-лелеи, лэгъэри, дилбоши, гъэйлеш гье э лэглэю дери. Чумгъою гьейсэгІэтиш хуб чи дире, гушгъою хуб шиновусде. Оммо э гъэд эн и нуьгъ сал ме уре недиремгъо, у екем диеш сар, чуькле бири.

Суьфде келедедейму гьич э герде нисе вегуьрдембу эри оморе э шегъер зигъисде э имуревоз. Песде ме э зарифет, мэхсереревоз гуфдурумки э у, ме уре мивирухунум гуфдире, чуьтам келебебейму жогьил гъисдики, э у ошугъ бире вирихундебуге уре, у емишогъ бире, эз гуфдире гофгъойме хъэз оморе уре, эхир-эхириш рази бисдо, эгерде вегуьрд. Гье у руз дир несохде, ме келедедеймуре э машин венушунде, офдорум э рэхъ.

Ме не зенме, пелпелуь э иловлей лампе вежегъисденигъоре хуно, эдембирим вежегъисде э песо-пушой эн келедедейму, уре хъэз биёв гуфдире э шегъер экиму зигъисде. Себэхъимуьн шохъонгум ме дуь билет восдоре келедедеймуре даже э театриш бердуьм. У хуб вуьнуь, шинову гуфдире, ме билетгъоре лап э суьфдеи жерге вегуьрдуьм. Оммо ме гьейсэгІэт э пешмуни эну кор нисе расиренуьм, эйчуь бердебуьруьм гуфдире уре э театр. Омбор гъэлете, недана кор сохдум ме уре э театр бердеи, лап хэто-бологъ овурдум э серме.

Эри, нуьшдем э келедедеймуревоз э театр, эдее спектакле томоше сохденим. Э спектакль эдембу бурмунде, чуьтам партизангъойму э вэхд эн Отечественни довгІо э тыл эн немцгъо э фашистгъоревоз женг бердебуьруьтге. Келедедейму чунере тик гуьрде е рач, динж эдембу денишире. Егилейге дуь фашистгъо е партизан имуре, автоматгъо э дес ишу дери, э пушо дешенде, диновундуьт э штаб ишу. Келедедейму гьеусэгІэт э битобиревоз эз жиге жуьмуьсде, сер гуьрд эри нифри сохде фашистгъоре. Офицер-фашист сер гуьрд эри пуьрсире эз партизан чуь герек буге уре. Оммо партизан хуни-хуни денишире э у, эз лэглэй хуьшде е гофиш неведешенд. Увэхди, хьуьршлуь бире, ведешенд тапинжере, вено лулей энуре э синей партизан, сер гуьрд эй терс доре, гьелебуле гуьрде эри эну, мизенуь гуфдире уре, эгенер партизан э доре пуьрсуьшгъой эну жугъоб недоге. Гьетте и коре дире, келедедейму гъуз бире векенд эз пой хуьшде калоше, э е зарбевоз шенд э сегъне. Калош раси э песой гъуьжум вегуьрде сер эн офицер.

— Веги тапинжейтуьре нелоигъ,— пое э хори зере келе-келе, хьэрой сохд э гъемей зал келедедейму,— не-буге ме туьре, гIэмолигъ, гунлее сине, гъейсэгIэт!...— келедедейму гъуз бисдо калошигереш эри векенде, пер-тово доре э сер эн роль эн немцки офицере возирембу-гьо артист.

Гъемей эни келедедейму сохде уингьо, коргьо, гуф-дире гофгьо бирден, эз нокуми бисдо, унегуьре ме э вэх-дию уре поюнде, лэгIэйюре гуьрде недануьсдуьм. Спек-такль гье усэгIэт поюнде омо. Э зал кимигьо келе-келе хэндуйсдуьт, кимигьойге, хьэрой сохде, гуфдуьруьт:

— И чуй хулиганини э гъэд спектакль?!

— Эжи инжо милиционер, дружинникгьо!

— Артист чуй тэхсиркори инжо?!..

Меш эз гъеме пушо, эз гъеме зиёдте хьэлово бисдо-рум э келедедейму, нифри-офри сохде уре, серкуш зере. Мере культурни одомире омбор гIэйб, хижолети омо эзи коргьой эни келедедейму э пушой эн ингъэде хэлгъ. Гъул энуре гуьрде, зури-зури кешире, ведебердуьм уре эз театр.

Келедедейму согъ и рэхъэ, сере гъуз гуьрде, гоф не-сохде, э пэхьники чумгьой гIэрси хуьшдере покурде-покурде омо э хуне. Ме э сер офдорум, ки келедедейму гъелбет верасири, ки ю омбор гъэлете, бидэгIэтие, биё-буре кор сохди гуфдире э театр, имогьой келе пешму-ни, юре хуьшдениюре гIэйб оmore эз сохде кор хуьшде.

Себэхьимуьн ме е келе заявление нуьвуьсдуьм э сер эн директор нен местком эн конторай «Заготрогатскот», мере чор хунеи дуь гуфдире э тозе вокурде дуь тебэгъ-эине хуне. Э заявление нуьвуьсдуьм, ки э меревоз сад сале келедедейму, кук ю — партизан э довгIо муьрди-гьо, зигъисде... У руз эз кор вогошдум ме э хуне дуьл-шор. Мере имогьой лап сэхд имид бу, ки э хотур иму нэгI, эз хотур эн келедедейму имуре тозе хуне мидуьт гуфдире. Бирден э пушой чумме омо, чуьтам ме не зен-ме э тозе хунегьо зигъисденимге, чуьтам ме не у э бол-хун ведироморе, гъэл гуьрде екире, гъутине э сер гъу-тине веноре, э парк зеренигьо музыка гуш веноре, валс вежегъисденимге.

Оммо ме э хуне вогошденге, омбор мэхьтел мундум, зенмере чум гIэрси, лов гиръеи диренге. Эз ранг пудри зере гъутинегьой эну эдембу сиегье гIэрсгьо рихде (эри зенме гIэрс рихунде гIэмел ниёв, чуьнки у мижегьой

чумгьой хуышдере споме раит зере). Эриме гьечу омо, ки зенме эз келедедейму ишжишиш бире, эдее гирисде. Уре эз коргьо, нуышде-вжыуышде, сер-сенбол келедедейму хьэз нисе оmore. Унегуре дуыл ю догъиногъи.

Ме занмере гъимиш сохдум. Зенме е раче сери, ме уре хосденуым. У э парикмахерски заведующая эн дамски салони, эз ме пул кемте пис овурде э хуне. Хотур, гъимиш энужире зене чуйтам гъишде мибу. Ме гьечу дануьсдуым, келедедейму э хуне дери, у е нуышди э до-руни хуне, керг э кергелуь нуышуьгьоре хуно, чуме э хов веноре, енебуге гъэйлей хуышдере томбоку пур сохде, туьхъмек дешенди э хуне. Зенме культурни одо-мини. У э буй духи-этир вердиш бире одомини. Эз буй томбокуй эн келезен мазалей энэ эдембу чэх бире.

Ме куьнд бире эз зенме, моч сохдум эз гIэрс тар бугьо гъутиней энуре, мугум евошлей, хоши-хоши:

Екемлейгеш сабуьр сох, довом ди, иму гьетте тозе хуне вегуьрде, миди муьфуьрсим уре э дигь. Э шегьер, э гъэд кифлет иму, у эдее диренуым уре эрэхь берде нибу.

— Кориш унжо дери дие—у вогошди рафди э дигь.

— Рафди?! Туь уре гуьрде поюнде недануьсди? — эриме гьечи омо, гуйге хори эзир пойгьойме эдее шэгъэ хурде.

Зенме, сиегье гIэрсгьой хуышдере покурде-покурде, сере жумунде, мугу:

— НэгI недануьсдуым. Ингъэде ме э у минет-синет сохдум, э пойгьой ю офдорум, мугум эз у, эгенер туь рафдиге, имуре э тозе хунегьо хуне нидуь, э хотур туь, туь сад сале келе зен э имуревоз зигьисдеи ёгъин мидуь, биё, э хотур худо екемигеш пой э киму...

— Гьери, келе зен чуй гуфди э гофтуь? — эбитоби-ревоз пуьрсуьруым ме.

— Келе зен мугу: эгенер ишму мере эз дигь эй хуне вегуьрде овурдейтге, ишмуре хуне герекиге, биёйт э дигь зигьит. Хуней бебей эн невейме э дигь тигъини, хэвлети, екиш нисе зигьисде. Биёвгу нуышуьгу, сэхьйиби сохугу хуней эн бебей хуышдере, и хэлгъэ хуно кор сохугу э дигь бебей хуышде.

Эхирки сер ишмуре дорд недуым, хуне э дуь болхо-невоз, еки э тараф дерьёгь, еки э тараф эн парк, веда-рафд эз десме, сохде ниетгьо, хьэрекетгьойме гьеме пуч-гъич бисдо. Гьеме э сереботи эн ки? Эни кафдаре,

мувэхъсуьзе келедедейму. Гъеле песе гуфдиренуьт:  
«пире одомигьоре хъуьрмет гирит, хотур ишуре омбор  
хогьит!..»

## ДОЛЛОК

— Дануьсденит чуьниге: гьер мерде рач бире воисде, иллогьки зен тейфесире,— мугу эз ме доллок, тиже серчире э сэгIбу зере бинебугьозме куьнд овурде.

Э гузги веде бу буй-балай эн доллок, жуьмуьсде-ча-руьсдей эню. Сер эню гиргине бу, чире бу, сифет ю — сиечерде. Уре е келе бигьгьо вебу. У э гоф сохдеки бигьгьгой эню верафдембуьруьт-фураморе. Оммо зерде чумгьгой эню э могьбулиревоз дениширембу э одоми.

— Гьелбет, э и кор е гIэйб недери, гьер одомире рач бире воисде гуфдире,— мугу гене доллок, э хьисобевоз воисде юре мере чуьниге несигIэт дуь, енебуге эзи хубе весиетгьгой хуьшде гую эриме,— эри деве енебуге де хьэйвониге бешгьэ нисди рачиге у небуге бирачиге. Меселен, гьич э хэпер девеш нисди герден ю шефди, кемер ю бонгьузи гуфдире. Гъеле уьсделуьге, ишму гузет сохдейтге: деве неденишире э гIэйбежери хуьшде, омбор уьктеми, сертики, пушотеине беггьо, хонгьоре хуно. Оммо имогьгой биё туь зенмере виниш. Э сер вини эню е зигил веромори, имуре имогьгой эз дес эни зигил э и хуне не динжини, не саламети. Зенме омбор гIэйб, дуьлесди кешире, э сер вини эню зигил веромори гуфдире. Нечогьэ одомире хуно бири, гье усэгIэт э хори е кор нисдики гьэгьри бире, хьэрой сохде, женг сохде э хуне.

Доллок серчире тик гуьрд, сере гьуз гуьрде, могьбуле хуно поисд, е лугьонде ох кеши. Эхьисобевоз гье и туьтем э пушой чум косиб зигил эн зен ю оморебу. Мере э у езугьиш омо.

— Дануьсденит, кире гене рачи герек нисдиге? — гуфди гене у.— Дуразруйму, рачи герек нисди муьрде одомире, чуьтам уре герек нисдиге не хуне, не дер, не пенжере, не герми, не хиники.

И гофгьгой энуре ме шиновусдумки, мере хэнде гуьрд. Доллок гуйге гьэгьри бисдо, серчире гье усэгIэт

дур берде эз ме, у гъош-гъобогъ хуышдере дуллу сохде, гъэгъри-гъэгъри мугу эз ме:

— Хэндуьсде, гражданин, э вэхд руш чире гІэмел ниёв. Имуре негъогъ э хэто медеше. Чутьтам хирург э вэхд эн операция эри пациент хуышде жогъоблунниге, меш, усдо-доллок сер-руш туьре э чиреки эз товунтуь жогъоблуннуьм. Эз елойге вегуьрде фегъм сохдиге, ме э туь гъейсэгІэт гуфдурумгъо гофгъо руьхшендиe, хэн-дее гофгъо нисди.

Э пенжерей эн доллокхуне е чуюкле ранг савзее ёлка вебу. Э лубегъгой эн у жуьре-бежуьре раче игрушкегъой гІэили вебу. Угъо эдембуьруьт тов-тов доре. Эз шишей пенжере веди бу, чутьтам э куче лепе-лепе сейреке верф оморембуге. Руз шохъонгум бу. Гъово оморе-оморе эдембу тор бире. Хэлгъ гъер мерд эдембуьруьт тэгІди сохде э хунегъошу эри рафде, э десгъошу бэхшгъо дери.

Ме хэндеймере поюндумки, доллок э олхогъиниревоз сер гуьрд гене гоф хуышдере эри гуфдире.

— Ини экиму оморенуьт клиентгъо, мердгъо, зенгъо. Эйчуь оморенуьт угъо? Гъелбетки рач веди бошут гуфдире. Ини, меселен, вегирит хуышденишмуре. Эгенер ишму е мегъ руш нечиритге, сер дуз несохдитге, вэхшире хуно веди мибошит. Дуз гуфдиренуьм ме небуге нэгІ?

Доллок е-дуь пой рафд песово, дениши э гузги э лойме, егІни жугъоб мере эри шиновусде. Ме сере жумундум, егІни, разинуьм гуфдире э у гуфдире гоф. Песде у гене куьнд омо, руш мере чире, сер гуьрд гоф хуышдере, мугу:

— Ини ме эришму е гоф гуьм. Эзи е ченд мегъ пушо ме э дамски салон кор сохдембуьруьм. Омо экиме е лап гъолинде огъиле зен. Ме огол зеруьм уре, нушундум э куьрси, пуьрсуьруьм: «Чуь прическа сохум эришму, чуь жире ранг зенуьм муйгъошмуре?» Муй мере сиегъе ранг зенит, прическаймере сохит — эри жогъиле духделегъо сохденигъоре хуно».

Ме денишуьруьм э сифет зен, э гъошгъо-муйгъой эн у, мугум: «Мадам, ишму эз сифет очугъэ, сипре одоминит, гъошгъошму, мижегъой чум ишму зердуьт. Эришму хуб мигуьнжуь зерде ранг. Песде прическай эн жогъиле духделе эришму нигуьнжуь. Муй сер ишму сейреки, лап нерми, ишму пуре одоминит. Ме ишмуре воисде тегъер прическа сохдумге эришму, ишму рач ве-

ди нибошит, бишерк веди мибошит. Биё ме э сал ишму гуъре, э ранг муй эн сер ишму гуъре эришму е хубе прическа сохум».

Эхирки чуьтариш гири, зене э сер венгесдуьм, гьондурмиш сохдум.

Ме эйчуь гуфдиренуьм и гофе э ишму? Гуш венит данит, чуьтам иму доллокгьо э кор иму селигъэлуь гьисдимгьо, хуби, рачи эн клиентгьоймуре хосденимге.

Доллок рушгьоймере чире варасде, сер гуьрд э гъэйчиревоз бигьгьоймере эй дуз сохде.

— Оммо, гражданин,— мугу эз ме доллок,— гъэдуьр имуре екиш нисе дануьсде, имуре екиш гьимет дорегор нисди, э иму гуш венорегор нисди.

— Чуьтам нисди? Ишмуре беге э гъэгъ ишму гуъре, э жофошму гуъре пул кем доре беге? — пуьрсуьруьм ме эзу.

Доллок гъэгъри бирере хуно бисдо, гъошгьой хушдере гъуьжунд шефд дениши э лойме.

— Кор беге гье э пул вери? — мугу у эз ме.— Э метелегьо гуфдирени: «Ошув верме гъошув вер». Хубе гоф, тэгИрифие гоф эри одоми эз эршефи эн суьрхи зиёди. Эриму, эри доллокгьо, е хубе гоф гуфдирегор, е хубе статья э газет нуьвуьсдегор одоми нисди. Оммо нисди одоми э киму, эки доллок неёв эри руш чире, сер дуз сохде, сер-сифет хушдере э порядке оворде. Ини имуре е писатели. У эз гъэилевоз эз дигь иму рафди э шегьер эри зигьисде. Эзумогьойлеревоз у э дигь небири. ГъейсэгИэт нисе дануьсденуьм эже зигьисдегеш у. Эз товун эн дигь, эн мэхьсуьл кошке-веровундеи, мол-гъэре дошдеи у гьичиш нисе дануьсде, эриме оморенигьо у дануьсдегьореш те имогьой гьемере фурмуш сохди. У гъейсэгИэт гъэмише эз суьмергъэндил тефигИэт нисе сохде, хире эз зими. Оммо у эз товун эн дигь, эн корзиндегуни эн колхозчигьо книггьо, ихдилотгьо нуьвуьсде. Эри эн доллок, эки комики у гьемише рафдени эри сер-руш чире у е доне заметкалеш ненуьвуьсди, е хубетэгИрифлуье гоф негуфдири эри энугьо. У гъейсэгИэт миёсде э десме офдоре, ме мидануьсдуьм чуь мисохдумге.

— Чуь мисохдит? — пуьрсуьруьм ме, бирази бирере хуно эз гофгьой эну.

— Молла Насреддин чуь сохдебуге, меш гьечу,— мугу доллок э жуьргИэтевоз.— Дануьсденит чуь сохди-

ге молла Насреддин? Егиле эки эн молла Насреддин е одоми оморебу эри сер чире. Серчи эн молла омбор куьт бу. Эз куьте серчи эн молла сер мерд гьечи дорд дорембу, гуйге пусд сер энуре эдембу эз бине векенде. Эз дорд дореи эз чум эн мерд гIэрс воноребу. Молла Насреддин дуьл мерде эри воровунде, гоф сохд э уре-воз, пуьрси эз у, мугу: «ишму ченд бирорит?» Мерд мугу: «иму пенж бирор бирим, эзу вэхд серме э дестуь офдоре эйло, хьисоб сох, ки чор бирор мундейм гуф-дире».

Ме хуб денишуьруьм э гузги э сифет эн доллар, рангме гье усэГIэт екем зерд бисдо: ме шинохдум уре доллар эз дигь иму бу. Вединики, не у мере шинохди, не ме уре шинохдем. Эз елойге э дуьлме оморембу: у белки мере шинохди, э гьосутевоз гуфдири и гофгьоре эме.

Пул эн долларе доре, зури-зури шляпаймере э серме веноре, ме видовусде ведироморум эз доллархоне.

Шев хисиренге, мивуьнуьм гьемин гье у доллар куьте серчи э дес дери, ленгуьсде-ленгуьсде эдее э пессоиме видовусде, сермере эй чире. Ме эз дес энуре эдее вирихденуьм, эз уьлуьм вируьхуьгьоре хунб. Бирден миденуьшуьм мивуьнуьм э пушойме е келе суьмергьэндиллугьги. Ме гье усэГIэт пэхьни бисдорум э гьэд суьмергьэндиллугь. Песде десгьоймере бурра, хуни сохденге э тиге дуразе тенге велггьой энуре, э сер офдорум, ки суьмергьэндиллугь нисди, гьэмишлугьги. Эз гьэмишлугь ме пэхьни бисдорум э зими. Э зир пойгьойме гIове дирe, э сер офдорум, ки и эз расдиш зими нисди, хири.

Оммо ленге доллар, куьте серчи э дес дери, суьфде э гьэмишлугь, песде э гьэд эн хир эдембу гешде мере.

Ме хэсде, вомунде, гьемейме гIов-эрэгь видов-видов ведироморум эз хир, вирихдуьм ведарафдуьм э е чул. Денишуьруьм э иловле — доллар веди небу. Екем хо-муш бире, дегешдуьм ме э серини, э зир эн е келе гьэребечдор (вэхд гьеминон бу). Э сер луьгей эн дор буьлдуьрчин е рач эдембу мэгIни хунде. Лов ме э шоре хэнде верафд эз раче мэгIни эн буьлдуьрчин. Оммо гье и дэгь-дэгьэ эз дор е гьэребеч офдоре раси э пушониме. Ме гье усэГIэт хэбер бисдорум, мивуьнуьм эз расдиш э сер болуш, э зир десме е гьэребеч дери, оммо у гьэребеч эн игрушкаи бу, эз ёлка офдоребу. Ёлка гьемин



э ён кроват, э ён эн бонилейме бу. Хэбер биренге, э ёр-  
ме омо ихдилот эн доллок, ме э хов диремгьо коргьо.  
Песде ме эриме теслих сохдум, ёгъин эз товун эн дол-  
локгьо, эн сенигІэт энугъо, верзирение жофой энугъо  
е хубе-тэгІрифлуье гоф эри гуфдире, нувьусде.

## ХЭНДЕЙ ЭН КЕЧИ

Шемей гьетте дануьсде зен эн председатель колхоз  
эз болница ведиромори, уре дудунеи гІэил бири, видов-  
видов омо э хуне, векенд эз расе дуьшие кечи хуьшде-  
ре, эз суьрггьою гуьрде, берд э лой хьэёт эн председа-  
тель колхоз. Уре имид бу, эхириш сохде ниетгъой энугъо  
эжиге миёв гуфдире. Ниетгъой эн Шемей у бу, е келе  
кор эри вегуьрде э колхоз. Эри энугъо омбор гурунди,  
хуьрди оморембу, ки у имогъой чуьл сала мерди, бисд  
сал эдее э қолхоз кор сохде, оммо э гъэд эни бисд сал  
уре не бригадир, не звеновод не норет егилеш, даже  
э гъэд эни бисд сал член эн ревизионни комиссияш не-  
вихдет. Эз ки элчэгъи беге у? Уре гуьом, мевихуьгу  
председатель, заместитель председатель, ю Шемей  
хуьшдениюш дануьсдени, юре унгъэде хундеи-дануьс-  
деи нисди. Оммо кор эн бригадири, звеноводире у эз  
угъониге бегем усолте э рэхъ миберд? И пушогъо прав-  
лений колхоз звеновод эн звено Шемей кор сохдени-  
гъоре э жигей эн э пенсия рафдигъо куьгъне звеновод  
е зене нори. Имогъой у биё э зир рэхъбери энугъо зен кор  
соху. Гъеме эз товун эн чуь кори, уре э е гъурлугъиш  
нисе норенигъо, егІни э гуфдирей эн е паре колхозник-  
гъоревоз, у э кор колхозни унгъэде дуьл нисе веноре, дуь  
руз э колхоз кор сохде, сеимуьн руз э базар бире савзи-  
пиёз, шир-пени эри фурухде.

Шемее имогъой воисдембу е фенд-гІэмел офу,  
э председатель колхозевоз дусд бу, менэхъэфи соху  
эрию, е гъуллугъ дуь гуфдире уре. Гъемин гъе ивэхди  
заведующий эн птецефермай эн колхоз э дуьсали курс-  
гьо эдембу рафде, у жиге миёсде хэвлет бире. Шемей  
эри хуьшде гъэсд сохд ёгъин жигей энугъо эри вегуьрде

эри хуышде. Гъемин э и птицеферма е раче жогъиле бие зениш кор сохдембу. Чум эн Шемей эз зуревоз э у бие зен домундебу. Уре имид бу, ю заведующий бисдоге дир-зу у биезене э хуышде ошугъ мисоху, кеф мисоху э уревоз. Тэхьно мерд, тэхьно зен, иловлеш чул-више, коргьой гуюгьоре хуно: «Хуне-хэвлет, боже — девлет». Песини въздгьо у даже э ховиш дирембу ю чуьтам заведиш эн птицеферма кор сохдениге, гъэл гуьрде бие, раче зене эеки сейл зеренуьтге э вишегьо, савзегеигьо. Оммо Шемей нисе дануьсдембу, чуьтам э сер-бегьем биёруге и метлеб хуышдере. Шиниренге, ки зен эн председатель колхоз дудунеи зенди, уре гъечинигеш эри е гЪэилиш шир кеми, Шемей но эри хуышде, дуьшие кечи хуышдере «гъелелуьге» эри берде доре э председатель. Э дигъ энугьо гЪэиле шир дедей вес нисе сохдембуге, шир эн кечире э дуьшире гЪовевоз гЪэриш сохде дорембуьруьт.

Руз эн поиз бу. Асмуре келе хэрегьой эн пешме хуно, булутгьо дегуьрдебу. Эз гъово эдембу неме ворущ оmore, унегуьре хоригьо тар бу, суьрт бу. Оммо кечи, э ён хъэьт эн председатель колхоз оmore расиренге, сер гуьрд эри нэхьси сохде. Чор пое э хори мисмаре хуно шишире, сере гъуз гуьрде, тиге шимшилгьоре хуно дуразе суьрггьой хуышдере ведешенде, у хъэрекет сохдембу эри эз жиге нежуьмуьсде, гуйге у дануьсдембу э чуь дуьл хьиллеиревоз сэхьиб юре эдее берде э хъэьт кесиге. Чорей эн Шемей небисдо, эз дуь суьрг эн кечи гуьрде, суьруьтме кешумоле дебезд э гужевоз нэхьси сохдембугьо кечире э хъэьт председатель.

Шемей э кечиревоз диromоренге э хъэьт эн председатель, у мивуьнуь э пушой хуней энуге грузовой машин поисди. Э машин тозе, эз шегьер восдоре овурде, мебель вери. Шофер председатель колхоз не зенхуьсуьрю, е келе зен, гъир-гъире сипре муйгьо, эдете шкафгьо, шифонергьоре эз машин вегуьрде э гъейву воноренуьт.

Шемей лове э менэхъафие хэнде веберде, омборекбу сохд гЪэилгьой эн председателе, эз товней эн тозе мебелиш гуфди: «Э шори-никиревоз сэхьиб сохошит». У суьфделе лэгЪэ вокурдебу эдембу гуфдире эричуь овурдиге у и кечире, бирден кечи, эз нокуми, э зарбевоз сере вежегьунде, ведешенд суьрггьой хуышдере эз дес эн Шемей. Кечи серсуре хуно видовусд э лой эн сире. Э гузги эн шифонер диренге у чигьрет чуьшдере, ке-

чи гьечу дануьсд у е кечигеи. Гье усэгІэт хьюьршлемиш бире, суьрггьоре пушово ведешенде, у чумгьоре чарунде, хуьшдере вешенде, рафд э сер эню. Те Шемей э иловле чарусде, видовусде э песой эню, гуьрде кечире, кечи э зарбевоз зе э суьрггьой хуьшдеревоз, лов-тум сохд гузги эн шифонере. Шишегьой эн гузги, зинг сохде шэхдей гІове хуно, лов-тум бисдоруьт гьерки э ело. Шемей сер хуьшдере эз терс вир сохде, хьюьршлуь бире, видовусд э песой кечи, уре эри тембихь доре. Гье и туьтем келе зен диренге кечи эн Шемей гузгире хуьрд сохди, е божэхь ведиромо эзу, чуьнки гузги хуьрд бире, егІни, эри ники нисди, эри бедини. Чум эн Шемей э лой эн сес келе зен гьисдики, хьюьрш эн кечи сокит небире, эз нокуми э е зарбевоз зе э суьргевоз эз шидрей эн Шемей. Пойгьой эн Шемей суьрт рафде, сер ю гиж бире, гье усэгІэт офдо, буетмиш бисдо э гьэд эн малад. Эри эню гьейсэгІэт гьечу омо, гуйге нэхьсе кечи уре э гьэд лугьонде чуьлокон зере венгесдиге. Е ченд минут у гьечи эз хори вэхуьшде недануьсде, эз сер ю сэгІэт рафдере хуно, дегешдебу э сер хори, э сер малад. Энжэгь мэгІ зерей эн кечи, комики ухшеш бу гьейсэгІэт э руьхшендие хэнде, э ёр эню овурд, ки сэхде ниетгьо, хьэрекетигьой эню гьеме негьогьи пуч бисдо гуфдире.

## ЗАРИФЕТ

Март эдембу верасде. Песини рузгьо сэхде кулокгьо лов-тум сохд домогълуье булутгьоре, темиз сохд шишере хуно асмуре. Энжэгь э е-дуь жигеле сипре бугьгьоре хуно мундебируьт чуькле булутлегьо. Имогьой себэхь-мунде э лой фирегье ковре дерьёгь миведиромо келе гьирмизине чуьшме, согь руз сер мигуьрд эри герм сохде, товуш рихунде э хори. Эз герми бире эйло, жогьиле эврушьюьмлуье савзегьо руз-беруз эдембируьт вероморе. И пушогьо бирэхьне бируьтгьо доргьо э иловлей кучегьо, э паркгьо, э гьирогь шегьер бируьтгьо богьгьо, э ковре хэлгІэт эн жогьиле руьгьэние велггьо сер гуьрдуьт эри депичире. Эз гьемме доргьо пушоте

гуыл кенд бодондор. Гуылгьой эн у вероморе кеф эн сэгIбуре хуно эдембу тов-тов доре. Эз дуре, герме хори-гьо вогошде гъушгьош эдембируйт э шори ве хуьроми-ревоз хунде. Эз гьемме бежидте, дилбоште, келе-келе, э хъзвесевоз эдембируйт хунде, э гIэрей хэсде луйге-гьой эн гъуьндуьре доргьо пэхьни биребируйтгьо буьл-буьлгьо.

Себэхьмунде Худоверди, главный бухгалтер эн келе магазин культтоваргьо, эдембу э кор рафде, евош-евош пой вегуьрде. Гиргине руш чире сифет эн у очугъ, сокит бу. Эз зир ковре шляпа веди бу э пигIогьо ве песой герден эн у гьир-гьире, нимелит сипи бире муйгьо.

Рэхь э лой контор эз гIэрей богъче бу. Гьетте герме рузгьо бире, доргьо велг ведешенде, Худоверди эз сер асфальт, эз ён богъче нэгI, эз гIэрей богъче, эз сер пичире жилгъэле рафдембу. Уре хъзз оморембу эз сер жилгъэ, эз зир гъуьндуьре соелуье доргьо, эз ён гуьл-луье кулелугъгьо, эз гIэрей мохберлуье гиьвгьо сесгьой гъушгьо-муьргъгьоре шиновусде-шиновусде гирошде и рэхьэ.

Э зинде бире, геймиш, вераисде битмишигьой эн васали денишире, хушбуьлуье эвире нефес кешире, гуйге хуьшдениюш тозеден жогьил-жовогьил биребу. Эй Худоверди гьечи оморембу, гуйге юш э и тозе велггьо, савзегьо ве гуьлгьоревоз дуьл ю, жун ю тозе бири, эшгъ пур бири. Сесгьой эн муьргъгьо гуйге э мугъумлуье сесгьой саз чарусде хундембируйт э дуьл эн у.

Гье у руз Худоверди дуьлшор, хуьром эз гъэд богъче, эз сер пичире-пичире тенге жилгъэ э гирошдеки, э раче-берачей эн у эдембу е назуке, инчегеле духдер оморе. Муйгьой эн у зерд бу, э ранг эн суьмбуьлгьой эн зими, чумгьой ю кип-кову, тов-тови, шей себэхьи нуьшде гуьлгьоре хуно. Э тен духдер гуьле-гуьле булши вебу. У хуьшдению гьейсэгIэт э вераисде хунчей гуьл ухшеш зерембу. Алише ловгьой эн духдер эдембируйт э ниетевоз хэндуьсде.

Угьо дуь э рачей еки оморенге, дуь-се луьнг демундеки э гIэрей эн угьо, гьердуьшу, чуме эз рэхь вегуьрде, денишируйт эеки. Худовердире омбар хош омо и жовоне нешинохэ духдер э ижире руз оморе э рэхь ю вохурд гуфдире. У денишики э духдер, ловгьой эн Худоверди гье эз сери хуьшде э мигьровуне хэнде верафдуьт. Духдериш, э гуьлсебэхьие ковре тов-товие чум-

гьой хуышдеревоз денишире э Худоверди, хандуьсд, зури-зури, э тозе сипре добонлуье туфлигьой хуышдеревоз зере гиросд.

Худоверди гуйге диеш шор бисдоге, духдер гьечи э ю денишире, лове э мигьровуни хэнде веберд гуфди-ре. Духдер гиросдки, у поисд э минжи эн жилгъэ, е ченд минут, чарусде песово, дениши э лой духдер, э чумгьоревоз рэхь сохде уре.

Дуьимуьн рузиш себэхьмунде, гье и вэхди, главбух вохурд э гъэд богъче, э сер эн жилгъэ гье э у гуьзеле нешинохэ духдер. У дениши э духдер э мигьровуниревоз, сере жумунде, лове э хэнде веберд. Духдериш сере тик гуьрде, э гиргине пуре сифет Худоверди денишире, сере жумунде хандуьсд.

Шохьонгум э хуне вогошденге, главбух, омбар поисд э пушой эн гузги, хуышдере томоше сохде, сер хуышдере, муйгьой хуышдере, сифет хуышдере дес зере, тимор сохде. У гуйге гьейсэгІэт суьфде хуб э тигъэтевоз вини, дануьсд, ки муйгьой сер ю сейрек бирет, сипи бирет, сифет юш гьолинд бири, сипре чоьгъэ ховоре, черхэ хуно дуллу бири эз зир чуней ю, зир эн чумгьой юш екем вемасири. Гьемме нишонегьой келе мерд бирей ю ведини эз сифет ю. У э пэхьникке бэхилиревоз, дениши э сифет эн зен хуыше, комики э гъэйгъусуьзиревоз, ведоре кемер хуышдере э нерме диван, эдембу журнал «Мода» фегьм сохде. Зен эн у той Худоверди бу. Оммо э муйгьой сер эн у е доне сипи недебу. Эз и бисденж сал пушо, чуьтам сип-сиегь, лаке хуно буге муйгьой зен ю, суьфде э уревоз шинох биребугьо вэгІдо, гье гьечу мунди муйгьой сер эн у, сифет ю шумоли, е доне гьуьж диромореи недери.

Э дуьл Худоверди бирден гъэгьр веромо э сер эн зен хуыше. Гуйге у гьейсэгІэт суьфде, гъэгьигъэт дануьсд вини, чуьтам усол гиросдиге гІуьмуьр ю э зен юревоз. У эри хуыше мэхьшово сохд гьейсэгІэт, ки зен эн у юре е вэхдиш эз дуьли не хосди дуьл эн у эри Худоверди бегьем е вэхдиш не сухди. Зен эн у рач гьисдигеш, эз дуьл, эз хосиет нерм, надуьшменд нисди. У э шуьвер хуыше гьич хуб чум нисе веноре, коргьо, хьисобгьой эн уре нисе пуьрсире. Шохьонгумгьо э хуне у э книг хундеки, эри урокгьо доре хьозур биреки (эз кор хуыше совой, у э финансовый техникумиш нубогьо дорембу), енебуге э нуьвуьсдеки тозе статья эри

журнал «Финансист», э жеки дешендембу статьягьой эн уре, евэхдиш зен эн у э мигьревуниревоз нисе дениширембу э у дуыл эн уре, герме ригагьой чуышмей вассали гуылгьо, савзегьоре герм, тимор сохденуытгьоре хуно герм нисе сохдембу.

Ижире думитгьо, фикиргьо сохдеки, Худовердире э хуыште езугъ омо, э гиросше рузгьой хуыште хэыф омо. Эз кон дуыл эн у е лугьонде ох, чуын е ноле ведиромо.

Э сеимуын руз Худоверди те ебо э кор рафде, хуб э тигьэтевоз сер-руш хуышдере чи, духи-пудри зе э сифет хуыште, туфлигьой хуышдере маз зере тов-тови сохд, геймиш бисдо. Те ебо шляпаре э сер веноре, у э тигьэтевоз фегьм мисохд иловлей эн шляпаре, песде мивено э сер хуыште.

И дес Худоверди расд омо э гуызеле духдер э сер жилгьэй эн богъ нэгI, эз парк э ведиромореки, чуынки у имбуруз тэгIди сохде екем зуте ведироморебу эз хуне. Главбух, духдере диремунде, э дуылхошииревоз себэхэхэйрбу до уре, шляпаре э десевоз тик гуърде, сер зе э духдер.

Э кор омоки, Худоверди гье усэгIэт диромо э кабинет хуыште, вегуърд шляпаре векенд макинтоше вено э гьиче, нуышд э жигей хуыште. У гье усэгIэт вегуърд эз ящик е келе дефдер хьисобире, сер гуърд чуьреиге эри фегьм сохде. Оммо дуыл главбух гьемин небу, сер у гиже хуно бу. Суыфдеи гиле э гьэд эн и хэйли салгьо у кор сохдеи, гуйге у нисе верасирембу мэгIэной э и дефдер веригьо хэтгьо ве хьисобгьоре. Э сер дефдер, э жигей хэтгьо ве шуморушгьо э пушой чумгьой эн у оморе ведиромрембу шекуыл жилгьэй эн богъ, чигьрет эн раче духдер, комики э мигьревуниревоз, э раче ковре чумгьой хуышдеревоз дениширембу э Худоверди.

Бирден Худоверди, эз хов хэбер бирере хуно, тик гуърд хуышдере, дер эн кабинет ю вокурде омоки. Э кин эн у диромо е дуразе, лэгьэре мерд, гьэйле э лэгIэ дери. Дироморегор куыгьне дусд, хьовир эн Худоверди бу, Вели Балаевич гуфдиренигьо. Главбух уре диремунде вэхуышд э пой. Гьердуй эн угьо, шори сохде, хуб сэхд дес екире гуърдуыт, дуь-екире «рузэхэйрбу» доре.

Вели не Худоверди эз е дигь бируыт, эеки э школа рафдембируыт э гIэилигьо, песде э жовони э драмкру-

жокиш гьердушу бэхш вегуърдембируът. Худоверди гъемише главный ролгъоре возирембу, оммо Вели роль духдерире. Увэхдигъо духдергъо нисе оморембируът э дигъгъо э самодеятельный кружокгъо э сегъне эри возире. Вели назуке, инчебеле жовон бу, сифет ю сипи, чумгъой ю алише бэгИлире хуно. Э хотур эн и кор уре роль духдери дорембу. Энжэгъ е гІэйб дебу э Вели — у лап дураз бу. Унегуъре у э сегъне роль духдерире возиреки, уре эри мэхсере «Леглег-гелин» гуфдирембируът. Велиш, Худовердире хуно, те довгІогъо оморебу эз дигъ э шегъер Махачкала, кор сохдембу музыкант э оркестр.

Вели гъечи хундегоре, данандеэ одоми бу. У хуб верасирембу музыкаре, литератураре, оммо гъеме уре делхэке одоми гуфдирембируът, чуьнки делхэкие коргъо омбар сохдембу. Егиле э жогъилигъо, угъо э дигъ гъисдики, драмкружок эн угъо норебу операй «Лейли ве Меджунуне». Хэлгъ гъеме оморебу э клуб, оммо томоше чуь кориге гъеле-меле сер гуърде нисе оморембу. Кими битобе зрительгъо сер гуърдуът эри чек зере, пой куфде. У вэхди пердей читире лов сохде, ведиромо э пушой хэлгъ Вели, ранги-берангие парталгъой эн Лейли э тен ю верики. Гъутинегъой эн у сэгІбу зере бу. Э е дес эн у серчи дебу, э е десигей эн у — чутке. У э вогънеки гъэгъри, хъуършлуь бирере хуно, серчи не чуткере бурмунде э хэлгъ гуфди келе-келе:

— Эй бироргъо-хэгъергъой ме, екем сабуър сохит дие. Ишму эдее диренит гуъзеле, надуьшменде Лейли гъеле сер-руш хуьшдере чире не варасди.— Вели бирмунд сэгІбу зере гъутинегъой хуьшдере. — Эгенер мере э и рушевоз виниге соймиши ме, Меджунун, у хэрегуш эз овчи вирихденигъоре хуно мивирихуь эз кин ме, эз деде бире руз хуьшдереш нэгІлети сохде.

И гофгъой Велире э зал нуьшдегоре одомигъо шиновусдуьтки, омбар хэндусдуьт, оммо э сабуъревоз, сесуьз денишируът те томоше сер гуърде оморе.

Те сивпенж сале бире, Вели зен не хосдебу, гъич гоф эн зен хосдеире неки э герде нисе вегуърдембу, эслогъ гуш венореш нисе воисдембу уре. Оммо э хинике руз зимисду келе мерд, келе зен — бебе-дедей эн Вели омбар шор бисдорут эз у телеграмма гъобул сохдуьтки. Э телеграмма кук эн угъо нуьвуьсдебу угъо зу биьвт расуьт гуфдире э гІэруьси.

Пире бебе-деде омбар шор бисдорут эз у хотуриш, ки Вели е теклей бебе-деде бу, зен не хосдеи эн у омбар хижолоти ве дуylesди дорембу дуыл эн угьоре, невере э гъужогъ невегуърдеки мимууруът гуфдире.

Угьо бугьолуье бэхшгьо вегуърде оморует э шегьер. Э хуней Вели оморенге, угьо винируът ки кук ишу хосдигьо зен эз ю пенж-шеш сал келеи, бие зени, дедей эн пенж гІэили. Эз мэхьтели ве эз дуylesдии кем мундебу дуыл эн бебе-дедере бердени. Угьо бэхшгьоре недуыл-недуыл доре вогошдуът оморует э дигь ишу, гуйге эз сер гьоврегоь вогошдере хуно, эжеки гьовре сохдет кук ишуре ве имидгьо-ниетгьошуреш э уревоз эеки.

Хуб нушде э раче-берачей Худоверди, Вели, гъэй-лере эз лэгІэ неведешенде, э дуылхоширевоз денишире э Худоверди, эдембу пуърсире хьол-овхьол эн уре, зене, гІэилгьоре.

Гьечи дусдгьо эеки гоф сохде, Худоверди, суьпуыле хэнде сохде, ихдилот сохд эри дусд хушде эз товун эн у гуьзеле духдер, ковре чумгьо, комики и се рузи у э кор оморекы э гъэриш богъ э сер жилгъэ вохурдени э у. Угьо екире дире э дуылхоши, ловхэндеревоз «руз эхэйр-бу» доренуът дуь екире.

Ихдилот дусдгьо верасденге, Вели дес эн уре гуърде, эз кабинет ведарафденге, Худоверди сер гуърд гьемшеиней хушдере хуно э олхоиниревоз эри кор сохде. Пушой кор верасде, кибуге телефон зе эри Худоверди.

— Алло! Ишмунит, Худовердинит?..— шиновусд у назуке, омбар надуьшменде сес зенунере.

— Эри,— э тегьнимиревоз гуфди Худоверди.

— Менуым гоф сохденуымгьо э ишмуревоз!.. Егилейгеш руз эхэйр бу!..

Худоверди э мэхьтелиревоз вешенд фирегье гьошгьой хушдере.

— Руз эхэйр бу,— жугьоб до у.— «Егилейгеш» эйчуь эхи, ме ишмуре нисе шинохденуым, недирем?..

Э телефон Худоверди шиновусд, чуьтам зен ох кешиге.

— Эй.. Ме мугум ишму гье усэгІэт э сер миофдонитге, киниге эришму телефон зеренигьо? Менуым... Ме!..

Сес телефон зерембугьо зен мигьровун бу, ширин бу. Бирден Худовердире лап герм бисдо, ехэн эн шей гуйге тенг бисдо эри герден эн у, синей ю — эри дуыл ю.



«Э жун бебе-дедей ме, э хысобевоз гье у духдери,— э битобиревоз жуьмуьсде-чарусде, думит сохд у э дуьл хуьшде». Худоверди гьэгьри-гьэгьри, э дуьшмениревоз дениши э лой эн дер кабинет, гьерки бисдо гьейсэгІэт оmore не диров гуфдире эз корсохгьо.

Тейте Худоверди эз шори ве дуьледэггьдэггьэи э хуьшде дироморе, духдер э нерме сес хуьшдеревоз, буйруггь дорере хуно, гуфди э Худоверди:

— Имбуруз шохьонгум иму э себэхьмунде вохурденимгьо жиге э боггь, э сер жилггьэ дениш э ме,— и гофе гуфдире мунде духдер вено трубкаре э жигей ю.

Лап те нимешев Худоверди дениши э парк, э битобиревоз гешде, рафде-оморе э сер жилггьэ. У э торики гьетте чигьрет, буй-балай эн е зене, енебуге духдере дире, гьечу дануьсдембу у эри ю телефон зериггьо духдери. Оммо духдер веде не бисдо. Худоверди вогошд э хуне: вомунде, хэсде, дуьлпешму. Соггь и рэхьэ э хуне вогошдеки у эдембу думит сохде. «Эйчуь эхи духдер не омоге». Эз расдиш, у э ме хэндуйсдими, енебуге зарифет гьенег сохди? Белкем гьечу биреш бисдоге, чуьнки имбуруз суьфдеи руз эн меггь апрели... Белкем гьэггьиггьэтиш уре воисдембу юре дире, оmore, гоф сохде, пезде пешму бири э гуфдире гоф хуьшде, енебуег терсири, гІэйб омори уре?»...

Эз у шевевоз гиросд дуь орине. Э ггьэд эн и дуь орине гьич е гилеш у раче духдер, ковре чумгьо не вохурд э Худоверди. Оммо Худовердире омбар воисдембу винуь гуфдире духдере. У бэхшлемиш мисохд э духдер зарифет эн уре, ки у юре нисе хосде гуфдире. Ненге эйчуь биё хоггьу у жоггьиле раче духдер уре, Худовердире, оггьиле мерде, сипре муйгьоре, нешинохэ одомире. Уре исэгІэт е войге бу эз духдер: биггьил гьер себэхь вохуругу э чум эн у э ггьэд парк, э сер эн жилггьэ, пушотеинере хуно э миггьровуниревоз, лов хэндеревоз денишире э у «рузэхэйрбу» дуьгу, «рузэхэйрбу» восдонугу. Дие уре гьичиш нисе воисде.

Е руз пушой шохьонгум куьггьне дусдгьо, Вели не Худоверди, нуьшдебируьт э павильон э ггьироггь дерьёггь эдембируьт шороб хурде, эекиревоз меслэхьэтггьо сохде. Руз эдембу шохьонгум бире, оммо бешгей эн дуразе ггьовоггьдорггьо эдембируьт дегесире сухде эз ригазггьой эн нимелит э песой доггьггьо пэхьни бирембуггьо чуьшме. Ггьовош эдембу серин бире. Вели вегуьрд эз куьф хуьш-

де гэйлере, екем э хуыште демундере хуно дениши э гэйле. Песде э дуыл гэебо е кор оморере хуно, телефоне хуно вено гэйлере э гуш хуыште, эз зир чум денишире э лой эн дусд хуыште Худоверди гуфди, сес хуышдере э сес зенунеи чарунде:

— Алло! Ишмунит, Худовердинит?.. Эй... Ме мугум ишму гэе усэгIэт э сер миофдонит, киниге эришму телефон зеренигбо. Менуым... Me!..

Худоверди гэе усэгIэт гуызгъулогъ бисдо, тиж дениши э Вели, гъогъ-мэхьтел бире мунде э жигей хуыште. Вэхуыште эз некуми эз жигей хуыште, пуърси эз у:

— Туь бири эри ме телефон зеребиригбо суьфдеи руз апрель?

— Гм...— сере жумунде, суьпуьле хэнде сохде, гуфди Вели.

И гофе шиновусде мунде, кесег эн нимелит жавусде гушд э лэгIэй Худоверди деbugьо, бирден мунд э бугъоз эн у, нефес ю гуърд, у лэгIэре вокурд ченд бо, эри нефес вокошире, эз дерьегъ ведешенде жэгIэ хуно.

## РУШ

Гъич сер ме нисе ведарафде эзи кор: омбаргбо мере э уызге одомигеревоз егIэлмиш бире той сохденуьт. Эгелер мере э е хубе одомиревоз бори той мисохдуьтге е дерд небу. Омбар-омбариш мере дирегор гьечу дануьсдени ме е луги-путинуьм, даш-башчинуьм, одомифурмунум.

Егиле ме, жаловней мере вегирде, эдее э хуне рафдембириуьм. Эз ён магазин э гирошдеки э дуыл ме омо: дарам эри гIэилгбо ширини восдонум, эримеш е бутилке шороб. Оммо, э жун ишму, у шоробе нехурдеки, у эз чумгбой ме омо ведиромо. Гье э ён дер эн магазин расиренге, киниге эз кемерме э десевоз зе. Чарусденуьм мивинуьм э пушой ме е сара мерд, хьире чумгбо поисди.

— Эй хьовир,— мугу у эз ме,— туь пул мере кей доренини?..

— Чув пуле? — махьтел мунде, пуърсируым ме эз у, куьф мере сэхд гуърде.

— Гьи, гьи, фурмуш сохдей кидан? — бовор несох-дере хуно, пуърси хьире чумгьо.— Э ёр туь немунди эзи шеш мегь пушо э санаторий «Жемчуг» э Крым гьис-дики, туь эз ме хьофдод монет пул вегирдебиригьо.

— Ме э гУьмуьрме гьеле гьич э санаториеш небирем,— мугум ме эз у,— жунсогьиме, гьелелуьге омбар хуби. Унегуьре гофгьой туь эриме келе махьтели омор.

Сара мерд, хьире чумгьо, э руьхшендиревоз дениши э ме, хандуьсд.

— Туь жонге нисе дануьсде, ки э санаторий омбар-омбариш э жигей эн нечоггьйо, хэсдегьо чуьтуьни жун-соггьэ, буггьэе одомигьо рафденуьтгьоре эри кеф сохде-шу... Воисдениге туьре э ёр туь биёрум эз хотур чув кор вегирдебириге туь у хьофдод монете эз ме э гьэрд. Ун-жо е инчелеле раче зен турчанка бу... Туьре хэржи вес несохде, эз ме пул хосди, мугу э Махачкале вогошденге муьдуьм. И шеш мегьи туьре гье эдее гуьз-гьулоггь сох-денуьм, оммо туь э чумме нисе вохурде. Имогьойле эхир офдори э дес ме.

— Эй жонум,— мугум эз мерд э хоширевоз,— дес-ке бура эз сер ме, ме не э санаторией «Жемчугиш» не-бирем, не эз туь пулиш э гьэрд невегирдем, не туьре ме те имбурузине руз э чумгьоймеревоз диреш недирем.

Сара мерд хьире чумгьо и гофгьоре шиновусденге, сер гуьрд эри хьэрой, гьолмогьол дешенде, мере биёбур сохде. Э сес зну кура бисдо хэлгь э томоше. Кимигьо э гоф зну бовор сохде, сер гуьрдуьт мере эри серкуш зере, егИни ме э пул э гьэрд вегуьрдеки, хэржи, кеф сохдеки хуб бу, имогьой э дореки эриме гурунди омор.

Мугум э дуьлме: «Шегьер иму чуьклеи, и дургуне хэбер лов мибу э гьемей шегьер, песде мере эри гешдеш э пушой хэлгь сер нибу.» Хьофдод монет пуле кепик-кепик шуморде, дорум у мерде, эз ехан ме дес кенуь бурав гуьфдире.

Е гилейге руз мигИд эн Май, сертенмере вокурде, эдее э демонстрация рафденуьм, е мерд омо пушой ме-ре гирд.

— Пой, туь мунош,— мугу у эз ме,— туь зен мере эз склад е холодильник эричуь недори?

Ме гье усэгИэт верасируьм, ки у мере э е одомигере-воз егИэлмиш бире дегиш сохди гуьфдире, мугум эз у:

— Мере э холодильникевоз кор нисди, ме э склад кор нисе сохденуым.

Нешинохэ мерд, суьпуэле хэнде сохд, дениши э ме э серкуширевоз:

— Эри ки гуфдире туь и гофгьоре, гуйге ме е небе-леде одоминуымге. Туь э хьисобевоз эри туь фикир сох-дей, ме туьре «магариж» нидуым гуфдире?..

Хун зе вешенд э келлей сер ме, чорей ме мибисдоге ме у мерде пара-пара мисохдум.

— Ибуд бош, бура эз пушой чумгьой ме,— хьэрой вегирдуым ме э сер эню.

Нешинохэ мерд эз терс песово-песово до хуьшдере, оммо лэгIэй хуьшдере негирд:

— Инжо хьэрой нечи месох э сер иму. Эз туь инжо кес терсирегор-чи нисди,— мугу у, э дуьшмениревоз денишире э ме, гьечи мидани, эз расдекиш е темизе, хьэлоле одомини, гьич эз кес пул нисе вегирдеге эри эз склад рохьо доре чигьо. Дие эри куктуь кооперативни хуне э чуй пулевоз восдорей, заграничный гарнитур эз же омори туьре. Эгенер хэлгэ э туь хотур гуьрде, очугь нисе гуфдирегеш э сифет туь, гьеме дануьсдени туь дуьзди гуфдире.

Руз мигIид дуьл мере у одоми гьечи хэреб сохд э гофгьой хуьшдеревоз. Эз ижире коргьо визор оmore, ме эриме фикир сохдум руш эри вегьишде, чигьрет ме дегиш бу, мере екиш э де кесигеревоз егIэлмиш бире де-гиш несохут гуфдире. Эз расдиш рушгьой ме вероморе, келе бисдоки ме эслогэ э хуьшде ухшеш нисе зеремби-руым, чигьрет ме гуйге лап дегиш биребу. Оммо и кор эз дуьлиме бу. Имогьой екиш мере э де одомигеревоз шек нисоху.

Оммо зен мере хьэз нисе оморембу ме руш вегьиш-дем гуфдире. Рушгьой мере диренге, гуйге зэхьлей эню рафдембу. Иллогьки у сер гуьрд э рушогьойме эри хьэ-лово бире эз хунейму е шуьд офденге. Эз шуьд не кек зэхьлегьой эню рафде.

— Туь и шуьда эз командировка овурдей э хуьшде-ревоз,— мугу зен эз ме.

Гьэгьигьэтиш, эзи е ченд руз пушо ме э район э ко-мандировке бируым. Оммо зен ме сер ебо ме эз коман-дировке вогошде, парталгьой мере, чемодан мере меде-берд э хьэет туьр-туьр, темиз мисохд, песде мидировунд э хуне, шуьд чи недебу гуфдире.

— Е чи парталгьоймере, чемоданмере туь ведебердей э хьээт темиз сохде,— мугум эз зен ме,— дие шуьде чьутам овордем ме э хуьшдеревоз?

— У шуьд э рушгьойтуь дебири. Туь э рушгьойтуь ревоз овордей уре эз командировке. Ме э туь эдее гуфдиренуьм, эгенер эз хуне шуьд офд омоге, е туь рушгьойтуьре мичини, енебуге ме эз хуне мадарам.

Худо ники сохд, эзу шуьд бэгъэй дие эз хунейму шуьд офд неомо. Рушгьоймеш мунд э жигей хуьшде, не зен меш жиро бире эз киме нерафд. Оммо имогьойле сер ёбо ме эз командировке оmore, зен ме эз парталгьо, чемоданме бэгъэй, рушмереш фегьм сохдембу, унжо шуьд дериге небуге нэгI.

Оммо и пушогьо э сер ме е кор оmore, чорейме не бире рушмере чириуьм, мундум э пушотеине чигьретмеревоз. Эзи дуь орине пушо ме творчески командировка вегирде, рафдуьм э е дуре район. Пушой ме э район рафде, зен мугу эз ме, биё ведеберим и сумогъэ э хьээт туь-туьр сохим. Сумогъ лап куьгъне бу. Э пусд эн э кори гилгез сохде хэр унгъэде туз недебу, э и сумогъ дебугьо. Зен ме тирочуре вегирде, ме дуразе шуше, поисдим гьерки э е лой сумогъ, сер гирдим эри додоре, туз ведешенде эз сумогъ.

Ме э гъирогъ сумогъ гьисдики зен ме э тирочуревоз эз сумогъ зереки, тирочуй эню омо раси э пушониме. Гье усэгIэт э пушониме е келе ковре дуьмбел веромо. Гьечу э у дуьмбел э пушони вериревоз вэхишдуьм рафдуьм э район. Ме оморумгьо дигъ лап э келлей догъ вебу. Эз шегьер е ченд сад верс дур бу. Оммо ме э и дуре дигъ оmoreки, чьукориге, гьеме мере дирегор эз зир лов эдембируьт хэндуьсде. Ме эриме фикир сохдум, ки хэндуьсдемун эн угьо эз товун эн у кори, егIни мере дуразе руш вери, э пушонимеш — е келе дуьмбел. Ме гьетте оmore, егиле рафдуьм э ки председатель сельсовет. У тэхьно нуьшдебу э канцелярия. Председатель сельсовет е екелуье пенжогъ сале мерд бу, э сер ю е келе килэхъ вебу. Ме уре э хуьрметевоз «рузэхэйрбу» дорум. Оммо у э жигей жугьоб мере доре, эз жигей хуьшде вэхуьшде, э мэхьтелиревоз денишире э ме, чумгьоре буьхъ сохде, мугу:

— Огъ! И туьни инжо оморейгьо?

— Менуьм,— мугум ме, гьеле э сер неофдоре чьукориге.

У екем гъуз бисдо эз гъирогъ эн стол, э энгуыщде-  
воз бирмунд пушонимере.

— И дуымбеле э пушонитуь зен венори?

— Эри,— жугъоб дорум ме.

— Э тирочуревоз?

— Эри, э тирочуревоз.

Председатель эн сельсовет жугъоб мере шиновус-  
денге, нуыщд э жигей хуыщде, сере тик гирде, шэгъгъе  
зере, келе-келе хэндуьсд. Ме омбар мэхьтел мундум, эс  
же дануьсдеге игъо гъозие-гъэдер эни дуымбел э пушо-  
ниме веригъоре: эхи ме э и дигъ суьфделе оморем, уш  
гъейсэгIэт, екиш мере инжо нисе шинохде, не эри е до-  
не одомиш ме лэгIэ вокурде негуфдирем эз товун эн зен  
ме нэхэбереки эз пушониме тирочу зерейре. И чуь ко-  
ри бу?

— Ишму эз же дануьсденит, ки зериге тирочуре эз  
пушониме,— суьпуыле хэнде сохде, пуьрсуьруьм ме эз  
председатель эн сельсовет.

— Ме эз же дануьсденуьм? Ме неки гъемей дигъ,  
гъемей район дануьсдени и коре,— жугъоб до председа-  
тель эн сельсовет, э руьхшендиревоз денишире э ме,—  
гъеме эдете гуфдиренуьт: «Хуб жигей ю зери уре, ми-  
ёсде зере гъэзере хуно сер юре лов сохде».

Эз мэхьтели ме перт бисдорум, эз ме дие гоф неве-  
диромо. Эвелимуьн эз же дануьсде игъо, чуьтам тирочу  
эз серме расириге? Ве дуьимуьнжи: эйчуь гуфдире  
игъо миёсде зере сермере гъэзере хуно лов сохде? И чуь  
кори?

— Туьре е кем мозол бири, у недануьсди чуь ох-  
мурлуье, руьхшендие гофгъо нуьвуьсдебириге туь э у  
телисим эз товун эн зенгъо, небуге у гъэгъигъэтиш сер  
туьре гъэрпузе хуно чех мисохд,— мугу, шефд дениши-  
ре э ме председатель эн сельсовет.— Туь гъечу дануьс-  
дени, дигъ иму дури гуфдире, инжо гъерчуь туьре  
воисд сохде мидани, сер хэлгъэ мипучуни? Дие у възд-  
гъо немунди...

Эз гофгъой эн председатель сельсовет ме вераси-  
руьм чуь гъозие-гъэдер бириге и перигъо э дигъ.

Зен эн е колхозник, эн чупон, хэйли вэгIдо шуьвер  
хуьщдере недири. У э гусбендгъой колхозевоз э ченд  
мегъгъоревоз гогъ э ейлогъ бире, гогъ э гъшилогъ. Зен  
терсири мерд ю э и възд э де зениге ошугъ бире, юре  
нешенуь гуфдире. Эзи ченд руз пушо э и дигъ омори

ведиромори е нешинохэ молла, дуразе рушгьо. Зен эн чупон омори э ки эн молла, дерд дуыл хуышдере гуфдири.

Молла, рушгьой хуышдере тимор сохде, мугу эз зен:

— Духдерме, гIэдоти: эз чум дур бугьо, эз дуылиш дур бирени. Дуыл туь негьогъ шек нисе сохде. Белки эз расдиш шуьвертуь э гъэд эн хэйли вэхд э китуь небиреи, туьре эз чум шендиге, эз дуыл ведешендиге. Хьэлов энуре е зениге эдее герм сохдеге.

Зен чупон и гофе шиновусдемунде, ранг ю рафд, мугу эз молла:

— Жон молла, е кор сох, шуьвере э ме вогосун, у мере шенде э де зениге ошугъ небу.

— Бошуьсде, духдерме,— жугьоб до молла,— эз нуминей худо эритуь е телисим минуьвуйсуьм э шуьвертуь эшгъ эн падшогъ Шелмире<sup>1</sup> мидешенуьм, э дуыл ю муьгьбет эн Меджунуне мидегесунум, у гIэнг э гIэсел чуьтам вогосирега, гьечу э туь могосу.

Молла вегуьрде е куьгьне, туз гуьрде, мегезгьо пури сохде когъозе, нуьвуйсд э хэсде мерекемевоз э хэтгьой гIэреб дуь-се гоф. Песде, эз зир лов хэндуьсде, у нуьвуйсдени э зугьун фарси ижире метелере: «Занро муяш дароз, аглош кутагъ», егIни, эн «зен муй ю дурази, эгъуьл ю кутэхъ». Молла нуьвуйсденге и руьхшендие гофгьоре, эри хуыше фикир сохдени, ки э и дуре дигь екиш хунде нидануь чуь нуьвуйсдиге у э и когъоз. Молла дорени когъозе э зен, гуфдирени и когъозе э пейлей гIов денуь бигьилуь, гьетте шуьвер ю оморе, у гIов дуь уре эри хурде. Эз хотур эн и кор, зен чупон овурдени эри молла е чоьгъэ гусбенде.

Себэхьимуьн гьэгьигъэтиш чупон — шуьвер эн зен оморе расирени э дигь. Эзи ченд руз пушо гелегьой эн колхоз эз гьишлогъ э ейлогъ оморебу. Чуькле верелегьо эз рэхъ скем хэсде, зэгIиф биребу. Бригадир фуьрсоребу уре э дигь эри верелегьо эз склад куфде жуьгъ, куфде суьмергъэндил биёру гуфдире. Оммо зен чупон гьечи дануьсдебу молла нуьвуйсдигьо когъоз кумеги сохди шуьвер юре эри э дигь овурде.

Согъ шев зен чупон хуб гьингъэр э гушд гусбендиревоз, сирсуьркеревоз гьуногълуьги сохди шуьвер

---

<sup>1</sup> Э гуфдирей туро не эн гьуроневоз падшогъ Шельмуьре (Сулеймане) хьофсад зен бу, 300 ошне.

хуышдере, шоробиш нори э пушой эну. Чупон серхош гыисди, зен ю эз пэхъники эну декуърди эз глов эн пейле, комики молла нуьвуьсде когъоз дэхсире домундебугъо, дорени шуьвер хуышдере эз глов эну. Суьфделе чупон хуб сирои, серхош э хъэлов дегешдебу, десе э лой эн зен дураз сохдебу, бирден уре келе шуьгъэмедерди гуьрд. Мерд эз шуьгъэм гуьрде, сер гуьрд эри гилгез, тартапил сохде э хори, ноле, хъэрой дешенде. Зэхълей эн зен рафд. У видовусд шев-нимешев э ки эн фельдшер, эз хов хэбер сохд уре, гуфди эри эну, пэхъни не-сохде, чуьтам шуьвер юре келе шуьгъэмедерди гуьрди-ге. Согъ шев те пушой себэхъ э е бедире марганцовой гловевоз фельдшер темиз сохд рури-шуьгъэмбей эн чупоне эз хурде чигъо не эз эшгъ падшогы эн Шелмуь не «Гізтошлуье муьгъбет» эн Меджнун.

Себэхъмунде биренге, чупон дануьсденге зен ю э сер ю чуь кор овурдиге, гъэгъри-гIоси бире эз зен хуышде, венуьшдени э кул гIэсб, рафдени э кор хуышде. Зен чупониш денишире, дирени, юре молла фурмунди, хэр сохди, э сер офдоренге хьиллеи энуре, гъэгър сохде, тирочуре вегирди, видовусде омори э ки эн молла. У молларе диремунде, кешире зерени эз пушонию. Молла, виники хьиллеию ошгор бири, гусбенде э пушо дешенде, вемасире дуьмбел хуышдере совусде-совусде, зуризури вирихдени эз дигъ.

Оммо чендгъэдер негуфдируьм э председатель эн сельсовет ме молла нисдуьм, гыич е вэхдиш молла небирем, у э ме бовор несохд.

— Эри ме инжо нэгъуьл мехун, — мугу эз ме председатель эн сельсовет, — эгенер туь гъейсэгIэт эз дигъ иму оворе небисдориге, ме телефон мизенуьм э район, э милиция, туьре гируь дешенуь гуфдире, небуге хуте бирей сер хэлгъэ пичунде, имогъойле воисдени сер мереш пичуни э гофгъойтуьревоз?

Ме эдее диренуьм, ки председатель эн сельсовет зарифет нисе сохде, у эдей эз дуьли гуфдире. У гъэгъигъэтиш десе кеши э лой телефон. Ме вэхишдуьм ведироморум эз канцелярия.

Э шегъер оморемунде, те ебо э хуне рафде, дироморум э парикмахерски. Э сер куьрси нуьшдемунде, ме э гъэгъревоз гуьрдуьм рушгъоймере, келе-келе гуфдируьм эз доллок:

— Чи-нит!!!



Имогьойле эз дуьли эн зен мени ме рушгьоре чирем гуфдире, оммо гене чуй кор омориге перигьо э сер ме, мере не дуьл, не гъувот не мунди эри гуфдире у гъозие-гъэдере.

## ОДОХЛУЙ ЭН ИОГАН

Немец Иоган Курт, кемере э куьрси ведоре, нуьшдебу э хуней хуьшде. Чумгьой энэ э хифлет рафдере хуно бу. Бирден эз буру сес эн звонок омо. Иоган гъеусэ-гIэт чумгьоре вокурд, э пой вэхуьшд, галстук хуьшдере дуз сохд, омо э ён дер. Деро вокурденге у вини: э лэгIэй эн дер е лэгъэре зен поисди, бордори, шуьгъэм ю э буз ю вери. Сифет эн зениш эн кими бордоре зенгьоре хуно бенек-бенеки, вомундеи. Иоган, суьфде зене диренге, омбар мэхьтел мунд. Зен э гужевоз нефес кешире, суьпле хэнде сохде, «руз эхэйрбу» до Иогане. Иоган гъечи дануьсд зене дерд-хурдеи гуьрди. У э хьисобевоз эз пушой хуней энэ э гиросдеки эз некуми гуьрди уре, унегуьре звонок зери эри ю «скорая помощь» огол зенуь гуфдире.

Иоган э хуьрметлуьиревоз огол зе бордоре зене, дировунд э хуне, нуьшунд э сер эн куьрси. Песде Иоган омо э ён телефон. Те ебо нумир эн телефоне вегирде, Иоган, лове э шоре хэнде веберде, э мигьровуниревоз гуфди эз зен:

— Дуьлтенги мекешит, фрау, ме гъейсэгIэт телефон мизенуьм ишмуре э больница беруь гуфдире. Э шори-никиревоз мизендит медиройт...

— Мере гъейсэгIэт больница герек нисди,— эз гофгьой эн Иоган бирази бирере хуно, гуфди бордоре зен. — Ме э кишму эри эн де кориге оморем.

Иоган трубкей эн телефоне но э жигей ю, мэхьтел мунде, дениши э зен:

— Гъечу буге гуит, чуй гъурлугъиге ишмуре э киме,— гуфди у.

Бордоре зен гоф несохде, ведешенд эз сумкей хуьшде чоргъэде газете, лов сохде, до уре э Иоган.

— Э и газет веригъо объявление эн ишмуни, господин Курт?

Курт дануьсдембугеш гьер гофе, э объявление нуьвуьсде оморигооре, гене сер гуьрд эри хунде: «Иоган Курт,— вебу э объявление,— 40 сале мерд. Балай ю 1 метр 70 см., муйгъой сер ю зерди, сехъиб эн е чуькле галантерийный магазин. Уре воисдени хосде зен эз 25 сале те 35 сале, зерде муйгъо, хосиет ю нерм, дуьлшор, комиреки екем пулиш гъисди. Зене гІэйил гъисдигеш гъэйгъу нисди. Кире воисдеге биёвгу э ижире адрес...»

Иоган вогордунд газете э зен, дениши э сифет ю, лове э шоре хэнде веберд.

— Омбар хуб, омбар хуб,— мугу Иоган.— Имогъойле гуит нум ишму чуьни?

— Нум ме? Эльфрида,<sup>1</sup>— жугъоб до зен, э назушмендиревоз.

— О, чуь хубе нуми,— шори сохдере хуно, келе-келе гуфди Иоган, муй рафде бирэхънее сер хуьшдере тимор сохде.— Ишму хуьшденишму эз чигърет, эз диремун вединит нерме, саламете одоминит, э нум ишму гуьнжоинит. Меш хуьшденимеш омбар динже, саламете одоминуьм. Ишму эриме лап хуб гуьнжуьсденитгъо зенит, оммо ме нисе дануьсденуьм ишмуре эз ме хуш оморениге небуге нэгІ?

— О, чуь гуфдиренит ишму,— гІэйб оморере хуно гуфди зен, э хоши ве хэндеревоз, денишире э Иоган,— Ишму э чум эн зенгъо лап хуш омренигъо мердит. Эри, эри!..

Иоганне эз гофгъой эн зен хъэз омо. У куьнд омо эз Эльфрида, э мигъревуниривоз денишире э келе шуьгъэм эн зен не бенек-бенеке сифет эн у, гуфди:

— ГІэйил — шорини, уьшуьгъи ве шолуми эн хуней... Эгенер ишмуре духдер бисдоге, уре нум мидим Эльфрида эгенер кук бисдоге — Иоган нум мидим.

Эльфрида шори-шори хэндуьсд, э дуьлхоши ве муьгъбетевоз дениши э Иоган. Уре эз гофгъой энум омбар хъэз омо. Эльфрида вокурд сумкаре, ведешенд сигарета, кеши, эз лэгІэ не сулагъой вини дуре ведешенде.

— Имогъойле ихдиёр дит е гофле пуьрсуьм эз иш-

---

<sup>1</sup> Ф р и е д е н — саламети, шолуми.

му, — гуфди Иоган, хоши-хоши, э шоре сифетевоз дени-  
шире э зен.

— Гуит, э сер чумгьойме, — гье у сэгІэт жугьоб до  
Эльфрида, хуьшдере э куьрси ведоре, луьнге э сер луьнг  
веноре (у э дуьл хуьшде хуьшдере уже зен эни хуне  
хьисоб сохдембу).

— Ишмуре чендгъаде пули? — асдалей, гІэйб о-  
мере хуно, пуьрси Иоган.

Те э ки Иоган омере, Эльфрида юш дануьсдембу ки  
«домор» и гофе мипуьрсуь гуфдире эз ю. Оммо Эльфри-  
да э хуьшде имид бире одомире хуно мугу эз у:

— Мере, господин Иоган, э сумкейме се гьозор мар-  
ка дери, э синейме — дуьл суьрхи эритуь.

Иоган гьеусэгІэт десе зе э бирэхьнее сер хуьшде,  
некруьм-некруьм хандуьсд.

— Гьи — гьи — гьи, эз «дуьл суьрхи» одоми пул  
нисе бурра, — эйгьом зерере хуно, мугу «домор».

Эльфрида гьеусэгІэт вераси, ки Иоган рази нисди  
эз се гьозор марке, уре э хьисобевоз омбарте пул воис-  
де эз «гІэруьс». У тере-тэгІди куьшд сигарете, э дуьлпе-  
соиревоз гуфди эз Иоган:

— Е пенжсад маркейгеш гьерчуьтар гири кура сох-  
де мидануьм, оммо эзу зиьдте нэгІ.

Иоган е гъадер вэгІдо домунд э хуьшде: у нисе да-  
нуьсдембу имогьой чуь гуьге э зен.

— Ишму э ме бэхшлемиш сохит, — эхир, э гужевоз  
лэгІэ вокурде, мугу у эз Эльфрида, — ме э газет обяв-  
ление нуьвуьсденге ме хоюмгьо зене гІэйл бисдогеш  
гъэйгъу нисди гуфдире, ме эз товней э шуьгъэм деригьо  
гІэйл фикир несохдебируьм. Ме эриме думит сохдеби-  
руьм ки, у уже э пой гешденигьо гІэйл мибу гуфдире.  
Ме э ишму очугъ гуьм, фрау Эльфрида, сес гирисдей  
эн соворе гІэйл э гушме дарафденге, серме омбар дорд  
доре, э чумме хов нисе омере, ме нечогъ биренуьм. Ме  
ки гье эз сербоштениш гуфдируьм э ишму: ме е сала-  
мете, динже одоминуьм. Мере сердинжи, дуьлдинжи,  
гушдинжи воисде. Э соворе гІэйлевоз ме э е хуне зи-  
гьисде нидануьм.

Эльфрида дуьлхуьрд, сергъуз ведарафд эз хуне.  
Е сэгІэтиш некеши, Эльфрида ведарафде, э хуне гене  
сес эн звонок омо. Иоган зури-зури рафд, дер хунере  
вокурд. И дес э хуне диromo е инчебеле, раче зен, ковре  
чумгьо, гьечи эз гІуьмуьр е сивпенж сале зен. Э урeвoз

е лэгъэре шаздегъ-гъевдегъ сале кукиш бу. Сифет эн зен очугъ бу, дуълшор бу, ловхэнделуъ бу. Иоган диремунде зене, омбар хуш омо э чум ю.

У текелиф сохде, огол зе, нушунд зене э сер куърси, эжеки эз и е сэгІэт пушо нуьшдебу Эльфрида. Куке, эз дедешу ихдиѐри вегуърде, деберд э у хунейге, но книгъо, журналгъо э пушой ю. Иоган вогошд, лов хэнде, э мигъревуниревоз денишире э сифет эн зен, дес доре уре, гуфди нум хуьшдере, дес эн зенеш моч сохд. Э гъуз биреки э вини эн Иоган верафдени буй эн хубе духигъо, этиргъо эз муйгъо, сифет, партал эн зен оморембугъо. У е кем пиѐн бирере хуно бисдо. Зениш, лове э шоре хэнде веберде, гуфди эз Иоган уре Магдолина нуми гуфдире.

— О, Магдолина! — омбар хубе, омбар бэхдевере нуми, — гъеусэгІэт жугъоб до Иоган, — романтически нуми. Магдолина куьнде дусд эн Исус Христос бу.

Зен э мигъровуниревоз денишире э Иоган, е пертовуш хэндуьсд. Иоган, денишире, ки ишу гьердуьшу эз дуьли екинуьт, ишуре эз еки хъэз оmore, е ченд минут гирошде бэгъдо пуърси эз Магдолина:

— Бхшлемиш сохит, имогъойле гуит: ишмуре чендгъэде пули?

— Ме гІошир нисдуьм, не лап косибиш нисдуьм, — жугъоб до зен.

— Омбар хуб, — мугу Иоган, — генеш мере дануьсде воисдембу чендгъэде ишмуре пулиге, — э битобиревоз жуьмуьсде э куърси, гуфди Иоган.

— Мере дуь гъозор маркеи, — мугу Магдолина.

Иоган гене дес кеши э бирэхънее гъугъ сер хуьшде. Песде э хуьшде домунде, вэхуьшд гешд э иловлей эн хуне. Эз дуьли энубу «гІэруьсе» пул кеми гуфдире. Оммо э чуь вогънеревоз уре э рэхъ декуьнуь гуфдире, у нисе дануьсдембу. Эжириш лэгІэ вокурде, гІэйб кеширере хуно, мугу у эз Магдолина.

— Магдолина, ме ишмуре эриме э зени вегуърде нидануьм, чуьнки гІэйл ишму лап келеи. У жогъиле одомини.

— Келе гІэйл деш хубтеи эз соворе гІэйл, эз у е инжимиши, е четини нисди эри бебе-деде. Четинигъой энубу эз сер гирошди. Ме не туьнире эз у е дуьлпесои, инжимиши нибу.

— Бэхшлемиш сохит, Магдолина, ишму э и гоф ом-

бар гъэлетит. Гъемин эз ижире жовонгъо гъейсэгІэт бе-бе-дедегъоре омбаре инжимишини. Ме нисе дануьсденуьм чуьтамиге э де виллетгъойге, оммо э иму, э Западная Германия э гІуьмуьр кук туь гъисдуьтгъо жовонгъо шевгъо те себэхъгъо домундет рафде э кабаре, э песой гешдегъо, вежегъисдеигъо мундет рафде, тирьек хурде, эз эгъуьл чешмиш бире, хэр-хэре коргъо сохденуьт, э дес полиция офдоренуьт. НэгІ, нэгІ, — дур эз хэто, дур эз бологъ! Ме е динже, саламете одоминуьм. Ме ужире дуьлпесоигъо, дуьледердигъоре эз сер берде нидануьм, унегуьре гуьом бурам ме э туь очугъ: туь эриме гуьнжолуье зен нисди...

Гъэгъигъэтиш Магдолина, Эльфридаре хуно эри Иоган гуьнжолуье зен небу. Оммо гІэиллугъ инжо кор небу. ГІэил гъейсэгІэт эри эну вогъне бу. Екиш эзи оморе «гІэруьсгъо» эри эну гуьнжолуь небу, чуьнки угъоре унгъэде пул небу, чендгъэде гъейсэгІэт те бинебугъоз герек буге Иоганне. Эз и дуь мегъ пушо э сер эн Иоган е беде кор оморебу. Жогъиле зен эну, э е американский офицер ошугъ бире, гъемме бире-небирей пул Иоганне — дегъ гъозор маркаре вегирде, вирихдебу э уревоз. Магазин эн Иоган гъейсэгІэт тип-тигъи бу, оммо эри мол восдоре уре пул небу. У э келе фикир хээл дебу: эгенер э дес эну е дуьруьжде пул недиромоге, у эслогъ дес тигъи, куьф тигъи мимуну. У вэхди у биё жару вегируь э кучегъо офдону эри жару зере, сер хуьшдере дошде. У гъейсэгІэт э сер гІов верие одомире хуно бу. Хуьшдере эз и кор, эзи четини эри хилос сохде, у нуьвуьсдебу э газет обявление, белки э ю е пуллуье зен гъисмет мубу гуьфдире. Оммо имогъой и е оринеи э ки эну ченд жире «гІэруьсгъо» эдембу оморе-рафде, э бэхд эн Иоган еки энугъореш унгъэде пул небу, чендгъэде гъейсэгІэт герек буге Иоганне.

Магдолина рафденге, Иоган сергерде хуьрде хуно нуьшдебу э сер куьрси э думитгъо, хээлгъой хуьшдере-воз. Гъовой шохъонгум бу. Эз пенжере веде бу чуьтам кулок луьгегъой доргъоре шувунде, хэзон бире велгъой поизире туьр-туьр сохдембуге эз доргъо. Песини хинике ригазгъой эн чуьшме дерафд, торик бисдо, гуйге эз нокуми э лампе товуш муьрдере хуно. Дуьл эн Иоган деш гъэренлугъ бисдо. ГъейсэгІэт уре гуйге дие имид небу е пуллуье зен гъисмет мибу гуьфдире э у. Уре фикир-думит эн себэхъине руз хуьшде гуьрдебу.

Иоган э фикиргьой хуышде мухшул гьисди, уре хэбер небисдо, кей диромогэ э хуне эз кию вирихдебугьо зен ю, ошне бире э амерканский офицеровоз.

— Иоган, жунме туь!..— мугу зен, десе э сине веноре.

Иоган сес энуре шиновусденеге, бирден эз нокуми эз хов хэбер бире одомире хуно, вешенд хуышдере, э келе мэхьтелиревоз дениши э зен хуышде. Эгенер зен энумуэрде, дуборе зинде бире эз гьовре вэхуышде миомогэ э ки энуму, у гьечи мэхьтел нимунд, гьейсэг!этинере хуно уре диринге. Песде у э хуышде дироморере хуно, чумгьоре келе сохде, эз хьуэрш дуьл хуышде гьип-гьирми-зи бире, хуни-хуни денишире э зен хуышде, хьэрой вегирд э сер энуму:

— Оворе бош эз пушой чумгьойме, хьээсуьз!

Оммо зен диеш куьнд оворе эз Иоган, офдо э пушой энуму.

— Иоган — жон, хосденуьм эз туь, бэхшлемиш сох э ме, — мугу у эз шуьвер хуышде, — ме э у офицеровоз вирихдебируьмгеш, оммо дуьлме э туьревоз бу.

— Гьо! Гьо! Э туь бэхшлемиш сохум ме ижире коре?! — ловгьой эн Иоган э шефде хэнде верафд. — Туь э ме овордейгьо гьэзобе, дуьшмеш э одоми ниёру. Туь зен ме биреки жиге, ошне гуьрде вирихдей э кесевоз. Гьеле сер зиёди пулгьой мере, дегь гьозор маркаре, те песини пфенинге<sup>1</sup> тур-темиз сохде, бердей э хуышдере-воз, мере догьиногь сохдей, эз бугьоз буррай!..

Зен вэхуышд, песово рафд. Раче, ковре чумгьой энуму гьэрсини бу, оммо ранг зере назуке ловгьою эдембируьт хэндуьсде. У э дес ю деbugьо чуькле чемоданлере э пушой хуышде вежогьунде, мугу эз шуьвер хуышде:

— Иоган, жун ме, эри энуму кор гьисдиге, туь фикир мекеш. Дегь гьозор марке гьеме инжо дери. Эзу дегь гьозор марке бэгьэй...

Эз битоби дуьл хуышде, э гуш эн Иоган дие неда-рафд песини гофгьой эн зен ю, гене чуь гуфдире воисдембуге уре э ю. Чумгьой энуму эз гиснеи муьрденигьо одомире хуно буй хурек э ю верафденге, келе бисдо, лилов хурд, дуьл ю верафд фурамо. У гьеусэг!эт видовусд омо, кеши ведешенд эз дес эн зен хуышде чемодане. Песде э тегьер эн назу, муше гуьрде, э далде э куьнж

<sup>1</sup> П ф е н и н г — кепик.

хуне видовусденигьоре хуно, чемодане вегирде, вирихд дерафд э у хунейге, пулгьоре эри шуморде. Зен эн Иоган э тегьнимиревоз омо нушд э сер эн куърси, эжеки эз и е ченд сэгІэт пушо нушддебу суьфде бордоре «ГІэрус» — Эльфриде, эзу бэгъдо Магдолина. Лове э хэнде веберде, у луьнге э сер луьнг веноре, ведешенд эз сумкей хуьшде гъолине амерканский сигаре, доно э лэгІэй хуьшде, дегесунд, сере тик гуърде, дуре ведешенд. Е паздегь минут гирошде бэгъдо эз доруни хуне ведиромо Иоган. Сифет эн у гъеме тар бу эз эрэгъ. Э ейлугъэвоз покурде эрэгъэ эз сифет, эз бирэхънее гъугъ сер хуьшде, у омо куьнд, поисд э пушой эн зен хуьшде. Нефес энэ эз шори гуърдебу, ловгъою э хэнде вебируьт, чумгъой энэ э мэхътели, мигъровуни ве дуьлхоширевоз дениширебируьт э сифет эн зен...

## ФИЛЛОКСЕРА

Мере дачи. Те ме доргъо, тегьенгъо дешенде э дача, гъеме коргъойме хуб-хос бу. Мере е дуьлесдиш небу, коргъой гуюгьоре хуно: «дуьл ме динж, лешме — рэхъэт». Оммо эз у вэхд эйлоревоз ме онгур чире, шире жарунде, шороб сохде эйлоревоз, э жун ишму, гуш ме, дуьл ме динж нисди, э гезиро домундем, нисе дануьсденуьм чуй сохумге. Эри комини пиёне мердимазариге шороб ме эришо лап ширин омори. Имогъойле у лов сохди э ГІэрей эн корсохгъойму (ме помощник эн главбух кор сохденуьм э автотранспортная контора), ки Ситгъиле (мере егІни) е шороб гъисди, гІов эн зуьм-зуьмере хуно лезетлуьни. Имогъой эз гъуногъгъо оморе-рафдегор эри гІов зуьм-зуьмере хурде мере сердинжи, хэвлети нисди. КимивэгІдо оморенуьт угъо шев-нимешев, лул пиён, гъеме э хуне хисире вэхд. Гъе эз домой дер сер гуьрденуьт эри хъэрой сохде:

— Эй Ситгъил! Гъери биёр ни гІов зуьм-зуьмейтуьре хурим, фегьм сохим, о-о!

Нигуюмки эз оморегор: «шев-нимеи, рэхъ ишмуре вор дит — вогордит песово», угъоре эз хуьшде гІэйб неоморенге, мере эз хэлгъ гІэйб оморе эхи. Чорей ме ни-

се бире, вэхушденуым эз ширине хов шушденуым дес руй мере, зен мере хэбер сохденуым, гышденуым эри энугьо шороб овурде, закуске норе, гынгъэр сохде, сирсуьрке кuffed.

Раз оморейт, хурит ишму шоробе, оммо эз ме дес кенит. Эки мугуи! Ишу хурденуыт, э меш хъэлово биренуыт, э гужевоз гышденуыт хурде мере.

— Эй Ситгъил, эгенер туь пешму нисдиге, иму имишев э хунейтуь эй омореи, туь биё хури э имуревоз и пейлей шоробе.

Ме кефсуьзе, эзГифе одоминуым, и ченд салгъои мере бобосил эдее зэхъмет доре, руригъой ме эдее сухденуыт, жигер меш хэреби, хов меш эн керге хунои. Чорей ме чуьни: вегирденуым пейлере хурденуым э гъуногъгъоревоз; бигъил негуют, ки ме пешмунум гуфдире угьо э хунейме эри омореи.

Суьфдеи пейлере хурденге, декуьрденуыт пейлегъоре дуьимуыьн гилеш.

— Эй Ситгъил, эгенер туь мердиге, и пейлереш биё хури э имуревоз.

Ме э ишму чуь гуьом: ме омбар номуслуье одоминуым, номус мере эри э хори незереи, ме чуьш мисохум, жунмереш э бохд мидуым. Бигъил руригъойме сухде кобоб бугу, жигерме лов, парче-парче бугу, бобосилме — диеш зобу, токи негуют, ки ме мерд нисдуым гуфдире. Чуьтам гуьом эз и гъурумсогъгъо: «эй хъовиргъо, эгенер мердьети эн инсон э ичку хурдеревоз мибисдоге, лап келе пиёниске лап холисе мерд миёсде хъисоб бире». Эдее диренуым гуфдируымгеш э угьо и гофе е фойде нисди, лэгГэймере гуьрденуым и дуьимуыьн пейлереш хурденуым э угъоревоз.

Гене пейлегъо пур сохде оморенуыт.

— Эй Ситгъил, э хунейтуь унгъэде беда, хижолети, Гэзор, муьрдеи гердо, чендгъэде дуьгъ эн шороб э пейлегъойму нен туь домундуьтге.

Ме э ишму гуьом ме екем шекелуье одоминуым. Гьерчуь гири оморени э дуьлме. Терсиренуым э сер ме, эн кифлет ме, эн ГЭилгъойме и беде коргъо и пиён бире гъуногъгъо гуфдиренуытгъо неёвт гуфдире. Коргъой гуьгъоре хуно гушде э денду гуьрде, хурденуым и пейлереш.

— Эй Ситгъил, и пейлере мехуругу у одоми, комики имуре нисе хосденигъо.



И гофе гуфдиренигъо одоми э лой ме буюхъ-буюхъиш дениширени. Хурденуым ме и пейлереш, негуют, ки ме угъоре нисе хосденуым гуфдире.

Оммо ченд бо гъуногъгъо рафденге, и хосдеи эн угъо эз чумгъойме ведироморобу. Руригъой ме сер гуърденуыт эри сухде, жигер ме дорд доре, дуыл мере берде. Зенмеш бирени хъэлегигер. Чорей зну нисе бире, у видовусде дерафдени э ки гъунши (угъоре э хуне телефон дери), эз чумгъой ю гІэрс рихде-рихде, огол зерени «скорая помоше».

— Фурух дачаре! — хъэлово бире, вепичирени зен э ехэн ме, гъетте ме екем э хуыше дироморе, — небуге туыш мимири, имуш эз дес, мирайм.

Эз елойге келе мерд, духдир, э «скорая помошевоз» оморенигъо гъечу дануысдени ме пиёнискеюм.

Эй Ситгъил, песини гиле эдее гуфдиренуым э туы, — энгуыше тик гуърде, гъеле-буле гуърдере хуно, гуфдирени у. — Эгенер туы эз ичку дес вегуърде нисе дануысдеге, иму туыре э гужевоз э больница мидегердуним эри туыре эз пиёнискеи хос сохде.

Гъелбет ижире кор биреки, хуб бу ме у дачаре фурухде, эз серме хилос мисохдумге. Оммо эз елойге дуыл ме нисе рафде у дачаре эри фурухде. Зарифети беге: гъер доре, гъер тегъенге ме э десдин десмеревоз инжо кошдем, веровундем, келе сохдем. Ме сери ебо э даче омореки, жунме гуйге тозе бире. НэгІ, ме у коре сохде нидануым. Оммо зен ме денишире диренге, ме и дачаре фурухдере э герде нисе вегуърденуым, эри хуыше ежирейге мэхышовогъойге сохде. Гъуншимере э даче е жогъиле раче бие зени. Дачайме нен у эки вогосири. Ки ми възІдо иму эеки вохурде, гоф сохденим, дуы э еки кор кумеги сохденим. Имогъой бие зени, жогъиле раче одомини гуфдире, ме нигуюмки эзу: э меревоз гоф месох! Зен ме имогъой гъечу дануысдени ме дачаре эз хотур зну бие зен нисе фурухденуым. Имогъой домундем ме, коргъой гуюгъоре хуно э гІэрей дуы кервони: эз ело шинохгъо, корсохгъойму гъоргой ишуре воисд оморенуыт э хунейму эри шороб хурде, мере эз мунде жигеш эри эз хъол венгесде, эз елойге зен ме эдее сергуш мере берде, гуш мере хурде. Гъич нисе дануысденуым чую сохумге.

Э хуне женг-чи небу гуфдире, ме имогъойле, жуыргІэт сохде, зенсуыз тэхно нисе рафденуым э даче.

У гъемише дуьме хуно э песойме оmore, егІни эме ихъ-дибор нисе сохде.

Зен эри хуьшде фикир несоху гуфдире, ме э песой зну бие зен гешденуьм гуфдире, егІни чумме э у дери, гъич э хуьшдеш бегъем нисе дениширенуьм: хубе партал нисе вокурденуьм, сер-руш э вэхдию нисе чиренуьм. Ме гъечинигеш е раче одоми нисдуьм. Оммо хубе партал невокурдеки, сер-руш нечиреки диеш бирач биренуьм.

Дердгъойме гуфдире верасдени нисди: гъеле гушвенит, коргъой гуюгъоре хуно догъ уьсде дэгъме чуь кориге омориге э сер ме.

Эз и е мегъ пушо эдее э даче кор сохденуьм, мивуьнуьм е десде жогъиле гІэилгъо оmoreуьт, е ченд тегъенге векендуьт эз бине, эдембуьруьт рафде, ме видов-видов оmore, муьшдгъоре гъово гуьрде, пушой эн угъоре веда-буррум:

— Ишму чуь сохденит, гъурумсогъгъо?! — хъэрой вегуьрдуьм ме э сер энугъо.

— Иму, леле, студентгъой эн сельскохозяйственный институтим, — жугъоб дс э жигей эн гъемей энугъо е гъуьндуьре обурлуье кук, э хъисобевоз, келей энугъо. — Иму вегуьрдейм и тегъенгъоре эри фегъм сохде угъо филлоксера гуьрдиге небуге негуьрдиге.

— Чуь? Филлоксера чуьни? — шефд денишире э угъо, э гъэгъревоз, пуьрсируьм ме.

— Филлоксера? У — гІэзори лап беде гІэзори эри тегъенгъо. Эгенер иму у гІэзоре офдимге эз тегъенгъо, э даче е доне тегъенгъо вегъише гІэмел ниёв, гъемей энугъо биё векенде биёвт. Пенж сал э даче ишмуре ихдиёр нисди инжо тегъенгъо эри кошке и гІэзор э де богъгъойге лов небу гуфдире.

И гофгъоре шиновусде мунде, дуьлме гъэреболугъ бисдо. Е ченд рузиге гиросше бэгъдо эме мэгІлуьм сохдуьт, ки э тегъенгъойтуь гІэзор эн Филлоксера офдори, угъоре эз бине векенде шенде, э у жиге тегъенгъо дерму декуьрде гереки.

Чорей ме небисдо, тевере вегуьрде, эз жунме визор оморере хуно, сер гуьрдуьм ме тегъенгъоре еки-еки эй векенде.

Корсохгъойму шиновусденге, ки э тегъенгъойму гІэзор офдори, ме тегъенгъоре венжирем, дие мере шороб нисди, не эйзуригъош нибу, эз ме дес вегуьрдуьт.

Цери э хуне э вогошдеки, мивинуым зенме поисди э лэгIэй дер, лов ю э суьлууле хэнде вери.

— Дануьсдени мерд чуьниге, — мугу у эз ме.— Эз лаборатория когъоз омори, угъо егIэлмиш бире, э жигей тегъенггъойму, тегъенггъой е одомигере анализ сохдет э лаборатория. Эз тегъенггъойму гIэзор неофдет.

И гофе шиновусде мунде, ме эз хуьшде рафдуым. Ме хэбер биренге, миденуьшуым мивинуым ме э хуне э хэлов дегешдем. Гъемин гье у духдир ченд бо э «Ско-рая помощевоз» оморебугъо, гъуз бире эдее дерзе ведешенде эз базуй ме...

## ЭЙГЬОМ

Эй дусдгъо, шинохгъо, бирор-хэгьер, дигьи-жэгIмети. Омбор хосденуым, тевэгъэ сохденуым э ишму э меревоз э эйгьомевоз, э килитлемеревоз гоф месохит. Ме мэгIэной эню килитлемегъо, эйгьомевоз гоф сохдеире нисе верасиренуым. Ме эзугъо омбор терсиренуым, чуьтам мар гезирегоре одоми эз эблэгъэ расе терсиренигъоре хуно, чуьнки омборе хэтогоъ, бологъо оморет э серме эз сереботи энижире гофгъо. Э жун ишму гье эз сереботи энугъо ме э лелеймуревоз келе дуьшме бирем, эз товун энугъо е кор э серме омори... Омон! Омон! Зугъун ме нисе рафде эри гуфдиреш у гъоziнере.

... Егиле эриме келе дедейму когъоз фуьрсореву. Э когъоз вебу ижире гофгъо: «Балайме! Нуьвуьс эриме зу-зу: е «эри», е «нэгI» дуьлтуь эз Рихъоне гIов хурдениге небуге нэгI».

Рихъоне нум эн духдери, комиреки ме эз жунме зиёдте хосдембуьруым. Ме уре диренге, эриме гьечи оморембу гуйге гIуьлом сим-богъиге, гъэд эни сим-богъ пур эз хушбуй эн гуьл ве рихъон, эз ме бэхдеверте, мозолуьте одоми нисди э руй эни хори. Иму дуь-екире гоф шовгIо доребирим, дуь-екире хосдени гъемише эз дуьли-жуни, ниет сохдебирим гьердуьеки эз дигь э шегьер эри рафде хунде, сенигIэткор бире.

Келедедейму эриме и когъозе нуьвуьсденге, ме омбор думит сохдум эриме, чуь дануьсде воисдеге уре эз ме, чуьниге мэгIэной эни гоф эню.

Когъоз эн келедедей эме расиреbugъо вэхд гьемин ме э Дербенд э больнице дегешдебуурьум, пойме ленгуусде. Эзи е ченд орине пушо э дигъ иму гІэруьси бу. Ме э и гІэруьси э Рихьонеревоз вежегьисдебуурьум. Ме э у денишире гьечи шор, гъэдерсуьз мозоллуь буурьум, гуйге э душгьойме, э пойгьойме пардушгьо вероморобу. Унегуьре ме э е келе эшгъэвоз, э зарбевоз э вежегьисдеки, пойме чеп хурде, офдоребуурьум, э раггьой эн пойме кори сохде, пойме сэхд вамасиребу.

Когъоз эн келедедере вегуьрденге, ме эриме омбор фикир сохдум: гьич мибуми е одоми эз дуьл эн одомиге гІов хуру? Дуьл беге билогъи, чешмеи эзу гІов эри хурде? Ме фикир сохдум эриме, ки келедедейму келе зени. Омборгьо пир бире-бире екем эз эгъуьл буш бире, унегуьре келедедей нуьвуьсди эриме ижире когъозе.

Сабэхьимуьн ме эз дуьли хэндусде э руьхшендие гофгьой эн келедедей нуьвуьсдуьм э дигъ эри энугъоз: «Келедедей, ме э гофгьойтуь омбор мэхьтелуьм. Дуьлме евэхдиш эз Рихьоне гІов нехурди, эзимбэгъдойгеш нихуру...»

Песде ме дануьсдем чуь хэре, эгъуьлсуьзе кор ме сохдемге, э десдин десмеревоз чуьжире хоснебирение яра ме э дуьлме зеремге. Ме мадан, э и гофевоз келедее эз ме дануьсде воисди эгенер ме Рихьонере хосденуьмге, у эз дуьлиме гьисдиге, илчигьо дефуьрсуь э ки бебе-дедей энугу, уре эриме хою. Ме ижире жугьоб нуьвуьсденге, келедедейму гьечи варасири эри хуьшде, ки ме Рихьонере нисе хосденуьм, у эз дуьлиме нисди. У когъоз мере берде бурмундебу э Рихьоне. Рихьоне когъоз мере хунденге, уш эри хуьшде фикир сохд, ки ме гуфдире гофгьо, уре доре шовгІогъо гьеме дургу бири, ме уре нисе хосденуьм, ме э гоф, э муьгьбет энугу хогьин ведироморем. Эзу рузевоз у эз ме келе гъэгъри бире, мере дие э чум дире нехосд. Гье эз товун эз ижире гъэлете корме эз войгейме, муьгьбетме мундум, сергерде хуьрд.

Бсалиге гиросше бэгъдо, ме э шегьер э хундеки, гене эриме эз келедедейму когъоз омо. У нуьвуьсдебу эриме. «Балайме, э бузтуь гІов веригеш, гІове мишени, зу-зу мийь мираси э дигъ: лелешму эдее динж бире».

Ме и когъозе вегуьрденге омбор шори сохдум. Чуьнки лелейму е нединже, женгесуре одоми бу. Е до не мигІид, гІэруьси э дигъ нисе гиросшембу, у лул-пи-

ён бире э дигь женг, гьолмогьол несоху, шори-ники эн хэлгъэ э гирье-шивен нечаруну. Гьумолет иму гьеме бирази, визор бу эз дес энү. Дигьбонигьойму гьеме хушдере дур кеширембуьруьт эзу, э шори-никишу огол нисе зерембируьт. Угьоре фикир бу эри э гьемей жэгметевоз гьэрор ведешенде, уре эз дигь ведекуьрде оворе соху гуфдире, гьэретиконе эз чул, мэхьсуьл ве-кенде пертово доренигьоре хуно.

Лелейму мере хосдембугеш (у гIаилсуьзе одоми бу), эрме гогь-бир пулиш фуьрсорембуге, ме эз бигIадетие коргьой энү омбор гIэйб, хижолети кеширембуьруьм. Оммо ме гьейсэгIэт ижире когьозе вегуьрденге эз келедедейму, омбор шор бире, нуьвуьсдуьм эри энү ижире жугьоб: «Эхириш э худо шуькуьр гердо диририм и рузе э чум имуревоз... Де мердгьойге ченд тойгьойтуь, лап туьнде, гIэтоше одомигьош эз зуревоз динж, хомуш саламат бирет, оммо туь гьечу мундей рафде. Ме гьелбет омбор шорум туь, леле, динж бирей гуфдире. Весси, эз хэлгьиш гIэйби. Ме гьейсэгIэт э дигь оморе нидануьм. Эри энижире кор, лелейму дие женжели нисе сохде, динж-хомуш бири гуфдире, гьелбет мере екиш эз институт рэхьо нисоху эри оморе. Дие гьелелуьге саламет бош. Бирорзерейтуй».

Егилейге эме хэбер расики, лелейму когьоз мере хунденге, делуьре хуно биребу гуфдире, эз гьэгьр жун хушде диворгьоре эдембу э муьшдевоз куфде. Энжэгь дуьимуьн когьозе эз келедедейму вегуьрденге эсер офдорум мэгIэной эн гофе: «лелейму эдее динж бире гуфдире». Дуьимуьн гиле. келедедейму нуьвуьсдебу эрме, ки лелейму сэхд нечогьи, пушой муьрдеи, ме зу-зу биём расуьм гуфдире.

Согь эни рэхь эз шегьер те дигь ме дуьлпесой эн лелейму буьруьм., эдембуьруьм гIэйб, хижолети кеширембуьруьм эз товун ме эри энү эз недани ме, небелидиме нуьвуьсде гофгьо. Ме екем терсиреш терсирембуьруьм э у эри вохурде, эз елойге дуьлме эдембу тэгIди сохде уре те чум энү хьэрзо гьнсдигьо эри дире, бэхшлемиши хосде эзу.

Сермере, эзи гIовункоре, тэхсирлуье одомигьоре хуно, гьуз гуьрде, дирсморум ме э хуней лелейму. Эз зир чум денишире, э у, куьнд бисдорум эки энү, евошлей э сугьрезани поисде, гуьрдуьм эз хинике эрэгь тар бире муйлуье дес энү, моч сохдум.

Лелейму дегешдебу э хьэлов э сер эн кемер. Эз гIэзор у лап лэгъэр биребу, сэхд сиегов зеребу. У мере диренге, гыч сереш нежумунд, э лойме недениши. Оммо ме дес юре гуьрденге, моч сохденге, у бирден ох, ноле зерере хуно сес сохд, э мигьревуниревоз дениши э лойме. Ме верасируьм, ки леле эз ме гъэгъриш бириге, ме эри эну ужире «хэре» когъозиш нуьвуьсдемге, чум эну э рэхьме дебу, уэ дуьл хуьшде эме бэхшлемиш сохди. Мере исэгIэт воисд е хубе, дуьлхошие гоф, лелеймуре хьэз биьвгъо, гуьом эри эну. «Эй леле, жон леле, — мугум ме эз у, — туь ингъэде хубе одоми гьисди, чуьтуьни хубе леле э гъэмиш эн Мегьрэгъэш недери».

Вой зугьунме миёсде куьт бире, ме эз лэгIэйме и гофе ведешендеинжон. Могьгъулже те и гофе гуфдире гIарейме нен лелейму гуйге хуб биребу, оммо у эз ме шиновусде мунде, э лап гурунде нечоь гьисдики жиге, хуйгире хуно бисдо, хуьрш вешенд э ю, гьеусэгIэт десе ведешенд эз дес ме, хьэрой вегуьрд э сер ме:

— Бур-ра эз инжо, хьэремзеде!.. — муьшде гьово вегуьрде, чумгьоре чарунде, гуфди у эз ме, гуйге лелейму гьейсэгIэт мере, бирорзерей хуьшде нэгI, гIэзроил эн жун хуьшде э пушой чумгьой хуьшде эдембу диреге. — Гьеле кеми туь эрима нуьвуьсдейгъо, муьрдеймере хосдейгъо, шори сохдейгъо, имогьойле туь мере э хуггьой эн Гъэмишгьой Мегьрэгъэревозиш той сохдей. Гыч хуг зере туьре енбоки сохо!..»

Ме мугум, лелейму эз расдиш делуь бириге, гьейсэгIэт шив микенуь миёв э сер ме шилолире хуно. Унегуьре ме гьеутуьтем эз жигейме вэхуьшде, вирихде ведарафдуьм эз ки эну.

Э жун ишму, ме гыч недануьсдебуьруьм, ки э гъэмишгьой Мегьрэгъэ хуггъо дебире гуфдире. МэгIэной эни гофе ме те имогьоиш неверасиребуьруьм. Ме мугум у гофе, у метелере эз хубе одомигъо гуфдиренуьтге. Небуге ме гыч ижире бираче гофе э гурунде нечоь, пушой муьрдей одоми мигуфдуруьм беге, у эз хуг зобутеш гьисдиге?

Оммо гуфдире гофгьой эн келедедейму эжиге неом: «лелейму динж небисдо». Е-дуь мегь гирошде бэгъдо, лелейму эз нечоьги хос бире, коргьой гуюгьоре хуно, синдили-гъундили зере эз хьэлов вэхуьшдебу. Оммо эз нечоьги хуб бире эйло, хосиетгьоюш дегиш бири. Дие имогьой у женгесуригъо, биёбуригъо нисе сох-

де, эз пиёнискеиш дес вегуърди. Себэхьмунде рафдени э колхоз э кор хушде, динж саламет, одомире хуно, шохьонгум вогошдени э хуней хушде. Дигьбонигьой-муш дие эз у хушдере гьйрогъ нисе кеширенуът, э у шефд нисе дениширенуът. Угьо имогьой уреш э гІэруь-сигьо, шоригьошу огол зеренуът.

Оммо дуьлме эз е кор энун буланмиши: лелейму эз у зйло эз ме гьэгьри бире, э меревоз гоф нисе сохде. Мере диренге у эз гьэгьр хурузе хуно сере тик гуърде, нимелит сипи бире рушгьой хушдере э дес гуърде, э лойме не денишире, зерени гиросше.

Гьемей эни гьозие-гьэдергьо э серме оморетгьо эз товун эни метелегьо не килитлеее гофгьой, мэгІэной эн комигьореки ме нисе дануьсденуьм. Эз товун энугьо эме расиретгьо ярагьо омбор гурундуът, хос небирени-нуът. Унегуьре ме гуфдиренуьмгьо: э хотур эн худо, эн бенде эриме килитлеее гофгьо мегуит, менуьвусит, ме эз угьо чумтерсуьм, чуьтам мар гезире одоми эз эб-лэгьэ расе терсиренигьоре хуно.

## ДУЬЛ ЭН ДЕДЕЙ

Угьо э куче гьемише эеки ведироморембуьруът, зең не шуьвер. Угьо э гешдеки аст-аста пой вечирембуь-руът. Гьердуьй энугьо пир буьруът. Э рэхь рафдеки, угьо екем кемере гьуз гуърде-гуърде рафдембуьруът, гуйге эз гІуьмуьр гиросше салгьо бор бире шелере хуно э кемер энугьо нуьшдебуьруът. Келе мерд гьуьндуьре одоми бу, лэгьэр, сифет энун сиечерде бу. Оммо пушони не ён чумгьой ю гьеме гьуьж дироморембу, дуразе бигь-гьой энун гьеме сипи бу. Гьеминониш, зимисдуш э сер энун килэхь вебу.

У асдалай эз гьул эн зен хушде гуърде, гІэруьсе хьйтиёт берденигьоре хуно, бердембу уре э хушдере-воз. Келе мерд одомире э куче диренге, гІэйб оморере хуно е пертовуш лове э хэнде вебердембу. Зен энун чуьк-леле, лэгьэрле, эз пойгьо хэребе одомире хуно пой но-рембу. Сер энун гьеммише дуьлу бу. У эз хори чум нисе вегуьрдембу, мугуиге терсирембу, пою домунде неофдо-ну гуфдире.

Эз куче гирошдегоре одомигъо, угъоре диренге, эз угъо шори сохдере хуно, дениширембуъруът э келе зен не келе мерд: егІни, денишит ебо, чуйтам угъо дуъ-екире гІээиз хосденуътге, гуйге гъимиш эн дуъ-екиш нисди угъоре. Оммо келе мерд диренге, чуйтам эз куче гирошдегоре одомигъо э угъо дениширембуъруътге, уре диеш гІэйб оморере хуно, суьпле хэнде сохдембу.

Пушотегъо угъо гъич э куче гъуле-гъул доноре нисе гешдембуъруът. Эри энугъо гъечи гешдеи гІэйбежере коре хуно оморембу. Оммо зен ю эз занигъо зэгІифшукест бире эйло, келе мерд эз «гІэйби-гІори» веда-рафде, эз гъул энугъуе, гердундембу уре э хуьшдеревоз.

Гъеле те и пушогъош келе мерд не келе зен лап кем веде бирембуъруът э куче. Угъо зигъисдембуъруът э е келе коммунальный хуне, э чоримуьн тебэгъэ. Зен э нечогъэ занигъой хуьшдеревоз э гужевоз верафде-фура-морембу эз нердуигъо. Эз и е мегъ пушо келе мерд не келе зен дуъ хуней хуьшдере дегиш содебуъруът гъе э у подъезд ишу э е хуней, оммо э суьфдеи тебэгъэ. Имогъойле угъо гьер руз ведироморембуъруът э куче, э парк эри гешде. Парк э гъирогъ деръегъ бу. Угъо э парк оморенге, гъемише э сер е скамейка нуьшдембуъруът. Келе мерд э ён зен хуьшде нуьшде, чумгъоре гъуьжунде, лове э суьпле хэнде веберде, э шори ве дуьлхоширевоз мидениши э парк гешденбуъруътгъо мердгъо, зенгъо, жовонгъо ве духдергъо, э вози сохдембуъруътгъо гІэйллегъо, э гуьлгъо ве доргъой эн парк, э ковре асмуй эн васали. Оммо келе зен, сере гъуз гуьрде, эзи э гІуьлом дуьлхуьрде одомигъоре хуно, нуьшдембу эз жиге нежуьмуьсде ве гъич э иловле неденишире.

Е гъэдер вэгІдо гирошде бэгъдо, угъо эз жигешу вэ-хуьшде, евош-евош мивогошдуът э хуне. Те ебо угъо э хуне оморе, келе мерд не келе зен, мидироморуът э магазин, мивосдорут эри шохъонгумишу булки, е бутилке кефир, пезде мидироморут э хуне. Оммо э хуне оморенге, келе зен гъе усэгІэт сер мигуьрд эри гуьфдире э мерд хуьшде:

— Эй Гази, э жун худо туь негъогъ сохди и коре, э гофме гуш невоноэри, хунере дегиш сохди,— э сер куьгъне диван нуьшде, э сифет шуьвер хуьшде денишире, шуькеет сохде ве серкуш зерере хуно уре, мугуьфди келе зен, ох кешире-кешире. Худо гъишдге, кук иму ми-



ёв, иму зен михогым эри эну, имуре, худоре шуькуьр, невегьо мубу, э е хуне иму чуйтам мизигым. Е хуне эриму лап тенги — тонголи.

Гази гье усэгIэт э гофгьой эн зен хуьшде жугьоб ни-до. У дануьсдембу, ки хуне эри эну вогъней гоф эн куке гьегене эри э ёр оворде, гуфдире, егIни, у худо мегуё, эдее эз ёр фуруш бире гуфдире, енебуге — те увэгIдои дуьшмегьоре гIов бери — у зинде нисди гуфдире.

Гази те ебо лэгIэ вокурде, гоф сохде, вегирдени сигарета эз сер стол, э гьолинде, чубугъа хуно сэхд гьис-дигьо энгуьшдгьой хуьшдеревоз нем сохдени уре, песеде дегесунде, кеширени.

— Эй Шекер, эйчуь негьогъ гуфдире туь и гофгьоре? Эриму, эри э куче, э эвир ведарафде гешдейму суьф-деи тебэгъа лап хуби. Песеде ме нетуьнире, келе мерд, келе зене е хуне лап весси. Согъигьо гердо, кук иму оморе-ведиромоге, ме е хунейге миофум. Сер бисдоге, килэхь офд миёв э сер эри веноре.

— «Офд миёв», «офд миёв», — гьошгьоре дуллу сохде, мерд хуьшдере гьэгьр дорере хуно гуфдирени Шекер. — Хуне офде эри эни гуйге хьэлвои. Дуьл ме эдее гумон сохде, чумме эдее рэхь кешире кук иму ёгъин эизуригьо миёв гуфдире. Дуьл дедей дургу ниую.

Гази эз зуревоз хуно бири э и гофгьой эн зен хуьш-де, эри эну гурунд оморенигеш у гофгьой эну. Оммо зене эри гьэгьри, дуьлхуьрд несохдеи, э гьэршуй гоф эну гоф нисе оворде. Оммо имбурузинере хуно гьечи э ими-девоз гьич негуфдиребу у эз товун кук ишу омореи-не-омореи. Чуь офдори гьечи э дуьл эну?

— Эй Шекер туь эз же дануьсде кук иму ёгъин эй-зуригьо миёв гуфдире, эз же омори туьре ужире имид? — э хьитиётиревоз пуьрсирени Гази, эз бил-були эн дуьл хуьшде, суьфдеи кешире сигарета э гьути доноре.

— Эз же дануьсденуьм? Хов винирем шову, — лове э дуьлхоше хэнде веберде, шори сохде, гуфдирени Ше-кер, — э хов миденишуьм мивинуьм киниге шев-ниме-шев эдее дер имуре куфде, огол зере: «Эдей! Дедей, ме-нуьм, дере воку!» Ме гьеусэгIэт дануьсдуьм, ки у сес энуни, эн кук имуни гуфдире...

И гофгьоре э гуфдиреки, чумгьой эн Шекер гIэрси бисдоруьт, нефес ю гуьрде, у дие гоф гуфдире неда-нуьсд. У э бел шолевоз гIэрсгьой чумгьой хуьшдере по-курд. Оммо чумгьой эн Шекер гIэрси буьруьтгеш, лов

эну эз шори кук ю «эйзуригъо» миёв гуфдире э хэнде вебу.

Гази гъошгъоре гъуьжунде, сере дуллу гуьрд, э сифет зен неденишуь гуфдире. У э ховгъо-фолгъо бовор нисе сохде. Не уре гъич боворине-имид нисди, кук энугъо согъи-зиндеи гуфдире, угъо бебе-деде уре гъич те г'уьмуьрлугъ э чум мивинуьт гуфдире. Оммо чуьтам гую у и гофгъоре э зен хуьшде, у гъеусэглэт хьэлегигер мибу мимуьруь. Зен энуре теимугъоиш имици, кук эну зиндеи, согъи гуфдире. Имогъойле Шекер э дуьл хуьшде венгесди кук ишу эйзуригъо биё гуфдире.

Гази сере тик гуьрде, дениширени э зен хуьшде, лове э гужевоз э хэнде вебердени, оммо чумгъо могъбули.

— Дануьсдени, Шекер, чуьниге,— зене эй хомуш сохде, гуфдирени у э вогънеки.— Кими ховгъо эз расдекиш э сер-бегъем оморенуьт. Белки хов туьш э сербегъем омо.

Келе зен э чумгъой г'эрсиревоз шори, ловхэнде дениширени э шуьвер хуьшде, сере жумунде-жумунде. Лап эз дуьли энунци, шуьверюш гъечи эде гуфдире, ки уреш имици, кук ишу согъи, зиндеи, эйзуригъо э хуне, руе дедей э шори-никиревоз мивогорду гуфдире.

... Шеви, э куче торики, гъич е сеслеш нисе омор. Шегъер хисири. Э хьэлов, э сер сифет, сере э болуш доноре пих зерезере хисири Гази. Оммо чум эн Шекер э хов нисе верафде. Э пушой чум эн оморенуьт гирошде рузгъо, гирошде зиндегунци эн. Ини гъейсэглэтинере хуно э ёр энунци, чуьтам у гъеждегъсале духдер гъисди э соймиши хуьшдеревоз Газиревоз эз дигъ вирихдебуге э шегъер. Бебей Шекере воисдембу духдер хуьшдере дуь э е кукиге, э одоми хуьшде, э нумгир ю. Оммо хун эн Шекер эри нумгир хуьшде дуьш нисе зерембу. У ошугъ биребу э Гази, дуьл эн э у вогосиребу. Угъо екире гоф доревуьруьт э пэхъники эри вирихде эз дигъ э шегъер, э гъисмет ишу мешет бирегор небу.

Э дуьл бебе-дедей Шекер гумон эри неовурде, Шекер гъемишеиней хуьшдере хуно себэхъмунде совуре вегуьрде рафдени э лой билогъ, гуйге г'ов эри овурде. Гъемин пушой г'эруьсци эн у нен нумгир ю бу. Э хуне уже эдембуьруьт хьозурлугъи эн г'эруьсире дире. Э куьндигъой билогъ, э гъэд гъуьндуьре кулелугъгъо Гази логъум г'эсбе гуьрде, епинжи э кул ю вери, пэхъни биребу, Шекере гузет сохде.

Гази эз товун нумгир эн де одомигере вирихундеи белкем куышдеш миомо. Оммо муьгьбет хосдеи эну эз жун юш ширин, зиёдте бу эри эну. Бебей Шекеригьо, одомигьой эну дануьсдуьт, ки духдер ишу э разимендиревоз вирихди гуфдире э Газиревоз, э песой эну негешдуьт, э урезоз дуьшмени негердундуьт. Оммо угьо эзу вэхд овло э Шекеревоз рафде-оморе несохдуьт, эзу чум вегуьрдуьт. Э Газиревоз вирихдеи энуре угьо э у бэхшлемиш несохдуьт.

Суьфдеи рузгьо, мегьгьо Гази не Шекер э шегьер, э гьэрибе жиге, эжеки угьоре одоми нэгI, мирос нэгI, хуне-жиге нэгI, омборе четинигьо, дуьлесдигьо кешуьруьт. Песде кор энугьо еботот бисдо: Гази дерафд э бондарный завод, шегуьрт эн бондур бисдо, Шекер э фабрик эн пешми.

Е-дуь сал гирошде бэгьдо угьо эз дигь вирихде, э виляет омо революция бисдо. Советская власть бесгьун доре дуьшменгьой хуьшдере, муьхькем бисдо. Тозе власть, тозе рэхь, тозе шоре зиндегунни вокурд эри жофокешгьо. Имогьойле дуьл эни дуь жогьиле зен-шуьвер, эни дуь жофокеше фэхьле омбор шор-хуьром бу. Оммо эз е кор дуьл энугьо могьбул, пешму бу — и ченд сали угьо имогьой зен-шуьверуьт, энжэгь угьоре гIэил нисе бирембу. Шуьвер эну Гази могьбул, биразибу, ишуре гIэил нисди гуфдире. Эз товун эни кор Шекер омборе думитгьо, хэьлгьо кеширембу: «мибу ми ужире кор эз товун уре гIэил небиреи, Гази мишенуь уре? У бебе-дедей хуьшдере шенде эз дигь вирихди омори э уревоз э шегьер, ингьэде у Газире гьечи сэхд хосдембу. Газиш эз товун эну э жун хуьшде гьимиш несохде, э терсгьо-бингьо гуш негуьрде, вирихунде овурди уре э шегьер. Имогьой чуьтам бире эри гIэил небиреи угьо эз еки жейле бошут?..»

Оммо Шекер эз хосиетгьо, гьовогьой эн шуьвер хуьшде эдембу дире, эгенер угьоре гIэил небисдоге, Гази эхир-эхириш уре мишенуь. Фикиргьо-думитгьой эни кор шев-руз дуьл энуре эдембу гьэреболугь сохде.

Гьемин гье увэхдигьо, кейки дие Шекере имид небу юре гIэил мибу гуфдире, хьэшд сал гирошде эзугьо эвленмиш бирей эйло, угьоре кук бисдо. Шори эн Шекер не Газире гьэдер небу. Шекер э гIуьзет эн бебешу нум но кук хуьшдере Юсуф. Келе мерд бебей эн Шекер, шиновусденге, ки духдер юре кук бири, э гIуьзет ю нум

юре нори, дуыл энү вогошд эри духдер хуышде. Э хуыш-деревоз бэхшгьо вегуърде, э зеневоз омо эки духдер эри боришмиш бире э угьоревоз, невей хуышдереш эри дире.

Э ёр эн Шекери, чуйтам гІэил суьфделе у денишире, лове э хэнде вебердебуге, пой норевуге. Э ёр энүни гьейсэгІэтинере хуно, чуйтам эзи си сал пушо, Юсуф хьофд сале гьисдики, Шекер десдей гьуьзуьргууле э дес гуърде бердебуге уре шори-шори э школа, э суьфдеи класс.

Газире воисдембу е гІэйиллейгеш семе бу угьоре, Юсуф е бирорсуьз, енебуге хэгьерсуьз немуну. Оммо эз Юсуф бэгъэй дие угьоре гІэил небисдо.

Суьфдеи салгьо, Юсуф чуйклеле гьисди, Гази омбор тенги кеширембу эз товун эни кор. Песде Юсуф келете биренге гуйге Гази екем гьемин бисдо. У мугу эз зен хуышде:

— Гъэйгьу нибу, худо гьишдге, Юсуф келе биренге, зен михогьим эри энү, имуре невегьо мибу, шори эн невегьоре мивиним.

Талавурчие гьушунгьой эн Гитлер э сер эн вилеет иму шишире оморенге, довгІо сер гуърденге, Юсуф э шаздегь сали дерафдебу. Эн омборе дедегьо балагьошу пуч бисдоруьт э довгІо. Омо вэхд эн Юсуф э солдати, э довгІо рафдени бисдо. У ю хуышдению эз зуревоз ниет сохдебу эри э довгІо рафде, женг сохде э фашистгьоревоз. Гьелбет, гурунд бу эри Шекер е теке куклей хуышдере эри э пушой гуниле-барут фуьрсоре. Дие чуй биё сохде биёв. Бегем кук эни эз кукгьой эн де дедегьойге зиёди? Песде э жигей э довгІо муьрде солдатгьо де жовонгьойге биё буравт ненге — нэгІ ватане эри гьэлхэнд дошде, фашистгьоре эри дербодогьун сохде, пиш сохде угьоре эз вилеет иму?

Оммо Шекер кук хуышдере э фронт э рэхь декуьрдеки (Юсуфе э солдати огол зеребу э васал э 1944 сал), уре имид бу кук ю зинде, согь-саламет эз довгІо могошду гуфдире. Е руз пушой эн довгІо верасде эз часть, эжеки Юсуф гьурлугь сохдембу, хэбер омо, ки Юсуфе нисе дануьсденим э вэхд эн е женг э гьэд эн довгІо чуй бисдоге.

Эз довгІо верасде эйло омборе салгьо гирошди, омо чум эн дедей гье чумерэхь энү бу. У шиновусдебу ченд одомигьо, эз довгІо бихэбер вир биретгьо, енебуге

э плен офдоретгъо, дир-зу вогошдет э хунегъошу. Кук юш белки вогошдге. Эри Шекер гъечи оморембу, ки душмегъо кук энуре э гъэлебенди сэхд гуърди, рэхъо нисе сохде, чуьнки у чуьтам лоигъ гъисдиге э гъэлхэндчи эн Ватан Совети женг берди гуфдире э угъоревоз. Оммо кук эну ужире дилбоши, жоборди, дедехогъи, уре е минкини бире мунде, гъуше хуно пар зере миёв эки эну. Имогъой эзи дигъне хове дирэ зйло уре ёгъин имиди, кук ю эхириш эз есири вирихде, хилос бири, у эизуригъо биё биёв гуфдире.

Ижире думитгъо-фикиргъой кукэ э ёр оворде, келе зен хэйли вэхд нэхиси. Оммо эхириш вомунде, чум энэ э хов верафд. Бирден егилейге келе зен эз гъэд хов шиновусд сес пойгъой эн кирейге э коридор. Киниге омо поисд э ён дер. Келе зен э гужевоз вокурде ховолуёе чумгъой хуьшдере, гуьз-гъулогъ бире, гуш вено. Дуь-се минут гирошд сес не омо. Дие сес неоморенге, келе зен эри хуьшде думит сохд, белки э коридор, э ён дер кескимсе нисди, эри энэ гъечи омори. И фикир э дуьл энэ дерики, бирден киниге, асда-асда гуйге хисирегоргъо нетерсуьт гуфдире, дере куфд, песде э гуш эн Шекер дерафд сес эн кук ю :

— Дедей, менуьм, оморем, дере воку!

— Балайме! Жун-жигерме! — нефес гуьрде-гуьрде, вэхуьшд келе зен, сес юш гуьрдере хуно.

Шекер эз шори жингир бирере хуно, вэхуьшд сер-су эз хъэлов э дуразе шеиревоз, сипре муйгъой ю лов-тум, десгъоре кешире пушова, пиёне хуно лой-лум хурде, омо эки эн дер. Дуь луьнг мунде эй дер, зен бирден, чин бурра суьмбуьле хуно, офдо э сер сифет э хори.

— Эдей, дедей!? Чуь бисдо туьре?!.. Бебе? — омо сес эн жовон эз песой эн дер.

Гази делуьре хуно гъеёбо вэхуьшд, видов-видов куьнд оморе эз дер, э лерзире десгъоревоз вокурд дере, гъогъ-мэхьтел бире, мунд э жигей хуьшде: э нимелит торике подъезд, лэгIэй дер поисдебу е хушбуй балае жовоне кук, парталгъой солдати э тен ю вери, чемоданиш э дес ю дери. Оммо у кук эн гъунши бу, комики э армия гъуллугъ сохдембу, гъемин энэ гъунши, э комиревоз угъо хунере дегйш сохдебуьруьтгъо. Оммо у гъеле нисе дануьсдембу кифлет энэ Гази не Шеке-ревоз хунере дегйш сохдет, э звери тебэгъэ кучмиш бирет гуфдире. Жовоне солдат э отпуск оморебу.

Эзунойлеревоз келе мерд тэхьно чубугъле э дес дери гешде. Имогъой одомигъоре э куче диренге, у гІэйбегІэйб суьпуьле хэнде нисе сохдембу, пушотеинере хуно, у эз гъул эн зен хуьшде гуьрде гешдембугъо вэгІдо.

И пушогъо ме эдембуьруьм э гъэд эн парк гешде. Э парк э гешдеки диренуьм гъе у келе мерде. У нуьшдебу тэхьноле э сер эн скамейка, десдечуре э зир лэгъэре, гъуьж дироморе чуней хуьшде гуьрде, у нуьшдебу гъе э сер эн скамейка, э сер эн комики пушоте у нуьшдембу э зен хуьшдеревоз. Гъизгъин васали бу. Доргъо э велгъоревоз, хори э савзегеигъоревоз безетмиш бируьт. Э сер клумбагъо гъуьзуьргуьлгъо эдембуьруьт жовогъиле хуно товуш доре эзир суьрхине ригагъой эн чуьшме. Пушотеинегъоре хуно, Гази э зен хуьшдеревоз нуьшдембуьруьтгъо вэгІдо, гъечу э сер зерде, гъумшенде жилгъэгъо эдембуьруьт гешде мердгъо, зенгъо, жовонгъо, духдергъо. Оммо келе мерд Гази, десе э чуне веноре э сер десдечу, э дердименде, могъбуле чумгъой хуьшдеревоз дениширебу э пушой хуьшде, чуь думитгъоиге эдембу сожде.

## ХЭНЖЕЛ

Пассажирский поезд суьфделе оmore расиребу э вогзол. Эз вагонгъо сер гуьрдуьт гъе усэгІэт пассажиргъо э чемодангъо ве шелегъошуревоз эри фураморе. Угъо гъетте эз вагонгъо ведироморе зури-зури мирафдуьт э лой дер эн вогзол эри э шегъер ведарафде.

Э пассажиргъоревоз фурамо эз вагон е гъуьндуьре, лэгъэре мерд. Сиегъе рушгъо-бигъгъой эн хэйли вэгІдо чире не оmoreбу. Э муйгъой сер эн оmore сипиигъо дебу. Вэхд поизиш буге, чуьшме эдембу гъеминоне хуно герми доре, оммо э сер-тен эн пассажир партал зимисдуне вебу. Веди буки у эз дуре жигегъо омори гуфдире, эжеки гъейсэгІэт хиникини, верфи. Э сер эн вебу зерде гушверие килэхь, э тен ю — кутэхъэ сиегъе пусди, э пой ю — куьгъне гердеверие чекмегъой фэхълеи.

Гъуьндуьре пассажир но шелей хуьшдере э хори, дениши э иловлей хуьшде, э диворгъой эн вогзол, э жер-

ге-жерге, солдатгьоре хуно поисдебуьруйтгьо э у тарафигей эн вогзол велг зерд бире, гьовогъдоргьо. Эз гIэрей энугьо веди бу дерьёгъ, кову, фирегъ, келе савзельуе мерже хуно. Минжи дерьёгъ эдембу тов доре дегесире эз товуш эн чуьшме дегъ монетигьой эршефире хуно. Оморигьо пассажир гене е-дуй гилейгеш хуб фегъм сохде, томоше сохде иловлей эн вогзоле, песде гьеэбо вешенд э кул хуьшде шелей хуьшдере, е чуькле сер бесде туморере, зури-зури ведарафд эз вогзол.

Э пушой вогзол мейду бу. Те мейдуре зере гирошде, е ченд дэгъ-дэгъэ инжигеш у поисд, фегъм сохд и чор тараф эн мейдуре: богъчере, хунегьоре.

Е нимсэгIэтигеш гирошде бэгъдо у эдембу гирошде эз зевери тараф шегьер, эз гIэрей тенге кучегьо, эн ён саре чуькле хунелегьой эн сенгъи. Э лап звер эн кучегьо веди бу догъ, э сер догъ ведибу куьгъне гъэдимие гъэле.

Э и тараф эн шегьер оморе расиренге и мерд сере гъуз гуьрде э екиш неденишире, сер гуьрд эри зури-зури пой вечире. Бирден э пушой хуьшде гьечи е пенжогъ метро гIэре дери, у вини, чуьтам е зен севоре гIэиле э гъужогъ гуьрде, эз звер асда-асда фураморениге. Зен бу гьечи е сивпенж сале сиечерде, раче сер. Мерд и зене диремунде гье у туьтем поисд, гъогъ бире мунде одомире хуно. Шеле офдо эз кул энэ э хори, э ён пойгьою. Сифет мерд дегеш, чумгьою, эн серсоне хуно бисдо. Ловгьой энэ э гужевоз э хэнде верафд. У десгьоре лов сохде, пиёне одомире хуно, рафд э пушорэхьи эн зен. Оммо зен диремунде ижире мерде, чуьтам у шив кенде оморениге э сер ю, терси десгьо, занигьой ю лерзи. ГIэиле сэхд э гъужогъ хуьшде гуьрде, зен эз нокуми е хъэрой вегуьрде, песово не чарусде, видовусд эри дир не сохде врихде.

— Лейло, э Лейло, метерс, ме Аслануьм, мевирих, — хъэрой дешенд э песой эн зен.

Зен терсире, вежегъуьсд пэхъни бисдо э песой диш куче, не сес энуреш нешиновусд. Аслан е-дуй луйнгигеш рэхъ рафд, песде поисд, сере дуллу гуьрде. Туморей энэ мунд гье э минжи рэхъ. Э и минут э и чуькле тенге куче е одомиш небу. Э пойгьой Аслан гуйге буховугьо веромоге. У дие рэхъ рафде недануьсд, гирошд нуьшд э сер эн е келе сенгъ э гъирогъ эн куче. Сере э сер занигьо веноре, у сер гуьрд, э сэгIэр хурде дуьл хуьшдере-

воз, эри фикир сохде, гирошде рузгьой хуьшдере эри э ёр оворде.

Э ёр эню омо эз и паздегь сал пушо бире коргьой ю. Аслан увэгидо бу бисд сала жовоне кук, усдой сеньги. Е руз шохьонгум у эдембу эз кор э хуне вогошде. И песини рузгьо кор эню э богъгьо бирембу. Инжиге у э де усдогьойгеревоз эдембу вокурде э гъэриш богъгьой эн колхоз дуь тебэгъэи хуне. Имбуруз у пул-жаловней хуьшдере вегуьрде, эдембу омор. Э куьф эню гьейсэгIэт е келе гъундогъ пул дебу.

Товуше менге шев васал бу. Асдарагьо, тикегьой жовогьиле хуно эдембуьруьт тов доре э ковре асму. Гуьлккенде емишдоргьо, тозе савзегьо е раче хушбуй лов сохдембуьруьт. Эз е тараф эн богъгьо догъгьо жерге писдебуьруьт, эз е тарафиге дерьегъ бу. Буьлбуьлгьо, э луьгегьой доргьо пэхьни бире, эдембуьруьт хунде дуь э хъвес еки.

Гьовой эн Асланиш лап хуб бу. Имогьой у миёв э хуне, мидуь и пулгьоре э дедешу. У гъундогъ пуле минуь э сер стол, сер мигуьруь эри шуморде. Э Аслан денишире, мугую у э дуьлхоширевоз:

— Чуь омбор овордей, хэлефме, туь и десиш?!

Дуьл Аслан шори мисоху, и гофе эз дедешу шиновусденге. Песде дедей энугьо е бэхш пуле вегуьрде эз гъундогъ жейле сохде, минуь э гъиругъ, мигую э зарифет, ловхэндеревоз:

— И бэхш пуле нуьм э гъиругъ эри хьозури гIэруьси эн Лейло не Аслан. Шинохдени, хэлефме, и дуь соймишигьоре? Еки эз угьо е гIэселе духдер гъуншимени, екиге — кукмени...

«Жон, дедей, чуь хубе, дуьлшоре мигьровуне одомини туь» — мугу э дуьл хуьшде Аслан ижире гофгьо ве коргьой дедешу э ёр оморенге.

Ловгьой эн Аслан э хэнде верафдуьт. Э пушой чумгьой эню омо раче чигьрет одохлуй ю, — Лейло. У е гуьзеле гьездегь сале духдер бу, сиегье гьошгьо, сиегье чумгьо, дуразе муйгьо. Э рачи эню эри Аслан неки э согъэ мэхъэле, э согъэ шегьериш ужире духдер недебу.

Гьечи гофгьой дедешуре, чигьрет одохлуй хуьшдере э ёр оворде, дуьлшор, ловхэнде омо раси у э гъиругъ шегьер. Е-дуь мэхъэлей шегьере гирошде бэгъдо, бирден киниге нум энуре гуьрд. Аслан чарусд песово, мивинуь у юре огол зегьо одоми холушунни, Мусои. Мусо



поисдебу, е лэгъэре гъуьндуьре одоми, сиегье бигъгьо. У куьнд омо эз хэгъерзореи хуьшде. Эз лэгIэй энэ эдем-бу буй эрэгъи оmore. Чумгъой энэ эз пиёни хьире хуно дениширембу.

— Шев, эхэйр бу, хэгъерзоре,— мугу у эз Аслан.

— Эгъуьбеттуь эхэйр бу, холу,— гуфди у эз Мусо, недуьл-недуьл.

Мусо е-дуь минут поисд, эз сер те ве пой томоше сохде, э пиёне чумгъой хуьшдеревоз, хэгъерзореи хуьш-дере, песде гуфди эз Аслан:

— Туь гуйге мере эри диреи пешмуре хунои?

— Пешму эйчуь? — эз гIэйб гъирмизи бире, гуф-ди Аслан.

Мусо гене сер гуьрд, чумгъоре гъуьж диrowунде, эри томоше сохде уре, гуйге у Аслане суьфделе дирербу, ловгъой хуьшдере э руьхшенди хэнде веберде.

Мусо бирор эн дедей Аслан бугеш, дедей энугьо уре э чум дире нисе хосдембу. Мусо э гъемей шегъер мэгI-луьм бу пиёниске — гъуморбаз бу гуфдире. Э кифлет-хуней хуьшдеревоз э рэхъ нисе рафдембу. И ченд сал бу эз товун ижире коргъой Мусо, хэгъер энэ, дедей Ас-ланигьо, э уревоз гоф нисе сохдембу. Э кук хуьшдеш е дегъ гиле гъэдэгъэ зеребу у э холушуревоз дусди-не-соху гуфдире, чуьнки терсирембу эз у кук ю усале хо-сиетгьо хуте мибу гуфдире.

— Ме дануьсденуьм,— гъэгъри бирере хуно, мугу Мусо эз Аслан,— туь э гоф дедешму денишире э мере-воз холу — хэгъерзореи нисе гердунде. Мере э елой куче диренге, туь эз улойгей куче гирошде. Э метелегьо гуфдиренуьт «кечелиш гъисдуьмге — бирорум». Чуьш бисдоге — ме холуйтуьнуьм. Одоми холуй хуьшдере гъечи эз чум нишенуь. Ме эз туь не эз дедешму нун не гIош нисе хосденуьм. Ишму эз ме эз гуьрг-хэйвуре ху-но эйчуь вирихденит?..

Аслан поисдебу сере дуллу гуьрде, нисе дануьсдем-бу чуь гуьге э холушу. Мусо диренге жовон э хуьшде домунди, лове э хэнде веберде, эз душ энэ зере, мугу:

— Дие башгу, жон хэгъерзоре, эз гофгъой ме бикеф мебош. Эгенер туь екем семе холуре хосдениге, кеш де-райм э закусочни е-дуь пейле эрэгъи вешеним, хурим э согъитуь.

Закусочниш дур небу е бисд-си метро бу эз угьо по-исдебуьруьтгьо жиге. Эз товуш келе лампе веде бу

э вывеска нуьвуьсде оmore гъирмизине буьск эн кобоби не нимлитрей эрэгъи. Веди буки, Мусо те э Аслан вохурде эз унжо ведиромореду.

...Эз нимешев гирошдебу холу не хэгъерзоре эз закусочни ведироморедубго вэгІдо. Гьердуй энугъо лулпиён бируьт. Аслан э пой поисде нисе дануьсдембу. У эрэгъи нэхурде-небеледе одоми эслогъ гиж — гъэриш биребу гъейсэгІэт. Занигъой энупичире-пичире эдембу рэхъ рафде. Е гъэдер вэхд Мусо гъул Аслане гуьрде, рэхъ сохд уре. Песде поюнде уре, э гъингъине велпичире зугъун хуьшдеревоз, гуфди зу:

— Дие Аслан дуз бура э хуне. Ме туьре те хунеш рэхъ мисохдум, энжэгъ терсиренуьм эз гофгъо — серкушигъой эн дедешму. Мере вихътей зугъун энуписди.— Песде Мусо десе доно э зир эн пинджек хуьшде, вегуьрд эзунжо е чуькле раче хэнжеллере, дум ширмогъире, до э хэгъерзорей хуьшде.— Ги и хэнжеле, веги э хуьшдеревоз. Рэхъ туь дури, белки герек бисдо, э куьф туь пул дери!..

Холу не хэгъерзоре поисдебуьруьт э ён гъит электрии. Аслан вегуьрд эз дес холушу хэнжеле, ведешенд уре эз лигъоб. Е гъэдер вэгІдо э гиже пиёне чумгъой хуьшдеревоз дениши э бирэхънее хэнжел э товуши эн лампе, песде дуборе доноре хэнжеле э лигъоб ю, доно э куьф хуьшде, рафд. Аслан диворгъой хунегъоре гуьрде эдембу рафде, нечогъэ, гІэтош гуьрде одоми вор хунугъоре хуно, у эдембу гъэриш-гъэрише гофгъо гуфди-ре, эз пиёни хуьшде э пичире зугъун хуьшдеревоз, эдембу мэгІнигъо хунде.

Э е тенге кучей эн звери мэхъэлей шегъер расиренге, у лой-лум хурде эдембу офдоре, омо гъе усэгІэт сэхд гуьрд эз душ эн е жовоне кук. Э дес кук дефдергъо-книгъо дебу. У э хъисобевоз эдембу эз школа енебуге техникум оmore. Э и вэхд эн шев екиш э куьче веди небу. Аслан жовоне куке эз нокуми сэхд гуьрде мунде, эз дес энупофдо, лов бисдо э хори книгъо, дефдергъой энуп. Куке гъэгър оmore, мугу:

— Ки гуж венори э туь ингъэде, те мувэхътуь гъэриш бире эри хурде, босяке хуно?!..

Аслан гуьрд эз ехэн энуп, э чешмише пиёне чумгъой хуьшдеревоз дениши э сифет эн кук, песде э гужевоз зугъуре чарунде, мугу зу:

— Кини бос-сяк, кук-сег, кини бос-сяк?!.

Кук кеши хуышдере, ехэн хуышдере эз дес энэ эри ведешенде, гье у туытем Аслан песово-песово рафд э е зарбевоз офдо э минжи куче. Кукэ езугъ омо. Гэиле сифет энэ пешмуре хуно бисдо. У зури-эузри омо эки Аслан, гъуз бисдо, эри михылои хосде эз Аслан дес хуышдере дураз сохде, эри дес энуре гуърде, вэхизунде, гуфди эз у:

— Дие вэхизит... ме миберуым рэхъ мисохум ишмуре... Кидан сер ишмуш сэхд расириге?..

Кук лап гъуз биренге уре эри вэхизунде, бирден е келе хъэрой-буыруыж ведиромо эз бугъоз энэ. У гье-ебо тик вэхуышд, э дуь десевоз гуърд эз шуыгъэм хуышде, хъэрой сохде-сохде, гирисде-гирисде рафд е ченд луынг видов-видов, ху берде юре, песде поисд, шуыгъэ-ме деш сэхд гуърде э сугърезани нуышде, гьеэбо бурра кутуме хуно офдо еново э сер хори.

... Эз у шевине кор эйло гиросшебу дуз паздегъ сал. И паздегъ сал Аслан эри одоми куышдеи нуышдебу э дуьсдогъи э у дуре хоригъой эн вилеет иму. Зиндегунни энэ тэхъл гурунд бу гъемей эни паздегъ сал. Деш тэхъл гурунд оморембу эри энэ у одомире куышди гуфдире, Говунсуызе, тэхсирсуызе одомире. Э нуышдеки, э вэхуышдеки, э ховгъой энэ э хисиреки э пушой эн Аслан оморембу чигърет эн у куышде кук.

Дедей энугъо егилеш ненуыувъсдебу эри энэ эз товун соймиши Аслан эн Лейло. Оммо Аслан когъозсуызиш дануьсдембу, ки дие Лейло эн ю нисди, у гъемишелуыг дур, рэгИд бири эзу. Дедей энугъо 15 салле зиёдте келе небу эз кук хуышде, эз Аслан. Аслан соворе гэйиле бу у биезен мундебугъо. Гуымуър жовони хуышдере у пуч сохде, нуышде дошдебу, келе сохдебу кук хуышдере. Имид, шори ве келегеди эн у е теке кук ю бу. Оммо пушой шори-ники дире у эз кук хуышде, Аслан э и беде руз гышд дедей хуышдереш. Аслан э дуьсдогъи данусьд, ки у э хэнжелевоз тэхъно кукэ некуышди. Э у хэнжелевоз куышди у гуымуър жовони хуышдереш, муыгъбет хуышдереш, гуымуър дедешуреш. Эз ижире думитгъо, фикиргъо дуыл энэ омбор сэгIэр хурдембу, гъэреболугъ бирембу, муы сер энэ сипи биребу.

Гъемей эни гиросше рузгъо, фикиргъо омо гъейсэгIэт э пушой чум энэ, Лейлоре, соймиши жовони хуышдере диренге. У сере гъуз гуърде нуышдебу э сер сенгъ э гъырогъ эн рэхъ.

Е чуйкле кукле, сумкей школан э кул ю вери, туморей Аслане э гужевоз кешире-кешире оворд но э пушой энун.

— Эй «дедушка», — гуфди гІаилле, — туморе эн ишмуни?

Аслан сере тик гуърде дениши э темизе ширмогъие сифет эн гІаил, лове э гужевоз э хэнде веберде, эдембу гуфдире: «Согъ боши, хэлефме», оммо зугъун ю нечарусд и гофе эри гуфдире. Эхи те имбурузине руз эз у екиш негуфдири «Э бе», е у эз екиш негуфдири «хэлефме», у гъич бебе небири. Аслан энжэгъ сере жумунд э гІаил денишире, вегуърд туморей хуышдере, вено э кул хуыше, рафд.

Эхириш омо раси у э лэгІэй гъопуй хъэет хуыше. У боруй хъэет хуышдере, гъопуре диренге, дуыл энун дэгъ-дэгъэ хурдере хуно бисдо, нефес ю гуърд. У е-дуь минут поисд, билбул бире одомире хуно, асде вокурд дер эн гъопуре.

Э минжи хъэет, э ён кур бире кулей гъуьзуьргуули э сугърезани нуышдебу е лап келе пире зен. Хэшиле сипре муйгъой энун ведиромореху эз зир эн куьгъне жундуре келэгъэи энун, дуллу биреху, гуърде пушой сифет энуре. Пире зен эдембу э лугу не хокистеревоз е чуйкле дуре гуърде гъэжгъулей муьсире темиз сохде. Чумгъой эн келе зен дору дерафдебу, сифет ю гъуьж дироморе, ранг хокистере хуно бу. Келе зен нешиновусд, чуьтам дер гъопу вокурде омоге, невини сес несохде, ки диромоге э хъэет.

Аслан дедешуре диренге бэгъдовой паздегъ сал гъечи, э и хьол, занигъой энун гуйге эз гъувот бурри, дуыл ю верафд-фурамо. У шелей хуышдере норе э хори, дегъоре лов сохде, луьнг но пушово. Уре воисдембу келекеле э дуьлхоширевоз огол зенун дедешуре, гую «Дедей, жон езугъэ, фэгъире дедей!». Оммо гъе у туьтем и гоф э лэгІэй энун дерики, сес эн Аслан гуърд, э у е сэхде гъирке вепичи, у гирисде-гирисде, рафд дедешуре эри гъэл гуърде.

Омар тигъие бедирегъоре вегуърде, терсе-трес, илов-лере чуме-чару сохде, асте-асте, кемере гъуз гуърде, юре кес невинуъ гуфдире, фурамо э сер жилгъэ, э дереи, эжеки эз зир келе сиегъе гъоей сенгъи, мугъум зерере хуно, эдембу палаше гъов билогъ гузгире хуно ведиро-море.

Шев бу. Э асму тикегъой жовогъиле хуно эдемби-руът астарегъо тов-тов доре, миже куде. Гиргинее менг, нуьгърере хуно, эдембу товуш доре хорире. Эз то-вуш эн менг, гъов билогъ эдембу руьгъ-руьгъ доре, чуькле гиригине шумоле сенгълегъош э кон билогъ гир-гине сипре монетлегъоре хуно тов дорембируът исэгъат.

Е ченд пой эз билогъ дурте кулелугъ бу, э савзе велгъо геймиш бире. Эз гъарей эн у кулелугъгъо эдем-бу сес эн буьлбуьл оморе. Э звер эз дереи э уло, э дему-ней эн вишелуье догъ, веди бируът хунегъой эн дигъ. Э кими хунегъо товуш куьшде оморебу, веди бу омбор-гъо э хифлет дебируът.

Э ён эн билогъ оморе расиренге, Омар но бедирегъо-ре э хори. Егилейгеш э гушгъулогъ поисдени ве иловле-ре чуме-чару сохдени. Диренге э иловле одоми нисди, ёгъин юре дирегор небири, э тигъие бедирегъоревоз э билогъ эри гъов оморенге, дуьл эн у олхогъин бисдо ве э рэхъэтиревоз ох вокошире, лове э хэнде веберд. Бир-ден э ёр эн у омо, чуьтам зен ю елэгъэзойге э гужевоз, э женг ве гъолмогъолиревоз уре э тигъие бедирегъоревоз эз хуне ведекуьрдиге эри гъов овурде, гъошгъой эн у дуллу бисдоруът, сифет ю — могъбул, бирази. У хэс-дере хуно нуьшд э сер эн куьгъне гъов гуърде сенгъ э гъирогъ билогъ, десе э чуне веноре.

Э ёр Омар омо имбурузине женгъо-хуьжетгъо гир-дигъо э зен хуьшдеревоз. Гъеле себэхъмунде зен эн у, Сакинат, э школе рафдеки, гуфди эз шуьвер хуьшде:

— Жон Омар, ме имбуруз эз школе дир мивегош-дум, бура туй э жигей ме ебо семе гъов биёр эз билогъ.

— Хуб, бошгу, мере визор меёр, мирам.

Зен дениши виники шуьвер ю эдее надуьл-недуьл, некруьм-некруьм жугъоб доре, гъэгъри, могъбуле хуно дениши э Омар.

— Гуфдируьм ки мирам, дие чуь воисде туйре? — Гъоси бирере хуно, гуфди Омар, э зен хуьшде денишире.

Зен рафденге, Омар вегуърд эз сиро тие бедирегьоре, эз тенге шефде пилонконлегьой тэхдеи фурамо э хьэёт. Песде у куьнд оморе эз ён гьопу, э жуьргІэтевоз вокурд дер гьопуре, луьнге кеши эй ведарафде, оммо гье у сэгІэт видов-видов вегошд песово, зури-зури дер гьопуре сэхд сохде, диромо э хьэёт, бедирегьоре э теретэгІди э еки зере-зере. У эдембу гьечи нефес кешире, мигуинге уре еки денорегор пиш сохдегор биребуге. Пушони эн у эрэгъ вешенд.

Дере вокурденге, э раче-берачей гьопу у дирербу гьунши хуьшдере Мехти Бабаеве. У келе килэхъ эн бухорей хуьшдере э сер дуйгъэди сохде, ёнбоки веноре, эдембу э тегьнимиревоз нимелит сипи бире бигъгьоре бурмш сохде, эз зир чум денишире э лой эн у.

Екем олхогьин бире, Омар гене куьнд омо эз лэгІэй гьопу, э хьитиётиревоз асталай вокурд, гене дуборе зури-зури сэхд сохд уре. Э пушой чумгьой эн у омо, чьутам у гьейсэгІэт ведарафде э бедирегьоревоз гуйге эдее гиросхде эз куче эри рафде э лой билогъ. Мердгьо ве зенгьой дигъ, э руьхшенди ве хэндеревоз денишире э лой эн у, гьерки эдете е серкуши, е гоф зеренуьт э у:

— И пардиле имогьой эз сер хуьшде килэхъэ вегирдени сефги дегуьрдени мунди не бесду вегирде гов дуьширени!...

— Эз имбуруз эйло э хьисобевоз у зен биренини, зен эн у — мерд.

— Гьечи бире дие, мерд хуьшдере э зир пожей зен дешенденге.

Ижире руьхшенди гьогъо эз товуней ю э ёр Омар оморенге, у омбар гІоси бисдо эз дес зен хуьшде. Нисе дануьсде бегем Сакинат, иму э шегьер нэгІ, э дигъ зигьисденимгьоре. Имогьой у есалними эз шегьер оморе э дигъ учители эри сохде, нуьгъ меги эеки эдее зигьисденим, хуне хэреб гьелемиш вердиш нисе бире э и хосятгьо ве гІэдотгьой дигъ иму. Хьэлово бири мунде э ме: «Чуь кори, еГни, инжо, чуь биёбурини, чуь номуси беге, кук э жигей дедей хуьшде — келе зен шелере э кул хуьшде веное, енебуге э жигей зен хуьшде рафдге э билогъ гІов эри овурде?»

Омар, гьелбет, юш дануьсдени, ки Сакинат дузи, оммо э гьэршуй гІэдот рафде бире? У Сакинат гуфдире коргьоре сохдге, неки мердгьо, зенгьош михэндуйт э ю, мердиш хьисоб нисохут юре.

Расдире гуфдире воисде, ки те и песини вэгдогъо Сакинат мифугъундгеш, серкуш мизегеш уре, оммо гъич э уревоз хъуьжет поисде, нигуфди у кор зенунере соху гуфдире, чъьнки э хуне келе зен, дедей Омаригъо дебу. У эз гъемме пушо, себэхъмунде мивэхуьшд, гІа-тош мивено э кинле, гове мидуьши ве э нэхир мифуьр-со, эри гІов мирафд. Имогъой и дуь мегъи у э хуне недери, рафди э е дигъиге, э нечогъэ хэгъер хуьшде эри сер кешире. Имогъой гъемме коргъой хуне вомунди э кул эн гІаруьс, эн Сакинат, юш — бордоре зен. Эри эню омбар четин бу согъ руз кор сохде бэгъдо, оmore гъемме коргъой хунере эри сохде, песде те нимешев дефдергъой гІаилгъой школаире фегъм сохде, э урок фердой эри хъозур бире.

Омар эдембу дирe, чуьтам зэхьмет кеширениге зен, уре э Сакинат езугъ оmoreмбу. Оммо неденишире э и кор э шуькеегъо-фугъундеигъой эн зен у эри хуьшде номус хъисоб сохдембу э у эри кумеги сохде, «кор зенунере» эри сохде.

Имбуруз шохьонгум Сакинат, эз школе вогошденге, вини э сиро тигъие бедирегъоре, дуьл ю гъэроболугъэ хуно бисдо.

— Омар туь не рафдей эри гІов? — туьндлемиш бисдо Сакинат, — э хуне е дуьгъле гІовиш недери десеш эри шушде. Чуь жире одомини туь?!..

Сакинат эз тэхъли дуьл хуьшде дие гоф сохде неда-нуьсд, гъирке величи э бугъоз эню. У куьнд омо эз стол, шенд гъэм дефдере, эз школе овурдебугъоре э хуьш-деревоз, э сер эн стол, песде нуьшд, сере гуьрде гирисд, душгъой ю лерзире-лерзире.

Омар гъошгъоре дуьлу сохде, дениши э зен хуьшде, э дес ю деbugъо книге гъэгъре-гъэгър шенде э сер стол, вэхуьшд, гъэгър кешире-кешире, гешд э иловлей хуне.

Сакинат сере тик гуьрде, э чумгъой гІэрсиревоз виники чуь книге хундембуге шуьвер ю, гъэгър ю диеш туьндленмиш бисдо.

— Эдее «Горянка» эн Расул Гамзатове хунде, оммо ю хуьшдени ю эз куьгъне гІэдотгъо, куьгъне хосиетгъо тоймиш нисе бире, гъеле э кин хуьшде комсомоли, зоотехники, интеллигент эн дигъи, — Сакинат э серкуши ве охмуриревоз дениши э шуьвер хуьшде.

Е ченд минут гьердуьй эн угъо гоф не сохде поис-дуьт. Бирден Сакинат э зарбевоз эз жигей хуьшде вэ-

хуыште, тигъие бедирегъоре овурде доре э шуьвер/хуыште, мугу э гъэгър не хуьжетевоз:

— Веги бедирегъоре, бура эри гIов гъейсэгIэт. Эгнер нерафдиге, ме эдее рафденуьм эз и хуне, е дэгъдэгъэш нисе зигъисденуьм э туьревоз.

Омар эдембу диреки, гъейсэгIэт «нэгI» гуфдириге, э руй Сакинат поисдиге у гъэгъигъэтиш гъелебулей хуышдере э жиге миёру, хубики гъейсэгIэт э уревоз эри э хуьжет непоисде, уре э руй неверовунде, рази бире э гоф эн у.

У эз лэгIэй хуыште е гофлеш неведировунде, вегирд бедирегъоре, ведиромо э сиро, песде фурамо э хъёт.

Э гъово эдембу менг лампере хуно товуш доре. Омар э лэгIэй домой дер эн гъопу поисд, гузет сохде, денишире э асму, кей ебо менг мидарав гуфдире. Оммо менг, гуйге дануьсде чуй фикир-хэел дериге э дуьл Омар, лос поисде э жигей хуыште, диеш, эдембу товуш доре, товуш сохде бунгъой хунегъоре, пичире, тенге, кучегъой дигъе, рэхъэ э лой дере, э ён билогъ рафдениргъоре. Омар гъич эри хуыште думит не сохдебу, ки у эз менг гIоси мибу гуфдире. Оммо гъейсэгIэт у эз дес эн менг кемте гIоси небу, эз дес зен хуыште бугъоре хуно, комики гIэиллере хуно э буше бедирегъоревоз зери ведекуьрде юре эз хуне, фуьрсоре эри гIов.

Бирден эз лой эн догъ, хэсде више, е келе сие булут, келе сие епинжире хуно жейле бире эз унжо, омо, симов зерере хуно э лой пушорэхъ эн менг, гуьрд пушой эн менге. Хоригъо, кучегъо гъе у сэгIэт тор бире, э гъэренлугъ демундуьт.

Омар зури-зури, бедирегъоре вегуьрде, ведиромо эз гъопу. Пэхъни-пэхъни, хуышдере гъуз гуьрде, э торики э гъэчэгъи буравгъоре хуно, рафд у эри гIов. Иллогъки у э чуметерси ве дуьлдэгъэзиревоз гиросдембу эз ён хуней председатель сельсовет Мехти, комики э хъисобевоз имбуруз дири уре э бедирегъоревоз, шек сохди, Омар эри гIов овурде рафде воисдембу гуфдире. У терсирембу гъейсэгIэтиш нэхэбереки Мехти оморе э ю расд неьв гуфдире.

Омар э дереи э ён билогъ оморе расиренге, менг ведиромо эз зир торике булут, гене э иловле товуш бисдо, рузе хуно.

...Бедирегъоре гIов пур сохде, Омар суьфделе пой норебу эри ведироморе эз дереи, бирден у вини киниге



эдее фуроморе эз тепеи э лой билогъ. Омар гле усэгІят бедирегъоре эз дес ведешенде, кемер гъуз гуърде вирихд дерафд э кулелугъ пэхъни бисдо. Буылбуыл гье усэгІят поюнд мэгІни хундей хуыщдере.

Омар эз гІэрей кулегъо эдембу денишире, киниге юре хуно шев-нимешев эри гІов э сер билогъ оморегор. Оморегубгъо одоми бу секретарь эн сельсовет Эмин Гайдаров, е чуыл сале лэгъэре мерд, дуразе чуне. Э е дес эну совуй муьси дебу, э е десиге бедире. У эдембу фураморе э олхоиниревоз, имид бу, ки э и вэхд нимешев эз ю бэгъэй эри гІов оморегор кес нибу гуфдире. Салме эз ён билогъ куьнд бисдоки, виники пуре бедирегъоре, у мэхътел мунд, э чуметерсиревоз дениши э илсвле. Песде эз гІэрей кулегъо у сес хэндей одомире шиногусденге, гье усэгІят э сугърезани нуьшд, э пушой хуышде норе сову не бедирере, э далдей энугъо пэхъни бисдо, юре невинуь гуфдире. Гье э и тегъер у э дуьлпесоиревоз, чум доноре поисд э лой эн кулелугъ, эз жеки сес тасире хэнде эдембу дерафде э гуш эну.

Омар сер гуьрд эз жигей хуышде, эри хъэз кесеггъой хоке шенде э лой Эмин. Кими кесеггъо, чубугъ э гъовол расуьгъоре хуно, сес сохде, миофдо э буше бедирегъой эн Эмин, мираси э лап гъуз бире кемер эну. Оммо Эмин гъич эз жигей хуышде нисе жуьмуьсдембу, эз мунде жигеш терсире, хъэлезигере хуно бире. Омар дениши вини, угъо гъечи те себэхъ биреш, дуь эз еки пэхъни мибошут, э гъечиревоз нуьшде поисде гІэмел ниёв. Суьфде ебо у жуьргІят сохде, вэхуьшд э пой, хэнде-хэнде куьнд оморе э лой билогъ, э ён Эмин, гуфди келе-келе:

— О, салам алейкум, ой гІэзизе хъовир секретарь эн Сельсовет, чуь рач иму инжо эеки расд омореим!?

Эмин диеш сер хуышдере гъуз гуърде, сер гуьрд э зир зугъун эри нифри сохде Омаре. Омар куьнд оморе эз Эмин, э зарифетевоз эз кемер ю зере, хэнде-хэнде мугу:

— Хуб, дие вэхиз, весси эз ме пэхъни бирейгъо!

Чорей Эмин не бисдо, вэхуьшд, терсе-терс, хуни-хуни дениши э Омар.

— Имогъой гу хъовир Гайдаров, — туь гъечи гъемеше оморени инжо э пэхъники э дуьзди енебуге э кин ошне буравгъоре хуно?

— Эде, лэгІэй туьре ги, э хотур худо, — гъэгъри-гъэгъри, сес гуьрдере хуно, гуфди Эмин, — гъечи келе-

келе эйчуь гоф сохде туь. Сес туь мирав э дигь песде мидануьт иму эри глов омореим гуфдире. Омборгьо э дигь гьеле не хисирет.

— Туь э гоф ме жугьоб ди ебо,— э гоф хуьшде поисде, эдембу гуфдире Омар.— Ме эдее эз туь одомире хуно пуьрсиренуьм: туь гьемише гьечи оморе э пэхьники, э гьэчэгьи енебуге э кин ошне биёвгьоре хуно эри глов берде?

— Вой бебе вой! — десгьоре э базугьой хуьшде зере, бигьгьоре вежегьунде, гуьндлемиш бисдо Эмин.— Э жун ишму э инсон нэгI, э шэхьиту оморем расд бире, э ён эн и глов. Э геде, туь ебо лэгIэй туьре семе ги. Ечи эз ме пушо инжо туь оморей. Песде мере диренге, хэрегуше хуно э гьэд куле пэхьни бирегориш туь не бири?

Омар э вогьнеки гьэгьри бирере хуно бисдо, мугу:

— Туь чуь сабурсуьзе одоми бире бебей, ме неда нуьсдем те имишев. Э туьревоз зарифет сохде нисе бире,— песде боришмиш бирере хуно гуфди.— Хуб бошгу, гьэгьри мебош, биё нуьшим екем, папрус кешим.

Э зеневоз женг гуьрде бэгьдо, Омар тэгIди нисе сохдембу эри э хуне рафде.

Угьо оморе нуьшдуьт э сер нерме ковре савзегегьи, е ён палаше билогь. Омар эз куьф хуьшде папрус ведешенде до Эмине, юш кеши. Е-дуь дэгьдэгьэ гьердуьй эн угьо нуьшдуьт гьечи гоф не сохде, денишире э менглуье гьово, э лой вишелуье догьгьо, торике дерегьо, сэхьрогьо. Песде Омар, суьпуьле хэнде сохде, сере жумунде, гуфди:

— Ме э туь гуьм расдире, те имишев гьич эри глов не оморем. ГьейсэгIэтиш э уьз ихдиёриндеймеревоз мибисдоге гене ниоморум. Зен мере э гужевоз эри глов фуьрсори. Э хотур э хуне женг не бирей оморем.

Эмин э руьхшендиревоз денишире э Омар, хуьшге, лэгьэре синей хуьшдере э такабуриевоз буруне ведешенде, юктеме хурузе хуно, гуфди келе-келе:

— Валлагь зен ме нэгIо, бебе, келебебей эн зен меш эз гьовре вэхуьшде миомогеш, мере межбур сохде, эри глов овурде фуьрсоре нидануьсдуьт.

— Дие эри чуь оморей? — э шекевоз пуьрси Омар.

— Гм... Оморем, чуьнки зен ме и се руз гурунд нечогьи, дегешди, гIэилгьо э хуне гловсуьз деруьт, чорей ме не бире оморем.

Ловгьой эн Омар э суьпуьле хэнде верафд. У лап

хуб дануьсдембу Эмин эдее дургуни гуфдире, хуьшдере, егІни, э пушой эн у «хуьрд», элчэгъ сохде нисе воисде.

Эмин ю е жонсуьзе, лэгъэре одоми бу. Э кор чули, э гурунде кор гуж эн у, гъувот эн у нисе рафдембу, унегуьре у гье ижире суке коргъо сохдембу э дигъ. Е гъэдер вэхд у когъоз гердундегор бу э Сельсовет, пезде гъэреул эн туку, и ченд сали имогъой секретарь эн Сельсовети. Оммо дургунигъо, хуьшдере тэгІриф дореигъош омбар дебу э у.

Зен Эмин Чичек, э у гуьре е пэхъливон бу — хиегълуь, жендеклуь, гъирмизине гъутинегъо, сес юш сес эн гІуьре мерде хуно. Эмин терсирембу эз зен хуьшде, эз гуфдире гоф ю гъич нисе ведарафдембу. Гьемме кор чулинере, эн мердире Чичек сохдембу, эн хунере, зенире — Эмин. У э пэхъники эз гъунши-мэхъэле гъобоигъой гІэилеш мишущд, чи мисохд, хунегъоре мивечи, оммо э пушой хэлгъ, бигъэ бурмиш доре, хуьшдере тэгІриф доре, мигуфди чуьтам зен ю эз ю «муй шендеге», терсирениге, гьемише э гоф ю белли бирениге.

Расди имишевине шев екиш нисе дануьсдембу, Эмин эз зен хуьшде терсиреире ве э пэхъники шев-нимешев эри гІов берде омореире.

Имбуруз шохъонгум Омар дирербу зен Эмине э контор колхоз, э счетовод колхозевоз э хъэрой-хъэрой сохдеки. Десгъоре э уьктемревоз э сер базугъой хуьшде веноре, Чичек э келе сесевоз эдембу вешмерде, хъэрой вегуьрде э сер счетовод, эз гъэдер звер э у расиренигъо муьзде, эз товуней у эз план звер суьмергъэндил веровундеире, дуз нунуьвусди гуфдире.

Эмин эз чумгъо ве хэндей Омар шек сохд, ки у э е доне гоф юш бовор нисе сохде гуфдире, дануьсдени гьемме дургунигъой эн уре ве унегуьре у омбор дуьлпесо бисдо. Эз зир ховорей бугъоз хуьшде гуьрде, денишире э минетевоз э сифте эн Омар, у гуфди:

— Омар, ме миром эри туь, э е доне одоми мегу, туь мере инжо дирей гуфдире, небу э зен туьш гуи.

— Эйчуь? — эй хъэз пуьрси Омар, дендугъоре сипи сохде.

— Гуфдиренуьт э метелегъо, сур туьре э дусд туь мегу, дусд туьреш дусди.

Омар хэндуьсд, сере жумунде, шенд папрусе, вэхуьшд э пой, вегуьрд совуй эн Эмине.

— Хуб, нигуюм, веги бедирере, пур сохим гъобгъоре, бурайм э хуне.

Эмин гоф несохде, екем олхогъин бирере хуно, вэхуьшд, вегуьрд бедирере. Эз билогъ куьнд бире, еки эн угъо бедирере, екиге совучере деноруьт э гIов. Бирден э ёр Эмин е жубе гоф оморере хуно, бедире гъеле э гъэд гIов дерики, чарусд э лой эн Омар, гуфди э мигъревуниревоз:

— Омар туь и пушогъо эз ме туьфенг хосдебири эри э ов рафде. Себэхь, э сер дуь чум ме, дино туьфенгеш веги, патрандашеш.

Э ёр эн Омар омо, чуьтам эз и е орине пушо у э Эмин вохурде, хосдебуге эз у туьфенг хуьшдере дуь гуьфдире э ю эри е-дуь рузи э ов эри рафде. Эмин недо, сер зиёди э уьктемиревоз гуфди:

— Не туьфенге, не гIэсбе э кес ихъдибор сохде хуб нисди.

Омар гъейсэгIэт верасики, Эмин эдее эри юре хоши гуьрде, имишевине сур эн уре, э пэхъники эри гIов берде оморейре э кес негую гуьфдире. Дие у гофе сипи несохде, сере жумунд, согъбоши гуфди, имид до мидиров гуьфдире.

Угъо суьфделе пуре гъобгъошуре эз хори вегуьрдебируьт, бирден винируьт, чуьтам е гъолинде одоми, бедирегъо э дес дери, э дуьзди буравгъо одомире хуно, э иловле денишире-денишире, оморениге э лой билогъ.

— Пой, туь мунош, екигеш эдее оmore э сер билогъ, — бедирегъоре э хори норе, — гъул эн Эмине зере, евош-евош гуфди Омар.

Ловгъой Эмин гъе усэгIэт э шоре хэнде верафд.

— Огъо! — душгъоре вешенде, э делхэкиревоз дениши у э сифет эн Омар. — Нисе дире туь и гIэзизе начальник мени, гъунши туь — председатель Сельсовет Мехти Бабаеви. Дуь гъэде ёнбокые килэхь эн уре нисе дире туь? Ме уре эз килэхь ю эз е верс дури мишинохум, шевиш гъисдиге.

Бирден Мехти е пертовуш винире, э сер билогъ дуь одоми поисдейре, чарусд песово, сер гуьрд эри вирихде, э гужевоз пой вечире-вечире.

— Эмин, видов вегордун биёр уре, гу не терсуь, — десе э кемер Эмин зере, гуфди Омар.

Гъе усэгIэт Эмин сову не бедирере норе, видовусд э песой начальник хуьше, комики ою э лулей гIэнгъо

саташмиш бире, имогъой эз угъо вирихденигъоре хуно, эдембу видовусде, лой хурде-хурде.

— Пой, э же вирихде туь, хуне хэреб, гъузи эз гуьрг вирихуьгъоре хуно, эз иму бэгъэй инжо кес нисди!..— гуфди Эмин евош-евош э биней гуш эн Мехти, оmore расиренге.

Мехти чарусд песово. Виники э песой ю видовусдегор де кес нисди, секретарь юни, дуьл ю екем жэгІм бисдо, лов ю э суьпуьле хэнде верафд. Буше бедирегъоре венгесде э хори, у е лугъонде нефес векоши, килэхъэ вегуьрде эз сер хуьшде, эрэгъ пушонире покурд.

— Пегъ, чуь герми,— гуфди у, пуф додоре-додоре. — Гъемей мере эрэгъ шишири.

— Гьелбет эрэгъ мишишуь,—езугъбери сохдере хуно, гуфди. Эмин— Э жун туь, гъечи эдебири видовусде туь, мугум ярпаланиш э туь нирасуьге.

Эмин хуьрмет сохде э председатель, вегуьрд эз хори буше бедирегъой эн уре, офдо э пушо. Мехти омо эз песой эн у. Бирден у поюнд Эмине.

— Пой, пой ебо, туь мунош, асте гуфди у, э десевоз эз душ Эмин зере.— Кем мундебу фурмуш сохдени. Э жун туь э и жире възд, одоми нум хуьшдереш фурмуш мисоху.

И гофгъоре гуфдире, Мехти чарусд песово, сер гуьрд кибугере эри огол зере:

— Магомед, вой Магомед, ведиро эз далдей туь, метрес —. Е минутиш негирошд, эз песой эн келе чинордор ведиромо Магомед, е огъиле сара мерд, пура одоми, гъолинде шуьгъэм, заведиш эн сельмаг.

Угъо гьерсееки оморенуьт э ён билогъ, Омар десгъоре лов сохде, сэхъиб хуне, куьгъне гІэзизе дусдгъой хуьшдере дире, шори сохугъоре хуно, э мигъревунире-воз теклиф сохд угъоре:

О, ишму хош оморит, софо овурдит э и гуьзеле ченлуье жиге!..— гуфди у, бирмунде э лой эн нуьгъерере хуно тов-тов дорембугъо билогъ.— Энжэгъ биё екире гоф дим: эзимбэгъдо эри гІов шев, э дуьзди-пэхъники нэгІ, биёт чум руз биётим. Чуьтам оmore эришму?

Завмаг эз некуми терсирере хуно, вешенд хуьшдере и гоф эн Омаре шиновусденге.

— Туь чуь гуфдире, Омар, эгъуьл туьре вир сохдей? Туьре воисдени нум имуре э гъемей дигъ биёбурсохи?

— Э хьисобиревоз денишириге, у дуз гуфдире,— папрусе эз куьф ведешенде, кешире, угьонигереш доре, гуфди Мехти.

Магомед гъэгъри, гъошгъобогълуь дениши э Мехти.

— Вой Мехти, туь чуь гуфдире? — э серкуширевоз гуфди Магомед.— Омар, гуьм, жогъили — гIэили, эз недани, эз эгъуьл суки хуьшде эдее гуфдире. Туь эхи келе мерди. Иму чум руз бедирегъоре-совугъоре вегуьрде, зенун хэйлогъире хуно, рафдимге эз пушой жэгIмет, чуьтам миденишим эз гIэйб э сифет эн угъо.

Эз гофгъой эн Магомед гъэгър омо Эмине. У, туьндлемиш бире, гуйге э сер эн у гъовкенде рафдере хуно, гуфди келе-келе:

— Туь э песой дестулке поисде, э тирозу не гезевоз чигъоре пеймунде эз серюш, эз эхир юш эн фурухде чигъо бурре, гIэйб нисе оморе туьре, оммо руз эз пушой хэлгъ эри гIов рафде гIэйб оморе?! Мере гуфдириге, ме визор-гизор оморем, шев-нимешев э дуьзди-пэхъники эри гIов рафде.

Завмаг эз Эмин зиёдте хуьршлемиш бире, шуьгъэме буруне ведешенде, чумгъоре келе сохде, нефес ю эз хуьрш величире, куьнд бисдо э бинебуз секретарь эн Сельсовет.

— Гъери гу ебо, туь мунош, эз ки дуьздирем ме чи э фурухдеки?!

— Хуьшдере э недануьсде мевени,— ловгъоре гъуьжунде, жугъоб до уре Эмин.— Ини-эй..., гъэри СэгIэдот немуьрди. У имбуруз шохъонгум оморебу э сельсовет эз дес туь эри шуькеет сохде, мол эвруьшуьмире овурдебу. «Эри шеш метро мол пул дорем, лухуьуфе эри сиригъ зере, оммо мугу, ним метроре зерей эз ю». Эз и зиёдте факт биреними?

Эз завмаг согъ е минут гоф неведиромо, нефес ю гуьрде одомире хуно, у дениши гогъ э Мехти, гогъ э Омар, гогъ э Эмин, песде гуфди эз у:

— Гъемей дигъ дануьсдени, ки СэгIэдот дургу-дулоби, фитне-хэбербери гуфдире. Биёругу себэхъ э магазин моле, ме гье э пушой туь мипеймунум, ним чореклеш эз шеш метро кем бисдоге, эдее герден мере зеренуьм.

— Дие вессит-о, ишмуш жиге офдейт, вэхд офдейт эри хуьжет гуьрде э екиревоз,— дэгIно зерере хуно, гуфди председатель эн Сельсовет.— Вегирит бедирегъошмуре, гIов пур сохит, бурайм.

Магомед, хуни-хуни денишире э Эмин, вегуурде бедирегьой хуышдере, рафд эз песой Мехти э гъырогъ билогъ. Гъобгъошуре гIов пур сохде, угъо овурде, норут э ён бедирегьой эн Омар не эн Эмин.

Гье и вэхд эз лой эн дигъ е зен э десгъо чуйиге дери эдембу зури-зури оморе э лой билогъ.

— Элле, бебевой, комини зениге эдее оморе инжо э сер билогъ,— э дуьледэгъдэгъэиревоз гуфди Эмин.

— Эри ме оморенигъо у СэгIэдоти,— лове э хэнде веберде, гуфди Омар.— Э дес эн у гуйге эз Магомед восдоригъо мол эврушуми дери.

— И чуй бологъ бисдо э сер ме омо,— сере вир сохдере хуно, гуфди Магомед.— Эз же дануьсди бу и кафдар ме инжо э билогъ эри гIов оморем гуфдире?!

— Эхъисобевоз рафди э хуне, пуьрсири эз зен туь, эз у дануьсди туь инжой гуфдире,— э зир гъэжгъу гIэтош денорере хуно, гуфди Омар.

Келе зен СэгIэдот инжо эри эз некуми оморе ведиромореи эз дуьли екиш небу, оммо эз гьемме зиёдте, завмаг эдембу дуьледэгъдэгъэи кешире, терсире, вежэгъуьсде.

— Бобовой, бобовой,— сере гуурде, черх хурд у э иловлей бедирегъо.— Эз же омо ведиромо и кафтар э сер ме. Оморенгу себэхъ э магазин, э жун бебей ме, е метро эврушумь зиёд мидорум юре, эз ехэн ме дес вегуурде рафденгу. Имогъой мирав биёбур мисоку имуре э гьеммей дигъ э гIэрей жэгIмет.

Дануьсденге, ки э сереботи шефде кор завмагини СэгIэдот инжо оморенигъо, Эмин диеш хъуьршлуь бире, сер гуурд эри вешмерде, серкуш зере Магомеде.

— Эз товун темэхъкори туьни иму имишев биёбур биренимгъо,— э дуьшмениревоз дениши у э завмаг.— Эгенер туь ним метро эврушумь эн уре нибурририге, у шев-нимешев инжо оморе ниведиромо.

— Туьре гьеле чум руз воисдембуки эри гIов эй оморе, дие эйчуь жэгъуьсди зэхълей туь, гьетте гъэрие СэгIэдоте дире? — э руьхшенди ве охмуриревоз, гуфди завмаг, видовусде э песой кулелугъ пэхъни бире. Ним минутиш гIэре недоре, эз песой эн у видовусде пэхъни бисдоруьт э кулелугъ Мехти не Эмин.

Е Омар бу олхогъин поисдебугъо, гъич э фикирюш небугъо. У эз дурине шинохд э лой билогъ оморенигъо одоми зен ю, Сакинати гуфдире.

Сакинат, гьелбет, зен бордор, шев-нимешев взхуьшде э сер билогъ, э песой эн шуввер хуьшде ниомо, эгнер у сэхд дуьлпесои никешиге. Эз шуввер эн у эри глов рафде э куьнди се сэгIэт гиросхебу. Сакинат эз школе оворде дефдергьореш фегьм сохде верасхебу, оммо Омар гьелеш веде небу. «Ярам чуй бири бу и мерде?» — эдембу сэхд дуьлпесои кешире Сакинат. Э дуьл эн у ченд жире сегьмлуье коргьо оморембу: «Белкем луьнг ю домунде э е чухури, хуьрд бири, оmore нисе дануьсде, енебуге женевеер эз некуми ведироморе, эз више-куле хьэлово бириге э у?...» У эри сохде женггьой хуьшде пешму бисдо, чумгьой ю глов-глови, гириздени бисдо.

Э гьечиревоз у, сэхд битоби сохде, ведиромо эз хуне, сефгире э дес гуьрде, рафд э лой билогъ. Омар эз дурине гье у сэгIэт э жогьиле чумгьой хуьшдеревоз вини, шинохд зен хуьшдере, оммо э кин ю бугьо одомигьоре фурмунде, мугу: «СэгIэдот э парчерево эдее оmore э сер эн завмаг.

Эз жилгэ э дере фураморенге Сакинат виниремунде шуввер хуьшдере, гIэиле хуно шори сохде, гуфди:

— Омар! Жун ме, эжеи туь те имогьой?! Дуьл ме паре бисдоки, — у эз шуввер хуьшде куьнд бире, э герден ю гьэл дешенде, моч сохд уре.

— Ме инжо э ихдилот мундебируьм э дусдгьой меревоз.

— Э коми дусдгьоревоз?! — Сакинат гье усэгIэт ведешенд десгьой хуьшдере эз герден шуввер хуьшде, э махьтели ве охмуриревоз дениши э сифет шуввер. Е ченд пуре бедирегьой гIове у виники, э дуьл эн у гье усэгIэт шек омо: белкем Омар инжо э зеневоз э ширине гоф ихдилот муьхшул бири мунди те имогьой? Гьеле у, Сакинат, дуьлпесои кешири эри эн у, э дуьл ю ченд жире фикиргьо-хэьлгьо омори.

Омар гье усэгIэт вераси, ки зен ю, чуьниге э хьисо-бевоз усоле кор эдее шек сохде эз ю, гьэгьире хуно бири. Унегуьре гье усэгIэт, лове э мигьровуне хэнде веберде, гуфди эз у:

— Имишев ме эри глов тэхьно не оmoreм...

— Эдее диренуьм, — гье усэгIэт гиризденире хуно гуфди Сакинат, руге э улойге чарунде.

— Эз ме бэгьэй се мердигеш омори э меревоз э пэхьники глов эри берде.



— Эжи дие у мердгъо? — лап унгъэдер бовор не сохде э гофгъой шуьвер хуьшде, пуьрси Сакинат.

— Инжокот, гъейсэгIэт миёвт,— э бовориниревоз жугъоб до Омар.— ГъейсэгIэт угъо пэхъни бирет эз туь, оммо имишев иму екире гоф дорейм, эзимбэгъдо гъеме-еки шев э пэхъники нэгI, чум руз э пушой эн гъеме э бедирегъо совугъоревоз эри гIов рафдени. Небуге чуьни эри дуьзди сохде нисе рафденим, эри гIов оворде эри зенгъо, кифлетгъойму эдее рафденим, дуз нисди?

— Эгенер ишму ижире игърол сохдейтге эеки, дие у туь гуфдиренигъо хъэрмэгъойтуь эри чуь пэхъни бирет, хэрегушгъоре хуно? — пуьрси Сакинат, иловлере чуме-чару сохде.

— Ме гъейсэгIэт огол зере миведировунум угъоре, олхогъин бош,— лове э хэнде веберде, гуфди Омар.

Эз кулелугъ гъе усэгIэт е дуразе ноле ведиромо, э хъисобевоз е эз Магомед, енебуге эз Эмин.

— Эй Магомед, Эмин, Мехти,— ведиройт эз пэхъни бире жигегъошму, небуге те ишму не ведиройт ме не Сакинат эз инжо рафдегор нисдим.

Е ченд минут гиросше бэгъдо лугъегъой эн е куле жуьмуьсд. Эз гъэд куле э пой вэхуьшде те нимелит ве-ди бисдо председатель Сельсовет Мехти. Эз песой начальник хуьшде вэхуьшд ведиромо Эмин. Угъс гоф не сохде, гъошгъоре дуллу сохде, э лой Омар не эн Сакинат неденишире, оморут э ён бедирегъошу э савзегеи пойсдуьт.

— Дие весси пэхъни бирейгъо, Магомед, кор эз у коргъо гиросди. Э нуькере тар бирегор эз воруш нитерсуь,— э лой кулелугъ денишире, э биразимендиревоз гуфди Мехти.

Сакинат, э мэхътели ве ловхэндеревоз, эдембу денишире, э коргъой мердгъо, шев э пэхъники эй гIов берде оморетгъо. Омбар гIэре некеши, гъолинде завмагиш фис зере-зере эз тенге нефес, ноле кешире, гIоси-диври ведиромо эз жигей хуьшде, куьнд бире эз Омар, хуни-хуни денишире э у, гуфди:

— Имогъой дуьл туь динж бисдо?!.

Е гъутиней Магомед, дуь кеф дес ю, буз эн шуьгъэм ю э маладевоз билесмол бу. Э хъисобевоз у э торики, теретэгIди э малад гъисдигъо жиге дегешдебу рафде э кулелугъ. Диренге уре гъечи билесмол бирей э маладевоз, суьфде Мехти, песде угъониге сер гуьрдуьт келе-

келе эри хэндуйсде, э энгуьшдевоз бирмунде э гъутине, шуьгъэм ве десгъой завмаг.

— Хъэ, хъэ, хъэ!..— эз зугъун эн угъо сохде, э гъэгъ-ревоз гуфди Магомед, хуни-хуни денишире гогъ э Омар, гогъиге э Мехти — Эйчуь хэндуйсденит шэгъгъэ зере, гІэйбиш бу гуфдире эз Сакинат, гъирогъ эн кини веди э инжо? Эгенер ишмуре дануьсде воисдениге, ишму э хуьшденишму эдейте хэндуйсденит.

— Дие эри ижире хэнде себеб небу гуфдире, эзим-бэгъдо, чуьтам игърол сохдейтге э гІэрей еки, шев э пэхъники нэгІ, руз биьйт эри гІов,— лове э хэнде ве-берде, гуфди Сакинат.

Эз лой кулелугъ гене омо сес эн буьлбуьл, Омар, се-ре тик гуьрде, дениши э асму товуш дорембугъо гирги-не менг. Э ёр эн у омо чуьтам у и дуь сэгІэт пушо, пу-шой эз хуне ведироморе хуни-хуни дениширебуге э менг, у эдее товуш доре гуфдире. ГъейсэгІэт Омар эдее денишире э у э мигъревуниревоз, ловхэндеревоз, песеде денишире э сер билогъ поисдегоргъо, гуфди келе-келе:

— Омбар, бэхдевере, гуьзеле шеви имишев, чуьтам оmore эришму, дусдгъо?..



## Новеллегьо

Бэхш эн худо . . . . .	5
Бэхш эн Шими эри зен хуьшде . . . . .	8
Чуьтам Шими э хуней домор хуьшде рафдебуге . . . . .	10
Хэр эн раби . . . . .	12
Хундегор бире асанти, одоми бире четин . . . . .	13
Дуьл . . . . .	13
Чуьтам Шими Дербенди муьрдебуге . . . . .	14
Чуьтам Шими Дербенди эри падшогь чауч бириге . . . . .	14
Э шороб сер денуьгьо — сере вир мисоку . . . . .	17
Гирьей эн шими сер муьрдей хэр хуьшде . . . . .	19
Инсон не мейму . . . . .	20
Эгьуьл не пул . . . . .	21
Шори эн Шими . . . . .	22
Муьрдей эн кес хисире одомире хуно оморе . . . . .	23
Сег эн Шими . . . . .	25
Чуьтам Шими э дуьзди рафдебуге . . . . .	25
«Гьуногь» эз Америка . . . . .	27
Хэр эн нови . . . . .	30
Зен эн Шими Дербенди . . . . .	30
Кишди хьомоли . . . . .	31
Гушд эн хэри . . . . .	31
Кук эн бебе . . . . .	32
Худой эн шогьиргьо . . . . .	33
Чуьтам Шими Дербенди э жигей худо биребуге . . . . .	36
Чуьтам Шими Дербенди зен хуьшдере фурмундебуге . . . . .	40
НевегIэмлей эн шими . . . . .	41
«Тэхсиркори» эн зенгьо . . . . .	42
Желегьой эн шими Дербенди . . . . .	44

Енгеьрой эн Шими . . . . .	44
Ловой эн Шими Дербенди . . . . .	45

### **Ихдилотгъо**

Чуьтам ме эз муьрде жиге хилос биремге . . . . .	49
Телефон . . . . .	52
Ой шомош . . . . .	58
Пишкеш . . . . .	64
Одохлуй эн пире зен . . . . .	69
Дуьшмен ме — гьуншимени . . . . .	76
«Новогодный домор» . . . . .	82
Э хэтой эн е моч . . . . .	86
Сиегье гIэрсгьо . . . . .	90
Доллок . . . . .	95
Хэндей эн кечи . . . . .	99
Зарифет . . . . .	101
Руш . . . . .	108
Одохлуй эн Иоган . . . . .	115
Филлоксера . . . . .	121
Эйгьом . . . . .	125
Дуьл эн дедей . . . . .	129
Хэнжел . . . . .	136
Э сер билогъ . . . . .	143

*Хизил Авшалумов*

А 22

**Э хэтой эн е моч.** Новеллигьо ве  
ихдилотгьо. Махачкала, Дагкнигоиз-  
дат, 1970.  
,160 с.

**Жертва одного поцелуя.**

На татском языке.

С(Тат)

Редактор М. Ханукаев.  
Художеств. редактор В. Логачев.  
Корректор М. Азизов.  
Техн. редактор А. Балашова.

Сдано в набор 2.III 1970 г.  
Подписано в печать 14.IV 1970 г.  
Форм бум. № 2 84×108<sup>1</sup>/<sub>32</sub>  
Бум. л. 2,5. Печ. л. 5.  
Усл. печ. 8,4. Уч.-изд. л. 7,61.  
С 02585. Тираж 2000. Цена 22 к.  
Переплет 15 к.

Дагестанское книжное издательство  
Управления по печати при Совете  
Министров ДАССР, Махачкала,  
ул. Маркова, 55. Зак. 362.

Типография им. С. М. Кирова  
Управления по печати при  
Совете Министров ДАССР,  
Махачкала, ул. Маркова, 51.

Цена 37 коп.

МАХАЧКАЛА 1970

*Х. Авшалумов*

ЖЕРТВА ОДНОГО ПОЦЕЛУЯ

На татском языке